

II

(Gníomhartha neamhreachtacha)

RIALACHÁIN

RIALACHÁN (AE) 2021/2085 ÓN gCOMHAIRLE

an 19 Samhain 2021

lena mbunaítear na Comhghnóthais faoi Fís Eorpach agus lena n-aisghairtear Rialacháin (CE) Uimh. 219/2007, (AE) Uimh. 557/2014, (AE) Uimh. 558/2014, (AE) Uimh. 559/2014, (AE) Uimh. 560/2014, (AE) Uimh. 561/2014 agus (AE) Uimh. 642/2014

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpach, agus go háirithe Airteagal 187 agus Airteagal 188, an chéad fhomhír, de,

Ag féachaint don togra ón gCoimisiún Eorpach,

Ag féachaint don tuairim ó Pharlaimint na hEorpa ⁽¹⁾,

Ag féachaint don tuairim ó Choiste Eacnamaíoch agus Sóisialta na hEorpa ⁽²⁾,

De bharr an mhéid seo a leanas:

- (1) Chun an tionchar is mó is féidir a bhaint amach ar chistiú ón Aontas agus rannchuidiú ar an mbealach is éifeachtaí le cuspóirí beartais an Aontais, bunaíodh le Rialachán (AE) 2021/695 ó Pharlaimint na hEorpa agus ón gComhairle ⁽³⁾ (an “Rialachán maidir le Fís Eorpach”) an creat beartais agus dlíthiúil le haghaidh comhpháirtíochtaí Eorpacha le comhpháirtithe ón earnáil phríobháideach nó phoiblí. Is príomhghné de chur chuige beartais Fís Eorpach -an Clár Réime um Thaighde agus um Nuálaíocht (“Fís Eorpach”) iad comhpháirtíochtaí Eorpacha. Bunaítear iad chun tosaíochtaí an Aontais ar a ndírítear le Fís Eorpach a bhaint amach agus le tionchar soiléir don Aontas agus do mhuintir an Aontais a áirithiú, rud is féidir a bhaint amach ar bhealach níos éifeachtaí le comhpháirtíocht, trí fhís straitéiseach a chomhroinntear idir na comhpháirtithe agus ar a n-aontaíonn na comhpháirtithe, seachas an tAontas amháin.
- (2) Go háirithe, tá ról tábhachtach ag comhpháirtíochtaí faoin gcolún “Dúshlán Dhomhanda agus an tIomaíochas Tionsclaíoch Eorpach” de chuid Fís Eorpach i gcuspóirí straitéiseacha, amhail dlús a chur le haistriú i dtreo na gcuspóirí forbartha inbhuanaithe agus Eoraip ghlas, dhigiteach a bhaint amach, agus ba cheart dóibh cur leis an téarnamh ón ngéarchéim nach bhfacthas a leithéid riamh roimhe, a tháinig chun cinn mar thoradh ar phaindéim COVID-19-. Teann comhpháirtíochtaí Eorpacha i ngleic le dúshlán chasta trasteorann a dteastaíonn cur chuige comhtháite uathu. Leis na comhpháirtíochtaí sin, táthar in ann dul i ngleic leis na clistí claochlaithe, córasacha agus margaidh a ndéantar cur síos orthu sna measúnuithe tionchair a ghabhann leis an Rialachán seo, ag tabhairt raon leathan gníomhaithe i measc na slabhraí luacha agus na n-éiceachóras le chéile chun oibriú i dtreo fis choiteann agus an fhís sin a aistriú ansin go treochláir nithiúla agus gníomhaíochtaí cur chun feidhme comhordaithe. Thairis sin, fágann siad gur féidir iarrachtaí agus acmhainní a dhíriú ar thosaíochtaí coiteanna chun na dúshlán chasta a réiteach.

⁽¹⁾ Tuairim an 21 Deireadh Fómhair 2021 (nár foilsíodh fós san Iris Oifigiúil).

⁽²⁾ IO C 341, 24.8.2021, lch. 29.

⁽³⁾ Rialachán (AE) 2021/695 ó Pharlaimint na hEorpa agus ón gComhairle an 28 Aibreán 2021 lena mbunaítear Fís Eorpach – an Clár Réime um Thaighde agus um Nuálaíocht, lena leagtar síos a rialacha maidir le rannpháirtíocht agus scaipeadh, agus lena n-aisghairtear Rialacháin (AE) Uimh. 1290/2013 agus (AE) Uimh. 1291/2013 (IO L 170, 12.5.2021, lch. 1).

- (3) D'fhonn tosaíochtaí agus tionchar a bhaint amach, ba cheart comhpháirtíochtaí Eorpacha a fhorbairt trí rannpháirtíocht leathan ó gheallsealbhóirí ábhartha ar fud na hEorpa, lena n-áirítear tionscal, eagraíochtaí taighde, comhlachtaí ag a bhfuil misean seirbhíse poiblí ar leibhéal áitiúil, réigiúnach, náisiúnta nó idirnáisiúnta, agus eagraíochtaí na sochaí sibhialta, amhail fondúireachtaí a thacaíonn le nó a thugann faoi thaighde agus nuálaíocht. Ba cheart dóibh a bheith ar cheann de na bearta a úsáidtear chun an comhar idir comhpháirtithe san earnáil phríobháideach nó phoiblí a neartú ar an leibhéal idirnáisiúnta freisin, lena n-áirítear trí chlár taighde agus nuálaíochta agus infheistíocht trasteorann sa taighde agus nuálaíocht a thabhairt le chéile, chun leasanna frithpháirteacha a sholáthar do dhaoine agus gnólachtaí agus a áirithiú ag an am céanna gur féidir leis an Aontas seasamh lena leasanna i réimsí straitéiseacha.
- (4) Nochtadh sa mheastóireacht eatramhach ar Fís 2020 arna bunú le Rialachán (AE) Uimh. 1291/2013 ó Pharlaimint na hEorpa agus ón gComhairle ⁽⁴⁾ gur tugadh stór suntasach ionstraimí agus tionscnamh comhpháirtíochta isteach le himeacht ama, agus go bhfuil seacht gcineál cur chun feidhme agus thart ar 120 tionscnamh comhpháirtíochta á rith faoi Fís 2020. Anuas ar an gcastacht a ghintear le hiomadú ionstraimí agus tionscnamh, measadh nach leordhóthanach an inniúlacht a bhaineann leo ar a n-iomlán chun cur le beartais ghaolmhara ar leibhéal an Aontais agus ar an leibhéal náisiúnta in ainneoin go seachadann siad tionchar dearfach maidir le dul chun cinn i leith a gcuspóirí a bhaint amach, mar shampla clár oibre fhadtéarmacha a shocrú, comhar taighde agus nuálaíochta a struchtúrú idir gníomhaithe a bheadh scaipthe amach óna chéile murach iad, agus infheistíochtaí breise a ghíaráil. Sainítear sa mheasúnú tionchar ar Fís Eorpach mar sin go bhfuil gá le dul i ngleic le tírdhreach cistiúcháin an Aontais le haghaidh taighde agus nuálaíochta agus an tírdhreach sin a chuíchóiriú, go háirithe maidir le comhpháirtíochtaí, chomh maith le comhpháirtíochtaí a atreorú i dtreo tionchar treisithe agus tosaíochtaí an Aontais a bhaint amach.
- (5) D'fhonn dul i ngleic le hábhair inní den sórt sin agus chun an uailmhian níos airde a bhaint amach le haghaidh infheistíochtaí Eorpacha, ba cheart go gcuirfidh Fís Eorpach simpliú agus athchóiriú mór ar aghaidh le haghaidh bheartas an Choimisiúin um chomhpháirtíochtaí taighde agus nuálaíochta. D'fhonn léiriú a thabhairt ar a nádúr sistéamach arb é is aidhm dó rannchuidiú le “claochluithe” ar fud an Aontais i dtreo na gcuspóirí inbhuanaithe, ba cheart do Fís Eorpach úsáid níos éifeachtaí a bhaint as na comhpháirtíochtaí sin le cur chuige níos straitéise, níos comhleánúnaí agus níos dírithe ar thionchar.
- (6) Bunaítear an creat ginearálta le Rialachán (AE) 2020/852 ó Pharlaimint na hEorpa agus ón gComhairle ⁽⁵⁾ chun a chinneadh an gcáilíonn gníomhaíocht eacnamaíoch mar ghníomhaíocht eacnamaíoch atá inbhuanaithe ó thaobh an chomhshaoil de chun infheistíochtaí inbhuanaithe a shainiú. Cruthaítear leis tagairt choiteann is féidir le hinfheisteoirí, bainc, tionscal agus taighdeoirí a úsáid nuair atáthar ag infheistiú i dtionscadail agus gníomhaíochtaí eacnamaíocha a bhfuil tionchar dearfach substaintiúil acu ar an aeráid agus an comhshaoil agus nach ndéanann dochar suntasach do cheachtar acu. Is é an tagairt sin an tagairt le haghaidh infheistíochtaí glasa san Aontas.
- (7) I gcás inarb ábhartha, ba cheart do chomhpháirtíochtaí Eorpacha cuimhneamh ar chritéir scagtha theicniúla dá dtagraítear in Airteagal 3 agus an prionsabal “gan dochar suntasach a dhéanamh” a leagtar amach in Airteagal 17 de Rialachán (AE) 2020/852 mar ionstraim chun ullmhacht agus rochtain a dtionscal ar mhaoiniú glas a fheabhsú a bheidh rithábhachtach le haghaidh glacadh margaidh agus imscaradh níos leithne na dteicneolaíochtaí agus na réiteach a chuirfidh siad ar fáil. Tá fianaise eolaíoch i gcroílár na gcritéir scagtha teicniúil sin. Ba cheart ról lárnach a bheith ag taighde agus nuálaíocht, a shaothraíonn na comhpháirtíochtaí Eorpacha, i gcuidiú leis na gníomhaithe eacnamaíocha na caighdeáin agus na tairseacha a shocraítear sa Rialachán sin a bhaint amach nó dul tharstu, agus na critéir scagtha theicniúla sin a choinneáil cothrom le dáta agus comhsheasmhach leis na cuspóirí a leagtar amach i dTeachtaireacht an 11 Nollaig 2019 ón gCoimisiún maidir le “Comhaontú Glas don Eoraip”.
- (8) Ar bhonn an Rialacháin maidir le Fís Eorpach, ba cheart a bheith in ann comhpháirtíochtaí Eorpacha a bhunú de réir trí chineál, is iad sin “comhchistithe”, “comh-chlársceidealaithe” agus “institiúidithe”. Ba cheart reachtaíocht nua de chuid an Aontais agus bunú struchtúr cur chun feidhme tiomanta de bhun Airteagal 187 den Chonradh ar Fheidhmiú an Aontais Eorpach (CFAE) a bheith mar chuid de bhunú comhpháirtíochtaí institiúidithe Eorpacha ar comhghnóthais iad idir comhpháirtithe ón earnáil phríobháideach agus phoiblí.

⁽⁴⁾ Rialachán (AE) Uimh. 1291/2013 ó Pharlaimint na hEorpa agus ón gComhairle an 11 Nollaig 2013 lena mbunaítear Fís 2020 — An Clár Réime um Thaighde agus Nuálaíocht (2014-2020), agus lena n-aighnítear Cinneadh Uimh. 1982/2006/CE (IO L 347, 20.12.2013, lch. 104).

⁽⁵⁾ Rialachán (AE) 2020/852 ó Pharlaimint na hEorpa agus ón gComhairle an 18 Meitheamh 2020 maidir le creat a bhunú chun infheistíocht inbhuanaithe a éascú, agus lena leasaítear Rialachán (AE) 2019/2088 (IO L 198, 22.6.2020, lch. 13).

- (9) Sainítear ocht réimse tosaíochta sa Rialachán maidir le Fís Eorpach, ina bhféadfar comhpháirtíochtaí institiúidithe Eorpacha a bhunaítear faoi Airteagal 185 nó 187 CFAE a mholadh. Ar fud na réimsí tosaíochta sin, cuirtear roinnt tionscnaimh le haghaidh comhpháirtíochtaí institiúidithe Eorpacha den sórt sin ar aghaidh agus cumhdaítear naoi gcinn díobh faoin Rialachán seo.
- (10) Ba cheart na gníomhaíochtaí taighde agus nuálaíochta a ghabhann comhghnóthais orthu féin a chistiú ó Fís Eorpach mar a fhoráiltear in Airteagal 12 agus Airteagal 13 den Rialachán maidir le Fís Eorpach. Ba cheart do na comhghnóthais sineirgí dlútha a fhorbairt le tionscnaimh eile de chuid Fís Eorpach agus le cláir eile agus ionstraimí cistiúcháin de chuid an Aontais chun an tionchar is mó a bhaint amach, go háirithe leo siúd a thacaíonn le himscaradh réiteach nuálach, oideachas agus forbairt réigiúnach, chun comhtháthú eacnamaíoch agus sóisialta a mhéadú agus éagthroime a laghdú.
- (11) Éilítear sa chur chuige nua le haghaidh comhpháirtíochtaí Eorpacha, agus go háirithe comhpháirtíochtaí institiúidithe Eorpacha, bealach nua leis an gcreat dlíthiúil faoina bhfeidhmeoidh siad a bhunú. Cé gur cruthaíodh gurb éifeachtach comhghnóthais a bhunú ar bhonn Airteagal 187 CFAE chun críoch Fís 2020 ó thaobh cur chun feidhme, is gá cur leis sin. Dá bhrí sin, is é is aidhm don Rialachán seo comhleanúnachas, éifeachtúlacht, oscailteacht, éifeachtacht agus treoshuíomh tionchair an chur chun feidhme a mhéadú tríd an Rialachán maidir le Fís Eorpach agus an taithí a fuarthas ó chur chun feidhme cláir faoi Fís 2020, a aistriú go forálacha coiteanna ar fud na gcomhghnóthas ar bhealach comhchuibhithe. Is é is aidhm dó comhpháirtíochtaí Eorpacha a éascú chun comhar agus sineirgí lena chéile a chur ar bun, agus, dá bhrí sin, úsáid iomlán a bhaint as a n-idirnasachtaí ar leibhéal eagraíochtúil. Ba cheart do chomhghnóthais féachaint le deiseanna a aimsiú chun ról a thabhairt d'ionadaithe comhpháirtíochtaí Eorpacha eile a bheith rannpháirteach i ndréachtú a gclár oibre, ag aithint na réimsí nó na gcomhghníomhaíochtaí a thacódh leis na dúshlán ar bhealach níos éifeachtúla agus níos éifeachtaí, ag seachaint forluí, ag ailíniú uainiú a ngníomhaíochtaí agus rochtain ar thorthaí agus ar mhalartú eolais ábhartha eile a áirithiú.
- (12) I ndiaidh aithint na sineirgí idir na comhghnóthais, ba cheart é a bheith mar aidhm acu na scaireanna buiséid ar cheart a úsáid le haghaidh gníomhaíochtaí comhlántacha nó comhghníomhaíochtaí idir na comhghnóthais a chinneadh. Thairis sin, is é is aidhm don Rialachán seo éifeachtúlachtaí feabhsaithe agus comhchuibhiú na rialacha a fheabhsú trí chomhar oibríochtúil neartaithe agus fiosrú barainneachtaí scála, lena n-áirítear bunú socrúithe cúloifige lenar cheart feidhmeanna tacaíochta cothrománacha a sholáthar do na comhghnóthais. Leis na socrúithe cúloifige sin ba cheart é a bheith níos fusa tionchar agus comhchuibhiú níos mó a bhaint amach ar phointí agus ag an am céanna leibhéal áirithe solúbthachta a choinneáil chun freastal ar riachtanais gach comhghnóthais. Ba cheart an struchtúr a bhunú trí úsáid a bhaint as comhaontuithe leibhéil seirbhíse a bheidh le tabhairt i gcrích ag na comhghnóthais. Ba cheart a chumhdach, leis na socrúithe cúloifige, na feidhmeanna comhordúcháin agus riaracháin i réimsí ina raibh a scagadh éifeachtúil costéifeachtach agus ba cheart a chur san áireamh leo a mhéid is féidir comhlíontacht le ceanglas freagrachta gach oifigigh údaráithe aonair agus comhchuibhiú na rialacha, lena n-áirítear rialacha maidir le maoin intleachtúil. Ba cheart an socrú dlíthiúil a cheapadh chun freastal ar riachtanais choiteanna na gcomhghnóthas ar an mbealach is fearr, chun a ndlúthchomhar a áirithiú agus chun féachaint ar na sineirgí féideartha uile i measc na gcomhpháirtíochtaí Eorpacha agus, mar thoradh air sin, idir na codanna éagsúla de Fís Eorpach agus idir na cláir eile a bhainistíonn na comhghnóthais.
- (13) Níor thug na measúnuithe tionchair maidir le gach comhghnóthas a ghabhann leis an togra le haghaidh an Rialacháin seo fianaise a dhlisteanáinn cur chun feidhme comhpháirtíochtaí Eorpacha i gcomhréir leis an Rialachán maidir le Fís Eorpach ach amháin i gcás nach n-éireodh le codanna eile de Fís Eorpach, lena n-áirítear foirmeacha eile de chomhpháirtíocht Eorpach, na cuspóirí a bhaint amach nó nach nginfidís na tionchair ionchais is gá, trína bhfuil údar le cur chun feidhme den sórt sin trí dhearcadh fadtéarmach agus leibhéal ard comhtháthaithe.
- (14) Le Fís Eorpach tugtar isteach cur chuige níos straitéisí agus comhleanúnaí atá treoraithe ag tionchar le haghaidh comhpháirtíochtaí Eorpacha, ag tógáil ar na ceachtanna a foghlaimíodh ón meastóireacht eatramhach ar Fís 2020. I gcomhréir leis an uaillmhian nua, is é is aidhm don Rialachán seo úsáid níos éifeachtaí a bhaint as comhpháirtíochtaí institiúidithe Eorpacha, go háirithe ag díriú ar chuspóirí, torthaí agus tionchair shoiléire is féidir a bhaint amach faoi 2030, agus trí rannchuidiú soiléir leis na tosaíochtaí beartais agus beartais ghaolmhara de chuid an Aontais a áirithiú. Tá dlúthchomhar agus sineirgí le tionscnaimh ábhartha eile ar leibhéal an Aontais, an leibhéal náisiúnta agus an leibhéal réigiúnach, go háirithe le comhpháirtíochtaí Eorpacha eile, rithábhachtach chun tionchar eolaíoch, socheacnamaíoch agus comhshaoil níos mó a bhaint amach agus glacadh torthaí a áirithiú. Chun na críche sin, féadfaidh na comhghnóthais forálacha Fhís Eorpach a chur i bhfeidhm lena gcumasófar cineálacha éagsúla sineirgí, amhail cistiú malartach, carnach nó comhcheangailte agus aistriú acmhainní. Agus measúnú á dhéanamh ar an tionchar foriomlán, ba cheart infheistíochtaí níos leithne lasmuigh de ranníocaíochtaí ó chomhpháirtithe agus arna spreagadh ag na comhghnóthais a chuireann le baint amach a gcuspóirí a chur san áireamh chun éascaíocht a dhéanamh ar luathú ghlacadh an mhargaidh le réitigh nuálacha.

- (15) Chun cur chuige comhleanúnach a áirithiú agus chun tionchair eolaíocha, theicneolaíocha, eacnamaíocha, shochaíocha agus chomhshaoil na gcomhpháirtíochtaí Eorpacha a shonrú i ndáil le cuspóirí Fís Eorpach agus thosaíochtaí an Aontais, ba cheart cuspóirí comhchoiteanna ginearálta agus comhchuspóirí sonracha ar cheart do gach comhghnóthas iad a bhaint amach a leagan amach sa Rialachán seo. Rannchuidíonn na comhghnóthais uile le chéile chun na cuspóirí sin a bhaint amach trína gcuspóirí aonair a bhaint amach. Ina theannta sin, sainítear sna codanna coiteanna den Rialachán seo cuspóirí oibríochtúla coiteanna atá díorthaithe ó na cuspóirí a shocraítear don Chlár Sonrach lena gcuirtear Fís Eorpach chun feidhme, a bunaíodh le Cinneadh (AE) 2021/764 ón gComhairle ^(*) (“an Clár Sonrach lena gcuirtear Fís Eorpach chun feidhme”). Ba cheart do gach comhghnóthas a chúraimí a chur i gcrích chun na prionsabail agus na critéir a leagtar amach le haghaidh comhpháirtíochtaí Eorpacha sa Rialachán maidir le Fís Eorpach (Airteagal 10 agus larscríbhinn III) a chomhlíonadh agus chun breisluach Eorpach a thabhairt i gcrích i gcomparáid le glaonna faoi phríomhchlár oibre Fís Eorpach. Déantar cuspóirí agus cúraimí na gcomhghnóthas a chomhlánú le cuspóirí agus cúraimí breise a bhaineann go sonrach le gach comhghnóthas. Agus a sainiúlachtaí agus a gcomhthéacsanna beartais á gcur san áireamh, ba cheart d’ailíniú loighce idirghabhála na gcomhghnóthas aonair le Fís Eorpach tacú leis an measúnú comhordaithe ar dhul chun cinn na gcomhghnóthas mar chuid de ghníomhaíochtaí faireacháin agus meastóireachta Fís Eorpach.
- (16) Tá an Rialachán seo bunaithe ar na prionsabail agus na critéir a leagtar amach sa Rialachán maidir le Fís Eorpach, lena n-áirítear oscailteacht agus trédhearcacht, éifeacht ghíarála láidir agus gealltanais fhadtéarmacha na gcomhpháirtithe uile atá páirteach. Ceann de chuspóirí an Rialacháin seo is ea oscailteacht na gcomhghnóthas agus a ngníomhaíochtaí a áirithiú do réimse leathan eintiteas, lena n-áirítear rannpháirtithe nua a ndéanfar faireachán orthu freisin faoi chuimsiú an phróisis um chomhordú straitéiseach do chomhpháirtíochtaí Eorpacha dá bhforáiltear faoi Airteagal 6(5) den Chlár Sonrach lena gcuirtear Fís Eorpach chun feidhme. Ba cheart do chomhpháirtíochtaí den sórt sin a bheith oscailte d’aon eintiteas atá toilteanach agus cumasach chun oibriú i dtreo na sprice coitinne, ba cheart dóibh rannpháirtíocht leathan agus ghníomhach na ngeallsealbhoirí a chur chun cinn ina ngníomhaíochtaí, ina mballraíocht agus ina rialachas, agus ba cheart dóibh a áirithiú go mbainfidh gach Eorpach tairbhe as na torthaí, go háirithe trí na torthaí a scaipeadh go forleathan agus gníomhaíochtaí réamhimscairthe ar fud an Aontais. A mhéid a bhaineann le comhaltaí príobháideacha agus a gcomheintitis nó a n-eintitis chleamhnaithe atá bunaithe i dtríú tíortha, ba cheart leas an Aontais agus an chomhghnóthais ar fhorais na slándála nó an oird phoiblí a choimirciú. Chuige sin, ba cheart don Choimisiún a bheith in ann iarraidh ar chomhaltaí príobháideacha bearta iomchuí a ghlacadh. D’fhéadfaí a áireamh ar bhearta den sórt sin láimhseáil iomchuí faisnéise rúnda nó teorannú eintiteas áirithe i ngníomhaíochtaí oibríochtúla sonracha an chomhalta phríobháidigh.
- (17) Chun cur i bhfeidhm comhleanúnach Airteagal 22(5) den Rialachán maidir le Fís Eorpach a áirithiú, ba cheart do na comhghnóthais comhleanúnachas a áirithiú leis an gcur chuige a glacadh le haghaidh gníomhaíochtaí a chistítear faoin gclár oibre Fís Eorpach maidir le cur i bhfeidhm an Airteagail sin, chomh maith le reachtaíocht an Aontais agus treoir ábhartha maidir lena chur i bhfeidhm in ábhair chomhchosúla i gclár oibre an chomhghnóthais lena mbaineann.
- (18) I gcás ina measfaidh an Coimisiún nó na Ballstáit rannpháirtíocht i ngníomhaíochtaí sonracha an chomhghnóthais a theorannú i gcomhréir le hAirteagal 22(5) den Rialachán maidir le Fís Eorpach, ba cheart don Choimisiún agus do na Ballstáit i ngrúpa ionadaithe na stát seasamh comhaontaithe a lorg ar bhonn cás ar chás sula nglacfár an clár oibre. I gcás comhghnóthas le Bord Údarás Poiblí, ba cheart do Bhord na nÚdarás Poiblí cur i bhfeidhm an Airteagail sin, arna iarraidh sin don Choimisiún, a fhormheas sula nglacfár an clár oibre. Thairis sin, tar éis cuireadh a fháil ón gCathaoirleach, ba cheart don Stiúrthóir Feidhmiúcháin foirmíocht ábhartha Choiste Chlár Fís Eorpach a chur ar an eolas go tráthrialta, sa bheis ar fhreagracht an Choimisiúin Coiste an Chláir a chur ar an eolas, faoi Airteagal 14(7) agus larscríbhinn III den Chlár Sonrach lena gcuirtear Fís Eorpach chun feidhme, agus go háirithe sula nglacfár clár oibre an chomhghnóthais lena mbaineann, faoi chur i bhfeidhm Airteagal 22(5) den Rialachán maidir le Fís Eorpach.
- (19) Éilítear le hIarscríbhinn III den Rialachán maidir le Fís Eorpach gur cheart do na ranníocaíochtaí airgeadais nó na ranníocaíochtaí comhchineáil ó chomhaltaí eile seachas an tAontas a bheith cothrom le 50 % ar a laghad agus go bhféadfaidh siad a bheith suas le 75 % de ghealltanais bhuiséadacha chomhiomlánaithe na gcomhghnóthas. Os a choinne sin, níor cheart an ranníocaíocht ón Aontas, lena n-áirítear aon chistí breise ó thíortha comhlachaithe, dul thar 50 % de ghealltanais bhuiséadacha chomhiomlánaithe gach comhghnóthais. Dá dhroim sin, ba cheart don Rialachán seo an ranníocaíocht a cheanglaítear ó chomhaltaí, seachas an tAontas, a shocrú ar an leibhéal céanna le ranníocaíocht an Aontais nó ar leibhéal níos airde. Ba cheart don Aontas a bheith in ann a ranníocaíocht a laghdú má theipeann ar chomhaltaí, seachas an tAontas, a ngealltanais a chomhlíonadh.

^(*) Cinneadh (AE) 2021/764 ón gComhairle an 10 Bealtaine 2021 lena mbunaítear an Clár Sonrach lena gcuirtear chun feidhme Fís Eorpach - an Clár Réime um Thaighde agus um Nuálaíocht, agus lena n-aisghairtear Cinneadh 2013/743/AE (IO L 167 I, 12.5.2021, lch. 1).

- (20) I gcomhréir le hAirteagal 10(1), pointe (c), den Rialachán maidir le Fís Eorpach, tá na comhghnóthais chun bainistíocht lárnach ar na ranníocaíochtaí airgeadais go léir a chur chun feidhme trí chur chuige comhordaithe. Ba cheart, dá réir sin, do gach stát rannpháirteach comhaontú riaracháin amháin nó níos mó a thabhairt i gcrích leis an gcomhghnóthas lena leagtar síos an sásra comhordúcháin chun ranníocaíochtaí a íoc le hiarratasóirí atá bunaithe sa stát rannpháirteach sin agus chun tuairisc a thabhairt ina leith. Chun comhleanúnachas lena dtosaíochtaí straitéiseacha náisiúnta a áirithiú, ba cheart ceart crosta a thabhairt do na stáit rannpháirteacha maidir lena ranníocaíochtaí airgeadais náisiúnta a úsáid i ndáil le hiarratasóirí atá bunaithe sna stáit rannpháirteacha sin. D'fhonn an t-ualach riaracháin ar thairbhíthe a íoslaghdú, simpliú a bhaint amach agus cur chun feidhme níos éifeachtúla a áirithiú, ba cheart do gach stát rannpháirteach iarracht a dhéanamh a sceideal íocaíochta, tuairisciú agus iniúchtaí a shioncrónú le sceideal íocaíochta, tuairisciú agus iniúchtaí na gcomhghnóthas agus a incháilitheacht costais a chóineasú leis an Rialachán maidir le Fís Eorpach. Na tairbhíthe atá bunaithe i Stáit Rannpháirteacha a chuireann na gníomhaíochtaí íocaíochta de chúram ar an gcomhghnóthas, ba cheart dóibh comhaontú deontais amháin a shíniú leis an gcomhghnóthas de réir an Rialacháin maidir le Fís Eorpach.
- (21) I gcomhréir leis na huaillmhianta a leagtar amach sa Rialachán maidir le Fís Eorpach, ar cheann de na réamhchoinníollacha a ghabhann le comhpháirtíochtaí institiúidithe Eorpacha a bhunú tá ranníocaíochtaí na gcomhpháirtithe a áirithiú ar feadh shaolré na gcomhghnóthas. Sa chomhthéacs sin, ba cheart do chomhpháirtíochtaí príobháideacha cuid shuntasach dá ranníocaíochtaí a sholáthar i bhfoirm ranníocaíochtaí comhchineáil leis na costais oibriúcháin a ghabhann leis an gcomhghnóthas. Ba cheart do chomhghnóthais a bheith in ann bearta a shainaithint chun na ranníocaíochtaí sin a éascú trína gcláir oibre, go háirithe trí rátaí cistiúcháin a laghdú. Ba cheart na bearta sin a bheith bunaithe ar riachtanais shonracha an chomhghnóthais agus na ngníomhaíochtaí foluiteacha. I gcásanna ina mbeidh údar cuí leo, ba cheart go mbeadh sé indéanta coinníollacha breise a thabhairt isteach lena n-éilítear rannpháirtíocht comhalta den chomhghnóthas nó dá gcomheintitis nó dá n-eintitis chleamhnaithe, ag díriú ar ghníomhaíochtaí inar féidir le comhpháirtithe tionsclaíocha an chomhghnóthais príomhról a ghlacadh, amhail léirithe ar mórsála agus tionscadail shuaitheanta níos cóngaraí don mhargadh, agus cur níos mó leis trí rátaí cistiúcháin níos ísle. Ba cheart don stiúrthóir feidhmiúcháin faireachán a dhéanamh ar leibhéal rannpháirtíochta na gcomhaltaí chun an bord rialála a chumhachtú le gníomhaíochtaí iomchuí a ghlacadh, ag áirithiú cothromaíocht idir tiomantas na gcomhpháirtithe agus oscailteacht. I gcásanna a mbeidh údar cuí leo, féadfar an caiteachas caipitiúil le haghaidh, mar shampla léirithe ar mórsála nó tionscadail shuaitheanta a chur san áireamh mar chostas incháilithe i gcomhréir leis an gcreat dlíthiúil is infheidhme.
- (22) Ba cheart go bhféadfaí, i gcomhréir le hAirteagal 15(3) den Rialachán maidir le Fís Eorpach, ranníocaíochtaí ó chlár arna gcomhaoiniú ag Ciste Forbraíochta Réigiúnaí na hEorpa arna bhunú le Rialachán (AE) 2021/1058 ó Pharlaimint na hEorpa agus ón gComhairle ⁽⁷⁾(CFRE), ag Ciste Sóisialta na hEorpa Plus arna bhunú le Rialachán (AE) 2021/1057 ó Pharlaimint na hEorpa agus ón gComhairle ⁽⁸⁾(CSE+), ag an gCiste Eorpach Muirí, Iascaigh agus Dobharshaothraithe arna bhunú le Rialachán (AE) 2021/1139 ó Pharlaimint na hEorpa agus ón gComhairle ⁽⁹⁾(CEMID) agus ag an gCiste Eorpach Talmhaíochta um Fhorbairt Tuaithe arna bhunú le Rialachán (AE) Uimh. 1306/2013 ó Pharlaimint na hEorpa agus ón gComhairle ⁽¹⁰⁾(CETFT) a mheas mar ranníocaíocht ó na stáit rannpháirteacha ar Ballstáit iad leis na comhghnóthais, ar choinníoll go gcomhlíontar Rialachán (AE) 2021/1060 ó Pharlaimint na hEorpa agus ón gComhairle ⁽¹¹⁾ agus na rialacháin chisteshonracha. Ina theannta sin, ba cheart go bhféadfaí ranníocaíochtaí ón tSaoráid Téarnaimh agus Athléimneachta arna bunú le Rialachán (AE) 2021/241 ó

⁽⁷⁾ Rialachán (AE) 2021/1058 ó Pharlaimint na hEorpa agus ón gComhairle an 24 Meitheamh 2021 maidir le Ciste Forbraíochta Réigiúnaí na hEorpa agus an Ciste Comhtháthaithe (IO L 231, 30.6.2021, lch. 60).

⁽⁸⁾ Rialachán (AE) 2021/1057 ó Pharlaimint na hEorpa agus ón gComhairle an 24 Meitheamh 2021 lena mbunaítear Ciste Sóisialta na hEorpa Plus (CSE+) agus lena n-aisghairtear Rialachán (AE) Uimh. 1296/2013 (IO L 231, 30.6.2021, lch. 21).

⁽⁹⁾ Rialachán (AE) 2021/1139 ó Pharlaimint na hEorpa agus ón gComhairle an 7 Iúil 2021 lena mbunaítear an Ciste Eorpach Muirí, Iascaigh agus Dobharshaothraithe agus lena leasaítear Rialachán (AE) 2017/1004 (IO L 247, 13.7.2021, lch. 1).

⁽¹⁰⁾ Rialachán (AE) Uimh. 1306/2013 ó Pharlaimint na hEorpa agus ón gComhairle an 17 Nollaig 2013 maidir leis an gcomhbheartas talmhaíochta a mhaoiniú, a bhainistiú agus faireachán a dhéanamh air agus lena n-aisghairtear Rialacháin (CEE) Uimh. 352/78, (CE) Uimh. 165/94, (CE) Uimh. 2799/98, (CE) Uimh. 814/2000, (CE) Uimh. 1290/2005 agus (CE) Uimh. 485/2008 ón gComhairle (IO L 347, 20.12.2013, lch. 549).

⁽¹¹⁾ Rialachán (AE) 2021/1060 ó Pharlaimint na hEorpa agus ón gComhairle an 24 Meitheamh 2021 lena leagtar síos forálacha coiteanna maidir le Ciste Forbraíochta Réigiúnaí na hEorpa, Ciste Sóisialta na hEorpa Plus, an Ciste Comhtháthaithe, an Ciste um Aistriú Cóir agus an Ciste Eorpach Muirí, Iascaigh agus Dobharshaothraithe agus rialacha airgeadais maidir leis na cistí sin agus maidir leis an gCiste um Thearmann, Imirce agus Lánpháirtíocht, an Ciste Slándála Inmheánaí agus an Ionstraim le haghaidh Tacaíocht Airgeadais don Bhainistiú Teorainneacha agus don Bheartas Víosáil (IO L 231, 30.6.2021, lch. 159).

Pharlaimint na hEorpa agus ón gComhairle ⁽¹²⁾ (“an tSaoráid”) a mheas mar ranníocaíocht ó na Ballstáit ar stáit rannpháirteacha iad leis na comhghnóthais, ar choinníoll go gcomhlíonfar forálacha na Saoráide agus na ngealltanais a leagtar amach sna pleananna náisiúnta téarnaimh agus athléimneachta.

- (23) I gcomhréir leis an bprionsabal maidir le ranníocaíochtaí a chomhroinnt go cothrom idir comhaltaí na gcomhghnóthas, ba cheart ranníocaíochtaí airgeadais le haghaidh costais riaracháin na gcomhghnóthas a chomhroinnt go cothrom idir an tAontas agus comhaltaí seachas an tAontas. Níor cheart dialla ón bprionsabal sin a mheas ach i gcásanna eisceachtúla a bhfuil bonn cirt leo, amhail nuair a bheadh na ranníocaíochtaí in aghaidh na comhpháirte nó an eintitis chleamhnaithe, go háirithe fiontair bheaga agus mheánmhéide (FBManna), ar leibhéal chomh ard go mbeidís ina gcúis le damáiste díréireach don dreasacht a bhainfeadh le bheith nó le fanacht mar chomheintiteas nó eintiteas cleamhnaithe de chuid an chomhghnóthais mar thoradh ar mhéid nó struchtúr ballraíochta de chuid an chomhghnóthais seachas an tAontas. Sna cásanna sin, ba cheart íoschéatadán na ranníocaíochta airgeadais bliantúla ó chomhaltaí seachas an tAontas le costais riaracháin an chomhghnóthais a bheith cothrom le 20 % de na costais riaracháin bhliantúla fhoriomlána agus ba cheart na ranníocaíochtaí ó FBManna a bheith cuid mhaith níos ísle ná iad siúd a fhaightear ó chomheintitis nó ó eintitis chleamhnaithe níos mó. Chomh luath agus a bhaintear mais chriticiúil ballraíochta amach lena gceadaítear do ranníocaíocht atá níos airde ná 20 % de na costais riaracháin bhliantúla fhoriomlána, ba cheart ranníocaíochtaí bliantúla in aghaidh an chomheintitis nó an eintitis chleamhnaithe a choinneáil nó a mhéadú agus é d’aidhm sciar na gcomhaltaí, seachas an tAontas, sa ranníocaíocht fhoriomlán le costais riaracháin bhliantúla an chomhghnóthais a mhéadú céim ar chéim. Ba cheart do chomhaltaí an chomhghnóthais, seachas an tAontas, iarracht a dhéanamh líon na gcomheintiteas nó na n-eintiteas cleamhnaithe a mhéadú d’fhonn a ranníocaíocht a mhéadú go 50 % de chostais riaracháin an chomhghnóthais thar a shaolré.
- (24) Éilítear faoin Rialachán maidir le Fís Eorpach go léireoidh na comhpháirtithe a dtiomantas fadtéarmach, lena n-áirítear trí íos-sciar d’inflheistíochtaí poiblí nó príobháideacha. Dá dhroim sin, ní mór don Aontas comhaltaí bunaidh atá bunaithe sna Ballstáit, tíortha atá comhlachaithe le Fís Eorpach nó eagraíochtaí idirnáisiúnta a shainaithint sa Rialachán seo. I gcás inár gá, áfach, ba cheart a bheith in ann bonn ballraíochta comhghnóthas a mhéadú i ndiaidh a mbunaithe le comhaltaí comhlachaithe a roghnaíodh tar éis nósanna imeachta oscailte agus trédhearcacha, agus na forbairtí teicneolaíochta nua nó comhlachas tíortha breise in Fís Eorpach á gcur san áireamh go háirithe.
- (25) Ba cheart deis a thabhairt d’eintitis dhlítheanacha a bhfuil suim acu tacú le cuspóirí na gcomhghnóthas ina réimsí sonracha taighde a bheith ina gcomhpháirtithe rannchuidithe de na comhghnóthais sin gan a bheith ina gcomhaltaí.
- (26) I gcomhréir le hAirteagal 16(5) den Rialachán maidir le Fís Eorpach, ba cheart leibhéal rannpháirtíochta eintitis dhlíthiúla na dtrí tíortha comhlachaithe a chur san áireamh agus na ranníocaíochtaí airgeadais ó thrí tíortha atá comhlachaithe le Fís Eorpach á leithdháileadh. Féadfar, dá réir sin, ranníocaíocht an Aontais sna comhghnóthais a mhéadú le ranníocaíochtaí ó thrí tíortha atá comhlachaithe le Fís Eorpach, ag cur san áireamh leibhéal rannpháirtíochta na n-eintiteas dlíthiúil sin agus ar an gcoinníoll go ndéanfar an méid iomlán faoina méadófar ranníocaíocht an Aontais a mheaitseáil ar a laghad le ranníocaíocht ó chomhaltaí seachas an tAontas, nó a gcomheintitis nó a n-eintitis chleamhnaithe.
- (27) Áirítear comhpháirtíocht phríobháideach phoiblí atá tairbhiúil do gach comhalta atá páirteach ann le comhghnóthas a bhunú, lena n-áirítear trí chinnteacht a chur chun cinn maidir le leithdháiltí móra buiséid le haghaidh na dtionscal ábhartha in imeacht 7 mbliana. Is féidir le comhaltaí tionchar a ghnóthú, go díreach nó trí na hionadaithe tionscail, nuair atáthar mar chomhalta bunaidh nó comhalta comhlachaithe, nó i gceann dá gcomheintitis nó dá n-eintitis chleamhnaithe, i mbord rialaithe an chomhghnóthais. Is é an bord rialaithe comhlacht cinnteoireachta an chomhghnóthais a chinneann treoshuíomh straitéiseach fadtéarmach na comhpháirtíochta, chomh maith lena tosaíochtaí bliantúla. Ba cheart an tAontas, na stáit rannpháirteacha, i gcás inarb ábhartha, na comhaltaí bunaidh agus na comhaltaí comhlachaithe a bheith in ann dá bhrí sin rannchuidiú le clár oibre agus leagan amach tosaíochtaí an chomhghnóthais tríd an gClár Oibre Straitéiseach um Thaighde agus um Nuálaíocht a ghlacadh agus a leasú b’fhéidir, chomh maith leis an gclár oibre bliantúil a ghlacadh, lena n-áirítear ábhar na nglaoanna ar thograí, an ráta cistiúcháin infheidhme in aghaidh na topaice glao, agus na rialacha gaolmhara maidir le nósanna imeachta tíolachta, meastóireachta, roghnaithe, bronnata agus athbheithnithe.

⁽¹²⁾ Rialachán (AE) 2021/241 ó Pharlaimint na hEorpa agus ón gComhairle an 12 Feabhra 2021 lena mbunaítear an tSaoráid Téarnaimh agus Athléimneachta (IO L 57, 18.2.2021, lch. 17).

- (28) Is iomchuí go léireoidh na comhaltaí seachas an tAontas a dtiomantas do chur chun feidhme an Rialacháin seo trí bhíthin litir ghealltanais, nó litir chomhpháirteach ghealltanais ina léirítear méid iomlán a ranníocaíochtaí i gcás inarb iomchuí, gan coinníollacha maidir lena n-aontachas a fhorchur. Ba cheart litreacha gealltanais den sórt seo a bheith bailí faoin dlí ar feadh shaolré an chomhghnóthais agus ba cheart don chomhghnóthas agus don Choimisiún faireachán grinn a dhéanamh orthu. Ba cheart do chomhghnóthais timpeallacht dhlíthiúil agus eagraíochtúil a chruthú a chumasaíonn comhaltaí lena ngealltanais a chomhlíonadh fad a áirítear tarraingteacht le haghaidh na ngeallsealbhoirí uile, oscailteacht leanúnach na gcomhghnóthas agus trédhearcacht le linn a gcur chun feidhme, go háirithe maidir le tosaíochtaí a leagan amach agus le haghaidh rannpháirtíocht i nglanna ar thograí.
- (29) Is bunchloch de Fís Eorpach é simpliú breise a bhaint amach. Sa chomhthéacs sin, ba cheart sásra tuairiscithe simplithe a bheith ann do chomhpháirtithe nach bhfuil orthu tuairisciú ar chostais neamh-incháilithe a thuilleadh. Ba cheart ranníocaíochtaí comhchineáil le haghaidh gníomhaíochtaí oibríochtúla a chur san áireamh ar bhonn costais incháilithe agus ar an mbonn sin amháin agus ba cheart iad a thuairisciú agus a iniúchadh i gcomhréir leis an sásra is infheidhme maidir leis an gcomhaontú deontais sonrach. Le cuntasáíocht den sórt sin ar bhonn costais incháilithe, ní féidir ranníocaíochtaí comhchineáil le haghaidh gníomhaíochtaí oibríochtúla a ríomh go huathoibríoch ach trí uirlisí TF Fís Eorpach, íslítear léi an t-ualach riaracháin i gcomhair comhpháirtithe agus bíonn an sásra tuairiscithe i leith ranníocaíochtaí níos éifeachtaí dá barr. Ba cheart do na comhghnóthais faireachán grinn a dhéanamh ar ranníocaíochtaí comhchineáil le haghaidh gníomhaíochtaí oibríochtúla agus ba cheart don stiúrthóir feidhmiúcháin tuarascálacha a réiteach agus a phoiblíú go rialta chun a shuí an bhfuil an dul chun cinn atá á dhéanamh i dtreo spriocanna na ranníocaíochtaí comhchineáil a bhaint amach sásúil go leor. Ba cheart don bhord rialaithe measúnú a dhéanamh ar na hiarrachtaí a rinne na comhaltaí agus na torthaí a bhain siad amach a rannchuidíonn leis na gníomhaíochtaí oibríochtúla, chomh maith le fachtóirí eile amhail leibhéal rannpháirtíochta FBManna agus a tharraingtí atá na comhghnóthais do rannpháirtithe nua. I gcás inar gá, ba cheart dó bearta leighis agus ceartaithe iomchuí a ghlacadh, ag cur na prionsabail atá bunaithe ar oscailteacht agus trédhearcacht san áireamh.
- (30) Ba cheart do na comhghnóthais deis agus spreagadh córasach a sholáthar do chomhaltaí seachas an tAontas chun a ngníomhaíochtaí taighde agus nuálaíochta a chur le gníomhaíochtaí an chomhghnóthais. Níor cheart go bhfaigheadh gníomhaíochtaí breise tacaíocht airgeadais ón gcomhghnóthas. Mar sin féin, is féidir iad a chur san áireamh mar ranníocaíochtaí comhchineáil na gcomhaltaí le haghaidh gníomhaíochtaí breise nuair a rannchuidíonn siad le cuspóirí an chomhghnóthais agus nuair a bhíonn siad nasctha go díreach lena ghníomhaíochtaí, lena n-áirítear costais neamh-incháilithe gníomhaíochtaí indíreacha arna gcistiú ag an gcomhghnóthas i gcás ina bhforáiltear dó sa phlean bliantúil gníomhaíochtaí breise. Is féidir an nasc sin a bhunú trí ghlacadh na dtorthaí ó ghníomhaíochtaí indíreacha atá cistithe ag an gcomhghnóthas nó trína thionscnaimh roimhe sin, nó trí bhreisluach suntasach don Aontas a léiriú. Ba cheart do chomhlacht iniúcháireachta neamhspleách arna cheapadh ag an eintiteas lena mbaineann na costais faoi seach a dheimhniú faoi réir an modh luachála a bheith infhíoraithe ag an gcomhghnóthas i gcás éiginnteachta. Ba cheart don Rialachán seo forálacha níos sonraí a leagan síos maidir le raon feidhme na ngníomhaíochtaí breise le haghaidh gach comhghnóthais, a mhéid a bhfuil gá leis chun an treoíocht agus an tionchar inmhianaithe a bhaint amach. Ba cheart do bhoird rialaithe comhghnóthas cinneadh a dhéanamh thairis sin faoi cibé an bhfuil gá, chun críoch na ranníocaíochtaí sin a luacháil, le modhanna simplithe amhail cnapshuimeanna nó costais aonaid a úsáid chun simpliú, éifeachtúlacht costais agus leibhéal cosanta iomchuí a bhaint amach le haghaidh sonraí tráchtála rúnda.
- (31) Ba cheart do rialú na gcomhghnóthas a áirithiú go bhfuil a bpróisis chinnteoireachta oiriúnach chun coimeád cothrom le dáta leis an timpeallacht shocheachnamaíoch agus teicneolaíochta a bhíonn ag athrú go tapa agus le dúshlán dhomhanda. Ba cheart do chomhghnóthais tairbhe a bhaint as saineolas, comhairle agus tacaíocht ó na geallsealbhoirí ábhartha uile, chun a gcúraimí a chur chun feidhme go héifeachtach agus sineirgí ar leibhéal an Aontais agus ar an leibhéal náisiúnta a áirithiú. Dá bhrí sin, ba cheart na comhghnóthais a chumhachtú chun comhlachtaí comhairleacha a bhunú d'fhonn sainchomhairle a sholáthair dóibh agus aon chúram eile de chineál comhairleach is gá chun cuspóirí na gcomhghnóthas a bhaint amach a dhéanamh. Agus na comhlachtaí comhairleacha á mbunú, ba cheart do chomhghnóthais ionadaíocht cothrom saineolaithe laistigh de raon feidhme an chomhghnóthais, lena n-áirítear maidir le cothromaíocht inscne, a áirithiú. Ba cheart do dhearthaí eolaíochta, chomh maith le dearthaí údarás náisiúnta agus réigiúnach agus geallsealbhoirí eile na gcomhghnóthas a bheith mar chuid den chomhairle a sholáthraíonn na comhlachtaí sin.
- (32) Ba cheart do chomhghnóthais a áirithiú go bhfuil na Ballstáit ar an eolas go leordhóthanach faoi ghníomhaíochtaí na gcomhghnóthas, gur féidir leo faisnéis thráthúil a sholáthar maidir le gníomhaíochtaí ar tugadh fúthu sna Ballstáit agus go bhfuil an deis acu rannchuidiú leis na próisis ullmhúcháin agus chinnteoireachta. Tá tábhacht ar leith leis an idirphlé sin leis na Ballstáit i gcomhthéacs na sineirgí agus an ghá atá le hailíniú na n-iarrachtaí agus na ngníomhaíochtaí ar leibhéal náisiúnta, réigiúnach, an Aontais agus Eorpach a áirithiú chun níos mó tionchair a chruthú. Ba cheart do chomhghnóthais gan rannpháirtíocht dhíreach nó indíreach ó na Ballstáit mar chomhaltaí nó comheintitis grúpa ionadaithe na stát a bhunú agus é d'aidhm aige gníomhaíochtaí na gcomhghnóthas a ailíniú leis na bearta agus na gníomhaíochtaí a ghlactar ar an leibhéal náisiúnta agus réigiúnach.

- (33) Ba cheart do chomhghnóthais a bheith in ann comhlacht comhairleach le feidhm chomhairleach eolaíochta a bhunú. Ba cheart don chomhlacht sin nó dá chomhaltaí a bheith in ann comhairle agus tacaíocht eolaíoch neamhspleách a sholáthar don chomhghnóthas faoi seach. Ba cheart cláir oibre bhliantúla agus gníomhaíochtaí breise, chomh maith le haon ghnéithe eile de chúraimí an chomhghnóthais, go háirithe, a bheith i gceist leis an gcomhairle eolaíoch, mar is gá.
- (34) D'fhonn a áirithiú go bhfuil comhghnóthais ar an eolas faoi dhreachaí agus tuairimí geallsealbhoirí ón slabhra luacha iomlán ina réimsí faoi seach, ba cheart do chomhghnóthais a bheith in ann a ngrúpaí comhairleacha de gheallsealbhoirí faoi seach a bhunú, le dul i gcomhairle leo maidir le saincheistanna cothrománacha nó ceistanna sonracha, de réir riachtanais gach comhghnóthais. Ba cheart grúpaí den sórt sin a bheith oscailte do gheallsealbhoirí poiblí agus príobháideacha, lena n-áirítear leasgrúpaí eagraithe, agus leasgrúpaí idirnáisiúnta ó na Ballstáit, ó thíortha comhlachaithe nó ó thíortha eile, atá gníomhach i réimse an chomhghnóthais.
- (35) Ba cheart do na comhghnóthais feidhmiú ar bhealach oscailte agus trédhearcach agus an fhaisnéis ábhartha go léir a sholáthar dá gcomhlachtaí iomchuí ar bhonn rialta tráthúil chomh maith lena gcuid gníomhaíochtaí a chur chun cinn, lena n-áirítear gníomhaíochtaí faisnéise agus scaipthe, don phobal i gcoitinne. Áirítear leis sin faisnéis thráthúil, faoi réir rialacha rúndachta agus miondealaithe de réir tíre maidir le hiarratas a dhéanamh agus rannpháirtíocht i ngníomhaíochtaí indíreacha arna gcistiú ag an gcomhghnóthas, maidir le torthaí meastóireachta gach glao ar thograí agus maidir le cur chun feidhme tionscadal, maidir le sineirgí le cláir ábhartha eile de chuid an Aontais agus comhpháirtíochtaí Eorpacha eile, maidir le gníomhaíochtaí breise, maidir le ranníocaíochtaí airgeadais agus comhchineáil arna ngealladh agus arna soláthar go hiarbhrí, maidir le feidhmiú bhuiséad an chomhghnóthais, agus maidir leis an nasc idir cuspóirí an chomhghnóthais agus ranníocaíochtaí comhchineáil le haghaidh gníomhaíochtaí breise.
- (36) Ba cheart na comhghnóthais a chur chun feidhme ag úsáid struchtúr agus rialacha a chuireann le héifeachtúlacht agus a áirithíonn simpliú. Chun na críche sin, ba cheart do na comhghnóthais rialacha airgeadais atá sonracha dá riachtanais a ghlacadh i gcomhréir le hAirteagal 71 de Rialachán (AE, Euratom) 2018/1046 ó Pharlaimint na hEorpa agus ón gComhairle ⁽¹³⁾.
- (37) Ba cheart cur chun feidhme an chomhghnóthais a bheith bunaithe ar na critéir a leagtar amach le haghaidh comhpháirtíochtaí institiúidithe Eorpacha sa Rialachán maidir le Fís Eorpach. Ba cheart tacú leis sin trí úsáid a bhaint as modhanna leictreonacha atá á mbainistiú ag an gCoimisiún. Tá faisnéis a bhaineann le gníomhaíochtaí indíreacha atá cistithe ag na comhghnóthais, lena n-áirítear torthaí, fíor-riachtanach chun beartais nó cláir an Aontais a fhorbairt, a chur chun feidhme, a fhaire agus a mheas. Dá bhrí sin, ba cheart do chomhghnóthais a áirithiú go bhfuil rochtain ag institiúidí an Aontais agus comhlachtaí, oifigí nó gníomhaireachtaí an Aontais ar an bhfaisnéis uile a bhaineann leis na gníomhaíochtaí indíreacha a chistíonn siad, lena n-áirítear ranníocaíochtaí agus torthaí na dtairbhíthe atá rannpháirteach i ngníomhaíochtaí indíreacha. Ba cheart na cearta rochtana sin a theorannú d'úsáid neamhthráchtála agus neamhiomaíoch agus ba cheart dóibh na rialacha rúndachta is infheidhme a chomhlíonadh. Ba cheart rochtain a thabhairt d'fhoireann institiúidí an Aontais agus d'fhoireann chomhlachtaí, oifigí nó gníomhaireachtaí an Aontais faoi réir caighdeán leordhóthanacha TF maidir le slándáil agus slándáil faisnéise agus i gcomhréir le prionsabail an riachtanais agus na comhréireachta.
- (38) Ba cheart do rannpháirtíocht i ngníomhaíochtaí indíreacha a chistíonn comhghnóthais faoi Fís Eorpach na rialacha a leagtar amach sa Rialachán maidir le Fís Eorpach a chomhlíonadh. Ba cheart do na comhghnóthais a áirithiú go gcuirfead na rialacha sin i bhfeidhm go seasmach bunaithe ar bhearta ábhartha arna nglacadh ag an gCoimisiún. Ba cheart do na comhghnóthais an tsamhail chorpóraideach den chomhaontú deontais a d'ullmhaigh an Coimisiún a úsáid. Maidir leis an tréimhse chun agóid a dhéanamh in aghaidh aistriú úinéireacht na dtorthaí dá dtagraítear in Airteagal 40(4) den Rialachán maidir le Fís Eorpach, ba cheart fad na sraitheanna nuálaíochta sna réimsí a chumhdáitear faoi na comhghnóthais faoi seach a chur san áireamh.
- (39) Ar cheann de phríomhchuspóirí na gcomhghnóthas tá acmhainneachtaí eacnamaíoch an Aontais a chothú, go háirithe a ceannaireacht eolaíochta agus theicneolaíoch. Thairis sin, cuirtear an gá atá le hinfeistiú i bpríomhtheicneolaíochtaí amhail 5G, intleacht shaorga (IS), an réal, cibearshlándáil agus teicneolaíocht ghlas, agus na teicneolaíochtaí sin a luachshocrú san Aontas, i dtábhacht sa téarnamh i ndiaidh COVID-19. Ba cheart do na comhghnóthais sin rannchuidiú leis an eolaíocht oscailte a chothú i gcomhréir le hAirteagal 14 agus Airteagal 39 den Rialachán maidir le Fís Eorpach. Beidh ról tábhachtach ag na torthaí a ghinfidh na rannpháirtithe uile chuige

⁽¹³⁾ Rialachán (AE, Euratom) 2018/1046 ó Pharlaimint na hEorpa agus ón gComhairle an 18 Iúil 2018 maidir leis na rialacha airgeadais is infheidhme maidir le buiséad ginearálta an Aontais, lena leasaítear Rialacháin (AE) Uimh. 1296/2013, (AE) Uimh. 1301/2013, (AE) Uimh. 1303/2013, (AE) Uimh. 1304/2013, (AE) Uimh. 1309/2013, (AE) Uimh. 1316/2013, (AE) Uimh. 223/2014, (AE) Uimh. 283/2014, agus Cinneadh Uimh. 541/2014/AE agus lena n-aisghairtear Rialachán (AE, Euratom) Uimh. 966/2012 (IO L 193, 30.7.2018, lch. 1).

sin, agus bainfidh na rannpháirtithe uile tairbhe as an gcistiú ón Aontas trí na torthaí a ghinfear leis an tionscadal agus le cearta rochtana ar na torthaí sin, fiú na rannpháirtithe nach bhfaigheann cistiú ón Aontas. Dá bhrí sin, chun leasanna Aontais a chosaint, ba cheart feidhm a bheith ag an gceart ag comhghnóthais chun agóid a dhéanamh in aghaidh aistriú úinéireacht na dtorthaí nó deonú ceadúnas eisiach i leith torthaí maidir le rannpháirtithe nach bhfaigheann cistiú ón Aontas freisin. Agus an ceart seo chun agóid a dhéanamh á fheidhmiú agus i gcomhréir le prionsabal na comhréireachta, ba cheart don chomhghnóthas cothromaíocht chóir a aimsiú idir leasanna Aontais agus cosaint chearta bunúsacha a mhéid a bhaineann le torthaí na rannpháirtithe nach bhfaigheann cistiú ón Aontas, ag cur san áireamh nach bhfuair na rannpháirtithe sin aon chistiú ón Aontas don ghníomhaíocht ónar gineadh na torthaí.

- (40) Ba cheart ranníocaíocht airgeadais an Aontais a bhainistiú i gcomhréir leis an bprionsabal maidir le bainistíocht fhónta airgeadais agus leis na rialacha maidir le bainistíocht indíreach a leagtar amach i Rialachán (AE, Euratom) 2018/1046.
- (41) Chun críoch an tsimplithe, ba cheart an t-ualach riaracháin a laghdú do na páirtithe uile. Ba cheart iniúchtaí dúbailte agus méideanna díréireacha doiciméad agus tuairiscithe a sheachaint. Ba cheart iniúchadh ar chistí an Aontais faoin Rialachán seo a dhéanamh i gcomhréir leis an Rialachán maidir le Fís Eorpach agus cláir chistiúcháin ábhartha eile de chuid an Aontais.
- (42) Ba cheart leasanna airgeadais an Aontais agus chomhaltaí eile na gcomhghnóthas a chosaint trí bhearta comhréireacha feadh an timthrialla caiteachais, lena n-áirítear neamhrialtachtaí a chosc, a bhrath agus a imscrúdú, agus cistí a cailleadh, a fócadh go mícheart nó a úsáideadh go mícheart a ghnóthú agus, i gcás inarb iomchuí sin, pionóis riaracháin agus airgeadais a ghearradh i gcomhréir le Rialachán (AE, Euratom) 2018/1046. I bhfianaise chineál sonrach na ngníomhaíochtaí a chuir roinnt de na comhghnóthais chun feidhme faoina gceanglaítear go ndéantar iad a chéimniú amach thar roinnt blianta, ba cheart don Choimisiún agus don chomhghnóthas ábhartha a bheith in ann na gealltanais bhuiséadacha bhliantúla a roinnt ina dtráthchodanna bliantúla. I ndáil leis sin, féadfar gealltanais bhuiséadacha an Chomhghnóthais um Eitlíocht Ghlan, Chomhghnóthas Iarnród na hEorpa agus Chomhghnóthas Taighde 3 BAT maidir leis an Aerspás Eorpach Aonair a roinnt ina dtráthchodanna bliantúla. Go dtí an 31 Nollaig 2024, níor cheart méid carnach na ngealltanais buiséadach sin a bheith os cionn 50 % de ranníocaíocht uasta ábhartha an Aontais faoi seach. Ón 1 Eanáir 2025 ar aghaidh, beidh 20 % ar a laghad de bhuiséad carnach na mblianta iarmharacha nach gcumhdófar le tráthchodanna bliantúla.
- (43) I bhfianaise chineál sonrach agus stádas reatha na gcomhghnóthas, ba cheart dóibh leanúint de bheith faoi réir urscaoileadh ar leithligh. Ba cheart don Chúirt Iniúchóirí na cuntais agus dlíthiúlacht agus rialacht na n-idirbheart is bun leo a iniúchadh.
- (44) I gcomhréir le hAirteagal 10(2), pointe (c), den Rialachán maidir le Fís Eorpach, ba cheart do chomhghnóthais cur chuige saolré soiléir a bheith acu. D'fhonn leasanna airgeadais an Aontais a chosaint go leordhóthanach, ba cheart comhghnóthais a bhunú ar feadh tréimhse a chríochnaíonn ar an 31 Nollaig 2031 chun deis a thabhairt dóibh a bhfreagrachtaí maidir le cur chun feidhme deontais a fheidhmiú go dtí go gcuirfear na gníomhaíochtaí indíreacha deiridh a seoladh i gcrích. Ba cheart na comhghnóthais a mhaoiniú trí chlár an Aontais faoin gceart airgeadais ilbhliantúil do 2021-2027 ("CAI 2021-2027"). Ba cheart do na comhghnóthais a bheith in ann glaonna ar thograí a sheoladh faoin 31 Nollaig 2028, i gcásanna lena bhfuil údar cuí agus a bhaineann le hinfhaighteacht an bhuiséid atá fágtha arna eascairt as CAI 2021-2027.
- (45) I gcomhthéacs thosaíocht an Choimisiúin maidir le "Comhaontú Glas don Eoraip" lena dtacaíonn teachtaireachtaí ón gCoimisiún an 11 Deireadh Fómhair 2018 maidir le Bhithghilleagair inbhuanaithe an Aontais don Eoraip: an nasc idir an geilleagar, an tsochaí agus an comhshaol a neartú, an 28 Samhain 2018 maidir le Pláinéad Glan do Chách – fís straitéiseach fhadtéarmach Eorpach ar mhaithe le geilleagar rachmasach, nua-aimseartha, iomaíoch atá neodrach ó thaobh na haeráide de, an 11 Márta 2020 maidir le Plean nua Gníomhaíochta don Gheilleagar Ciorclach i gcomhair Eoraip níos glaine agus níos iomaíche, an 20 Bealtaine 2020 maidir le Straitéis Bhithéagsúlachta an AE do 2030: An dúlra a thabhairt ar ais inár saol, an 20 Bealtaine 2020 maidir leis an Straitéis "Ón bhFeirm go dtí an Forc" le haghaidh córas bia atá cothrom, sláintiúil agus neamhdhíobhálach don chomhshaol agus an 17 Deireadh Fómhair 2020 maidir leis an Straitéis Ceimiceán don Inbhuanaitheacht: i dTreó Timpeallacht Saor ó Thocsaineach, ba cheart

don earnáil bhitbhunaithe Eorpach, lena n-áirítear FBManna, réigiúin agus príomhtháirgeoirí, a bheith aeráidneodrach, níos ciorcláí agus níos inbhuanaithe fad a fhanann siad iomaíoch ar an scála domhanda. Féadfaidh éiceachóras nuálaíochta bithbhunaithe atá láidir, tíosach ar acmhainní agus iomaíoch spleáchas ar amhábhair iontaise agus acmhainní mianracha neamh-inathnuaite a laghdú agus dlús a chur le hionadú na n-ábhar agus na n-acmhainní sin. Féadfaidh sé táirgí, ábhair, próisis agus cothaitheigh inathnuaite bithbhunaithe a fhorbairt ó dhramhaíl agus bithmhais tríd an nuálaíocht atá treoraithe ag an inbhuaine agus ciorclaíocht. Féadfaidh éiceachóras den sórt sin luach a chruthú freisin ó bhunábhar áitiúil, lena n-áirítear dramhaíl, fuíll agus taobhsruthanna, chun poist, fás agus forbairt eacnamaíoch a chur ar fáil ar fud an Aontais, ní hamháin i gceantair uirbeacha ach i gcríocha tuaithe agus cósta freisin, áit a dtáirgtear bithmhais agus ar réigiúin forimeallacha iad go minic inar annamh a mbaintear tairbhe as forbairt thionsclaíoch.

- (46) Dhírigh an Comhghnóthas Tionscail Bhithbhunaithe a bunaíodh faoi Fís 2020 ar úsáid inbhunaithe acmhainní, go háirithe earnálacha atá dian ó thaobh acmhainní de agus a bhfuil tionchar mór acu amháin talmhaíocht, monaríocht teicstíle agus foirgníocht, ag díriú ar oibreoirí, monaróirí, gléasraí agus monarchana áitiúla go háirithe. Bhí sraith láidir de 34 mholadh mar chuid dá mheastóireacht eatramhach a foilsíodh i mí Dheireadh Fómhair 2017 agus léirítear na moltaí sin i ndearadh an Chomhghnóthais um Eoraip Chiorclach Bhithbhunaithe a bhunaítear leis an Rialachán seo. Ní leanúint dhíreach ar an gComhghnóthas Tionscail Bhithbhunaithe é an Comhghnóthas um Eoraip Chiorclach Bhithbhunaithe ach clár a thógann ar na gaiscí a bhain an tionscnamh roimhe sin amach agus a théann i ngleic leis na heasnamh a bhain leis. I gcomhréir leis na moltaí sin, ba cheart do raon níos leithne de gheallsealbhoirí, lena n-áirítear an earnáil phríomhúil (eadhon talmhaíocht, dobharshaothrú, iascach agus foraoiseacht) chomh maith le soláthraithe dramhaíola, fúill agus taobhsruthanna, údarais réigiúnacha agus infheisteoirí a bheith rannpháirteach sa Chomhghnóthas um Eoraip Chiorclach Bhithbhunaithe chun clisti sa mhargadh agus próisis bhithbhunaithe neamh-inbhuanaithe a chosc. D'fhonn a chuspóirí a bhaint amach, níor cheart dó ach tionscadail atá ag cloí le prionsabail na ciorclaíochta, na hinbhuaine agus na dteorainneacha pláinéadacha a chistiú.
- (47) Ba cheart don Chomhghnóthas um Eoraip Chiorclach Bhithbhunaithe Grúpaí Imscartha a bhunú ar cheart dóibh a bheith mar chomhlachtaí comhairleacha agus páirt ghníomhach a ghlacadh sna pléití straitéiseacha atá leis an clár oibre don chomhpháirtíocht a shocrú. Tá sé rithabhachtach go gcuirfeadh na comhlachtaí comhairleacha sin san áireamh sa struchtúr rialaithe le rannpháirtíocht níos leithne agus níos mó infheistíocht phríobháideach a áirithiú san earnáil chiorclach bhithbhunaithe. Ba cheart do na Grúpaí Imscartha go háirithe tacaíocht a sholáthar do chruinnithe straitéiseacha an Bhoird Rialaithe mar a dtagann ceannairí tionscail, ionadaithe na ngeallsealbhoirí agus ionadaithe ardleibhéil an Choimisiúin le chéile leis an mBord Rialaithe buan chun treoshuíomh straitéiseach na comhpháirtíochta a phlé agus a leagan amach.
- (48) Ba cheart gurbh é príomhchuspóir an Chomhghnóthais um Eitlíocht Ghlan rannchuidiú le lorg éiceolaíochta na heitlíochta a laghdú trí dhlús a chur le forbairt teicneolaíochtaí eitlíochta atá aeráidneodrach lena n-imscaradh a luaithe agus is féidir, dá bhrí sin déanfar rannchuidiú nach beag leis na cuspóirí uailmhianacha maidir le tionchar ar an gcomhshaol a mhaolú a ghabhann leis an gComhaontú Glas don Eoraip agus Rialachán (AE) 2021/1119 ó Pharlaimint na hEorpa agus ón gComhairle⁽¹⁴⁾ ("Dlí Aeráide Eorpach"), is é sin, laghdú 55 % in astaíochtaí i gcomparáid leis na leibhéil a bhí ann in 1990 faoin mbliain 2030, agus aeráidneodracht a bhaint amach faoi 2050 ar a dhéanaí, i gcomhréir le Comhaontú Pháras a glacadh faoi Chreat-Choinbhinsiún na Náisiún Aontaithe ar an Athrú Aeráide⁽¹⁵⁾. Ní féidir an cuspóir sin a bhaint amach ach trí dhlús a chur leis na próisis taighde agus nuálaíochta in aerloingseoireacht agus na próisis sin a bharrfheabhsú agus trí iomaíochas domhanda thionscal eitlíochta an Aontais a fheabhsú. Ba cheart don Chomhghnóthas um Eitlíocht Ghlan a áirithiú go bhfanann eitlíocht níos glaine sábháilte, slán agus éifeachtúil chun paisinéirí agus earraí a iompar d'aer.
- (49) Tógann an Comhghnóthas um Eitlíocht Ghlan ar an taithí a fuarthas ó Chomhghnóthas Spéire Glaine agus ó Chomhghnóthas Spéire Glaine 2. Ba cheart don chomhpháirtíocht nua Eorpach a bheith níos uailmhianach ag díriú ar léiritheoirí ceannródaíocha a fhorbairt. I gcomhréir leis na torthaí ón meastóireacht eatramhach ar Chomhghnóthas Spéire Glaine 2, ba cheart do thionscnamh nua a áirithiú go bhfuil gach léiritheoir ar an gconair chriticiúil maidir le forbairt na gcéad chlár eile aerárthaí ionas go mbeidh na teicneolaíochtaí a fhorbrófar in ann freastal dáríre ar an bpríomhthosaíocht, sé sin "imscaradh a luaithe is féidir". Dá bhrí sin, ba cheart don chomhghnóthas nua díriú ar infheictheacht a chuspóirí saothraithe aonair a mhéadú agus cumais faireacháin, bhainistíochta agus tuairiscithe an chomhghnóthais a neartú chun castacht na hiarrachta taighde agus nuálaíochta a éilítear ionas go mbeidh an chomhpháirtíocht Eorpach in ann a cuspóirí a bhaint amach a léiriú.

⁽¹⁴⁾ Rialachán (AE) 2021/1119 ó Pharlaimint na hEorpa agus ón gComhairle an 30 Meitheamh 2021 lena mbunaítear an creat chun aeráidneodracht a bhaint amach agus lena leasaítear Rialachán (CE) Uimh. 401/2009 agus (AE) 2018/1999 ("An Dlí Aeráide Eorpach") (IO L 243, 9.7.2021, lch. 1)

⁽¹⁵⁾ IO L 282, 19.10.2016, lch. 4.

- (50) Ba cheart don Chomhghnóthas um Eitlíocht Ghlan tógáil ar cheannaireacht láidir ó thionscal eitlíochta na hEorpa agus ar bhonn ballraíochta éagsúil, ag tabhairt raon leathan geallsealbhóirí agus smaointe ar fud na hEorpa le chéile. D'fhonn na cuir chuige a bhfuil an gealladh is mó fúthu agus na heintitis atá in ann iad a bhaint amach a shainathint, sheol an Coimisiún glao ar léiriú smaointe agus ar chomhaltaí féideartha. Ba cheart cead a thabhairt don Bhord Rialála comhaltaí comhlachaithe a roghnú bunaithe ar thorthaí an ghlaio sin agus glaonna amach anseo chun foráil a dhéanamh maidir le leathnú tapa an ghrúpa comhaltaí.
- (51) D'fhonn tionchar na ngníomhaíochtaí taighde agus nuálaíochta ar laghdú éifeachtach astaíochtaí agus digiteáil an tionscail eitlíochta a dtugann na Comhghnóthais um Eitlíocht Ghlan agus Taighde BAT 3 an Aerspáis Eorpaigh Aonair fúthu a uasmhéadú agus a bhrostú, ba cheart do na comhghnóthais sin féachaint le comhoibriú dlúth a thabhairt i gcrích le Gníomhaireacht Sábháilteachta Eitlíochta an Aontais Eorpaigh (EASA) in obair na comhpháirtíochta Eorpaí, ag áirithiú go ndéantar eolas ar na teicneolaíochtaí nua arna bhforbairt a mhalartú go luath. Beidh an comhoibriú sin ríthábhachtach chun dlús a chur leis an nglacadh sa mhargadh, tríd an bpróiseas creidiúnaithe do na táirgí agus na seirbhísí a leanann as sin a éascú mar a cheanglaítear le Rialachán (AE) 2018/1139 ó Pharlaimint na hEorpa agus ón gComhairle ⁽¹⁶⁾.
- (52) D'fhonn sineirgí idir cláir ar leibhéal an Aontais, an leibhéal náisiúnta agus an leibhéal réigiúnach a uasmhéadú, ba cheart do ghrúpa ionadaithe na stát de chuid an Chomhghnóthais um Eitlíocht Ghlan na féidearthachtaí a fhiosrú chun tacaíocht airgeadais a sholáthar ar an leibhéal náisiúnta do thograí sármhaithe nár roghnaigh an Chomhghnóthas um Eitlíocht Ghlan cistiú a thabhairt dóibh mar thoradh ar an iomarca suibscríofa.
- (53) Tá an Eoraip ag dul i ngleic leis an dúshlán a bhaineann le ról ceannasach a imirt maidir le dlús a chur le claochlú comhshaoil na chéad ghlúine eile aerárthaí agus costais shochoíocha astaíochtaí gás ceaptha teasa san aer a inmheánú sa tsamhail ghnó le haghaidh aeriompair fad a leanann sí ar aghaidh ag áirithiú “cothrom na Féinne” i gcomhair táirgí Eorpacha ar an margadh domhanda. Dá bhrí sin, ba cheart don Chomhghnóthas um Eitlíocht Ghlan tacú leis na hionadaithe Eorpacha sna hiarrachtaí maidir le caighdeánú idirnáisiúnta agus reachtaíocht idirnáisiúnta.
- (54) Tháinig forbairt suntasach ar an tsuim a chuirtear sa hidrigin le 5 bliana anuas, agus tá Creat-Choinbhinsiún na Náisiún Aontaithe ar an Athrú Aeráide (Comhaontú Pháras) sínithe agus daingnithe ag na Ballstáit go léir ag 21ú Comhdháil de chuid na bPáirtithe (COP21). Is é is aidhm don Chomhaontú Glas don Eoraip an tAontas a chlaochlú ina shocharaí choir rathúil ina mbeidh geilleagar nua aimseartha iomaíoch, atá tiosach ar acmhainní, áit nach mbeidh aon ghlan-astaíochtaí gás ceaptha teasa ann faoi 2050 ar a dhéanaí. Áirítear hidrigin ghlan, cealla breosla, breoslaí malartacha eile agus stóráil fuinnimh i measc na réimsí tosaíochta. Tá hidrigin le feiceáil go ríshoiléir sna teachtaireachtaí ón gCoimisiún an 8 Iúil 2020 maidir le straitéis hidrigine le go mbeadh an Eoraip aeráidneodrach agus maidir le geilleagar aeráidneodrach a chumhachtú: Straitéis an Aontais Eorpaigh um Chomhtháthú Córais Fuinnimh, agus i seoladh na Comhghuaillíochta Eorpaí don Hidrigin Ghlan trína dtugtar na geallsealbhóirí uile le chéile chun riachtanais teicneolaíochta, deiseanna infheistíochta agus bacainní rialála a shainathint chun éiceachóras hidrigine glan a thógáil san Aontas lena rannchuideofar leis an spleáchas reatha ar bhreoslaí iontaise agus astaíochtaí gás ceaptha teasa in earnálacha ábhartha a laghdú. D'fhéadfadh an Chomhghnóthas um Hidrigin Ghlan glacadh torthaí taighde agus nuálaíochta (T&N) a chumasú trí chreataí infheistíochta, amhail an Comhaontas Eorpach um Hidrigin Ghlan agus Tionscadail Thábhachtacha ar mhaithe le Leas na hEorpa i gCoitinne (IPCEI) maidir le Hidrigin.
- (55) Tacaíodh le gníomhaíochtaí tiomnaithe taighde agus nuálaíochta a bhaineann le feidhmeanna hidrigine ó 2008, go príomha trí na Comhghnóthais um Chealla Breosla agus um Hidrigin, eadhon, Comhghnóthas FCH agus Comhghnóthas FCH 2 faoin Seachtú Clár Réime arna bhunú le Cinneadh Uimh. 1982/2006/CE ó Pharlaimint na hEorpa agus ón gComhairle ⁽¹⁷⁾ agus Fis 2020 chomh maith le tionscadail thraidisiúnta chomhoibriúchá, ag cumhdach gach céim/réimse de shlabhra luacha na hidrigine. Ba cheart don Chomhghnóthas um Hidrigin Ghlan

⁽¹⁶⁾ Rialachán (AE) 2018/1139 ó Pharlaimint na hEorpa agus ón gComhairle an 4 Iúil 2018 maidir le rialacha comhchoiteanna i réimse na heitlíochta sibhialta agus lena mbunaítear Gníomhaireacht Sábháilteachta Eitlíochta de chuid an Aontais Eorpaigh, agus lena leasaítear Rialachán (CE) Uimh. 2111/2005, Rialachán (CE) Uimh. 1008/2008, Rialachán (AE) Uimh. 996/2010, Rialachán (AE) Uimh. 376/2014 agus Treoir 2014/30/AE agus Treoir 2014/53/AE ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 552/2004 agus Rialachán (CE) Uimh. 216/2008 ó Pharlaimint na hEorpa agus ón gComhairle agus Rialachán (CEE) Uimh. 3922/91 ón gComhairle. (IO L 212, 22.8.2018, lch. 1).

⁽¹⁷⁾ Cinneadh Uimh. 1982/2006/CE ó Pharlaimint na hEorpa agus ón gComhairle an 18 Nollaig 2006 maidir le Seachtú Clár Réime an Chomhphobail Eorpaigh um thaighde, um fhorbairt theicneolaíoch agus um ghníomhaíochtaí léiriúcháin (2007-2013) (IO L 412, 30.12.2006, lch. 1)

acmhainneacht eolaíoch an Aontais a neartú agus a chomhtháthú chun dlús a chur le forbairt agus feabhsú ardfheidhmeanna hidrigine glaine atá réidh don mhargadh, ar fud úsáidí deiridh fuinnimh, iompair, tógála agus tionscail. Ní bheifear in ann é sin a dhéanamh ach má chuirtear neartú iomaíochais shlabhra luacha hidrigine an Aontais leis, go háirithe FBManna.

- (56) D'fhonn cuspóirí eolaíochta an Chomhghnóthais um Hidrigin Ghlan a bhaint amach, ba cheart deis a thabhairt do gach earnáil a bhaineann leis an ngeilleagar hidrigine a bheith rannpháirteach in ullmhú agus i gcur chun feidhme a Chláir Oibre Straitéisigh um Thaighde agus um Nuálaíocht. Leis na gníomhaíochtaí a dhéanann an Comhghnóthas um Hidrigin Ghlan, ba cheart conairí teicneolaíochta suaití mar rogha ar theicneolaíochtaí príomhshrutha a chur san áireamh. Ba cheart don earnáil phoiblí a bheith rannpháirteach, go háirithe údaráis réigiúnacha agus náisiúnta, agus údaráis náisiúnta freagrach as beartais aeráide agus bearta a bhaineann le sásraí margaidh a bhunú, chun na bearnaí idir forbairt teicneolaíochta atá réidh don mhargadh agus úsáid ar scála mór a líonadh.
- (57) Áirítear sa Chomhghnóthas um Hidrigin Ghlan an pobal taighde mar chomhalta den chomhlachas Hydrogen Europe Research, agus ar an gcaoi sin níor cheart comhlacht a thugann comhairle eolaíoch a bhunú.
- (58) Ós rud é gur féidir hidrigin a úsáid mar bhreosla, nó mar iompróir fuinnimh agus chun fuinneamh a stóráil, tá sé fíorriachtanach go mbunaítear comhar struchtúrtha lena lán comhpháirtíochtaí Eorpacha eile, le haghaidh úsáid deiridh go háirithe. Ba cheart don chomhpháirtíocht Eorpach um hidrigin ghlan idirghníomhú le hiompar de bhóthar agus iompar d'uisce atá saor ó astaíochtaí, iarnróid na hEorpa, eitlíocht ghlan, próisis don phláinéad agus comhpháirtíochtaí Eorpacha um chruach ghlan. Chun na críche sin, ba cheart struchtúr a bhunú a thuairiscíonn don Bhord Rialaithe chun comhar agus sineirgí idir na comhpháirtíochtaí sin i réimse na hidrigine a áirithiú. Bheadh an Comhghnóthas um Hidrigin Ghlan ar an aon chomhpháirtíocht a dhíríonn ar aghaidh a thabhairt ar theicneolaíochtaí táirgthe hidrigine. Ba cheart do chomhar le comhpháirtíochtaí úsáide deiridh díriú go háirithe ar an teicneolaíocht a léiriú agus sonraíochtaí a chomhshainiú.
- (59) Cuireann iarnróid le Limistéar Eorpach Iompair Aonair (SETA) agus is buneilimint iad de bheartas forbartha inbhuanaithe fadtéarmach an Aontais. I dtéarmaí méid eacnamaíoch, is é EUR 69 mbilliún oll-bhreisluch díreach earnáil iarnróid na hEorpa agus is ionann a holl-bhreisluch indíreach agus EUR 80 billiún. Tá 1,3 milliún duine fostaithe go díreach san earnáil iarnróid agus bhí de bheis ar mhilliún duine fostaithe go hindíreach.
- (60) Cuirtear i bhfios go láidir sa teachtaireacht ón gCoimisiún an 10 Márta 2020 maidir le *A New Industrial Strategy for Europe* [Straitéis Nua Thionsclaíoch don Eoraip] gur féidir le tionscail ghluaiseachta atá inbhuanaithe agus cliste, amhail tionscal an iarnróid, an t-aistriú digiteach agus glas a threorú, tacaíocht a thabhairt d'iomaíochas tionsclaíoch na hEorpa agus nascacht a fheabhsú, agus go bhfuil sé de fhreagracht ar na tionscail sin é sin a dhéanamh. Dá bhrí sin, ba cheart d'iompar de bhóthar, d'iarnróid d'eitlíocht agus d'uisce cur le laghdú 90 % ar astaíochtaí iompair faoin mbliain 2050. Mar ábhar tosaíochta, ba cheart sciar mór den 75 % de lasta intíre a iompraítear ar bhóithre inniu a aistriú chuig na hiarnróid agus chuig uiscebhealaí intíre.
- (61) Bunaíodh an Comhghnóthas Shift2Rail in 2014 chun gníomhaíochtaí taighde, forbartha agus bailíochtaithe an tionscnaimh Shift2Rail a bhí ann roimhe sin a bhainistiú ag cur cistiú ón earnáil phoiblí agus phríobháideach a sholáthair a chomhaltai le chéile agus ag tarraingt ar acmhainní teicniúla inmheánacha agus seachtracha. Bunaíodh leis cineálacha nua comhair, atá comhsheasmhach le rialacha iomaíochta, idir geallsealbhóirí ón slabhra luacha iomlán iarnróid agus ó lasmuigh den earnáil iarnróid thraidisiúnta, agus baineadh leas as taithí agus saineolas Ghníomhaireacht Iarnróid an Aontais Eorpaigh ar shaincheisteanna a bhaineann le hidir-inoibritheacht agus sábháilteacht.
- (62) Ba cheart é a bheith mar chuspóir an ag Comhghnóthas um Iarnród na hEorpa líonra iarnróid ardacmhainneachta comhtháite Eorpach chur ar fáil trí dheireadh a chur le bacainní don idir-inoibritheacht agus trí réitigh a sholáthar don chomhtháthú iomlán, lena gcuimhdaítear bainistíocht tráchta, feithiclí, bonneagar agus seirbhísí agus é d'aidhm aige tionscadail agus nuálaíochtaí a bheith á nglacadh agus á n-imscaradh níos tapúla a bhaint amach. Ba cheart go saothródh sé sin an póiteinséal ollmhór atá ann i leith digiteáil agus uathoibriú chun laghdú ar chostais an iompair d'iarnród, a acmhainneacht a fheabhsú agus cur lena sholúbhacht agus iontaofacht, agus ba cheart é a bhunú ar ollstruchtúr córais feidhme tagartha a dhéanann an earnáil a chomhroinnt, i gcomhar le Gníomhaireacht Iarnróid an Aontais Eorpaigh.

- (63) Ba cheart don Chomhghnóthas um Iarnród na hEorpa na nithe seo a leanas a shainiú ina Mháistirphlean: a ghníomhaíochtaí tosaíochta taighde agus nuálaíochta, agus an t-ollstruchtúr córais fhoriomlán agus cur chuige comhchuibhithe oibríochtúil, lena n-áirítear gníomhaíochtaí léirithe ar scála mór agus réimsí suaitheanta, atá de dhíth chun dlús a chur le dul i bhfeidhm nuálaíochtaí teicneolaíochta comhtháite, idir-inoibritheacha agus caighdeánaithe is gá chun tacú leis an Limistéar Eorpach Iarnróid Aonair.
- (64) Is córas casta é an t-iarnród, le hidirghníomhaíochtaí an-dlúth idir bainisteoirí bonneagair, gnóthais iarnróid (oibreoirí traenacha) agus a dtrealamh faoi seach (bonneagar agus rothstoc). Ní féidir nuálaíocht a chur ar fáil gan sonraíochtaí comhchoiteanna agus straitéis sa chóras iarnróid iomlán. Dá bhrí sin, ba cheart do Chólún Córasach an Chomhghnóthais um Iarnród na hEorpa, a bhaileoidh ionchur ó gheallsealbhoirí ábhartha lasmuigh den chomhghnóthas agus laistigh de, an earnáil a chumasú chun teacht le chéile ar choincheap oibríochtúil aonair agus ollstruchtúr córais, lena n-áirítear sainiú ar sheirbhísí, bloic feidhme, agus comhéadain, atá mar bhunús le hoibríochtaí an chórais iarnróid. Ba cheart dó an creat foriomlán a sholáthar le háirithiú go ndíreofar le taighde ar riachtanais chustaiméirí agus ar riachtanais oibríochtúla a chomhaontaítear agus a chomhroinntear go comhpháirteach. Ba cheart go dtabharfadh an t-aschur ón gColún Córasach tacaíocht d'idir-inoibritheacht don ghréasán iarnróid ina iomláine, lena n-áirítear croíghréasán cuimsitheach TEN-T agus príomhlínte agus línte réigiúnacha nach n-áirítear in TEN-T. Ba cheart do mhúnla rialachais agus próiseas cinnteoireachta Chomhghnóthas um Iarnród na hEorpa a bheith ina léiriú ar ról ceannasach an Choimisiúin maidir le córas iarnróid na hEorpa a aontú agus a chomhtháthú, go háirithe maidir leis an gcoincheap aonair oibríochtúil agus an t-ollstruchtúr córais a sholáthar go tapa agus go héifeachtach, agus na comhpháirtithe príobháideacha a bheith rannpháirteach i ról chomhairleacha agus tacaíochta teicniúla ag an am céanna.
- (65) D'fhonn a áirithiú go n-úsáidtear torthaí taighde leibhéal uillmhachta teicneolaíochta (LUT) íseal go héifeachtach ag LUTanna níos airde, agus go háirithe sa Chomhghnóthas um Iarnród na hEorpa, ba cheart do chláróifig an Chomhghnóthais um Iarnród na hEorpa gníomhaíochtaí den sórt sin a chur chun feidhme.
- (66) I gcás inar gá, d'fhonn aistriú agus leathnú tapa ballraíochta a áirithiú, ba cheart ligean do Bhord Rialála an Chomhghnóthais um Iarnród na hEorpa le comhaltaí comhlachaithe a roghnú ar bhonn torthaí glao ar léiriú spéise a sheolann an Coimisiún.
- (67) I gcomhthéacs thosaíochtaí an Choimisiúin i leith Spriocanna Forbartha Inbhuanaithe na Náisiún Aontaithe, agus Sprioc Forbartha Inbhuanaithe 3 go háirithe, agus na teachtaireachta comhpháirtí ón gCoimisiún an 9 Márta 2020 dar teideal *Towards a comprehensive Strategy with Africa* [I dtreo Straitéis chuimsitheach leis an Afraic], tá an tAontas tiomanta do chur le saol sláintiúil agus folláine a chur chun cinn le haghaidh gach duine, do thógáil ar chomhpháirtíocht níos láidre fiú idir an dá mhór-roinn agus do thacú le hacmhainneachtaí taighde agus nuálaíochta san Afraic. Ba cheart do Chomhghnóthas Shláinte Dhomhanda EDCTP3 aghaidh a thabhairt ar an easpa diagnóisice, cóireálacha agus vacsaíní iomchuí, i measc teicneolaíochtaí sláinte eile mar a thugtar orthu, atá ann chun dul i ngleic le galair thógálacha amhail VEID, maláire agus eitinn ach le galair thógálacha eile a bhaineann le bochtaineacht agus a ndéantar siléig iontu, atá coitianta san Afraic, go háirithe san Afraic Fho-Shahárach freisin. Léiríodh le paindéim COVID-19 gur féidir le galair thógálacha scaipeadh go tapa ar fud an domhain mar gheall ar nascacht mhéadaithe idir réigiúin éagsúla ar domhan, trí thrádáil dhomhanda agus trí thurasóireacht. Dá bhrí sin, tá sé rithabhachtach go bhforbraítear teicneolaíochtaí sláinte chun teorainn a chur le scaipeadh galar tógálach, agus chun troid ina n-aghaidh nuair a scaiptear iad, chun sláinte saoránach sna tíortha lena mbaineann agus san Aontas a chosaint. D'fhonn ceannaireacht sláinte domhanda níos láidre ná an tionscnamh EDCTP2 a bhí ann roimhe seo a bhaint amach, ba cheart raon feidhme na comhpháirtíochta a leathnú chun freagairt ar bhagairtí galar tógálach atá ag teacht chun cinn, na fadhbanna méadaitheacha a bhaineann le frithsheasmhacht fhrithmhiocróbach agus comhghalrachtaí galar neamhthógálach a chumhdach.
- (68) Is gá rannpháirtíocht a fháil ó shraith mhór gníomhaithe agus gealltanais fhadtéarmacha chun dul i ngleic le galair thógálacha a dhéanann difear don Afraic Fho-Shahárach le huirlisí teicneolaíochta nua-aimseartha. Ba cheart do Chomhghnóthas Shláinte Dhomhanda EDCTP3 idirghabháil a dhéanamh chun líonrú agus comhar Thuaidh–Theas agus Theas–Theas atá tairbheach agus inbhuanaithe a bhaint amach, ag cruthú caidreamh le neart eagraíochtaí san earnáil phríobháideach agus phoiblí chun comhar tionscadal agus institiúideach a neartú. Ba cheart don chlár cuidiú chun comhar nua Thuaidh–Theas agus Theas–Theas a bhunú chun staidéir iltíre, ilsuímh a dhéanamh san Afraic Fho-Shahárach. Ina theannta sin, ba cheart do chomhdháil idirnáisiúnta tráthrialta, Fóram Comhpháirtíochta maidir le Trialacha Cliniciúla idir Tíortha Eorpacha agus Tíortha i mBéal Forbartha (EDCTP), a bheith mar ardán i gcomhair eolaithe agus líonraí ábhartha ón Eoraip, Afraic agus áiteanna eile, chun a dtorthaí agus a smaointe a roinnt agus naisc comhair a bhunú.

- (69) Ba cheart do Chomhghnóthas Shláinte Dhomhanda EDCTP3 tógáil ar an taithí a fuarthas le linn chlár EDCTP agus EDCTP2, trí infheistíochtaí an Aontais, na mBallstát, na dtíortha comhlachaithe agus na dtíortha Afracacha a chur chun tairbhe chun torthaí a bhaint amach nach mbainfeadh tíortha aonair ná creatchlár taighde an Aontais amach ar a n-aonar. Ba cheart do Chomhlachas EDCTP, a dhéanann ionadaíocht ar na stáit a ghlacann páirt sa chlár, rannchuidiú le gníomhaíochtaí breise agus d'fhéadfadh sé ranníocaíocht airgeadais a thabhairt do Chlár EDCTP3 agus dá chur chun feidhme. Ba cheart dó rannpháirtíocht bhríoch na dtíortha Fo-Shaháracha a sholáthar sa phróiseas cinnteoireachta, rud atá fíor-riachtanach chun dul i ngleic le hualach na ngalar i dtíortha Fo-Shaháracha. Ba cheart do chisteoirí taighde idirnáisiúnta eile, amhail daonchairde, an tionscal cógaisíochta agus tríú tíortha eile, a bheith mar chuid den chomhghnóthas, agus ba cheart dóibh cur leis an gcomhpháirtíocht mar chomhpháirtithe rannchuidithe ar bhonn *ad hoc*. Thairis sin, d'fhonn tionchar an chlár a mhéadú, ba cheart do Chomhghnóthas Shláinte Dhomhanda EDCTP3 a bheith in ann eintitis dhlítheanacha ar féidir a bheith rannpháirteach i ngníomhaíochtaí indíreacha a shainaithint, i gcás glaonna sonracha. Ba cheart é a bheith indéanta foráil a dhéanamh sa chlár oibre nach mbeidh eintitis dhlítheanacha den sórt sin incháilithe chun cistiú a fháil ón gcomhghnóthas.
- (70) Áirítear le Comhghnóthas Shláinte Dhomhanda EDCTP3 Ballstáit agus tíortha comhlachaithe mar chomhaltáí de Chomhlachas EDCTP, agus dá bhrí sin níor cheart grúpa ionadaithe na stát a bhunú.
- (71) Tá sé fíor-riachtanach go bhfuil na gníomhaíochtaí a chistíonn Comhghnóthas Shláinte Dhomhanda EDCTP3 nó a chumhdaítear faoina chlár oibre, i gcomhréir iomlán le Cairt um Chearta Bunúsacha an Aontais Eorpaigh, an Coinbhinsiún Eorpach um Chearta an Duine agus a Phrótacail Fhorlíontacha, na príonsabail eiticíúla i nDearbhú Heilsincí de chuid Chomhlachas Dhomhanda na Lianna Míochaine, 2008, na caighdeáin dea-chleachtas a ghlac an Chomhdháil Idirnáisiúnta um Chomhchuidibhiú Ceanglas Teicniúil i ndáil le Clárú Earraí Cógaisíochta atá le hÚsáid ag an Duine, reachtaíocht ábhartha an Aontais agus riachtanais eiticíúla áitiúla na dtíortha ina dtabharfar faoi na gníomhaíochtaí taighde. Thairis sin, ba cheart do Chomhghnóthas Shláinte Dhomhanda EDCTP3 a éiliú go bhfuil na nuálaíochtaí agus na hidirghabhálacha a fhorbraítear bunaithe ar thorthaí na ngníomhaíochtaí indíreacha a dtacaíonn an clár leo inacmhainne agus inrochtana do dhaonraí leochaileacha.
- (72) Má tá Comhghnóthas Shláinte Dhomhanda EDCTP3 le bheith rathúil agus d'fhonn rannpháirtíocht sa chomhpháirtíocht a spreagadh, ba cheart do chistiú an chomhghnóthais a bheith teoranta d'eintitis dhlítheanacha atá bunaithe i mBallstáit nó tíortha comhlachaithe nó atá bunaithe i gcomhstáit de chuid Chomhlachas EDCTP, i gcomhréir leis an Rialachán maidir le Fís Eorpach. Ba cheart do na heintitis a bhunaítear i dtíortha na hAfraice Fo-Shaháraí agus i dtríú tíortha eile a bheith in ann a bheith rannpháirteach sna glaonna fós gan cistiú a fháil. Thairis sin, ba cheart d'eintitis atá bunaithe i dtíortha seachas comhaltáí Chomhlachas EDCTP3 a bheith incháilithe chun cistiú a fháil le haghaidh ábhar glaonna sonracha freisin nó i gcás glao ina dteitear i ngleic le héigeandáil sláinte poiblí, áit a ndéantar foráil ina leith sa chlár oibre. Ba cheart do Chomhghnóthas Shláinte Dhomhanda EDCTP3 gach beart is iomchuí a ghlacadh, lena n-áirítear bearta conarthacha, chun leasanna airgeadais an Aontais a chosaint. Ba cheart a fhéachaint le comhaontuithe eolaíochta agus teicneolaíochta a thabhairt i gcrích le tríú tíortha freisin. Sula dtabharfar i gcrích iad, i gcás ina mbeidh eintitis atá bunaithe i dtríú tír gan comhaontú den sórt sin rannpháirteach le cistiú i ngníomhaíocht indíreach, ba cheart do Chomhghnóthas Shláinte Dhomhanda EDCTP3, eadhon bearta malartacha a chur i bhfeidhm chun leasanna an Aontais a choimirciú: ba cheart do chomhordaitheoir airgeadais na ngníomhaíochta a bheith bunaithe i mBallstát nó i dtír comhlachaithe agus ba cheart méid an réamh-mhaoinithe chomh maith le forálacha dliteanais an chomhaontaithe deontais a oiriúnú chun na rioscaí airgeadais a chur san áireamh go leordhóthanach.
- (73) I gcomhthéacs tosaíochtaí an Choimisiúin, is iad sin, “Gilleagar a fhóireann do dhaoine” agus “Eoraip atá oiriúnach don Aois Dhigiteach”, ba cheart do thionscal na hEorpa, lena n-áirítear FBManna, éirí níos glaise, níos ciorcláí agus níos digítí fad a fhanann siad iomaíoch ar scála domhanda. Chuir an Coimisiún béim ar ról feistí agus teicneolaíochtaí digiteacha leighis a théann i ngleic le dúshlán atá ag teacht chun cinn agus le húsáid ríomhsheirbhísí sláinte chun cúram sláinte ardchaighdeáin a sholáthar, chomh maith le glao chun soláthar cógas leighis inacmhainne a áirithiú chun freastal ar riachtanais an Aontais, fad a thacaítear le tionscal cógaisíochta Eorpach atá nuálach agus ceannródaíoch. Is é is aidhm do Chomhghnóthas an Tionscnaimh um Shláinte Nuálach rannchuidiú chun iomaíochas thionscal sláinte an Aontais a neartú, tionscal atá ina bhunchloch de gheilleagar eolasbhunaithe an Aontais, chun gníomhaíocht eacnamaíoch maidir le forbairt teicneolaíochtaí sláinte a mhéadú, go háirithe réitigh sláinte chomhtháite, agus dá bhrí sin feidhmiú mar uirlis chun ceannaireacht theicneolaíoch a mhéadú agus an claochlú digiteach a chothú inár sochaithe. Is féidir tosaíochtaí polaitíochta den sórt sin a bhaint amach ach na gníomhaithe is tábhachtaí a thabhairt le chéile eadhon an saol acadúil, cuideachtaí de mhéideanna éagsúla agus úsáideoirí deiridh nuálaíochtaí sláinte, faoi scáth comhpháirtíochta príobháidí poiblí i dtaighde agus

nuálaíocht sláinte. Ba cheart do Chomhghnóthas an Tionscnaimh um Shláinte Nuálach cuidiú le cuspóirí “Plean Sáraithe Ailse na hEorpa” agus “Plean Gníomhaíochta Eorpach ‘Aon Sláinte Amháin’ i gcoinne Frithsheasmhacht in aghaidh Ábhair Fhrithmhiocróbacha” a bhaint amach. Ba cheart do Chomhghnóthas an Tionscnaimh um Shláinte Nuálach a bheith i gcomhréir leis na teachtaireachtaí ón gComhairle an 10 Márta 2020 maidir le Straitéis Nua Eorpach maidir le Tionsclaíocht, an 10 Márta 2020 maidir le Straitéis FBM le haghaidh Eoraip inbhuanaithe dhigiteach agus an 25 Samhain 2020 maidir leisan Straitéis Chógaisíochta don Eoraip.

- (74) Tógann Comhghnóthas an Tionscnaimh um Shláinte Nuálach ar an taithí a fuarthas ón gComhghnóthas maidir leis an Tionscnamh um Míochaine Nuálaíoch 2 (Comhghnóthas IMI2) lena n-áirítear an obair a rinne an tionscnamh roimhe sin chun paindéim COVID-19 a chomhrac. I gcomhréir leis na moltaí ón meastóireacht eatramhach ar Chomhghnóthas IMI2, ba cheart do thionscnamh a thagann ina dhiaidh cur ar chumas earnálacha eile tionscail teagmháil ghníomhach a dhéanamh le tionscal na cógaisíochta chun leas a bhaint as a saineolas maidir le hidirghabhálacha nua cúraim sláinte a fhorbairt. Dá bhrí sin, is gá do na hearnálacha tionscail na hearnálacha bithchógaisíochta, biteicneolaíochta agus teicneolaíochtaí sláinte a chumhdach, lena n-áirítear cuideachtaí atá gníomhach sa réimse digiteach. Ba cheart cosc, diagnóis, cóireáil agus bainistíocht galar a chumhdach i raon feidhme an chomhghnóthais agus ní mór é a bhunú ag tabhairt aird iomchuí ar ualach ard na n-othar nó na sochaí nó ar an dá rud mar gheall ar dhéine an ghalair nó an líon daoine a ndéanann an galar difear dóibh, chomh maith le tionchar eacnamaíoch ard an ghalair le haghaidh othar agus le haghaidh córais cúraim sláinte. Ní mór do na gníomhaíochtaí cistithe freagairt ar riachtanais shláinte poiblí an Aontais, ag tacú le forbairt nuálaíochtaí sláinte amach anseo atá sábháilte, duinelárnach, éifeachtach, costéifeachtach agus inacmhainne le haghaidh othar agus córais sláinte poiblí.
- (75) D’fhonn an deis is fearr chun smaointe eolaíochta nua, taighde rathúil agus gníomhaíochtaí nuálaíochta a áirithiú, ba cheart do phríomhghníomhaithe Chomhghnóthas an Tionscnaimh um Shláinte Nuálach a bheith ina dtaighdeoirí ó chineálacha éagsúla eintiteas, idir eintitis phoiblí agus eintitis phríobháideacha. An tráth céanna, ba cheart d’úsáideoirí deiridh amhail saoránaigh, gairmithe cúraim sláinte agus soláthraithe cúraim sláinte an Aontais, ionchur a sholáthar le haghaidh dhearadh straitéiseach agus ghníomhaíochtaí an chomhghnóthais, ag áirithiú go bhfreastalaíonn an tionscnamh ar a riachtanais. Thairis sin, ba cheart d’údaráis rialála náisiúnta agus ar fud an Aontais, comhlachtaí measúnaithe teicneolaíochta sláinte agus íocóirí cúraim sláinte ionchur luath a sholáthar ar ghníomhaíochtaí na comhpháirtíochta, fad a áirithítear nach bhfuil aon choinbhleacht leasa ann, d’fhonn cur leis an dóchúlacht go gcomhlíonfaidh torthaí na ngníomhaíochtaí cistithe na ceanglais le haghaidh glacadh agus ag baint amach na dtionchar ionchais dá bharr. Ba cheart go gcuideodh gach ionchur den sórt sin le hiarrachtaí dírithe níos fearr i réimsí riachtanais nach bhfreastalaítear orthu.
- (76) Is dúshlán agus bagairtí domhanda iad na dúshlán agus na tubaistí sláinte atá ann faoi láthair. Dá bhrí sin, ba cheart do Chomhghnóthas an Tionscnaimh um Shláinte Nuálach a bheith oscailte do rannpháirtíocht ó ghníomhaithe léinn, tionscail agus rialála, d’fhonn tairbhe a bhaint as rochtain níos leithne ar shonraí agus saineolas, chun freagairt ar bhagairtí sláinte atá ag teacht chun cinn agus chun an tionchar sochaíoch is gá a bhaint amach, go háirithe torthaí sláinte níos fearr do shaoránaigh an Aontais. An tráth céanna, ba cheart an chuid is mó de ghníomhaíochtaí na comhpháirtíochta a dhéanamh i mBallstáit agus i dtíortha comhlachaithe Fís Eorpach.
- (77) Ba cheart cuspóirí na comhpháirtíochta a dhíríú ar an réimse réamhiomaíochta, dá bhrí sin ag cruthú spás sábháilte le haghaidh comhar éifeachtúil idir cuideachtaí atá gníomhach i dteicneolaíochtaí sláinte éagsúla. D’fhonn cineál comhtháiteach Chomhghnóthas an Tionscnaimh um Shláinte Nuálach a léiriú, cuidiú leis na sadhlanna idir earnálacha na tionscail sláinte a bhriseadh agus an comhar idir tionscal agus an saol acadúil a neartú, ba cheart do thromlach na dtionscadal atá cistithe ag an tionscnamh a bheith trasearnálach.
- (78) Tagraíonn an téarma Eochairtheicneolaíochtaí Digiteacha do chomhpháirteanna agus córais leictreonacha atá mar bhonn taca faoi gach earnáil mhór eacnamaíoch. Chuir an Coimisiún an gá atá le máistreacht a fháil ar na teicneolaíochtaí den sórt sin san Eoraip i dtábhacht, go háirithe i gcomhthéacs tosaíochtaí beartais Eorpacha, amhail ceannaireacht dhigiteach. Éilíonn tábhacht an réimse agus na dúshlán a dtéann geallsealbhóirí san Aontas i ngleic leo gníomhaíocht phráinneach d’fhonn a áirithiú nach bhfágfar aon lúb ar lár i nuálaíocht agus slabhraí luacha na hEorpa. Ba cheart sásra a bhunú ar leibhéal an Aontais dá bharr chun soláthar taithí le haghaidh taighde agus nuálaíochta le comhpháirteanna agus córais leictreonacha ó na Ballstáit, ón Aontas agus ón earnáil phríobháideach a chomhtháthú agus a dhíríú.

- (79) Ba cheart don Chomhghnóthas Eochairtheicneolaíochtaí Digiteacha dul i ngleic le hábhair atá sainmhínithe go soiléir a chuirfidh ar chumas tionscal Eorpach trí chéile na teicneolaíochtaí is nuálaí a dhearadh, a mhonarú agus a úsáid i gcomhpháirteanna agus córais leictreonacha. Tá gá le tacaíocht airgeadais struchtúrtha agus chomhordaithe ar an leibhéal Eorpach chun cuidiú le foirne taighde agus le tionscail Eorpacha na láidreachtaí atá acu faoi láthair a choinneáil ar bhonn ceannródaíoch i gcomhthéacs idirnáisiúnta atá an-iomaíoch agus chun na bearnaí sna teicneolaíochtaí atá criticiúil le haghaidh claochlú digiteach san Eoraip a léiríonn príomhluachanna an Aontais, lena n-áirítear príobháideacht agus iontaobhas, slándáil agus sábháilteacht, a dhúnadh. Tá comhar i measc gheallsealbhoirí an éiceachórais, a dhéanann ionadaíocht ar gach sciar de na slabhraí luacha, rithábachtach i gcomhair forbairt teicneolaíochtaí nua agus ghlacadh tapa na nuálaíochta sa mhargadh. Tá oscailteacht agus solúbthacht chun geallsealbhoirí, lena n-áirítear FBManna, a chomhtháthú i réimsí teicneolaíochta nó i réimsí cóngaracha, nó sa dá réimse, rithábachtach freisin.
- (80) Ba cheart don Chomhghnóthas Eochairtheicneolaíochtaí Digiteacha na hacmhainní airgeadais agus teicniúla atá riachtanach a thabhairt le chéile chun máistreacht a fháil ar luas síor-mhéadaithe na nuálaíochta sa réimse seo, agus as sin go gcruthófar torthaí tábhachtacha don tsochaí, d'fhonn na rioscaí a ghlacfar a roinnt amach agus dul i mbun oibre le chéile trí straitéisí agus infheistíochtaí a ailíniú i dtreo an leasa choitinn san Eoraip. Dá bhrí sin, ba cheart gurbh iad comhaltaí an Chomhghnóthais um Eochairtheicneolaíochtaí Digiteacha an tAontas, na Ballstáit agus tíortha comhlachaithe le Fís Eorpach ar bhonn deonach, agus comhlachais mar chomhaltaí príobháideacha a dhéanann ionadaíocht dá gcomheintitis. Déanfaidh rannpháirtíocht na mBallstát ailíniú comhleanúnach le clár agus straitéisí náisiúnta a éascú a thuilleadh, ag laghdú forluí agus dheighilt na n-iarrachtaí fad a áirithítear sineirgí i measc geallsealbhoirí agus gníomhaíochtaí.
- (81) Agus rannchuidithe na stát rannpháirteach lena rannpháirtithe náisiúnta á gcur chun feidhme i ngníomhaíochtaí indíreacha, ba cheart don Chomhghnóthas Eochairtheicneolaíochtaí Digiteacha a chur san áireamh go bhfuil ar na stáit rannpháirteacha rialacha dochta maidir leis an mbuiséad náisiúnta a chomhlíonadh. I ndáil leis sin, ba cheart do na stáit rannpháirteacha gealltanais tháscacha airgeadais a thabhairt sula nglacfar gach clár oibre bliantúil agus ba cheart dóibh comhaontuithe atá ceangailteach ó thaobh dlí a thabhairt i gcrích leis an gcomhghnóthas, agus gealltanais á thabhairt ag na stáit rannpháirteacha na socruithe íocaíochta a dhéanamh maidir lena rannchuidiú le gníomhaíochtaí indíreacha feadh shaolré an chomhghnóthais. Ba cheart comhaontuithe den sórt sin a chur i gcrích i gcomhthéacs an nós imeachta bhuiséadaigh bhliantúil agus chlársceidealú an chomhghnóthais. Ba cheart don Bhord Rialaithe an clár oibre bliantúil a ghlacadh agus aird chuí aige ar na gealltanais tháscacha sin. Ba cheart do Bhord na nÚdarás Poiblí tograí a roghnú. Tar éis na céimeanna sin amháin, agus ag teacht le rialacha airgeadais an chomhghnóthais, ar cheart don oifigeach údaraithe na tiomantais bhuiséadacha agus dlíthiúla a dhéanamh le haghaidh na ngníomhaíochtaí indíreacha sin.
- (82) Ag leanúint ar aghaidh ar an gcleachtas a bunaíodh i gComhghnóthas ECSEL, tá gá le maolú ar Airteagal 34 den Rialachán maidir le Fís Eorpach d'fhonn rátaí aisíocaíochtaí éagsúla a cheadú ag brath ar an gcineál rannpháirtithe, eadhon FBManna agus eintitis dhlítheanacha neamhbhrabúsacha, agus ar an gcineál gníomhaíochta, atá le cur chun feidhme i gcónaí i measc tairbhíthe ó gach stát rannpháirteach. Ba cheart an chothromaíocht chearta a áirithiú idir rannpháirtíocht geallsealbhoirí i ngníomhaíochtaí atá cistithe ag an gComhghnóthas Eochairtheicneolaíochtaí Digiteacha agus léibhéal rannpháirtíochta níos airde ó FBManna a chothú mar a mholtar sa mheastóireacht eatramhach ar Chomhghnóthas ECSEL.
- (83) Áirítear sa Chomhghnóthas um Eochairtheicneolaíochtaí Digiteacha Ballstáit agus tíortha comhlachaithe mar chomhaltaí de Bhord na nÚdarás Poiblí, agus dá bhrí sin níor cheart grúpa ionadaithe na stát a bhunú.
- (84) Féachann creat dlíthiúil Aerspáis Eorpaigh Aonair an Aontais arna bhunú le Rialachán (CE) Uimh. 549/2004 ó Pharlaimint na hEorpa agus ón gComhairle ⁽¹⁸⁾ le córas bainistíochta aerthráchta (BAT) na hEorpa a athchóiriú trí ghníomhaíochtaí institiúideacha, oibríochtúla, teicneolaíochta agus rialála chun a fheidhmiúlacht i dtéarmaí acmhainneachta, sábháilteachta, éifeachtúlachta agus tionchar comhshaoil a fheabhsú.

⁽¹⁸⁾ Rialachán (CE) Uimh. 549/2004 ó Pharlaimint na hEorpa agus ón gComhairle an 10 Márta 2004 lena leagtar síos an creat chun an t-aerspás Eorpach aonair a chruthú (IO L 96, 31.3.2004, lch. 1).

- (85) Is é is aidhm don tionscadal um Fhorbairt agus Taighde BAT san Aerspás Eorpach Aonair (“tionscadal SESAR”) arna bhunú le Rialachán (CE) Uimh. 219/2007 ón gComhairle ⁽¹⁹⁾ an bhainistíocht aerthráchta a nuachóiriú agus nuálaíocht teicneolaíochta agus oibríochtúil a chnuasú chun tacú leis an aerpsás Eorpach aonair. Tá sé mar aidhm aige réitigh theicneolaíochta a sholáthar chun BAT ardfeidhmíochta a bhaint amach faoi 2035 chun feidhmiú na hearnála aeriompair a bheidh neamhphlúchta, níos sábháilte fiú agus níos neamhdhiobhálaí don chomhshaol agus don aeráid a chumasú, i gcomhréir leis an gComhaontú Glas don Eoraip agus an Dlí Aeráide Eorpach. Tá trí phríoiseas idirghaolmhara, leanúnacha agus chomhoibríocha atá ag athrú de shíor mar chuid de thionscadal SESAR agus déantar leo na córais nuálaíochta teicneolaíochta agus na nósanna imeachta oibríochtúla is bun leis an aerpsás digiteach Eorpach mar a shainítear i Máistirphlean Eorpach BAT a shainiú, a fhorbairt agus a úsáid dá dtagraítear i gCinneadh 2009/320/CE ón gComhairle ⁽²⁰⁾.
- (86) Is é an “Máistirphlean Eorpach BAT” an uirlis pleanála le haghaidh nuachóiriú BAT ar fud na hEorpa, ag nascadh gníomhaíochtaí taighde agus nuálaíochta BAT le cásanna gníomhaíochtaí imscartha chun feidhmiúlacht chuspóirí an Aerspáis Eorpaigh Aonair a bhaint amach.
- (87) Bunaíodh Comhghnóthas SESAR agus is é a bhí mar chuspóir leis bainistíocht a dhéanamh ar chéimeanna sainithe agus forbartha thionscadal SESAR, ag cur cistiú ón earnáil phoiblí agus phríobháideach a sholáthair a chomhaltáí le chéile agus ag tarraingt ar acmhainní teicniúla inmheánacha agus seachtracha, chomh maith le Máistirphlean Eorpach BAT a fhorghníomhú agus a thabhairt cothrom le dáta, nuair is gá. Bunaíodh cineál nua comhair leis, is é sin comhar idir geallsealbhóirí in earnáil áit nach féidir dul chun cinn a dhéanamh ach nuair a chuireann gach geallsealbhóir réitigh nua chun feidhme ar bhealach sioncrónaithe. I bhfianaise bhunú rathúil an ainm branda “SESAR”, ba cheart do Chomhghnóthas Taighde BAT 3 an Aerspáis Eorpaigh Aonair nua leanúint ar aghaidh á úsáid.
- (88) Ba cheart do Chomhghnóthas Taighde BAT 3 an Aerspáis Eorpaigh Aonair tógáil ar an taithí a fuarthas ó Chomhghnóthas SESAR agus leanúint lena ról comhordaithe maidir le taighde BAT san Aontas. Ba cheart acmhainneacht taighde agus nuálaíochta san Eoraip a neartú agus a chomhtháthú a thuilleadh a bheith mar phríomhchuspóirí Chomhghnóthas Taighde BAT 3 an Aerspáis Eorpaigh Aonair, ag cuidiú le dlús a chur le digiteáil na hearnála agus earnáil níos athléimní agus inscálaithe i leith athruithe i dtrácht a dhéanamh di. Ba cheart dó iomaíochas aeriompair le foireann agus iompair aeir gan foireann agus seirbhísí BAT a neartú, tríd an nuálaíocht, chun tacú le téarnamh agus fás eacnamaíoch. Ba cheart dó glacadh sa mhargadh le réitigh nuálacha a fhorbairt agus dlús a chur leis chun an t-aerspás san Aerspás Eorpach Aonair a bhunú mar an aerpsás is éifeachtúla agus is neamhdhiobhálaí don chomhshaol don eitilt ar domhan.
- (89) Ba cheart do Chomhghnóthas nua Taighde BAT 3 an Aerspáis Eorpaigh Aonair a bheith in ann ionchur teicniúil a fhorbairt agus a bhailíochtú ag tabhairt cúnamh don Choimisiún le gníomhaíochtaí rialála in BAT, mar shampla. ag ullmhú na doiciméadachta uile le haghaidh na dtionscadal coiteann a bhunaítear faoi Rialachán ó Pharlaimint na hEorpa agus ón gComhairle maidir le cur chun feidhme an Aerspáis Eorpaigh Aonair, ag tabhairt faoi staidéir theicniúla nó ag tacú le gníomhaíochtaí um chaighdeánú. Ba cheart dó maoirseacht an Máistirphlean Eorpaigh BAT arna fhorghníomhú ag Cinneadh 2009/320/CE, lena n-áirítear an faireachán, an tuairisciú agus an nuashonrú a ghabhann leis, a áirithiú freisin. Ina theannta sin, ba cheart vótaí a bheith ag an gCoimisiún vótaí i gcomhréir le ranníocaíocht an Aontais sa bhuiséad, agus 25 % de na vótaí ar a laghad. Áirithítear leis an socrú sin go gcoinníonn an Coimisiún cumas láidir an obair a dhéanann an Comhghnóthas maidir leis na cúraimí sin a stiúradh, ó thaobh beartais de, trí na sásraí maoirseachta neartaithe a bunaíodh le haghaidh eintiteas mar sin.
- (90) Ba cheart rannpháirtíocht i gComhghnóthas Taighde BAT 3 an Aerspáis Eorpaigh Aonair a bheith oscailte don raon agus don ionadaíocht geallsealbhóirí is forleithne agus is féidir ó gach Ballstát agus tír chomhlachaithe le Fís Eorpach, lena n-áirítear FBManna, trí chineálacha éagsúla rannpháirtíochta. Go háirithe, ba cheart cothromaíocht chuí idir monaróirí trealaimh don eitlíocht le foireann agus gan foireann, úsáideoirí aerpsáis, soláthraithe seirbhísí aerloingseoireachta, aerfoirt agus comhlachais foirne míleata agus gairmithe, a áirithiú sa rannpháirtíocht, agus deiseanna a thairiscint do FBManna, don saol acadúil agus d’eagraíochtaí taighde. D’fhonn na cuir chuige a bhfuil an gealladh is mó fúthu agus na heintitis atá in ann iad a bhaint amach a shainaithint, sheol an Coimisiún glao ar léiriú spéise le haghaidh comhaltáí féideartha. Ba cheart go gceadófaí don Bhord Rialála comhaltáí comhlachaithe a roghnú ar bhonn thorthaí an ghlaio sin d’fhonn foráil a dhéanamh maidir le leathnú tapa an ghrúpa comhaltáí.

⁽¹⁹⁾ Rialachán (CE) Uimh. 219/2007 ón gComhairle an 27 Feabhra 2007 maidir le Comhghnóthas a bhunú chun glúin nua an chórais Eorpaigh um bainistíocht aerthráchta (SESAR) a fhorbairt (IO L 64, 2.3.2007, lch. 1).

⁽²⁰⁾ Cinneadh 2009/320/CE ón gComhairle an 30 Márta 2009 lena dtacaítear leis an Máistirphlean Eorpach um Bainistíocht Aerthráchta de chuid thionscadal Taighde BAT Aerspáis Aonair Eorpaigh (SESAR) (IO L 95, 9.4.2009, lch. 41).

- (91) Is iad úsáideoirí aerispáis, a chuireann go hindíreach leis na hiarrachtaí taighde agus forbartha atá cistithe ag geallsealbhóirí móra BAT, amhail soláthraithe seirbhísí aerloingseoireachta nó an tionscal monaraithe a thógann agus a fheistíonn na haerárthaí a úsáideann na húsáideoirí aerispáis, a ghlacfaidh na táillí cúrsa ina n-iomláine. Dá bhrí sin, ba cheart ionadaíocht iomchuí a thabhairt d'úsáideoirí aerispáis laistigh de Bhord Rialála Chomhghnóthas Taighde BAT 3 an Aerspáis Eorpaigh Aonair.
- (92) D'fhonn a áirithiú go n-úsáidtear torthaí taighde taiscéalaíoch BAT (LUTanna ísle) go héifeachtach ag LUTanna níos airde, agus go háirithe i gComhghnóthas Taighde BAT 3 an Aerspáis Eorpaigh Aonair, ba cheart do chláróifig an chomhghnóthais bainistíocht a dhéanamh ar ghníomhaíochtaí den sórt sin.
- (93) Tá bonneagar iomchuí agus na seirbhísí tacaíochta riaracháin, TF, cumarsáide agus lóistíochta is gá ag an nGníomhaireacht Eurocontrol. Ba cheart do Chomhghnóthas Taighde BAT 3 an Aerspáis Eorpaigh Aonair tairbhe a bhaint as bonneagar agus seirbhísí den sórt sin ó Eurocontrol. Sa chomhthéacs sin, tá roinnt sineirgí féideartha ann is féidir a chruthú ag comhthiomsú acmhainní riaracháin le Comhghnóthais eile trí chúloifig choiteann. Ar an gcúis sin, ba cheart do Chomhghnóthas Taighde BAT 3 an Aerspáis Eorpaigh Aonair rogha a dhéanamh gan bheith páirteach sna socrúithe cúloifige a bhunaítear leis an Rialachán seo.
- (94) Bunaíodh Comhlachas Bonneagair um Líonraí agus Seirbhísí Cliste 6G (6G-IA) ag tógáil ar an gcomhlachas réamhtheachtach, agus is é atá mar chuspóir aige bonn leathan geallsealbhóirí a chruthú chun cuspóirí chomhpháirtíochta an Chomhghnóthais um Líonraí agus Seirbhísí Cliste a áirithiú. Cé nach bhfuiltear ag súil ach go mbeidh líon teoranta comheintiteas agus eintiteas cleamhnaithe ag an gcomhlachas tionsclaíoch i rith na chéad bhlianta i ndiaidh a bhunaithe, is é atá de chuspóir leis comhaltáí nua ó thoghcheantair geallsealbhóirí atá gníomhach i slabhra luacha na Líonraí agus Seirbhísí Cliste a chuimsiú. Nuair a bhreithnítear a mhéid measartha measta agus an tionchar ar a chomheintitis FBManna, níl sé inbhuanaithe don chomhlachas rannchuidiú le 50 % de chostais riaracháin an Chomhghnóthais um Líonraí agus Seirbhísí Cliste thar a shaolré, go háirithe sna chéad bhlianta i ndiaidh a bhunaithe. Thairis sin, tháinig dúshlán chun cinn le haghaidh gníomhaithe eacnamaíocha, lena n-áirítear i réimse theicneolaíochta na faisnéise agus na cumarsáide, mar gheall ar an ngéarchéim de thoradh phaindéim COVID-19 agus na tionchair a ghabhann léi. Dá bhrí sin, ba cheart a áirithiú go bhfuil comhpháirtithe príobháideacha an chomhghnóthais in ann a ngealltanais a chomhlíonadh, fad a fhanann na coinníollacha tarraingteach agus a spreagann siad comhpháirtithe nua chun bheith rannpháirteach sa chomhlachas. Ba cheart d'íoschéatadán na ranníocaíochta airgeadais bliantúla ó chomhaltáí seachas an tAontas le haghaidh costais riaracháin a bheith cothrom le 20 % de na costais riaracháin bhliantúla fhoriomlána dá bhrí sin. Go háirithe, ba cheart é a bheith indéanta go rannchuidíonn comheintitis FBManna níos lú i gcomparáid le fiontair níos mó. Ba cheart do chomhaltáí an chomhghnóthais seachas an tAontas féachaint le líon na gcomheintiteas nó na n-eintiteas cleamhnaithe a mhéadú d'fhonn a ranníocaíocht a mhéadú go 50 % de chostais riaracháin an chomhghnóthais thar a shaolré a uasmhéadú.
- (95) I gcomhthéacs thosaíochtaí an Choimisiúin le haghaidh 2019-2024 "Eoraip atá oiriúnach don Aois Dhigiteach", "Geilleagar a fhóireann do dhaoine", agus na cuspóirí beartais a leagtar amach i gcomhthéacs a dteachtairacht maidir le "Todhchaí Dhigiteach na hEorpa a Mhúnlú", ní mór don Eoraip bonneagair dhigiteacha chriticiúla bunaithe ar líonraí 5G a fhorbairt agus a hacmhainneachtaí teicneolaíochta i dtreo 6G a thógáil i gcomhréir le tréimhse ama 2030. Sa chomhthéacs seo, chuir an Coimisiún tábhacht straitéiseach comhpháirtíochta Eorpaí le haghaidh Líonraí agus Seirbhísí Cliste chun seirbhísí nascacht-bhunaithe slána a sholáthar do thomhaltóirí agus gnólachtaí i dtábhacht. Is féidir na tosaíochtaí sin a bhaint amach ag tabhairt na bpríomhghníomhaithe, eadhon tionscal, an saol acadúil agus údaráis phoiblí, le chéile faoi scáth comhpháirtíochta Eorpaí a thógann ar ghnóthachtálacha an tionscnaimh Infrastruchtúr Comhpháirtíochta Phoiblí Phríobháideach 5G a tháinig roimhe sin, a d'fhorbair teicneolaíocht agus caighdeán 5G go rathúil.
- (96) Ceapadh an Comhghnóthas um Líonraí agus Seirbhísí Cliste chun dul i ngleic le saincheisteanna beartais i réimse an bhonneagair dhigitigh, chun tacú le bonneagar 5G a imscaradh laistigh de raon feidhme chlár Digiteach na Saoráide um Chónascadh na hEorpa 2 (CEF2) arna bhunú le Rialachán (AE) 2021/1153 ó Pharlaimint na hEorpa agus ón gComhairle ⁽²¹⁾ agus chun raon feidhme teicneolaíochta an taighde agus na nuálaíochta a leathnú go líonraí 6G. Ba

⁽²¹⁾ Rialachán (AE) 2021/1153 ó Pharlaimint na hEorpa agus ón gComhairle an 7 Iúil 2021 lena mbunaítear an tSaoráid um Chónascadh na hEorpa agus lena n-aisghairtear Rialachán (AE) Uimh. 1316/2013 agus Rialachán (AE) Uimh. 283/2014 (IO L 249, 14.7.2021, lch. 38).

cheart dó, le dlúth-rannpháirtíocht na mBallstát, an fhreagairt ar bheartas agus riachtanais shóisialta an Aontais maidir le héifeachtúlacht an líonra fuinnimh, cibearshlándáil, ceannaireacht theicneolaíoch, príobháideachtas agus eitic a neartú agus ba cheart go gcuirfeadh sé síneadh le raon feidhme an taighde agus na nuálaíochta ó sholáthar líonraí chuig seirbhís néalbhunaithe, chomh maith le comhpháirteanna agus gaireas a chumasaíonn seirbhísí le haghaidh saoránach agus raon leathan earnálacha eacnamaíocha amhail cúram sláinte, iompar, monaraíocht agus na meáin.

- (97) Ní féidir leis an tionscal agus an Coimisiún amháin dul i ngleic leis na cuspóirí beartais a bhaineann le Líonraí agus Seirbhísí Cliste. Éilítear rannpháirtíocht straitéiseach na mBallstát mar chuid den struchtúr rialála go háirithe chun aghaidh a thabhairt ar na cuspóirí sin ó thaobh dearcadh iomlánaíoch agus comhordaithe. Dá bhrí sin, ba cheart don Bhord Rialála lánaírd a thabhairt ar thuairimí ghrúpa ionadaithe na stát, go háirithe na cinn a bhaineann le treoir straitéiseach maidir le cláir oibre agus cinntí cistiúcháin.
- (98) Beidh ardbhonneagair 5G mar bhonn chun éiceachórais don aistriú digiteach agus don aistriú glas a fhorbairt agus, sa chéad chéim eile ansin, le haghaidh staid na hEorpa chun teicneolaíocht 6G a ghlacadh. Tá deiseanna i gcomhair forbairt 5G agus éiceachórais dhigiteacha bunaithe ar 6G níos déanaí le fáil sa Chlár Digiteach SCE 2 agus sa Chlár don Eoraip Dhigiteach arna bhunú le Rialachán (AE) 2021/694 ó Pharlaimint na hEorpa agus ón gComhairle ⁽²²⁾ agus InvestEU arna bunú le Rialachán (AE) 2021/523 ó Pharlaimint na hEorpa agus ón gComhairle ⁽²³⁾. Ag cur an raon leathan geallsealbhóirí poiblí agus príobháideacha atá rannpháirteach i dtionscadail imscartha den sórt sin san áireamh, tá sé fíor-riachtanach go ndéantar socrú an chlár oibre straitéisigh, an rannchuidiú le clárú, agus faisnéis agus rannpháirtíocht na ngeallsealbhóirí a ghabhann leis na cláir sin a chomhordú. Mar bhonn straitéiseach leis na cúraimí sin, ba cheart don Chomhghnóthas um Líonraí agus Seirbhísí Cliste forbairt na gClár Oibre Straitéiseach a chomhordú le haghaidh réimsí ábhartha imscartha, amhail córais 5G feadh bóithre agus iarnród. Leis na cláir oibre sin, ba cheart tacú, *inter alia* leis na treoicláir imscartha, na príomhroghanna le haghaidh samhlacha comhair agus saincheisteanna straitéiseacha eile a leagan amach.
- (99) Déantar foráil in Airteagal 20(3) den Rialachán maidir le Fís Eorpach nach mór, i gcás inarb iomchuí, don Choimisiún nó don chomhlacht cistiúcháin grinnscrúdú slándála a dhéanamh maidir le tograí a bhfuil saincheisteanna slándála ag baint leo.
- (100) De bhun Chonclúidí na Comhairle an 3 Nollaig 2019 agus Mholadh an 26 Márta 2019 maidir le Cibearshlándáil líonraí 5G le haghaidh gníomhaíocht chomhordaithe ar leibhéal an Aontais, d'fhoilsigh Grúpa Comhair na mBallstát um Shlándáil Líonraí agus Faisnéise bosca uirlisí an Aontais ina bhfuil bearta maolaithe riosca a bhaineann le cibearshlándáil líonraí 5G i mí Eanáir 2020 ("an bosca uirlisí"). Áitítear ar an mbosca uirlisí sraith de bhearta straitéiseacha agus teicniúla chomh maith le gníomhaíochtaí tacaíochta d'fhonn na príomhrioscaí cibearshlándála i leith líonraí 5G, a aithníodh i dtuarascáil mheasúnaithe riosca chomhordaithe an Aontais, a mhaolú, agus chun treoir a sholáthar maidir le roghnú na mbeart ar cheart tosaíocht a thabhairt dóibh i bpleananna maolaithe ar an leibhéal náisiúnta agus ar leibhéal an Aontais. Tacaíonn Teachtaireacht an 29 Eanáir 2020 ón gCoimisiún dar teideal *Implementing the EU toolbox* [Bosca Uirlisí AE a Chur Chun Feidhme] le gach beart agus treoir a leagtar amach sa bhosca uirlisí agus cuirtear béim ar an ngá atá le srianta, lena n-áirítear eisiaimh riachtanacha, maidir le soláthróirí a meastar go mbaineann ardriosca leo bunaithe ar na fachtóirí a shonraítear i measúnú riosca comhordaithe an Aontais chomh maith le bearta eile chun spleáchas ar na soláthróirí sin a sheachaint. Aithnítear ann freisin sraith de ghníomhaíochtaí sonracha don Choimisiún, go háirithe chun a áirithiú go mbeidh rannpháirtíocht i gcláir cistiúcháin an Aontais i réimsí teicneolaíochta ábhartha faoi réir an choinníll go gcomhlíonfar riachtanais slándála, ag baint leas iomlán as choinníollacha slándála agus á gcur chun feidhme a thuilleadh. Dá bhrí sin, ba cheart forálacha iomchuí a thabhairt isteach le cur chun feidhme an Rialacháin seo chun na bearta slándála a léiriú trí ghníomhaíochtaí atá cistithe ag Comhghnóthas SNS agus, ar bhonn a mholtaí, ag comhlachtaí cistiúcháin eile a chuireann cláir an Aontais i réimse na líonraí agus seirbhísí cliste chun feidhme.

⁽²²⁾ Rialachán (AE) 2021/694 ó Pharlaimint na hEorpa agus ón gComhairle an 29 Aibreán 2021 lena mbunaítear an Clár don Eoraip Dhigiteach agus lena n-aisghairtear Cinneadh (AE) 2015/2240 (IO L 166, 11.5.2021, lch. 1).

⁽²³⁾ Rialachán (AE) 2021/523 ó Pharlaimint na hEorpa agus ón gComhairle an 24 Márta 2021 lena mbunaítear Clár InvestEU agus lena leasaítear Rialachán (AE) 2015/1017 (IO L 107, 26.3.2021, p. 30).

- (101) Bunaíodh na comhghnóthais faoi Fís 2020 le haghaidh na tréimhse suas leis an 31 Nollaig 2024. Ba cheart do na comhghnóthais tacaíocht leanúnach a sholáthar dá gcláir taighde faoi seach ag cur na gníomhaíochtaí atá fágtha nó ar cuireadh tús leo nó a leantar ar aghaidh leo faoi Rialacháin (CE) Uimh. 219/2007, (AE) Uimh. 557/2014 ⁽²⁴⁾, (AE) Uimh. 558/2014 ⁽²⁵⁾, (AE) Uimh. 559/2014 ⁽²⁶⁾, (AE) Uimh. 560/2014 ⁽²⁷⁾, (AE) Uimh. 561/2014 ⁽²⁸⁾ agus (AE) Uimh. 642/2014 ⁽²⁹⁾ ón gComhairle i gcomhréir leis na Rialacháin sin go dtí a bhfoirceannadh. Ar mhaithe le deimhneacht dhlíthiúil agus soiléireacht ba cheart na Rialacháin sin a aisghairm.
- (102) Níor cheart don Aontas gníomhú ach i gcás ina mbaineann buntáiste inléirithe leis an ngníomhaíocht sin ar leibhéal an Aontais agus é níos éifeachtaí ná gníomhaíocht a ghlactar ar an leibhéal náisiúnta, réigiúnach nó áitiúil. Díríonn na comhghnóthais ar réimsí ina mbaineann breisluach inléirithe le gníomhú ar leibhéal an Aontais mar gheall ar scála, luas agus raon feidhme na n-iarrachtaí a theastaíonn ionas go mbeidh an tAontas in ann a chuspóirí CFAE fadtéarmacha a chomhlíonadh agus a thosaíochtaí agus gealltanais straitéiseacha beartais a bhaint amach. Thairis sin, ba cheart breathnú ar na comhghnóthais bheartaithe mar chomhghnóthais a thacaíonn le gníomhaíochtaí náisiúnta agus fonáisiúnta sa réimse céanna agus ba cheart dóibh na gníomhaíochtaí sin a neartú.
- (103) Ós rud é nach féidir leis na Ballstáit cuspóirí an Rialacháin seo a ghnóthú go leordhóthanach, agus gur fearr is féidir dá bhrí sin, d'fhoill dúbhláil gan ghá a sheachaint, mais chriticiúil a chothú agus a áirithiú go n-úsáidfeair airgeadas poiblí ar bhealach barrmhaith, iad a bhaint amach ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach (CAE). I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.
- (104) D'fhoill leanúnachas a áirithiú maidir le tacaíocht a sholáthar sna réimsí beartais ábhartha, ba cheart an Rialachán seo a theacht i bhfeidhm mar ábhar práinne lá a fhoilsithe,

TAR ÉIS AN RIALACHÁN SEO A GHLACADH:

CUID A hAON

FORÁLACHA COITEANNA

TEIDEAL I

FORÁLACHA GINEARÁLTA

Airteagal 1

Ábhar

Bunaítear naoi gcomhghnóthas leis an Rialachán seo de réir bhrí Airteagal 187 CFAE chun comhpháirtíochtaí institiúidithe Eorpacha dá dtagraítear in Airteagal 10(1), pointe (c), den Rialachán maidir le Fís Eorpach a chur chun feidhme. Socraítear a gcuspóirí agus a gcúraimí, ballraíocht, eagraíocht agus rialach oibríochtúla eile leis.

⁽²⁴⁾ Rialachán (AE) Uimh. 557/2014 ón gComhairle an 6 Bealtaine 2014 lena mbunaítear Comhghnóthas maidir leis an Tionscnamh um Míochaine Nuálaíoch 2 (IO L 169, 7.6.2014, lch. 54).

⁽²⁵⁾ Rialachán (AE) Uimh. 558/2014 ón gComhairle an 6 Bealtaine 2014 lena mbunaítear an Comhghnóthas Spéire Glaine 2 (IO L 169, 7.6.2014, lch. 77).

⁽²⁶⁾ Rialachán (AE) Uimh. 559/2014 ón gComhairle an 6 Bealtaine 2014 lena mbunaítear Comhghnóthas na cealla breosla agus hidrigin 2 (IO L 169, 7.6.2014, lch. 108).

⁽²⁷⁾ Rialachán (AE) Uimh. 560/2014 ón gComhairle an 6 Bealtaine 2014 lena mbunaítear Comhghnóthas Tionscail Bhithbhunaithe (IO L 169, 7.6.2014, lch. 130).

⁽²⁸⁾ Rialachán (AE) Uimh. 561/2014 ón gComhairle an 6 Bealtaine 2014 lena mbunaítear Comhghnóthas ECSEL (IO L 169, 7.6.2014, lch. 152).

⁽²⁹⁾ Rialachán (AE) Uimh. 642/2014 ón gComhairle an 16 Meitheamh 2014 lena mbunaítear Comhghnóthas Shift2rail (IO L 177, 17.6.2014, lch. 9).

*Airteagal 2***Sainmhínithe**

Chun críocha an Rialacháin seo, tá feidhm ag na sainmhínithe seo a leanas:

1. ciallaíonn “comhalta seachas an tAontas” aon stát rannpháirteach, comhalta príobháideach nó eagraíocht idirnáisiúnta eile atá mar chomhalta den chomhghnóthas;
2. ciallaíonn “comhalta bunaidh” aon eintiteas dlítheanach atá bunaithe i mBallstát, tír a ghabhann le Fís Eorpach, nó eagraíocht idirnáisiúnta a aithnítear mar chomhalta de chomhghnóthas sa Rialachán seo nó i gceann de na hlarscríbhinní a ghabhann leis;
3. ciallaíonn “comhalta comhlachaithe” aon eintiteas dlítheanach atá bunaithe i mBallstát, tír a ghabhann le Fís Eorpach, nó eagraíocht idirnáisiúnta a aontaíonn do chomhghnóthas ag síniú litir ghealltanais i gcomhréir le hAirteagal 6(3) agus faoi réir formheasa i gcomhréir le hAirteagal 7;
4. ciallaíonn “stát rannpháirteach” aon Bhallstát nó tír atá comhlachaithe le Fís Eorpach agus a thugann fógra maidir lena rannpháirtíocht i gníomhaíochtaí an chomhghnóthais ábhartha trí bhíthin litir ghealltanais;
5. ciallaíonn “comhalta príobháideach” aon eintiteas dlíthiúil arna bhunú faoin dlí poiblí nó príobháideach agus ar comhalta é de chomhghnóthas seachas an tAontas, stáit rannpháirteacha nó eagraíochtaí idirnáisiúnta;
6. ciallaíonn “comheintitis” na heintitis atá ina gcomhalta príobháideach de chuid comhghnóthais, i gcás inar comhlachas an comhalta príobháideach de réir reachtanna an chomhalta sin;
7. ciallaíonn “comhpháirtí rannchuidithe” aon tír, eagraíocht idirnáisiúnta nó eintiteas dlítheanach seachas comhalta de chomhghnóthas, nó comheintiteas de chuid comhalta nó eintiteas cleamhnaithe de cheachtar díobh, a thacaíonn le cuspóirí comhghnóthais ina réimse sonrach taighde agus ar formheasadh a iarratas nó a hiarratas i gcomhréir le hAirteagal 9;
8. ciallaíonn “ranníocaíochtaí comhchineáil le haghaidh gníomhaíochtaí oibríochtúla” ranníocaíochtaí ó chomhaltaí príobháideacha, comheintitis nó na heintitis chleamhnaithe de cheachtar díobh, ó eagraíochtaí idirnáisiúnta agus ó chomhpháirtithe rannchuidithe, ina gcuimsítear na costais incháilithe a thabhaigh siad chun gníomhaíochtaí indéacha a chur chun feidhme lúide ranníocaíocht an chomhghnóthais sin agus stáit rannpháirteacha an chomhghnóthais sin i leith na gcostas sin;
9. ciallaíonn “gníomhaíocht bhreise” gníomhaíocht, a áirítear sa phlean bliantúil gníomhaíochtaí breise a ghabhann le príomhchuid an chláir oibre, nach bhfaigheann tacaíocht airgeadais ón gcomhghnóthas ach a rannchuidíonn lena chuspóirí agus atá nasctha go díreach le glacadh torthaí ó thionscadal faoin gcomhghnóthas sin nó ó thionscnaimh roimhe sin nó lena ngabhann breisluch suntasach ó thaobh an Aontais de;
10. ciallaíonn “ranníocaíochtaí comhchineáil le haghaidh gníomhaíochtaí breise” ranníocaíochtaí ó chomhaltaí príobháideacha, comheintitis, agus na heintitis chleamhnaithe de cheachtar díobh, agus ó eagraíochtaí idirnáisiúnta, ina gcuimsítear na costais a thabhaigh siad chun gníomhaíochtaí breise a chur chun feidhme lúide aon ranníocaíocht ón Aontais agus ó stáit rannpháirteacha an chomhghnóthais sin le haghaidh na gcostas sin;
11. ciallaíonn “tionscnaimh roimhe sin” aon chomhpháirtíocht i réimse amháin de na réimsí a chumhdaítear i gcomhghnóthas a fuair tacaíocht ó cheann de chreachtláir an Aontais roimhe sin le haghaidh taighde;
12. ciallaíonn “Clár Oibre Straitéiseach um Thaighde agus um Nuálaíocht” an doiciméad ina gcumhdaítear tréimhse Fís Eorpach ina sainaithnítear na príomhthosaíochtaí agus na teicneolaíochtaí agus na nuálaíochtaí is gá chun cuspóirí an chomhghnóthais a bhaint amach;
13. ciallaíonn “clár oibre” an doiciméad dá dtagraítear in Airteagal 2, pointe (25), den Rialachán maidir le Fís Eorpach;

14. ciallaíonn “coinbhleacht leasa” cás a bhaineann le gníomhaí airgeadais nó duine eile dá dtagraítear in Airteagal 61 de Rialachán (AE, Euratom) 2018/1046;
15. ciallaíonn “rannpháirtí nua” eintiteas ar tairbhí é, den chéad uair, de dheontas arna dhámhachtain ag comhghnóthas aonair nó ag a thionscnamh roimhe sin agus nach comhalta bunaidh é den chomhghnóthas sin ná dá thionscnamh roimhe sin.

Airteagal 3

Bunú

1. Tá na comhghnóthais seo a leanas bunaithe mar chomhlachtaí Aontais don tréimhse a chríochnóidh an 31 Nollaig 2031 agus a mhaoinítear faoi CAI 2021-2027:
 - (a) an Comhghnóthas um Eoraip Bhithbhunaithe Chiorclach;
 - (b) an Comhghnóthas um Eitlíocht Ghlan;
 - (c) an Comhghnóthas um Hidrigin Ghlan;
 - (d) Comhghnóthas um Iarnród na hEorpa;
 - (e) Comhghnóthas Shláinte Dhomhanda EDCTP3;
 - (f) Comhghnóthas an Tionscnaimh um Shláinte Nuálach;
 - (g) an Comhghnóthas Eochairtheicneolaíochtaí Digiteacha;
 - (h) Comhghnóthas Taighde BAT 3 an Aerspáis Eorpaigh Aonair;
 - (i) an Comhghnóthas um Líonraí agus Seirbhísí Cliste.
2. Maidir leis na comhlachtaí Aontais dá dtagraítear i mír 1 tagrófar dóibh mar “na comhghnóthais” le chéile.
3. D’fhonn fad Fís Eorpach a chur san áireamh, déanfar glao ar thograí faoi na comhghnóthais a sheoladh faoin 31 Nollaig 2027 ar a dhéanaí. I gcásanna a bhfuil údar cuí leo, féadfar glao ar thograí a sheoladh faoin 31 Nollaig 2028, ar a dhéanaí.
4. Beidh pearsantacht dhlítheanach ag na comhghnóthais. I ngach ceann de na Ballstáit, beidh an inniúlacht dhlítheanach acu is fairsinge atá ar fáil do dhaoine dlítheanacha faoin dhlíthe na mBallstát sin. Féadfaidh siad, go háirithe, maoin shochorraithe agus maoin dhochorraithe a fháil nó a dhiúscairt agus féadfaidh siad a bheith ina bpáirtí in imeachtaí dlíthiúla.
5. Is sa Bhruiséil, an Bheilg, a bheidh a shuíomh ag na comhghnóthais.
6. Mura sonraítear a mhalairt, beidh feidhm ag na forálacha a leagtar amach i gCodanna a hAon agus a Trí maidir le gach comhghnóthas. Beidh feidhm ag na forálacha a leagtar amach i gCuid a Dó maidir le gach comhghnóthas, de réir mar is iomchuí.
7. Chun críocha Chodanna a hAon agus a Trí agus mura sonraítear a mhalairt, ciallóidh tagairt do chomhghnóthas nó comhlacht aonair tagairt do gach comhghnóthas nó gach comhlacht coibhéiseach de na comhghnóthais aonair agus a inniúlachtaí maidir le comhlachtaí eile den chomhghnóthas céanna.

TEIDEAL II

FEIDHMIÚ NA gCOMHGHNÓTHAS

Caibidil 1

Cuspóirí agus cúraimí

Airteagal 4

Cuspóirí agus Prionsabail

1. Cuirfidh na comhghnóthais dá dtagraítear in Airteagal 3 den Rialachán seo le cuspóirí ginearálta agus sonracha an Rialacháin maidir le Fís Eorpach mar a leagtar amach in Airteagal 3 den rialachán sin.
2. Déanfaidh na comhghnóthais, trí rannpháirtíocht agus gealltanais na gcomhpháirtithe maidir le clár gníomhaíochtaí taighde agus nuálaíochta lena ngabhann breisluach Eorpach a dhearadh agus a chur chun feidhme, na cuspóirí ginearálta seo a leanas a thabhairt i gcrích i dteannta a chéile:
 - (a) na hacmhainneachtaí eolaíochta, nuálaíochta agus teicneolaíochta a neartú agus a chomhtháthú agus naisc chomhoibríochta a éascú ar fud an Aontais chun tacú le cruthú agus scaipeadh eolais agus scileanna nua ardchaighdeán, go háirithe d'fhonn cuspóirí a bhaint amach i leith dúshláin dhomhanda, iomaíochas an Aontais agus breisluach, athléimneacht agus inbhuaine Eorpach a dhaingniú agus a fheabhsú agus cur le Limistéar Eorpach Taighde (LET) atreisithe;
 - (b) ceannaireacht dhomhanda ar shlabhraí luacha an Aontais, ar ceannaireacht í atá dírithe ar an inbhuaine, agus athléimneacht na slabhraí luacha sin, a dhaingniú in eochairtheicneolaíochtaí agus in eochairthionscail i gcomhréir leis na straitéisí tionsclaíochta agus le straitéisí FBManna don Eoraip, leis an gComhaontú Glas don Eoraip, an Plean Eorpach don Téarnamh Eacnamaíoch agus le beartaí ábhartha eile an Aontais;
 - (c) an glacadh a bheidh le réitigh nuálacha ar fud an Aontais lena dtabharfar aghaidh ar dhúshláin aeráide, chomhshaoil, sláinte, dhigiteacha agus ar dhúshláin dhomhanda shochaíochta eile a rannchuidíonn le tosaíochtaí straitéiseacha an Aontais a fhorbairt agus dlús a chur leo, dlús á chur le fás eacnamaíoch an Aontais agus éiceachóras na nuálaíochta á chothú, agus Spriocanna Forbartha Inbhuanaithe na Náisiún Aontaithe á mbaint amach freisin, agus aeráidneodracht á baint amach san Aontas faoi 2050 ar a dhéanaí, i gcomhréir le Comhaontú Pháras, agus ar an gcaoi sin cáiliocht na beatha ag saoránaigh na hEorpa a fheabhsú.
3. Seachadfaidh na comhghnóthais na cuspóirí sonracha seo a leanas:
 - (a) feabhas a chur ar an mais chriticiúil agus ar na hacmhainneachtaí agus na hinniúlachtaí eolaíochta agus teicneolaíochta a bhaineann le taighde agus nuálaíocht chomhoibríoch, thrasearnálach, trasbheartais, trasteorann agus idirdhisciplíneach ar fud an Aontais chomh maith lena gcomhtháthú in éiceachórais Eorpacha a éascú;
 - (b) dlús a chur leis an aistriú glas agus leis an aistriú digiteach mar aon leis na claochluithe eacnamaíochta, sóisialta agus sochaíochta i réimsí agus earnálacha a meastar go mbaineann tábhacht straitéiseach leo maidir le tosaíochtaí an Aontais, go háirithe astaíochtaí gás ceaptha teasa a laghdú faoin mbliain 2030 i gcomhréir leis na spriocanna aeráide agus fuinnimh a socraíodh i gcomhréir leis an gComhaontú Glas don Eoraip agus an Dlí Aeráide Eorpach;
 - (c) feabhas a chur ar chumais agus feidhmíocht taighde agus nuálaíochta na slabhraí luacha éiceachórais nuálaíochta agus eacnamaíoch Eorpacha atá ann cheana agus na slabhraí luacha éiceachórais nuálaíochta agus eacnamaíoch Eorpacha nua, lena n-áirítear i ngnólachtaí nuathionscanta agus FBManna;
 - (d) dlús a chur le himscaradh, glacadh agus scaipeadh réiteach, teicneolaíochtaí, seirbhísí agus scileanna nuálacha in éiceachórais athneartaithe taighde agus nuálaíochta Eorpacha agus in éiceachórais thionsclaíochta athneartaithe Eorpacha, lena n-áirítear trí rannpháirtíocht fhorleathan agus luath agus comhchruthú le húsáideoirí deiridh, lena n-áirítear FBManna agus gnólachtaí nuathionscanta, le comhlachtaí saoránach, agus le comhlachtaí rialála agus um chaighdeánú;
 - (e) feabhsúcháin chomhshaoil, fuinnimh, acmhainn-spárálacha, shochaíochta, chiorclaíochta agus táirgiúlachta a thabhairt i gcrích i dtáirgí, teicneolaíochtaí, feidhmeanna agus seirbhísí nua trí earraíocht a bhaint as acmhainneachtaí agus acmhainní an Aontais.
4. Beidh na cuspóirí breise a leagtar amach i gCuid a Dó ag na comhghnóthais freisin.

5. Agus an Rialachán maidir le Fís Eorpach á chur chun feidhme acu, urramóidh na comhghnóthais na prionsabail a leagtar amach in Airteagal 7 den Rialachán sin.
6. Cloífidh na comhghnóthais leis na coinníollacha agus na critéir le haghaidh comhpháirtíochtaí Eorpacha a leagtar amach in Airteagal 10 den Rialachán maidir le Fís Eorpach agus Iarscríbhinn III a ghabhann leis an Rialachán maidir le Fís Eorpach.

Airteagal 5

Cuspóirí agus cúraimí oibríochtúla

1. Cloífidh na comhghnóthais leis na cuspóirí oibríochtúla seo a leanas i gcomhréir leis na critéir a leagtar amach in Iarscríbhinn III a ghabhann leis an Rialachán maidir le Fís Eorpach, agus rannchuideoidh siad le cuspóirí oibríochtúla Fís Eorpach mar a leagtar iad amach sa Chlár Sonrach lena gcuirtear Fís Eorpach chun feidhme:
 - (a) sármhaitheas a athneartú agus a scaipeadh, lena n-áirítear ag cothú rannpháirtíocht níos leithne agus ag neartú nasc comhair ar fud an Aontais;
 - (b) barr feabhais eolaíoch a neartú, lena n-áirítear trí thorthaí taighde atá úrscothach bunúsach agus ar theorainn an eolais a mheas, i gcás inarb ábhartha, agus a ngníomhaíochtaí á gcur chun feidhme acu;
 - (c) gníomhaíochtaí taighde agus nuálaíochta a spreagadh in FBManna agus rannchuidiú le cruthú agus uas-scálú cuideachtaí nuálacha, go háirithe cuideachtaí nua-thionscanta, FBManna, agus i gcásanna eisceachtúla, cuideachtaí lárchaipitlithe beaga;
 - (d) an nasc idir beartais taighde, nuálaíochta agus, i gcás inarb iomchuí, oideachais, oiliúna agus beartais eile, lena n-áirítear comhlántachtaí le beartais agus gníomhaíochtaí taighde agus nuálaíochta náisiúnta, réigiúnacha agus Aontais, a athneartú;
 - (e) príomhshruthú inscne a neartú, lena n-áirítear gné na hinscne san ábhar taighde agus nuálaíochta a chomhtháthú;
 - (f) naisc chomhair idir taighde agus nuálaíocht Eorpach agus i measc earnálacha agus disciplíní, lena n-áirítear na heolaíochtaí sóisialta agus na daonnachtaí, a mhéadú;
 - (g) an comhar idirnáisiúnta a neartú mar thaca le cuspóirí beartais an Aontais agus le gealltanais idirnáisiúnta;
 - (h) feasacht an phobail agus glacadh an phobail, gníomhú i leith éilimh agus leathadh agus úsáid réiteach nua a spreagadh trí, i gcás inarb iomchuí, na saoránaigh agus na húsáideoirí deiridh a bheith rannpháirteach i bpróisis chomhdheartha agus chomhchruthaithe;
 - (i) saothrú torthaí taighde agus nuálaíochta a spreagadh agus torthaí a scaipeadh agus a shaothrú go gníomhach, go háirithe chun infheistíochtaí príobháideacha a ghíaráil agus chun beartais a fhorbairt;
 - (j) dlús a chur leis an gclaochlú tionsclaíoch agus leis an athléimneacht ar fud na slabhraí luacha, lena n-áirítear trí scileanna don nuálaíocht a fheabhsú agus tríd an teicneolaíocht dhigiteach a chur chun cinn;
 - (k) tacú le cur chun feidhme eolaíoch fianaisebhunaithe bheartais ghaolmhara an Aontais, chomh maith le gníomhaíochtaí rialála, caighdeánaithe agus infheistíochta inbhuanaithe ar an leibhéal náisiúnta, ar an leibhéal Eorpach agus ar an leibhéal domhanda.
2. Déanfaidh na comhghnóthais na cúraimí seo a leanas trí chur chuige córasach a ghlacadh chun na cuspóirí a bhaint amach:
 - (a) tacaíocht airgeadais a chur ar fáil, i bhfoirm deontas den chuid is mó, do ghníomhaíochtaí indéacha taighde agus nuálaíochta, a roghnófar tar éis glaonna oscailte, trédhearcacha agus iomaíocha seachas i gcásanna a bhfuil údar cuí leo a shonraítear ina gclár oibre chun coinníollacha breise a leagan síos lena gceanglaítear rannpháirtíocht chomhaltaí an chomhghnóthais nó a gcomheintiteas nó a n-eintiteas cleamhnaithe;
 - (b) dlúthchomhar a fhorbairt agus comhordú a áirithiú le comhpháirtithe Eorpacha eile, lena n-áirítear trí chuid de bhuiséad an chomhghnóthais a shannadh do chomhghlaonna, i gcás inarb iomchuí;
 - (c) sineirgí a lorg agus a uasmhéadú le gníomhaíochtaí agus cláir ábhartha ar leibhéal an Aontais, ar an leibhéal náisiúnta agus ar an leibhéal réigiúnach, agus i gcás inarb iomchuí, féidearthachtaí le haghaidh tuilleadh cistithe uathu, go háirithe iad sin a thacaíonn le himscaradh agus glacadh réiteach nuálach, oiliúna, oideachais agus forbartha réigiúnaí, amhail Cistí Beartais Comhtháthaithe nó Pleananna náisiúnta Téarnaimh agus Athléimneachta;

- (d) a áirithiú go gcuireann a n-oibríochtaí le pleanáil straitéiseach ilbhliantúil, tuairisciú, faireachán agus meastóireacht agus ceanglais eile Fís Eorpach mar a leagtar amach in Airteagal 50 agus Airteagal 52 den Rialachán maidir le Fís Eorpach, amhail cur chun feidhme an chreata aiseolais comhbheartais;
- (e) rannpháirtíocht FBManna agus gnóilachtaí nuathionscanta ina ngníomhaíochtaí a chur chun cinn agus a áirithiú go gcuirfear faisnéis thráthúil ar fáil dóibh, i gcomhréir le cuspóirí Fís Eorpach;
- (f) cur chuige spriocdhírthe a fhorbairt laistigh dá gClár Oibre Straitéiseach um Thaighde agus Nuálaíocht maidir le bearta a chur chun feidhme chun rannpháirtithe nua a mhealladh, go háirithe FBManna, institiúidí ardoideachais agus eagraíochtaí taighde, chun líonraí comhoibríocha a leathnú;
- (g) na hacmhainní poiblí agus príobháideacha atá riachtanach chun na cuspóirí a leagtar amach sa Rialachán seo a bhaint amach a shlógadh;
- (h) faireachán a dhéanamh ar an dul chun cinn i dtreo ghnóthú na gcuspóirí a leagtar amach sa Rialachán seo, agus i gcomhréir leis na forálacha a leagtar amach in Airteagal 50 den Rialachán maidir le Fís Eorpach agus in Iarscríbhinn III agus Iarscríbhinn V a ghabhann le Rialachán maidir le Fís Eorpach;
- (i) a gclár oibre a shainiú agus a chur chun feidhme;
- (j) idirchaidreamh a dhéanamh leis an raon geallsealbhoirí is fairsinge agus is féidir, lena n-áirítear ach gan a bheith teoranta do, gníomhaireachtaí dláráithe, eagraíochtaí taighde agus institiúidí ardoideachais, úsáideoirí deiridh agus údarais phoiblí, go háirithe chun críche tosaíochtaí agus gníomhaíochtaí gach comhghnóthais a shainiú agus chun trédhearcacht, oscailteacht agus cuimsitheacht, agus buntáistí don tsochaí a áirithiú;
- (k) tabhairt faoi ghníomhaíochtaí faisnéise, cumarsáide, poiblíochta, scaipthe agus saothraithe trí Airteagal 51 den Rialachán maidir le Fís Eorpach, a chur i bhfeidhm *mutatis mutandis*, lena n-áirítear tríd an bhfaisnéis mhionsonraithe agus chomhleanúnach maidir le torthaí ó ghníomhaíochtaí cistithe taighde agus nuálaíochta a chur ar fáil agus a dhéanamh inrochtana, ar bhealach tráthúil, i ríomhbhunachar sonraí coiteann Fís Eorpach;
- (l) an tacaíocht theicniúil, eolaíochta agus riaracháin is gá chun a chúraimí a dhéanamh a sholáthar don Choimisiún agus chun críocha feidhmiú ceart agus forbairt na réimsí sonracha a théitear i ngleic leo sa chomhghnóthas san Aontas a áirithiú;
- (m) rannchuidiú le comhéadan níos éifeachtaí idir eolaíocht agus beartas a fhorbairt, le heolaíocht oscailte a chothú trí úsáid torthaí níos fearr a áirithiú agus le dul i ngleic le riachtanais bheartais, chomh maith le saothrú, scaipeadh agus glacadh níos tapa torthaí a chur chun cinn i gcomhréir le hAirteagal 14 agus Airteagal 39 den Rialachán maidir le Fís Eorpach;
- (n) an t-eolas ábhartha a fuarthas ó bhainistíocht tionscadal taighde agus nuálaíochta agus a dtorthaí a shainiú agus a thuairisciú, i gcomhréir le creat aiseolais comhbheartais agus le straitéisí agus gníomhaíochtaí chun tacú le cuspóirí an Chomhaontaithe Ghlais don Eoraip, don Choimisiún ionas go mbeidh sé mar ionchur chun faireachán a dhéanamh ar bhearta beartais reatha, iad a mheasúnú agus a cheartú, nuair is gá, nó chun tionscnaimh agus cinntí beartais nua a mhúnlú;
- (o) tacú leis an gCoimisiún chun critéir scagtha teicniúla láidre atá bunaithe ar an eolaíocht a fhorbairt agus a chur chun feidhme de bhun Airteagal 3 de Rialachán (AE) 2020/852 maidir le hinfheistíochtaí inbhuanaithe, ag déanamh faireacháin agus ag measúnú a gcur chun feidhme laistigh den earnáil eacnamaíoch ina bhfeidhmíonn siad, d'fhonn aiseolas *ad hoc* a sholáthar le haghaidh déanamh beartas, nuair is gá;
- (p) an prionsabal “gan dochar suntasach a dhéanamh” de bhun Airteagal 17 de Rialachán (AE) 2020/852 a bhreithniú maidir le gníomhaíochtaí na gcomhghnóthas a thagann faoi raon feidhme an Rialacháin sin agus forálacha an Rialacháin sin a chur san áireamh chun rochtain ar mhaoiniú inbhuanaithe a fheabhsú, i gcás inarb ábhartha;
- (q) aon chúram eile is gá chun na cuspóirí a leagtar amach sa Rialachán seo a bhaint amach a dhéanamh.

3. I dteannta na gcúraimí a leagtar amach san Airteagal seo agus i gCuid a Dó, féadfar é a chur ar iontaoibh na gcomhghnóthas cúraimí breise a éilíonn cistiú carnach, comhlántach nó comhcheangailte idir clár an Aontais a chur chun feidhme.

*Caibidil 2***Comhaltaí, comhpháirtithe rannchuidithe agus ranníocaíochtaí***Airteagal 6***Comhaltaí**

1. Is iad an tAontas, a mbeidh an Coimisiún ina ionadaí dó, agus aon cheann díobh seo a leanas, mar atá sonraithe i gCuid a Dó, comhaltaí na gcomhghnóthas dá dtagraítear in Airteagal 3:
 - (a) stáit rannpháirteacha;
 - (b) comhaltaí bunaidh;
 - (c) comhaltaí comhlachaithe.
2. Ní féidir ballraíocht i gcomhghnóthas a aistriú chuig tríú páirtí gan aontú roimh ré ón mbord rialaithe dá dtagraítear i gCaibidil 3, Roinn 1 den Teideal seo.
3. Déanfaidh comhaltaí bunaidh agus comhaltaí comhlachaithe litir ghealltanais a shíniú agus sonrófar inti raon feidhme na ballraíochta i dtéarmaí ábhair, gníomhaíochtaí agus a ré, chomh maith le ranníocaíochtaí na gcomhaltaí bunaidh agus na gcomhaltaí comhlachaithe leis an gcomhghnóthas, lena n-áirítear léiriú ar na gníomhaíochtaí breise atá beartaithe dá dtagraítear in Airteagal 11(1), pointe (b).

*Airteagal 7***Roghnú na gcomhaltaí comhlachaithe**

1. Féadfaidh comhghnóthais glaonna ar léiriú spéise atá oscailte agus trédhearcach a sheoladh d'fhonn comhaltaí comhlachaithe a roghnú a d'fhéadfadh rannchuidiú le cuspóirí na gcomhghnóthas a bhaint amach. Is iad na comhghnóthais a liostaítear a gcomhaltaí bunaidh in Iarscríbhinn I, Iarscríbhinn II agus Iarscríbhinn III a sheolfaidh na glaonna sin. Leagfar amach sa ghlaon ar léiriú spéise na príomhacmhainneachtaí a theastaíonn chun cuspóirí an chomhghnóthais a bhaint amach agus d'fhéadfaí a iarraidh ar iarratasóirí léiriú ar an rannchuid a d'fhéadfaí a dhéanamh a chur ar fáil. Foilseofar gach glao ar shuíomh gréasán an chomhghnóthais agus cuirfear iad in iúl trí gach cainéal iomchuí lena n-áirítear, i gcás inarb infheidhme, grúpa ionadaithe na stát, d'fhonn an rannpháirtíocht is leithne agus is féidir a áirithiú ar mhaithe le cuspóirí an chomhghnóthais a bhaint amach.
2. Déanfaidh an stiúrthóir feidhmiúcháin na hiarratasóirí le haghaidh ballraíochta a mheasúnú le cúnamh ó shaineolaithe neamhspleácha agus, i gcás inarb iomchuí, comhlachtaí ábhartha an chomhghnóthais, ar bhonn eolas, taithí agus bhreisluach doiciméadaithe an iarratasóra chun cuspóirí an chomhghnóthais a bhaint amach, fiontacht airgeadais an iarratasóra agus gealltanais fadtéarmach i gcomhair rannchuidithe airgeadais agus comhchineáil le haghaidh an chomhghnóthais, agus coinbhleachtaí leasa féideartha á gcur san áireamh.
3. Déanfaidh an bord rialaithe measúnú ar iarratais le haghaidh ballraíochta a mheas agus a fhormheas nó a dhiúltú.

*Airteagal 8***Athruithe ar an mballraíocht nó foirceannadh na ballraíochta**

1. Féadfaidh aon chomhalta de chomhghnóthas a bhallraíocht sa chomhghnóthas sin a fhoirceannadh. Tiocfaidh an foirceannadh i bhfeidhm agus beidh sé neamh-inchúlghairthe 6 mhí tar éis fógra a thabhairt do stiúrthóir feidhmiúcháin an chomhghnóthais, a chuirfidh na comhaltaí eile ar an eolas. Amhail ón dáta foirceanta, brisfear an comhalta ó aon oibleagáid seachas iad siúd a d'fhormheas nó a thabhaigh an chomhghnóthas roimh fhoirceannadh na ballraíochta, mura gcomhaontaítear a mhalairt.
2. Cuirfidh gach comhalta príobháideach an chomhghnóthas ar an eolas go tráthúil maidir le haon chumasc nó éadail idir comhaltaí ar dócha go mbeidh tionchar aige nó aici ar an gcomhghnóthas nó maidir le haon táthcheangal comhalta ag eintiteas nach comhalta den chomhghnóthas é.

3. Déanfaidh an bord rialaithe cinneadh i dtaobh an bhfoirceannfar ballraíocht aon chomhalta dá dtagraítear i mír 2, d'fhonn leanúnachas gnó a áirithiú agus leas an Aontais nó an chomhghnóthais a chosaint. Tiocfaidh an foirceannadh i bhfeidhm agus beidh sé neamh-inchúlghairthe tráth nach déanaí ná 6 mhí ó chinneadh an bhoird rialaithe nó ar an dáta a shonraítear sa chinneadh sin, cibé acu is luaithe. Ní ghlacfaidh an comhalta ná na comhaltaí lena mbaineann páirt i vóta an bhoird rialaithe.
4. Cuirfidh gach comhalta príobháideach an comhghnóthas ar an eolas go tráthúil maidir le haon athrú suntasach eile ina úinéireacht, rialú nó chomhdhéanamh. I gcás ina measann an Coimisiún gur dóchúil go mbeidh tionchar ag an athrú ar leas an Aontais nó an chomhghnóthais ar fhorais slándála nó oird phoiblí, féadfaidh sé a mholadh don bhord rialaithe ballraíocht an chomhalta phríobháidigh lena mbaineann a fhoirceannadh. Déanfaidh an bord rialaithe cinneadh maidir le foirceannadh ballraíochta an chomhalta phríobháidigh lena mbaineann. Ní ghlacfaidh an comhalta príobháideach lena mbaineann páirt i vóta an bhoird rialaithe.
5. Tiocfaidh an foirceannadh i bhfeidhm agus beidh sé neamh-inchúlghairthe tráth nach déanaí ná 6 mhí ó chinneadh an bhoird rialaithe nó ar an dáta a shonraítear sa chinneadh sin, cibé acu is luaithe.
6. Féadfaidh an bord rialaithe ballraíocht aon chomhalta nach gcomhlíonann a oibleagáidí de bhun an Rialacháin seo a fhoirceannadh. Tá feidhm *mutatis mutandis* ag an nós imeachta a leagtar amach in Airteagal 28(6).
7. I gcás inarb iomchuí, féadfaidh an Coimisiún a iarraidh ar chomhaltaí príobháideacha bearta iomchuí a dhéanamh chun a áirithiú go ndéanfar leas an Aontais agus an chomhghnóthais ar fhorais slándála nó oird phoiblí a choimirciú.
8. I gcás ina ndéantar aon athrú ar an mballraíocht nó ar an bhfoirceannadh, foilseoidh an comhghnóthas láithreach ar a shuíomh gréasáin liosta nuashonraithe dá chomhaltaí mar aon leis an dáta a ghabhfaidh éifeacht leis an athrú sin.
9. I gcás inarb iomchuí agus faoi réir Airteagal 16(3), cinnfidh an bord rialaithe athdháileadh na gceart vótála sa bhord rialaithe de bharr an athraithe ar an mballraíocht nó de bharr foirceannadh.

Airteagal 9

Comhpháirtithe rannchuidithe

1. Cuirfidh aon chomhpháirtí rannchuidithe is iarratasóir mar a shainítear in Airteagal 2, pointe (7), litir formhuinithe faoi bhráid an bhoird rialaithe. Sonrófar raon feidhme na comhpháirtíochta i dtéarmaí ábhair, gníomhaíochtaí agus a ré, agus mionsonraí maidir le rannchuidiú an iarratasóra leis an gcomhghnóthas sa litir formhuinithe sin.
2. Déanfaidh an bord rialaithe measúnú ar an litir formhuinithe agus déanfaidh sé an t-iarratas a fhormheas nó diúltú dó.
3. Ní bheidh cearta vótála ag comhpháirtithe rannchuidithe i mbord rialaithe comhghnóthais.

Airteagal 10

Ranníocaíocht airgeadais ón Aontas

1. Cumhdófar le ranníocaíocht airgeadais an Aontais leis na comhghnóthais, lena n-áirítear leithreasuithe Limistéar Eorpach Eacnamaíoch (LEE), costais riaracháin agus oibriochtúla nach mó ná na huasmhéideanna a shonraítear i gCuid a Dó, ar choinníoll go ndéanfar an méid sin a mheaitseáil ar a laghad le ranníocaíocht ó chomhaltaí eile seachas an tAontas nó a gcomheintitis nó a n-eintitis chleamhnaithe.
2. Féadfar ranníocaíocht an Aontais a shonraítear i gCuid a Dó a mhéadú le ranníocaíochtaí ó thríú tíortha atá comhlachaithe le Fís Eorpach i gcomhréir le hAirteagal 16(5) den Rialachán maidir le Fís Eorpach agus ar choinníoll go ndéanfar an méid iomlán faoina méadófar ranníocaíocht an Aontais a mheaitseáil ar a laghad le ranníocaíocht ó chomhaltaí eile seachas an tAontas, nó a gcomheintitis nó a n-eintitis chleamhnaithe.

3. Déanfar ranníocaíocht an Aontais a íoc ó leithreasuithe i mbuiséad ginearálta an Aontais a leithdháiltear ar an gClár Sonrach lena gcuirtear Fís Eorpach chun feidhme, i gcomhréir le hAirteagal 62(1), pointe (c)(iv), agus Airteagal 154 de Rialachán (AE, Euratom) 2018/1046 i gcás na gcomhlachtaí dá dtagraítear in Airteagal 71 den Rialachán sin.
4. Féadfar cistí breise an Aontais a chomhlánóidh an ranníocaíocht dá dtagraítear i mír 3 den Airteagal seo a chur ar iontaoibh na gcomhghnóthas i gcomhréir le hAirteagal 62(1), pointe (c)(iv), agus Airteagal 154 de Rialachán (AE, Euratom) 2018/1046.
5. Maidir le ranníocaíochtaí a chomhfhreagraíonn do chúraimí breise atá curtha ar iontaoibh Comhghnóthais i gcomhréir le mír 4 den Airteagal seo nó Airteagal 5(3) den Rialachán seo, beidh feidhm ag ceanglais Airteagal 155 de Rialachán (AE, Euratom) 2018/1046.
6. Ní chuirfeadh ranníocaíochtaí breise ó chlár an Aontais a chomhfhreagraíonn do chúraimí breise atá curtha ar iontaoibh comhghnóthais de bhun mhír 4 den Airteagal seo nó d'Airteagal 5(3) san áireamh nuair a bheidh ranníocaíocht airgeadais uasta an Aontais mar a shainítear i gCuid a Dó á ríomh.

Airteagal 11

Ranníocaíochtaí ó chomhaltaí seachas an tAontas agus comhpháirtithe rannchuidithe

1. Mura sonraítear a mhalairt i gCuid a Dó, is éard a bheidh i ranníocaíochtaí comhaltaí príobháideacha ranníocaíochtaí airgeadais agus aon cheann díobh seo a leanas:
 - (a) ranníocaíochtaí comhchineáil le haghaidh gníomhaíochtaí oibríochtúla;
 - (b) ranníocaíochtaí comhchineáil le haghaidh gníomhaíochtaí breise, atá formheasta ag an mbord rialaithe i gcomhréir le hAirteagal 17(2), pointe (n).
2. Mura sonraítear a mhalairt i gCuid a Dó, tabharfaidh comhaltaí príobháideacha tuairisc faoin 31 Bealtaine gach bliain, ar a dhéanaí, dá mbord rialaithe faoi seach maidir le luach na ranníocaíochtaí dá dtagraítear i mír 1, pointe (b), a rinneadh i ngach bliain airgeadais roimhe sin. D'fhonn na ranníocaíochtaí sin a luacháil, cinnfear na costais i gcomhréir le gnáthchleachtais chuntasaíochta costais na n-eintiteas lena mbaineann, le caighdeáin chuntasaíochta infheidhme na tíre ina bhfuil an t-eintiteas bunaithe agus leis na Caighdeáin Chuntasaíochta Idirnáisiúnta agus na Caighdeáin Tuairiscithe Airgeadais Idirnáisiúnta is infheidhme. Déanfaidh comhlacht iniúchóireachta neamhspleách arna cheapadh ag an eintiteas lena mbaineann na costais a dheimhniú agus ní dhéanfaidh an comhghnóthas lena mbaineann ná aon chomhlacht de chuid an Aontais iniúchadh orthu. Féadfaidh an comhghnóthas lena mbaineann an modh luachála a dheimhniú, i gcás go mbeadh aon éiginnteacht ann de bharr an deimhniúcháin. I gcásanna atá sonraithe go cuí, féadfaidh an bord rialaithe úsáid cnapshuimeanna nó costas aonaid a údarú chun na ranníocaíochtaí sin a luacháil.
3. Is ranníocaíochtaí airgeadais a bheidh sna rannchuidithe ó stáit rannpháirteacha. Tabharfaidh na stáit rannpháirteacha tuairisc don bhord rialaithe faoin 31 Eanáir gach bliain maidir leis na ranníocaíochtaí airgeadais a rinneadh sa bhliain airgeadais roimhe sin.
4. Is ranníocaíochtaí airgeadais agus ranníocaíochtaí comhchineáil le haghaidh gníomhaíochtaí oibríochtúla a bheidh sna rannchuidithe ó eagraíochtaí idirnáisiúnta, mura sonraítear a mhalairt i gCuid a Dó.
5. Comhfhreagróidh na ranníocaíochtaí ó chomhpháirtithe rannchuidithe do na méideanna sin a gheall siad sa litir formhuinithe nuair a rinneadh comhpháirtí rannchuidithe díobh agus is ranníocaíochtaí airgeadais agus ranníocaíochtaí comhchineáil le haghaidh gníomhaíochtaí oibríochtúla a bheidh sna ranníocaíochtaí sin.
6. Féadfaidh an Coimisiún ranníocaíocht airgeadais an Aontais leis an gcomhghnóthas a fhoirceannadh, a laghdú go comhréireach nó a chur ar fionraí nó an nós imeachta foirceanta dá dtagraítear in Airteagal 45 a úsáid in aon cheann de na cásanna seo a leanas:
 - (a) i gcás ina mainníonn an comhghnóthas lena mbaineann na coinníollacha maidir le ranníocaíocht an Aontais a chur ar iontaoibh;
 - (b) i gcás ina mainníonn na comhaltaí seachas an tAontas nó a gcomheintitis nó a n-eintitis chleamhnaithe ranníocaíocht a dhéanamh, gan ranníocaíochta dhéanamh ach i bpáirt, mura dtugann siad urraim do na teorainneacha ama a leagtar amach i mír 2 maidir leis an ranníocaíocht dá dtagraítear i mír 1, mír 4 agus mír 5 den Airteagal seo;
 - (c) de thoradh na meastóireachtaí dá dtagraítear in Airteagal 171(2).

7. Ní chuirfidh cinneadh an Choimisiúin maidir le ranníocaíocht an Aontais a fhoirceannadh, a laghdú go comhréireach nó a chur ar fionraí cosc ar aisíocaíocht na gcostas incháilithe arna dtabhú cheana féin ag na comhaltaí seachas an tAontas sula gcuirtear an cinneadh in iúl don chomhghnóthas.

8. I gcomhréir leis an nós imeachta a leagtar amach in Airteagal 28(6), dícháileofar aon chomhalta den chomhghnóthas seachas an tAontas a mhainníonn a ngealltanais maidir leis na ranníocaíochtaí dá dtagraítear sa Rialachán seo chun vóta a chaitheamh ar an mbord rialaithe go dtí go gcomhlíonfaidh siad a n-oibleagáidí. I gcás ina mainníonn aon chomhalta den sórt sin a n-oibleagáidí a chomhlíonadh ar dhul in éag tréimhse 6 mhí breise, déanfar a mballraíocht a chúlghairm, mura gcinneann an bord rialaithe a mhalairt i gcásanna a bhfuil údar cuí leo. Ní ghlacfaidh an t-eintiteas lena mbaineann páirt i vóta an bhoird rialaithe.

Airteagal 12

Bainistíocht ranníocaíochtaí ó na stáit rannpháirteacha

1. Tabharfaidh gach stát rannpháirteach gealltanais tascach maidir le méid a ranníocaíochtaí airgeadais náisiúnta leis an chomhghnóthas. Tabharfar an gealltanais sin sula nglacfar an clár oibre.

Chomh maith leis na critéir a leagtar amach in Airteagal 22 den Rialachán maidir le Fís Eorpach, féadfar a áireamh sa chlár oibre, mar iarscribhinn, critéir incháilitheachta maidir le heintitis dhlítheanacha náisiúnta.

Cuirfidh gach stát rannpháirteach meastóireacht ar na tograí de réir an Rialacháin maidir le Fís Eorpach ar iontaoibh an chomhghnóthais.

Is ar liosta an rangaithe arna sholáthar ag an gcoiste meastóireachta a bhunófar roghnú na dtograí. Féadfaidh an comhlacht atá freagrach as roghnú imeacht ón liosta sin i gcásanna a bhfuil údar cuí leo, mar a leagtar amach sa chlár oibre iad, chun comhsheasmhacht fhoriomlán chur chuige na punainne a áirithiú.

Beidh ceart crosta ag gach stát rannpháirteach maidir le gach saincheist a bhaineann le húsáid a ranníocaíochtaí airgeadais náisiúnta féin leis an gcomhghnóthas d'iarratasóirí arna mbunú sna stáit rannpháirteacha sin, ar bhonn tosaíochtaí straitéiseacha náisiúnta.

2. Déanfaidh gach stát rannpháirteach ceann amháin nó níos mó de na comhaontuithe riaracháin a thabhairt i gcrích leis an gcomhghnóthas lena leagfar síos an sásra comhordúcháin chun ranníocaíochtaí a íoc le hiarratasóirí atá bunaithe sa stát rannpháirteach sin agus chun tuairisc a thabhairt ina leith. Áireofar sa chomhaontú sin sceideal, coinníollacha íocaíochta, ceanglais tuairiscithe agus iniúcháireachta.

Déanfaidh gach stát rannpháirteach a dhícheall a sceideal íocaíochta, a thuairisciú agus a iniúchtaí a shioncrónú le sceideal íocaíochta, tuairisciú agus iniúchtaí an chomhghnóthais agus a rialacha incháilitheachta costais a chóineasú le rialacha Fís Eorpach.

3. Sa chomhaontú dá dtagraítear i mír 2, féadfaidh gach stát rannpháirteach íoc a ranníocaíochta lena thairbhíthe a chur ar iontaoibh an chomhghnóthais. Tar éis tograí a roghnú, geallfaidh an stát rannpháirteach an tsuim is gá le haghaidh íocaíochtaí. Féadfaidh údarais iniúcháireachta an stáit rannpháirtigh na ranníocaíochtaí náisiúnta faoi seach a iniúchadh.

Caibidil 3

Eagrú na gcomhghnóthas

Airteagal 13

Sineirgí agus éifeachtúlachtaí i socruithe cúloifige

1. Déanfaidh comhghnóthais, laistigh de bhliain amháin tar éis dháta theacht i bhfeidhm an Rialacháin seo, socruithe cúloifige a oibriú trí chomhaontuithe leibhéil seirbhíse a thabhairt i gcrích, mura sonraítear a mhalairt i gCuid a Dó agus faoi réir an ghá atá le leibhéal coibhéiseach um chosaint leas airgeadais an Aontais a áirithiú nuair a bhíonn cúraimí a bhaineann le cur chun feidhme an bhuiséid á gcur ar iontaoibh comhghnóthas. Áireofar na réimsí seo a leanas, ar a laghad, sna socruithe sin, faoi réir daingniú inmharthanachta agus tar éis scagadh acmhainní:

(a) tacaíocht acmhainní daonna;

- (b) tacaíocht dhlíthiúil;
- (c) teicneolaíochtaí faisnéise agus cumarsáide;
- (d) cuntasáocht (gan ciste san áireamh);
- (e) cumarsáid;
- (f) bainistíochta lóistíochta, imeachtaí agus seomraí cruinnithe;
- (g) tacaíocht do straitéis iniúchóireachta agus frithchaloise.

2. Soláthróidh comhghnóthas roghnaithe amháin nó níos mó na socruithe cúloifige coiteanna dá dtagraítear i mír 1 do na comhghnóthais eile go léir. Coinneofar socruithe idirghaolmhara laistigh den aon chomhghnóthas amháin a mhéid is iomchuí chun na cúraimí lena mbaineann a chur chun feidhme go héifeachtúil agus go héifeachtach chun struchtúr comhleanúnach eagraíochtúil a áirithiú.

3. Cumasóidh na comhaontuithe leibhéil seirbhíse dá dtagraítear i mír 1 aistriú leithreasuithe nó aisghabhála costas chun na seirbhísí coiteanna idir na comhghnóthais a sholáthar.

4. Gan dochar d'athshannadh do chúraimí eile laistigh den chomhghnóthas, nó do shocruithe riaracháin eile, nach bhfuil tionchar acu ar chonarthaí fostaíochta, féadfar baill foirne atá sannta do na feidhmeanna arna n-aistriú chun críoch na socruithe cúloifige, arna n-óstáil ag comhghnóthas eile, a aistriú chuig an gcomhghnóthas sin. I gcás ina gcuireann ball foirne a dhiúltú nó a diúltú in iúl i scríbhinn, féadfaidh an comhghnóthas conradh an bhaill foirne sin a fhoirceannadh faoi na coinníollacha dá dtagraítear in Airteagal 47 de Choinníollacha Fostaíochta Sheirbhísigh eile an Aontais, a leagtar síos i Rialachán (CEE, Euratom, CEEG) Uimh. 259/68 ón gComhairle ⁽³⁰⁾.

5. Coimeádfaidh na baill foirne dá dtagraítear i mír 4, a aistríodh chuig an gcomhghnóthas atá ag óstáil na socruithe cúloifige, an cineál céanna conartha agus an feidhmghrúpa céanna agus an grád céanna, agus measfar gur chaith siad a seirbhís iomlán sa chomhghnóthas sin.

Airteagal 14

Comhlachtaí na gcomhghnóthas

1. Beidh bord rialaithe, stiúrthóir feidhmiúcháin agus, seachas i gcomhghnóthais ina bhfuil ionadaíocht ag stáit ar an mBord Rialaithe, grúpa ionadaithe de chuid na mballstát, ag gach comhghnóthas.
2. Féadfaidh comhlacht comhairleach eolaíochta agus grúpa geallsealbhóirí agus aon chomhlacht eile a bheith ag comhghnóthas freisin i gcomhréir leis na forálacha i gCuid a Dó.
3. Le linn a chuid cúraimí a chomhall, ní thabharfaidh gach comhlacht sna comhghnóthais ach faoi na cuspóirí a leagtar amach sa Rialachán seo agus ní fheidhmeoidh siad ach laistigh de raon feidhme ghníomhaíochtaí an chomhghnóthais chun na críche lenar bunaíodh é.
4. Gan dochar do mhír 3, féadfaidh comhlachtaí de dhá chomhghnóthas nó níos mó ná dhá chomhghnóthas cinneadh a dhéanamh comhar struchtúrtha, lena n-áirítear trí chruinnithe tráthrialta nó comhchoistí, a bhunú.

⁽³⁰⁾ IO L 56, 4.3.1968, lch. 1.

Roinn 1

Bord Rialaithe*Airteagal 15***Comhdhéanamh an Bhoird Rialaithe**

1. Beidh an bord rialaithe comhdhéanta de bheirt ionadaithe ar a laghad de chuid an Choimisiúin, thar ceann an Aontais, agus de líon na n-ionadaithe ó gach comhalta de chuid an chomhghnóthais seachas an tAontas mar a leagtar amach i gCuid a Dó maidir le gach comhghnóthas.
2. I gcomhréir le hAirteagal 6(1), pointe (b), i gcás ina n-áirítear stáit rannpháirteacha i gcomhaltaí an chomhghnóthais, ceapfar ionadaí amháin ó gach stát rannpháirteach chun bheith ar an mbord rialaithe.

*Airteagal 16***Feidhmiú an Bhoird Rialaithe**

1. Déanfaidh ionadaithe comhaltaí an bhoird rialaithe gach iarracht chun cinntí a ghlacadh de chomhthoil. Má chliseann orthu teacht ar chomhréiteach, déanfar vótáil. Measfar cinntí a bheith glactha le tromlach 75 % ar a laghad de na vótaí, lena n-áirítear vótaí na n-ionadaithe atá as láthair, ach gan staonadh ó vótáil a áireamh.

Féadfaidh na cinntí a ghlacann an bord rialaithe a bheith faoi réir aon rialail shonrach ábhartha a leagtar amach i gCuid a Dó freisin.

2. Ní mór don Choimisiún, 50 % ar a laghad de na comhaltaí príobháideacha agus, más infheidhme, 50 % ar a laghad de thoscáirí na stát rannpháirteach a bheith i láthair chun go mbeidh an bord rialaithe in ann vótáil.

3. Beidh 50 % de na cearta vótála ag an Aontas, mura sonraítear a mhalairt i gCuid a Dó. Beidh cearta vótála an Aontais doroinnte.

Beidh cearta vótála na gcomhaltaí seachas an tAontas faoi réir na rialacha sonracha a leagtar amach i gCuid a Dó. Mura sonraítear a mhalairt i gCuid a Dó, beidh an líon céanna vótaí ag gach ionadaí de chuid na gcomhaltaí seachas an tAontas.

4. Ceapfaidh an tAontas agus na hionadaithe eile, ar a n-uain, cathaoirleach an bhoird rialála ar bhonn bliantúil uainíochta, mura bhforáiltear a mhalairt i gCuid a Dó.

5. Reáchtálfadha an bord rialaithe gnáthchruinnithe dhá uair sa bhliain ar a laghad. Féadfar cruinnithe urghnácha a ghairm arna iarraidh sin ag an gcathaoirleach, an stiúirthóir feidhmiúcháin, an Coimisiún nó ag tromlach ionadaithe na gcomhaltaí seachas an tAontas nó na stát rannpháirteach. Is é an cathaoirleach a ghairfidh cruinnithe an bhoird rialaithe agus reáchtálfar iad ag suíomh an chomhghnóthais lena mbaineann, mura gcinneann an bord rialála a mhalairt i gcásanna a bhfuil údar cuí leo. Cuirfear clár oibre na gcruinnithe, agus na cinntí, ar fáil go poiblí go tráthúil ar shuíomh gréasáin an chomhghnóthais faoi seach.

6. Beidh sé de cheart ag an stiúirthóir feidhmiúcháin freastal ar chruinnithe agus páirt a ghlacadh i bpléití ach ní bheidh aon chearta vótála aige.

7. Beidh stádas breathnóra ag cathaoirleach agus leaschathaoirleach ghrúpa ionadaithe na stát ag cruinnithe an bhoird rialaithe. Beidh sé de cheart ag cathaoirleach chomhlachtaí eile an chomhghnóthais lena mbaineann freastal ar chruinnithe an bhoird rialaithe mar bhreathnóirí aon uair a phléitear saincheistanna a thagann faoi raon feidhme a gcúraimí. Féadfaidh na breathnóirí páirt a ghlacadh i bpléití ach ní bheidh aon chearta vótála acu.

8. Féadfaidh an cathaoirleach cuireadh a thabhairt do dhaoine eile freisin, go háirithe ionadaithe comhpháirtíochtaí Eorpacha eile, gníomhaireachtaí feidhmiúcháin nó rialála, údarais réigiúnacha laistigh den Aontas agus ardáin teicneolaíochta Eorpacha, freastal mar bhreathnóirí ar bhonn cás ar chás faoi réir na rialacha maidir le rúndacht agus coinbhleacht leasa.

9. Ní bheidh ionadaithe na gcomhaltaí faoi dhliteanas pearsanta as gníomhaíochtaí a ghlac siad ina gcáil mar ionadaithe ar an mbord rialaithe seachas i gcásanna mórfhaillí nó mí-iompar toiliúil.
10. Glacfaidh an bord rialaithe a rialacha nós imeachta féin.
11. Beidh ionadaithe na gcomhaltaí agus na mbreathnóirí faoi cheangal ag forálacha cóid iompair lena mbunófar a n-oibleagáidí chun sláine agus cáil an chomhghnóthais lena mbaineann agus an Aontais a choimirciú.

Airteagal 17

Cúraimí an Bhoird Rialaithe

1. Is é an bord rialaithe comhlacht cinnteoireachta gach comhghnóthais. Beidh freagracht fhoriomlán air maidir le treoshuíomh straitéiseach, comhleanúnachas le cuspóirí agus beartais ábhartha an Aontais, agus oibríochtaí an chomhghnóthais sin agus déanfaidh sé maoirseacht ar chur chun feidhme a ghníomhaíochtaí.

Déanfaidh an Coimisiún, ina ról ar an mbord rialaithe, iarracht comhordú agus comhleanúnachas a áirithiú idir gníomhaíochtaí na gcomhghnóthas agus gníomhaíochtaí ábhartha chlár cistiúcháin an Aontais, d'fhonn sineirgí agus comhlántachtaí a chur chun cinn, agus ag an am céanna dúbailtí á seachaint, nuair a bheidh tosaíochtaí a chumhdaítear i dtaighde comhoibritheach á sainaithint.

2. Déanfaidh an bord rialaithe na cúraimí seo a leanas:
 - (a) bearta a ghlacadh chun cuspóirí ginearálta, sonracha agus oibríochtúla an chomhghnóthais a chur chun feidhme, measúnú a dhéanamh ar a n-éifeachtacht agus a dtionchar, dlúthfhaireachán tráthúil a áirithiú ar dhul chun cinn chlár taighde agus nuálaíochta an chomhghnóthais agus gníomhaíochtaí aonair maidir le tosaíochtaí an Aontais agus an Chláir Oibre um Thaighde Straitéiseach agus Nuálaíocht, lena n-áirítear maidir le comhlántacht le cláir réigiúnacha nó náisiúnta, agus bearta ceartaitheacha a dhéanamh i gcás inar gá chun a áirithiú go mbainfidh an comhghnóthas a chuspóirí amach;
 - (b) measúnú, glacadh nó diúltú iarratas ar bhallraíocht i gcomhréir le hAirteagal 7;
 - (c) measúnú, glacadh nó diúltú iarratas ó chomhpháirtithe rannchuidithe féideartha i gcomhréir le hAirteagal 9;
 - (d) cinneadh a dhéanamh maidir le foirceannadh ballraíochta sa chomhghnóthas d'aon chomhalta nach gcomhlíonann a oibleagáidí de bhun an Rialacháin seo nó i gcomhréir le hAirteagal 8(2) agus (3);
 - (e) rialacha airgeadais an chomhghnóthais a ghlacadh i gcomhréir le hAirteagal 27;
 - (f) buiséad bliantúil agus plean bunaithe foirne a ghlacadh, lena n-áirítear an líon post buan agus sealadach de réir an fheidhmghrúpa agus gráid, chomh maith leis an líon foirne ar conradh agus saineolaithe náisiúnta ar iasacht arna gcur in iúl i gcoibhéisí lánaimseartha;
 - (g) cinneadh a dhéanamh maidir le leithdháileadh na gcostas riaracháin i measc na gcomhaltaí seachas an tAontas, i gcás ina mainníonn na comhaltaí sin teacht ar chomhaontú i gcomhréir le hAirteagal 28(2), agus míchothromaíochtaí féideartha ina ngealltanais riaracháin i gcomparáid lena rannpháirtíocht á gcur san áireamh;
 - (h) na cumhachtaí arna mbronnadh ag Rialacháin Foirne Oifigigh an Aontais Eorpaigh a leagtar síos i Rialachán (CEE, Euratom, CEEG) Uimh. 259/68 (na "Rialacháin Foirne") ar an Údarás Ceapacháin agus ag Coinníollacha Fostaíochta Sheirbhísigh Eile an Aontais Eorpaigh ar an Údarás atá Cumhachtaithe chun Conradh Fostaíochta a Thabhairt chun Críche ("cumhachtaí an údaráis ceapacháin") a fheidhmiú i gcomhréir le mír 4 den Airteagal seo agus maidir le foireann an chomhghnóthais;
 - (i) an stiúthóir feidhmiúcháin a cheapadh, a dhífhostú, síneadh a chur lena théarma oifige, treoir a thabhairt dó agus a fheidhmíocht a fhaire;
 - (j) an Clár Oibre Straitéiseach um Thaighde agus um Nuálaíocht a ghlacadh ag tús an chomhghnóthais agus é a nuashonrú i rith shaoilré Fís Eorpach, i gcás inar gá. Aithneofar sa Chlár Oibre Straitéiseach um Thaighde agus um Nuálaíocht tionchar dírithe na comhpháirtíochta, punann gníomhaíochtaí bheartaithe, torthaí, acmhainní, táirgí insoláthartha agus garspriocanna ionchais intomhaiste a bhfuiltear ag súil leo laistigh de thréimhse shonrach.

Sainithneoidh sé freisin na comhpháirtíochtaí Eorpacha eile lena mbunóidh an comhghnóthas comhar foirmiúil agus rialta, agus féidearthachtaí do shineirgí idir gníomhaíochtaí an chomhghnóthais agus tionscnaimh agus beartais náisiúnta nó réigiúnacha bunaithe ar eolas a fhaigheann na stáit rannpháirteacha nó grúpa ionadaithe na stát chomh maith le shineirgí le cláir agus beartais eile de chuid an Aontais;

- (k) clár oibre agus na meastacháin ar chaiteachas comhfhreagrach mar a mholann an stiúrthóir feidhmiúcháin a ghlacadh, tar éis tuairim ghrúpa ionadaithe na stát a mheas, chun an Clár Oibre Straitéiseach um Thaighde agus um Nuálaíocht a chur chun feidhme, lena n-áirítear na gníomhaíochtaí riaracháin, inneachar na nglanna ar thograí, coinníollacha féideartha maidir le déileáil le tograí *ex aequo* i gcomhréir le hAirteagal 28(3) de Fís Eorpach agus a clár oibre, na réimsí taighde atá faoi réir comhghlaonna agus comhar le comhpháirtíochtaí eile agus shineirgí le cláir eile de chuid an Aontais, an ráta cistiúcháin is infheidhme, agus na rialacha gaolmhara maidir le nósanna imeachta um thíolacadh, meastóireacht, roghnú, dámhachtain agus athbhreithniú agus aird ar leith ar an aiseolas ar riachtanais bheartais;
- (l) i gcás inarb iomchuí, an rannpháirtíocht i ngníomhaíochtaí sonracha sa chlár oibre a theorannú i gcomhréir le hAirteagal 22(5) den Rialachán maidir le Fís Eorpach agus i gcomhréir leis an seasamh a comhaontaíodh ar bhonn cás ar chás idir an Coimisiún agus na Ballstáit i ngrúpa ionadaithe na stát, mura sonraítear a mhalairt i gCuid a Dó;
- (m) bearta a ghlacadh chun rannpháirtithe nua, go háirithe FBManna, institiúidí ardoideachais agus eagraíochtaí taighde, a mhealladh chuig gníomhaíochtaí agus beartais an chomhghnóthais, lena n-áirítear, i gcás inarb infheidhme, iad a spreagadh le bheith ina gcomhaltaí príobháideacha nó ina gcomheintitis de na comhaltaí príobháideacha;
- (n) an plean bliantúil le haghaidh gníomhaíochtaí breise, a leagtar amach in iarscríbhinn a ghabhann leis an bpríomhchuid den chlár oibre, a fhorhmeas ar bhonn togra ó na comhaltaí seachas an tAontas agus tar éis dul i gcomhairle leis an gcomhlacht comhairleach eolaíochta nó le comhlacht den sórt sin mar a leagtar amach i gCuid a Dó agus tar éis tuairim ghrúpa ionadaithe na stát a mheas;
- (o) treoshuíomh straitéiseach a sholáthar maidir le comhar le comhpháirtíochtaí Eorpacha eile i gcomhréir leis an gClár Oibre Straitéiseach um Thaighde agus um Nuálaíocht;
- (p) measúnú agus formheas a dhéanamh ar an tuarascáil bhliantúil chomhdhlúite maidir le gníomhaíochtaí, lena n-áirítear caiteachas comhfhreagrach agus an buiséad atá tiomnaithe do chomhghlaonna le comhpháirtíochtaí Eorpacha eile;
- (q) tuairim thabhairt maidir le cuntais chríochnaitheacha an chomhghnóthais;
- (r) socruithe a dhéanamh, de réir mar is iomchuí, chun acmhainn iniúchóireachta inmheánaí an chomhghnóthais a bhunú;
- (s) struchtúr eagraíochtúil na clároifige a fhorhmeas ar mholadh ón stiúrthóir feidhmiúcháin;
- (t) beartas cumarsáide an chomhghnóthais a fhorhmeas ar mholadh ón stiúrthóir feidhmiúcháin;
- (u) mura sonraítear a mhalairt i gCuid a Dó, an liosta beart a roghnófar le haghaidh cistiú a fhorhmeas;
- (v) rialacha cur chun feidhme a ghlacadh chun feidhm a thabhairt do na Rialacháin Foirne agus do Choinníollacha Fostaíochta Seirbhíseach Eile i gcomhréir le hAirteagal 110(2) de na Rialacháin Foirne;
- (w) rialacha a ghlacadh maidir le saineolaithe náisiúnta a thabhairt ar iasacht don Chomhghnóthas agus maidir le húsáid a bhaint as oiliúnaithe;
- (x) grúpaí comhairleacha nó meithleacha a bhunú, de réir mar is gá, lena n-áirítear i gcomhar le comhghnóthais eile, anuas ar chomhlachtaí an chomhghnóthais dá dtagraítear in Airteagal 14, ar feadh tréimhse chinnte agus chun cuspóir sonracha a chomhlíonadh;
- (y) iarrataí ar leasú an Rialacháin seo a chur faoi bhráid an Choimisiúin, i gcás inarb iomchuí;
- (z) comhairle nó anailís eolaíochta ar shaincheisteanna sonracha a iarraidh ó chomhlacht comhairleach eolaíochta an chomhghnóthais nó a chomhaltaí, lena n-áirítear a mhéid a bhaineann le forbairtí in earnálacha cóngaracha;
- (a1) plean le haghaidh chéimniú amach an chomhghnóthais ó chistiú Fís Eorpach a ghlacadh faoi dheireadh 2023 ar mholadh ón stiúrthóir feidhmiúcháin;
- (b1) feidhmíocht aon chúram nach leithdháiltear go sonracha do chomhlacht ar leith de chomhghnóthas a áirithiú, faoi réir na féidearthachta gur féidir leis an mbord rialála aon chúram den sórt sin a shannadh do chomhlacht eile de chuid an chomhghnóthais lena mbaineann.

3. Féadfaidh bord rialaithe comhghnóthais a bheith faoi réir aon rialail shonrach a leagtar amach i gCuid a Dó freisin.
4. Glacfaidh an bord rialaithe, i gcomhréir le hAirteagal 110(2) de na Rialacháin Foirne, cinneadh bunaithe ar Airteagal 2(1) de na Rialacháin Foirne sin agus ar Airteagal 6 de Choinníollacha Fostaíochta Seirbhíseach Eile lena ndéantar cumhachtaí ábhartha an údaráis ceapacháin a tharmligean don stiúrthóir feidhmiúcháin agus lena sainítear na coinníollacha faoinar féidir an tarmligean cumhachtaí sin a chur ar fionraí. Údarófar don stiúrthóir feidhmiúcháin na cumhachtaí sin a fho-tharmligean.
5. Tabharfaidh an bord rialaithe lánaird ar thuairimí, ar mholtaí nó ar thograí ghrúpa ionadaithe na stát, más ann dóibh, sula gcaithfear vóta. Cuirfidh an bord rialaithe grúpa ionadaithe na stát ar an eolas gan moill mhíchuí faoi na bearta leantacha a thug sé ar thuairimí, ar mholtaí nó ar thograí den sórt sin, nó tabharfaidh sé cúiseanna mura ndéanfar bearta leantacha ina leith.

Roinn 2

An Stiúrthóir Feidhmiúcháin

Airteagal 18

An stiúrthóir feidhmiúcháin a cheapadh, a dhífhostú agus síneadh a chur le téarma oifige an stiúrthóra feidhmiúcháin

1. Molfaidh an Coimisiún liosta iarrthóirí, triúr ar a laghad más féidir, don stiúrthóir feidhmiúcháin tar éis dul i gcomhairle le comhaltaí an chomhghnóthais seachas an tAontas. Chun críoch an chomhairliúcháin sin, ceapfaidh gach cineál comhaltaí de chuid an chomhghnóthais seachas an tAontas ionadaí amháin chomh maith le breathnóir amháin thar ceann an bhoird rialaithe
 2. Ceapfaidh an bord rialaithe an stiúrthóir feidhmiúcháin ar bhonn tuilteanais agus scileanna, ó liosta iarrthóirí arna moladh ag an gCoimisiún, tar éis nós imeachta roghnúcháin oscailte agus trédhearcach, a urramóidh prionsabal na cothromaíochta inscne.
 3. Beidh an stiúrthóir feidhmiúcháin ina bhall foirne agus fostófar é mar ghníomhaire sealadach den chomhghnóthas faoi Airteagal 2, pointe (a), de Choinníollacha Fostaíochta Seirbhíseach Eile.
- Chun críche conradh an stiúrthóra feidhmiúcháin a chur i gcrích, déanfaidh cathaoirleach an bhoird rialaithe ionadaíocht thar ceann an chomhghnóthais.
4. Ceithre bliana a mhairfidh téarma oifige an Stiúrthóra Feidhmiúcháin. Faoi dheireadh na tréimhse sin, tabharfaidh an Coimisiún, tar éis dó dul i gcomhairle leis na comhaltaí seachas an tAontas, faoi mheasúnú ar fheidhmiú an stiúrthóra feidhmiúcháin agus cúraimí agus dúshláin an chomhghnóthais sa todhchaí.
 5. Féadfaidh bord rialaithe an chomhghnóthais, ag feidhmiú ar thogra ón gCoimisiún agus aird á tabhairt ar an meastóireacht dá dtagraítear i mír 4, téarma oifige an stiúrthóra feidhmiúcháin a fhadú uair amháin, ar feadh tréimhse nach faide ná 3 bliana.
 6. Ní fhéadfaidh stiúrthóir feidhmiúcháin a bhfuil síneadh curtha lena théarma oifige a bheith rannpháirteach in aon nós imeachta roghnúcháin eile don phost céanna.
 7. Ní féidir stiúrthóir feidhmiúcháin a dhífhostú ach ar chinneadh ón mbord rialaithe ag gníomhú ar thogra ón gCoimisiún, tar éis dó dul i gcomhairle le grúpa ionadaithe na stát agus le comhaltaí an chomhghnóthais seachas an tAontas.

Airteagal 19

Cúraimí an Stiúrthóra Feidhmiúcháin

1. Is é an stiúrthóir feidhmiúcháin an príomhfheidhmeannach a bheidh freagrach as bainistíocht laethúil an chomhghnóthais i gcomhréir le cinní an bhoird rialaithe. Soláthróidh sé nó sí an fhaisnéis uile is gá don bhord rialaithe le haghaidh fheidhmiú a fheidhmeanna. Gan dochar d'inniúlachtaí institiúidí an Aontais agus an bhoird rialaithe faoi seach, ní iarrfaidh an stiúrthóir feidhmiúcháin ná ní ghlacfaidh sé le treoracha ó aon rialtas ná ó aon chomhlacht eile ná ní ghlacfaidh sé nó sí teagasc uathu.

2. Is é nó í an stiúrthóir feidhmiúcháin ionadaí dlíthiúil an chomhghnóthais. Beidh sé nó sí cuntasach do bhord rialaithe an chomhghnóthais.
3. Cuirfidh an stiúrthóir feidhmiúcháin buiséad an chomhghnóthais chun feidhme agus áiritheoidh sé nó sí comhordú idir comhlachtaí agus seirbhísí éagsúla an chomhghnóthais.
4. Déanfaidh an stiúrthóir feidhmiúcháin na cúraimí seo a leanas ar son an chomhghnóthais:
 - (a) a áirithiú go ndéanfar bainistiú inbhuanaithe éifeachtúil ar an gcomhghnóthas agus go gcuirfear an clár oibre chun feidhme go héifeachtúil;
 - (b) an dréachtbhuiséad bliantúil agus an plean bunaithe foirne a ullmhú agus a chur faoi bhráid an bhoird rialaithe;
 - (c) an clár oibre agus na meastacháin ar chaiteachas comhfhreagrach an chomhghnóthais a ullmhú agus, tar éis tuairim ghrúpa ionadaithe na stát nó Bhord na nÚdarás Poiblí de réir mar is iomchuí, a chur san áireamh, é a chur faoi bhráid an bhoird rialaithe, chun an Clár Oibre Straitéiseach um Thaighde agus um Nuálaíocht a chur chun feidhme;
 - (d) cuntais bhliantúla an chomhghnóthais a chur faoi bhráid an bhoird rialaithe chun tuairim a fháil;
 - (e) an tuarascáil bhliantúil chomhdhlúite ar ghníomhaíochtaí, lena n-áirítear faisnéis maidir leis an gcaiteachas comhfhreagrach agus na ranníocaíochtaí comhfhreagracha ó chomhaltaí eile seachas an tAontas dá dtagraítear in Airteagal 11(1), a ullmhú agus a chur faoi bhráid an bhoird rialaithe lena measúnú agus lena formheas;
 - (f) faireachán a dhéanamh ar na ranníocaíochtaí dá dtagraítear in Airteagal 11(1), tuairisciú go tráthrialta don bhord rialaithe faoi dhul chun cinn maidir le spriocanna a bhaint amach agus bearta leighis agus ceartaithe a mholadh, i gcás inar gá;
 - (g) faireachán a dhéanamh ar chur chun feidhme na mbeart chun rannpháirtithe nua a mhealladh, go háirithe FBManna, institiúidí ardoideachais agus eagraíochtaí taighde;
 - (h) comhar foirmiúil agus tráthrialta a bhunú le comhpháirtíochtaí Eorpacha a aithnítear sa Chlár Oibre Straitéiseach um Thaighde agus um Nuálaíocht agus i gcomhréir leis an treoshuíomh straitéiseach a sholáthair an bord rialaithe;
 - (i) tar éis cuireadh a fháil ón gCathaoirleach, foirmíocht ábhartha Choiste Chlár Fís Eorpach a chur ar an eolas go tráthrialta, de bhreis ar fhreagracht an Choimisiúin Coiste an Chláir a chur ar an eolas faoi Airteagal 14(7) agus Iarscríbhinn III a ghabhann leis an gClár Sonrach lena gcuirtear Fís Eorpach chun feidhme, agus go háirithe, sula nglacfar clár oibre an chomhghnóthais, i ndáil le cur i bhfeidhm Airteagal 22(5) den Rialachán maidir le Fís Eorpach;
 - (j) an liosta gníomhaíochtaí atá le roghnú le haghaidh cistiú ón gcomhghnóthas a chur faoi bhráid an bhoird rialaithe nó Bhord na nÚdarás Poiblí de réir mar is iomchuí;
 - (k) measúnú a dhéanamh ar iarratas le haghaidh comhaltaí comhlachaithe i gcomhair ballraíochta sa chomhghnóthas tar éis glao oscailte ar léiriú spéise agus tograí le haghaidh comhaltaí comhlachaithe a chur faoi bhráid an bhoird rialaithe;
 - (l) comhlachtaí eile an chomhghnóthais a chur ar an eolas go tráthrialta maidir le gach ábhar a bhaineann lena ról;
 - (m) comhaontuithe deontais agus cinntí faoina shainchúram nó faoina sainchúram a shíniú thar ceann an chomhghnóthais;
 - (n) conarthaí soláthair a shíniú thar ceann an chomhghnóthais;
 - (o) faireachán agus measúnú ar dhul chun cinn an chlár i gcomparáid le táscairí ábhartha tionchair agus le cuspóirí sonracha an chomhghnóthais mar a shainmhínítear i gCuid a Dó, faoi mhaoirsiú an bhoird rialaithe agus i gcomhordú le comhlachtaí comhairleacha i gcás inarb ábhartha, agus i gcomhréir le hAirteagal 171 a áirithiú;
 - (p) beartas cumarsáide an chomhghnóthais a chur chun feidhme;
 - (q) oibríochtaí agus foireann an chomhghnóthais a eagrú, a stiúradh agus a mhaoirsiú laistigh de theorainneacha tarmiligin ón mbord rialaithe;
 - (r) feidhmiú córas rialaithe inmheánaigh éifeachtach agus éifeachtúil a bhunú agus a áirithiú agus aon athrú suntasach air a thuairisciú leis an mbord rialaithe;

- (s) leasanna airgeadais an Aontais agus na gcomhaltaí eile a chosaint trí bhearta coisctheacha in aghaidh na calaoise, an éilithe agus aon ghníomhaíochtaí neamhdhleathacha eile, a chur i bhfeidhm, trí bhíthin seiceálacha éifeachtacha agus, i gcás ina mbraithfear neamhrialtachtaí, trí mhéideanna a íocadh ar bhealach mícheart a aisghabháil agus, i gcás inarb iomchuí, trí phionóis riaracháin agus airgeadais éifeachtacha, chomhréireacha agus athchomhairleacha a fhorchur;
 - (t) cur i gcrích na measúnuithe riosca agus na bainistíochta riosca ar son an chomhghnóthais a áirithiú;
 - (u) aon bheart eile is gá chun measúnú a dhéanamh ar dhul chun cinn an chomhghnóthais i dtreo a chuspóirí a bhaint amach;
 - (v) plean le haghaidh chéimniú amach an chomhghnóthais ó chistiú Fís Eorpach a ullmhú agus a chur faoi bhráid an bhoird rialaithe lena ghlacadh;
 - (w) aon chúraimí eile atá ar iontaoibh nó atá tarmlichte dó nó di ag an mbord rialaithe nó is gá faoin Rialachán seo a dhéanamh;
 - (x) beidh an chumhacht aige nó aige a chumhachtaí nó a cumhachtaí a tharmligeán chuig baill foirne eile faoi réir rialacha a bheidh le glacadh i gcomhréir le hAirteagal 17(4).
5. Féadfaidh an stiúrthóir feidhmiúcháin a bheith faoi réir aon riail shonrach a leagtar amach i gCuid a Dó freisin.
6. Bunóidh an stiúrthóir feidhmiúcháin clároifig chun a fhreagracht nó a freagracht a chur i gcrích maidir le gach cúram tacaíochta de chuid an chomhghnóthais a eascraíonn as an Rialachán seo. Beidh an chlároifig comhdhéanta d'fhoireann an chomhghnóthais agus go háirithe, déanfaidh sí na cúraimí seo a leanas:
- (a) tacaíocht a thabhairt chun córas cuntasaíochta iomchuí a bhunú agus a bhainistiú i gcomhréir le rialacha airgeadais an chomhghnóthais;
 - (b) bainistíocht a dhéanamh ar chur chun feidhme clár oibre an chomhghnóthais ar fud na sraithe chur chun feidhme;
 - (c) gach faisnéis ábhartha thráthúil agus gach tacaíocht ábhartha thráthúil a chur ar fáil don chomhghnóthas agus dá chomhlachtaí atá riachtanach dóibh chun a ndualgaí a chomhlíonadh;
 - (d) feidhmiú mar rúnaíocht na gcomhlachtaí sa chomhghnóthas agus tacaíocht a thabhairt do ghrúpaí comhairleacha arna mbunú ag an mbord rialaithe, más ann.

Roinn 3

Comhlachtaí comhairleacha

Airteagal 20

Grúpa ionadaithe na stát

1. Seachas i gcásanna ina bhfuil Ballstáit agus tíortha comhlachaithe rannpháirteach i gcomhghnóthas mar chomhaltaí nó i gcomheintitis de chomhaltaí, bunóidh comhghnóthais grúpa ionadaithe de chuid na mballstát mar a shonraítear i gCuid a Dó faoi réir na bhforálacha san Airteagal seo.
2. Beidh suas le beirt ionadaithe agus suas le beirt ionadaithe mhalartacha ó gach Ballstát agus ó gach tír comhlachaithe i ngrúpa ionadaithe na stát. Toghfaidh grúpa ionadaithe na stát cathaoirleach agus leaschathaoirleach as measc a chomhaltaí.
3. Tiocfaidh grúpa ionadaithe na stát le chéile dhá uair in aghaidh na bliana ar a laghad. Is é an cathaoirleach nó aon trian ar a laghad de chomhaltaí ghrúpa ionadaithe na stát a chomórfaidh na cruinnithe. Freastalóidh cathaoirleach an bhoird rialaithe agus an stiúrthóir feidhmiúcháin nó a n-ionadaithe ar na cruinnithe mar bhreathnóirí arna iarraidh sin do chathaoirleach ghrúpa ionadaithe na stát chun críche faisnéis a sholáthar maidir le hábhair shonracha.
4. Féadfar cruinnithe de chuid ghrúpa ionadaithe na stát a rialáil le haon fhoráil shonrach a leagtar amach i gCuid a Dó.

5. Féadfaidh cathaoirleach ghrúpa ionadaithe na stát cuireadh a thabhairt do dhaoine eile freastal ar a chruinnithe mar bhreathnóirí, go háirithe ionadaithe ó na húdaráis chónaidhme nó réigiúnacha ábhartha laistigh den Aontas, ionadaithe ó institiúidí ardoideachais agus eagraíochtaí a dhéanann taighde, comhlachais FBManna nó comhlachais den earnáil tionsclaíoch agus ionadaithe ó chomhlachtaí eile den chomhghnóthas.

6. Déanfar clár oibre agus doiciméid tacaíochta chruinnithe ghrúpaí ionadaithe na stát a scaipeadh luath go leor d'fhonn ionadaíocht iomchuí ó gach Ballstát agus gach tír chomhlachaithe a áirithiú. Déanfar an clár oibre a scaipeadh go tráthúil ar an mbord rialaithe freisin chun críoch faisnéise.

7. Rachfar i gcomhairle le grúpa ionadaithe na stát agus, go háirithe, déanfaidh sé faisnéis a athbhreithniú agus soláthróidh sé tuairimí faoi na cúrsaí seo a leanas:

- (a) dul chun cinn ar chlár an chomhghnóthais agus baint amach a spriocanna agus na tionchair a bhfuiltear ag dréim leo mar chuid de Fís Eorpach, lena n-áirítear faisnéis faoi ghlaonna ar thograí agus tograí a fuarthas agus faoi phróiseas meastóireachta na dtograí;
- (b) nuashonrú an Chláir Oibre Straitéisigh um Thaighde agus um Nuálaíocht i gcomhréir le pleanáil straitéiseach Fís Eorpach agus le hionstraimí cistiúcháin eile an Aontais agus na mBallstát;
- (c) naisc le tionscnaimh Fís Eorpach agus tionscnaimh eile Aontais, náisiúnta agus, i gcás inarb ábhartha, réigiúnacha, lena n-áirítear cistí beartais comhtháthaithe i gcomhréir le straitéisí speisialaithe chliste;
- (d) dréachtchlár oibre, lena n-áirítear inneachar na nglanna ar thograí, go háirithe maidir le topaicí taighde ar LUT níos ísle a áirítear sa dréachtchlár oibre agus maidir le critéir incháilitheachta a chur i bhfeidhm;
- (e) páirtíocht FBManna, gnólachtaí nuathionscanta, institiúidí ardoideachais agus eagraíochtaí taighde, agus bearta arna nglacadh chun rannpháirtíocht rannpháirtithe nua a chur chun cinn;
- (f) gníomhaíochtaí arna ndéanamh chun torthaí a scaipeadh agus a shaothrú feadh an tslabhra breisluacha;
- (g) tuarascáil bhliantúil ar ghníomhaíochtaí.

8. Chun críche an tseasaimh a comhaontaíodh dá dtagraítear in Airteagal 17(2), pointe (l) a lorg, ní áireofar i ngrúpa ionadaithe na stát ach Ballstáit, amháin. I rialacha nós imeachta ghrúpa ionadaithe na stát déanfar an nós imeachta chun comhaontú ar an seasamh sin a shonrú a thuilleadh.

9. I gcás inarb infheidhme, tuairisceoidh grúpa ionadaithe na stát don bhord rialaithe go tráthrialta freisin, agus gníomhóidh sé mar chomhéadan leis an gcomhghnóthas ar na cúrsaí seo a leanas:

- (a) stádas clár ábhartha náisiúnta nó réigiúnach taighde agus nuálaíochta agus sainaitheint réimsí féideartha comhair, lena n-áirítear gníomhaíochtaí nithiúla arna gcur i gcrích nó arna mbeartú chun teicneolaíochtaí ábhartha agus réitigh nuálacha a imscaradh agus a ghlacadh;
- (b) bearta sonracha a glacadh ar leibhéal náisiúnta nó réigiúnach i ndáil le himeachtaí scaipthe, ceardlanna teicniúla tiomnaithe agus gníomhaíochtaí cumarsáide;
- (c) bearta sonracha ar leibhéal náisiúnta nó réigiúnach i ndáil le gníomhaíochtaí imscartha i leith gach comhghnóthais faoi seach;
- (d) beartais agus tionscnaimh náisiúnta nó réigiúnacha d'fhonn comhlántachtaí i ndáil le Clár Oibre Straitéiseach um Thaighde agus um Nuálaíocht agus cláir oibre bhliantúla an chomhghnóthais a áirithiú.

10. Cuirfidh grúpa ionadaithe na stát, ag deireadh gach bliana féilire, tuarascáil isteach ina ndéantar tuairisc ar na beartais náisiúnta nó réigiúnacha i raon feidhme an chomhghnóthais agus ina sainithnítear bealaí sonracha comhair leis na gníomhaíochtaí atá cistithe ag an gcomhghnóthas.

11. Féadfaidh grúpa ionadaithe na stát tuairimí, moltaí nó tograí a eisiúint, ar a thionscnamh féin, chun an mbord rialaithe nó chun an oifigeach feidhmiúcháin maidir le cúrsaí teicniúla, bainistíochta agus airgeadais, chomh maith le cúrsaí a bhaineann le cláir oibre agus doiciméid eile, go háirithe nuair a bhíonn tionchar ag na cúrsaí sin ar leasa náisiúnta nó réigiúnacha.

12. Gheobhaidh grúpa ionadaithe na stát faisnéis thráthúil agus ábhartha ar bhonn tráthrialta, lena n-áirítear miondealú de réir tíre, i measc sonraí eile faoi iarratas a dhéanamh agus rannpháirtíocht i ngníomhaíochtaí indíreacha atá cistithe ag an gcomhghnóthas, faoi thorthaí meastóireachta gach glao ar thograí agus cur chun feidhme na dtionscadal, faoi shineirgí le cláir ábhartha eile de chuid an Aontais agus le comhpháirtíochtaí Eorpacha eile, faoi ghníomhaíochtaí breise, faoi ranníocaíochtaí airgeadais agus comhchineáil arna ngealladh agus arna dtabhairt go hiarbhír agus faoi fhorghníomhú bhuiséad an chomhghnóthais.

13. Glacfaidh grúpa ionadaithe na stát a rialacha nós imeachta féin agus aird chuí á tabhairt ar Airteagal 33 agus Airteagal 42.

14. Féadfaidh comhghnóthas amháin nó níos mó ná comhghnóthas amháin comhghrúpa ionadaithe de chuid na mballstát a bhunú i gcomhréir leis na forálacha ábhartha a leagtar amach i gCuid a Dó.

Airteagal 21

Comhairle eolaíochta

1. Mura sonraítear a mhalairt i gCuid a Dó, lorgóidh comhghnóthais comhairle eolaíoch neamhspleách trí bhíthin na nithe seo a leanas:

- (a) comhlacht comhairleach eolaíochta atá le bunú ag an gcomhghnóthas i gcomhréir leis na forálacha ábhartha a leagtar amach i gCuid a Dó, agus faoi réir fhorálacha an Airteagail seo; nó
- (b) iarrataí *ad hoc* ón mbord rialaithe chuig an gcomhghnóthas ar shaineolas neamhspleách maidir le ceistanna sonracha.

2. Beidh ionadaíocht chothrom saineolaithe i measc chomhaltaí an chomhlachta chomhairligh eolaíochta, laistigh de raon feidhme ghníomhaíochtaí an chomhghnóthais, lena n-áirítear maidir le cothromaíocht inscne agus gheografach. Beidh na hinniúlachtaí agus saineolas is gá ag comhaltaí an chomhlachta chomhairligh eolaíochta ag cumhdach an réimse theicniúil d'fhonn moltaí atá bunaithe ar an eolaíocht a dhéanamh don chomhghnóthas, ag cur tionchar aeráide, comhshaoil agus socheacnamaíoch moltaí den sórt sin agus cuspóirí an chomhghnóthais san áireamh.

3. Beidh comhaltaí an chomhlachta chomhairligh eolaíochta, chomh maith le breathnóirí ar tugadh cuireadh dóibh, faoi réir oibleagáid na rúndachta gairmiúla, a bhfuil feidhm aici, de bhua na gConarthaí agus na rialacha lena gcuirtear chun feidhme iad, maidir le gach comhalta de chuid na n-institiúidí agus a bhfoirne, chomh maith le rialacha an Choimisiúin maidir le slándáil a bhaineann le faisnéis íogair neamh-rúnaicmithe agus rúnaicmithe an Aontais a chosaint, arna leagan síos i gCinntí (AE, Euratom) 2015/443 ⁽³¹⁾ agus (AE, Euratom) 2015/444 ⁽³²⁾ ón gCoimisiún faoi seach.

4. Bunóidh an bord rialaithe próiseas roghnúcháin oscailte lena n-áirítear critéir shonracha le haghaidh chomhdhéanamh chomhlacht comhairleach eolaíochta an chomhghnóthais agus ceapfaidh sé a chomhaltaí. Déanfaidh an bord rialaithe na hiarrthóirí féideartha arna moladh ag grúpa ionadaithe na stát a chur san áireamh.

5. Toghfaidh an comhlacht comhairleach eolaíochta a chathaoirleach as a chomhaltaí.

6. Tiocfaidh an comhlacht comhairleach eolaíochta le chéile faoi dhó in aghaidh na bliana ar a laghad agus is é an cathaoirleach a ghairfidh na cruinnithe. Féadfaidh an cathaoirleach cuireadh a thabhairt do dhaoine eile freastal ar a chruinnithe mar bhreathnóirí. Glacfaidh an comhlacht comhairleach eolaíochta a rialacha nós imeachta féin. Cuirfear clár oibre na gcruinnithe ar fáil go poiblí go tráthúil ar shuíomh gréasáin an chomhghnóthais faoi seach.

7. Déanfaidh an comhlacht comhairleach eolaíochta na cúraimí seo a leanas:

- (a) comhairle a thabhairt faoi na tosaíochtaí eolaíochtaí ar a dtabharfar aghaidh sna cláir oibre, lena n-áirítear maidir le raon feidhme ghlaonna ar thograí, i gcomhréir leis an gClár Oibre Straitéiseach um Thaighde agus um Nuálaíocht agus le pleanáil straitéiseach i gcomhair Fís Eorpach;
- (b) comhairle a thabhairt faoi na gnóthachtálacha eolaíochta a dtabharfar tuairisc orthu sa tuarascáil bhliantúil maidir le gníomhaíochtaí;

⁽³¹⁾ Cinneadh (AE, Euratom) 2015/443 ón gCoimisiún an 13 Márta 2015 maidir le Slándáil sa Choimisiún (IO L 72, 17.3.2015, lch. 41).

⁽³²⁾ Cinneadh (AE, Euratom) 2015/444 ón gCoimisiún an 13 Márta 2015 maidir leis na rialacha slándála chun faisnéis rúnaicmithe de chuid an Aontais Eorpaigh a chosaint (IO L 72, 17.3.2015, lch. 53).

- (c) bearta ceartaithe nó treoshuíomh nua a mholadh don bhord rialaithe, i bhfianaise dhul chun cinn an Chláir Oibre Straitéisigh um Thaighde agus um Nuálaíocht agus dul chun cinn gníomhaíochtaí aonair, i gcás inar gá;
- (d) comhairle neamhspleách agus eolaíochta a sholáthar ar shaincheistean sonracha arna iarraidh ag an mbord rialaithe, go háirithe a mhéid a bhaineann le forbairtí in earnálacha gaolmhara, nó chun tacaíocht a thabhairt le meastóireacht iarratas ó chomhaltaí comhlachaithe agus comhpháirtithe rannchuidithe ionchais;
- (e) i gcás ina sonraítear i gCuid a Dó, measúnú a dhéanamh ar thorthaí na ngníomhaíochtaí teicneolaíochta agus nuálaíochta atá cistithe ag an gcomhghnóthas agus tuairisciú don bhord rialaithe;
- (f) i gcás ina sonraítear i gCuid a Dó, a bheith rannpháirteach i gcoistí comhtháthaithe earnála a bunaíodh go sonrach idir comhpháirtíochtaí Eorpacha faoi Fís Eorpach chun sineirgí a chumasú;
- (g) aon chúram eile a dhéanamh, mar a shonraítear i gCuid a Dó.

8. Tar éis gach cruinnithe de chuid an chomhlachta chomhairligh eolaíochta, cuirfidh an cathaoirleach tuarascáil ina n-achomrítear tuairimí an comhlachta agus a chomhaltaí faoin ábhar a pléadh i gcaitheamh an chruinnithe faoi bhráid an bhoird rialaithe. A mhéid is féidir, cuirfear an tuarascáil ar fáil go poiblí ar shuíomh gréasáin an chomhghnóthais faoi seach.

9. Féadfaidh an comhlacht comhairleach eolaíochta, ar a thionscnamh féin, comhairle a thabhairt don bhord rialaithe chun dul i gcomhairle léi maidir le pointí sonracha nach gcumhdaítear leis na cúraimí a leagtar amach i mír 7. A mhéid is féidir, cuirfear an tuarascáil ar fáil go poiblí ar shuíomh gréasáin an chomhghnóthais faoi seach.

10. Cuirfear an comhlacht comhairleach eolaíoch ar an eolas faoi na cúiseanna i gcás nach leanfar a chomhairle faoin gclár oibre agus faoin gClár Oibre Straitéiseach um Thaighde agus um Nuálaíocht.

Airteagal 22

Líonra geallsealbhóirí

1. Féadfaidh comhghnóthais grúpa geallsealbhóirí a bhunú i gcomhréir leis na forálacha ábhartha a leagtar amach i gCuid a Dó agus faoi réir an Airteagail seo.
2. Ba cheart don ghrúpa geallsealbhóirí a bheith oscailte do gach geallsealbhóir poiblí agus príobháideach, lena n-áirítear grúpaí eagraithe, grúpaí atá gníomhach i réimse an chomhghnóthais agus leasghrúpaí idirnáisiúnta ó na Ballstáit, tíortha gaolmhara nó tíortha eile.
3. Bunóidh an bord rialaithe na critéir shonracha agus an próiseas roghnúcháin maidir le comhdhéanamh an ghrúpa geallsealbhóirí agus beidh sé mar aidhm aige ionadaíocht chothrom a bhaint amach ó thaobh dáileadh geografach, inscne, earnála agus saineolas na ngeallsealbhóirí de. I gcás inarb ábhartha, cuirfidh an bord rialaithe na hiarrthóirí ionchais arna moladh ag grúpa ionadaithe na stát san áireamh.
4. Cuirfear an grúpa geallsealbhóirí ar an eolas go tráthrialta faoi ghníomhaíochtaí an chomhghnóthais agus tabharfar cuireadh dó barúlacha a thabhairt maidir le tionscnaimh bheartaithe an chomhghnóthais.
5. Tionólfaidh an stiúrthóir feidhmiúcháin cruinnithe an ghrúpa geallsealbhóirí.
6. Féadfaidh an stiúrthóir feidhmiúcháin comhairle a chur ar an mbord rialaithe dul i gcomhairle leis an ngrúpa geallsealbhóirí maidir le ceisteanna sonracha. I gcás ina ndéantar comhairliúchán den sórt sin, cuirfear tuarascáil faoi bhráid an bhoird rialaithe agus chuig grúpa ionadaithe na stát tar éis an phlé ábhartha sa ghrúpa geallsealbhóirí agus cuirfear ar fáil go poiblí í ar shuíomh gréasáin an chomhghnóthais faoi seach.

*Caibidil 4***Forálacha airgeadais agus oibríochtúla**

Roinn 1

Forálacha ginearálta*Airteagal 23***Teorannú rannpháirtíochta a chur i bhfeidhm go comhleanúnach**

Áiríteoidh na comhghnóthais comhleanúnachas leis an gcur chuige a ghlacfar maidir le gníomhaíochtaí a chistítear faoin gclár oibre Fís Eorpach a ghlacfar i gcomhréir le hAirteagal 13(2), pointe (b), den Chlár Sonrach lena gcuirtear Fís Eorpach chun feidhme i dtaca le cur i bhfeidhm Airteagal 22(5) den Rialachán maidir le Fís Eorpach, chomh maith le reachtaíocht an Aontais agus treoir atá ábhartha dá chur i bhfeidhm in ábhair chomhchosúla i gclár oibre an chomhghnóthais lena mbaineann.

*Airteagal 24***Rialacha is infheidhme maidir leis na gníomhaíochtaí arna gcistiú ag an gcomhghnóthas**

1. Beidh feidhm ag an Rialachán maidir le Fís Eorpach maidir leis na gníomhaíochtaí arna gcistiú ag an gcomhghnóthas faoi Fís Eorpach. I gcomhréir leis an Rialachán sin, measfar gur comhlacht cistiúcháin é gach comhghnóthas agus tabharfaidh sé tacaíocht airgeadais do ghníomhaíochtaí indéacha de bhun Airteagal 6 den Rialachán sin.
2. Féadfaidh na gníomhaíochtaí arna gcistiú ag na comhghnóthais a bheith faoi réir aon rialail shonrach ábhartha a leagtar amach i gCuid a Dó freisin.
3. De mhaolú ar Airteagal 40(4), pointe (a), den Rialachán maidir le Fís Eorpach, beidh feidhm ag an gceart chun agóid a dhéanamh maidir le rannpháirtithe a ghineann na torthaí nach bhfuair cistiú ó chomhghnóthas.

*Airteagal 25***Pleanáil oibríochtúil agus airgeadais**

1. Ullmhóidh an stiúrthóir feidhmiúcháin dréachtchlár oibre agus cuirfidh sé faoi bhráid an bhoird rialaithe é lena ghlacadh.
2. Glacfar an clár oibre faoi dheireadh na bliana roimh a chur chun feidhme. Foilseofar an clár oibre agus na glaonna ar thograí ar shuíomh gréasáin an chomhghnóthais agus ar shuíomh gréasáin Fís Eorpach, agus, chun tacú leis an gcomhordú le straitéis fhoriomlán Fís Eorpach, comhroinnfear é le foirmíocht ábhartha Choiste an Chláir chun críoch faisnéise.
3. Ullmhóidh an stiúrthóir feidhmiúcháin dréachtbhuiséad bliantúil don bhliain dár gcionn agus cuirfidh sé faoi bhráid an bhoird rialaithe é lena ghlacadh.
4. Glacfaidh an bord rialaithe an buiséad bliantúil do bhliain áirithe faoi dheireadh na bliana roimh a chur chun feidhme.
5. Oiriúnófar an buiséad bliantúil chun méid ranníocaíocht airgeadais an Aontais, mar a leagtar amach i mbuiséad an Aontais é, agus, i gcás inarb infheidhme, méideanna na ranníocaíochtaí airgeadais ó chomhaltai eile seachas an tAontas agus ó chomhpháirtithe rannchuidithe, más ann dóibh, a chur san áireamh.

*Airteagal 26***Tuairisciú oibríochtúil agus airgeadais**

1. Soláthróidh an stiúrthóir feidhmiúcháin tuarascáil bhliantúil chomhdhlúite maidir le feidhmíocht a ghníomhaíochtaí nó a ghníomhaíochtaí i gcomhréir le rialacha airgeadais an chomhghnóthais don bhord rialaithe. Cuirfear an tuarascáil bhliantúil chomhdhlúite ar ghníomhaíochtaí ar fáil don phobal go tráthúil ar shuíomh gréasáin an chomhghnóthais faoi seach.
2. Áireofar sa tuarascáil bhliantúil chomhdhlúite ar ghníomhaíocht, i measc nithe eile, eolas ar na cúrsaí seo a leanas:
 - (a) taighde, nuálaíocht agus gníomhaíochtaí eile a rinneadh agus an caiteachas comhfhreagrach;
 - (b) na tograí a tíolacadh, lena n-áirítear miondealú de réir na dtíortha ina bhfuil an t-eintiteas dlítheanach bunaithe, agus de réir chineál na rannpháirtithe, go háirithe FB Manna agus rannpháirtithe nua;
 - (c) na ghníomhaíochtaí indíreacha a roghnaíodh i gcomhair cistiú, lena n-áirítear scagadh de réir catagóir rannpháirtí, lena n-áirítear FB Manna, agus de réir tíre, agus ag tabhairt le fios ranníocaíocht an chomhghnóthais faoi seach leis na rannpháirtithe agus na ghníomhaíochtaí aonair;
 - (d) faisnéis maidir le hoscailteacht na chomhghnóthas, lena n-áirítear faireachán ar naisc chomhoibríocha;
 - (e) na ghníomhaíochtaí breise arna ndéanamh ag comhaltaí seachas an tAontas, lena n-áirítear miondealú de réir na dtíortha ina bhfuil na comhaltaí príobháideacha, a gcomheintitis nó na heintitis chleamhnaithe de chuid ceachtar acu bunaithe;
 - (f) an comhar le comhpháirtíochtaí Eorpacha eile, lena n-áirítear glaonna comhpháirteacha, agus sineirgí idir bearta an chomhghnóthais agus tionscnaimh nó beartais náisiúnta nó réigiúnacha.
3. Seolfaidh oifigeach cuntasáíochta an chomhghnóthais na cuntais shealadacha chuig oifigeach cuntasáíochta an Choimisiúin agus chuig an gCúirt Iniúchóirí i gcomhréir le rialacha airgeadais an chomhghnóthais.
4. Seolfaidh an stiúrthóir feidhmiúcháin an tuarascáil ar bhainistíocht bhuiséadach agus airgeadais chuig Parlaimint na hEorpa, chuig an gComhairle agus chuig an gCúirt Iniúchóirí i gcomhréir le rialacha airgeadais an chomhghnóthais.
5. Déanfar an nós imeachta um urscaoileadh i gcomhréir le rialacha airgeadais an chomhghnóthais.

Roinn 2**Forálacha airgeadais***Airteagal 27***Rialacha airgeadais**

1. Glacfaidh an chomhghnóthas a rialacha airgeadais féin i gcomhréir le hAirteagal 71 de Rialachán (AE, Euratom) 2018/1046.
2. Foilseofar na rialacha airgeadais ar shuíomh gréasáin an chomhghnóthais faoi seach.

*Airteagal 28***Cineálacha maoinithe**

1. Beidh gach comhghnóthas comhchistithe ag an Aontas, na comhaltaí seachas an tAontas agus na comhpháirtithe rannchuidithe trí ranníocaíochtaí airgeadais agus ranníocaíochtaí comhchineáil le haghaidh gníomhaíochtaí oibríochtúla.
 2. Comhaontóidh na comhaltaí seachas an tAontas faoin mbealach a ndéanfar a ranníocaíocht chomhchoiteann a chomhroinnt eatarthu i gcomhréir leis na rialacha airgeadais is infheidhme.
 3. Cumhdófar costais oibríochtúla an chomhghnóthais trí bhíthin:
 - (a) ranníocaíocht airgeadais ón Aontas;
 - (b) ranníocaíochtaí airgeadais ó na comhaltaí príobháideacha nó a gcomheintitis nó, a n-eintitis chleamhnaithe, ó chomhpháirtithe rannchuidithe nó ó eagraíocht idirnáisiúnta atá ina comhalta den chomhghnóthas;
 - (c) i gcás inarb infheidhme, ranníocaíochtaí airgeadais ó na stáit rannpháirteacha;
 - (d) ranníocaíochtaí comhchineáil mar a shainítear in Airteagal 2, pointe (8);
 4. I gcomhréir le hAirteagal 10 agus Airteagal 11, beidh acmhainní comhghnóthais a chuirtear isteach ina bhuiséad comhdhéanta de na ranníocaíochtaí seo a leanas:
 - (a) ranníocaíochtaí airgeadais na gcomhaltaí leis an gcomhghnóthas le haghaidh costais riaracháin, arna gcomhroinnt go cothrom ar bhonn bhliantúil idir an tAontas agus comhaltaí seachas an tAontas, mura sonraítear a mhalairt i gCuid a Dó mar gheall ar an gcineál sonrach ballraíochta a bhaineann le comhghnóthas;
 - (b) ranníocaíochtaí airgeadais na gcomhaltaí nó na gcomhpháirtithe rannchuidithe le costais oibríochtúla an chomhghnóthais;
 - (c) aon ioncam a ghineann an comhghnóthas;
 - (d) aon ranníocaíochtaí, acmhainní agus ioncam airgeadais eile.
- Measfar gur ioncam a bheidh in aon ús a ghnóthóidh na ranníocaíochtaí dá dtagraítear sa mhír seo.
5. Féadfar aon chuid nach n-úsáidtear den ranníocaíocht i gcomhair costais riaracháin a chur ar fáil chun costais oibríochtúla an chomhghnóthais lena mbaineann a chumhdach.
 6. Má mhainníonn comhalta den Chomhghnóthas seachas an tAontas a ghealltanais a bhaineann lena ranníocaíocht, cuirfidh an stiúrthóir feidhmiúcháin é ar an eolas faoin méid sin i scríbhinn agus leagfaidh sé amach tréimhse réasúnach inar cheart an mhainneachtain a chur ina ceart. I gcás ina bhfuil an comhalta lena mbaineann seachas an tAontas fós ar mainneachtain, tráth a éagfaidh an tréimhse sin, cuirfidh an stiúrthóir feidhmiúcháin an Coimisiún agus na stáit rannpháirteacha, i gcás inarb infheidhme, ar an eolas i bhfianaise bearta féideartha de bhun Airteagal 11(8) agus cuirfidh sé in iúl don chomhalta lena mbaineann go bhfuil sé dícháilithe chun vóta a chaitheamh ar an mbord rialaithe i gcomhréir leis an Airteagal sin.
 7. Úsáidfear acmhainní an chomhghnóthais agus a ghníomhaíochtaí chun a chuspóirí agus a chúraimí a chomhall.
 8. Beidh úinéireacht ag an gcomhghnóthas ar na sócmhainní uile a ghin sé nó a aistríodh chuige chun a chuspóirí agus a chúraimí a chomhall.
 9. Seachas i gcás ina bhfoirceannantar an comhghnóthas, ní íocfar aon ioncam breise thar chaiteachas le comhaltaí an chomhghnóthais sin, mura gcinneann an bord rialaithe a mhalairt.

*Airteagal 29***Ceangaltais airgeadais**

1. Ní sháróidh ceangaltais airgeadais comhghnóthais méid na n-acmhainní airgeadais atá ar fáil nó atá tiomanta dá bhuiséad ag a chomhaltaí agus a chomhpháirtithe rannchuidithe.
2. Féadfar gealltanais buiséadacha na gcomhghnóthas dá dtagraítear in Airteagal 3(1) pointe (b), pointe (d) agus pointe (h), a roinnt ina dtráthchodanna bliantúla. Go dtí an 31 Nollaig 2024, ní rachaidh méid carnach na ngealltanais buiséadach sin i dtráthchodanna thar 50 % d'uasranníocaíocht an Aontais a leagtar amach in Airteagal 10. Ó mhí Eanáir 2025 ar aghaidh, beidh 20 % ar a laghad de bhuiséad carnach na mblianta iarmharacha nach gclúdófar le tráthchodanna bliantúla.

*Airteagal 30***Leasanna airgeadais na gcomhaltaí a chosaint**

1. Deonóidh an comhghnóthas rochtain d'fhoireann an Choimisiúin agus do dhaoine eile atá údaraithe ag an gcomhghnóthas nó ag an gCoimisiún faoi seach, chomh maith leis an gCúirt Iniúchóirí, ar a chuid láithreán agus áitreabh agus ar an bhfaisnéis go léir, lena n-áirítear faisnéis i bhformáid leictreonach, a theastóidh uathu chun a gcuid iniúcháireachtaí a dhéanamh.
2. Tá sé de chumhacht ag an Oifig Eorpach Frith-Chalaoise (OLAF) imscrúduithe riaracháin a dhéanamh, lena n-áirítear seiceálacha agus cigireachtaí ar an láthair, i gcomhréir leis na forálacha agus na nósanna imeachta a leagtar síos i Rialachán (Euratom, CE) Uimh. 2185/96 ón gComhairle ⁽³³⁾ agus Rialachán (AE, Euratom) Uimh. 883/2013 ó Pharlaimint na hEorpa agus ón gComhairle ⁽³⁴⁾ agus d'fhonn a shuí ar tharla calaois, éilliú nó aon ghníomhaíocht neamhdhleathach eile lena ndéantar difear do leasanna airgeadais an Aontais i ndáil le comhaontú, nó le cinneadh nó le conradh a chistítear faoin Rialachán seo.
3. Tugtar de chumhacht d'Oifig an Ionchúisitheora Phoiblí Eorpaigh (OIPE), i gcomhréir le Rialachán (AE) 2017/1939 ón gComhairle ⁽³⁵⁾, cionta coiriúla a dhéanann difear do leasanna airgeadais an Aontais a imscrúdú agus a ionchúiseamh mar a leagtar amach in Airteagal 4 den Rialachán sin.
4. D'ainneoin mhíreanna 1 go 3, beidh forálacha sna comhaontuithe, sna cinntí agus sna conarthaí a eascróidh as an Rialachán seo a chur chun feidhme, lena dtabharfar an chumhacht go sainráite don Choimisiún, don chomhghnóthas faoi seach, don Chúirt Iniúchóirí, do OIPE agus do OLAF na hiniúchtaí, seiceálacha ar an láthair agus cigireachtaí sin a dhéanamh i gcomhréir lena gcuid inniúlachtaí faoi seach.
5. Áiríteoidh gach comhghnóthas go dtabharfar cosaint leordhóthanach do leasanna airgeadais a chuid comhaltaí trí rialuithe inmheánacha agus seachtracha iomchuí a chur i gcrích nó iad a choimisiúnú.
6. Aontóidh gach comhghnóthas do Chomhaontú Idirinstitiúideach an 25 Bealtaine 1999 idir Parlaimint na hEorpa, an Chomhairle agus an Coimisiún maidir le himscrúduithe inmheánacha arna seoladh ag an Oifig Eorpach Frith-Chalaoise (OLAF) ⁽³⁶⁾. Glacfaidh gach comhghnóthas na bearta riachtanacha is gá chun imscrúduithe inmheánacha a chuirfidh OLAF i gcrích a éascú.
7. Tabharfaidh an comhghnóthas rochtain do gach cúirt iniúchóirí náisiúnta, arna iarraidh sin dóibh, ar an bhfaisnéis uile a bhaineann le ranníocaíochtaí náisiúnta an stáit rannpháirtigh faoi seach, lena n-áirítear faisnéis i bhformáid leictreonach, a bheidh riachtanach chun a n-iniúchtaí a dhéanamh.

⁽³³⁾ Rialachán (Euratom, CE) Uimh. 2185/96 ón gComhairle an 11 Samhain 1996 maidir le seiceálacha agus cigireachtaí ar an láthair arna ndéanamh ag an gCoimisiún chun leasanna airgeadais na gComhphobal Eorpach a chosaint i gcoinne na calaoise agus neamhríaltachtaí eile (IO L 292, 15.11.1996, lch. 2).

⁽³⁴⁾ Rialachán (AE, Euratom) Uimh. 883/2013 ó Pharlaimint na hEorpa agus ón gComhairle an 11 Meán Fómhair 2013 maidir le himscrúduithe arna ndéanamh ag an Oifig Eorpach Frith-Chalaoise (OLAF) agus lena n-aisghairtear Rialachán (CE) Uimh. 1073/1999 ó Pharlaimint na hEorpa agus ón gComhairle agus Rialachán (Euratom) Uimh. 1074/1999 ón gComhairle (IO L 248, 18.9.2013, lch. 1).

⁽³⁵⁾ Rialachán (AE) 2017/1939 ón gComhairle an 12 Deireadh Fómhair 2017 lena gcuirtear chun feidhme comhar feabhsaithe maidir le bunú Oifig an Ionchúisitheora Phoiblí Eorpaigh ("OIPE") (IO L 283, 31.10.2017, lch. 1).

⁽³⁶⁾ IO L 136, 31.5.1999, lch. 15.

*Airteagal 31***Iniúcháireachtaí ex post**

Déanfar iniúcháireachtaí ar ghníomhaíochtaí i gcomhréir le hAirteagal 53 den Rialachán maidir le Fís Eorpach mar chuid de na gníomhaíochtaí indíreacha in Fís Eorpach, go háirithe ag teacht leis an straitéis iniúcháireachta dá dtagraítear in Airteagal 53(2) den Rialachán sin.

*Airteagal 32***Iniúchadh Inmheánach**

1. Feidhmeoidh iniúcháir inmheánach an Choimisiúin na cumhachtaí céanna maidir leis an gcomhghnóthas leo sin a fheidhmítear maidir leis an gCoimisiún agus féachfaidh sé leis an ualach riaracháin ar an gcomhghnóthas a laghdú.
2. Féadfaidh an bord rialaithe feidhm iniúcháireachta inmheánaí a bhunú i gcomhréir le rialacha airgeadais an chomhghnóthais lena mbaineann.

Roinn 3**Forálacha oibríochtúla***Airteagal 33***Rúndacht**

Gan dochar d'Airteagal 34 agus Airteagal 36, áiríteoidh gach comhghnóthas go dtabharfar cosaint d'fhaisnéis rúnda a bhféadfadh nochtadh na faisnéise sin lasmuigh d'institiúidí Aontais agus comhlachtaí, oifigí nó gníomhaireachtaí eile an Aontais, damáiste a dhéanamh do leasanna a chomhaltaí nó do na rannpháirtithe i ngníomhaíochtaí an chomhghnóthais faoi seach. Áirítear le faisnéis rúnda den sórt sin, ach níl sé teoranta do, faisnéis phearsanta, faisnéis tráchtála, faisnéis íogair neamh-rúnaicmithe agus rúnaicmithe.

*Airteagal 34***Trédhearcacht**

Beidh feidhm ag Rialachán (CE) Uimh. 1049/2001 ó Pharlaimint na hEorpa agus ón gComhairle ⁽³⁷⁾ maidir le doiciméid atá i seilbh comhghnóthais.

*Airteagal 35***Sonraí pearsanta a phróiseáil**

I gcás ina n-éilítear le cur chun feidhme an Rialacháin seo go ndéanfaí sonraí pearsanta a phróiseáil, déanfar iad a phróiseáil i gcomhréir le Rialachán (AE) 2018/1725 ó Pharlaimint na hEorpa agus ón gComhairle ⁽³⁸⁾.

⁽³⁷⁾ Rialachán (CE) Uimh. 1049/2001 ó Pharlaimint na hEorpa agus ón gComhairle an 30 Bealtaine 2001 maidir le rochtain phoiblí ar dhoiciméid ó Pharlaimint na hEorpa, ón gComhairle agus ón gCoimisiún (IO L 145, 31.5.2001, lch. 43).

⁽³⁸⁾ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39).

*Airteagal 36***Rochtain ar thorthaí agus faisnéis maidir le tograí**

1. Tabharfaidh an comhghnóthas rochtain d'institiúidí an Aontais agus do chomhlachtaí, oifigí agus do ghníomhaireachtaí an Aontais, mar aon le húdaráis na stát rannpháirteach i gcás inarb infheidhme, ar an bhfaisnéis go léir a bhaineann leis na gníomhaíochtaí indíreacha a chistíonn sé. Áireofar san fhaisnéis sin ranníocaíochtaí agus torthaí na dtairbhíthe a bheidh rannpháirteach i ngníomhaíochtaí indíreacha an chomhghnóthais nó aon fhaisnéis eile a mheastar a bheith riachtanach chun beartais nó cláir an Aontais, nó i gcás inarb infheidhme, na stát rannpháirteach a fhorbairt, a chur chun feidhme, a chur faoi fhaireachán agus a mheas. Tá cearta rochtana den sórt sin teoranta d'úsáid neamhthráchtála agus neamhiomaíoch agus comhlíonfaidh siad na rialacha rúndachta is infheidhme.
2. Chun críocha beartais nó cláir an Aontais a fhorbairt, a chur chun feidhme, a fhaire agus a mheas, soláthróidh an comhghnóthas an fhaisnéis a áirítear i dtograí a chuirtear isteach don Choimisiún. Beidh feidhm aige sin *mutatis mutandis* maidir le stáit rannpháirteacha i gcás inarb infheidhme maidir le tograí lena n-áirítear iarratasóirí atá bunaithe ar a gcríocha, atá teoranta d'úsáid neamhthráchtála agus neamhiomaíoch agus i gcomhréir leis na rialacha rúndachta is infheidhme.

*Caibidil 5***Foireann agus dliteanas****Roinn 1****Foireann, pribhléidí agus díolúintí***Airteagal 37***Foireann**

1. Maidir leis na Rialacháin Foirne agus Coinníollacha Fostaíochta Sheirbhísigh Eile an Aontais Eorpaigh agus na rialacha a ghlac institiúidí an Aontais go comhpháirteach chun na Rialacháin Foirne agus na Coinníollacha Fostaíochta Seirbhíseach Eile sin a chur i bhfeidhm, ba cheart go mbeadh feidhm acu maidir le foireann an chomhghnóthais.
2. Socrófar na hacmhainní foirne i bplean bunaíochta foirne gach comhghnóthais lena gcuirfear in iúl líon na bpost sealadach de réir feidhmghrúpa agus gráid agus líon na mball foirne ar conradh arna sloinneadh in aonaid de choibhéis lánaimseartha, i gcomhréir lena bhuiséad bliantúil.
3. Beidh foireann shealadach agus foireann ar conradh ag obair don Chomhghnóthas.
4. Is é an Comhghnóthas a íocfaidh na costais go léir a bhaineann leis an bhfoireann.

*Airteagal 38***Saineolaithe náisiúnta ar iasacht agus oiliúnaithe**

1. Féadfaidh comhghnóthas úsáid a bhaint as saineolaithe náisiúnta ar iasacht agus oiliúnaithe nach bhfuil fostaithe go díreach ag an gcomhghnóthas. Cuirfear líon na saineolaithe náisiúnta ar iasacht arna chur in iúl i gcoibhéisí lánaimseartha leis an bhfaisnéis maidir le hacmhainní foirne dá dtagraítear in Airteagal 37(2) i gcomhréir le buiséad bliantúil an chomhghnóthais lena mbaineann.
2. Glacfaidh bord rialaithe an chomhghnóthais lena mbaineann cinneadh ina leagfar síos rialacha maidir le saineolaithe náisiúnta a thabhairt ar iasacht don chomhghnóthas faoi seach agus maidir le fostaíocht oiliúnaithe.

*Airteagal 39***Pribhléidí agus Díolúintí**

Beidh feidhm ag Prótacal Uimh. 7 maidir le pribhléidí agus díolúintí an Aontais Eorpaigh, atá i gceangal le CAE agus le CFAE, maidir leis na comhghnóthais agus foireann na gcomhghnóthas.

*Roinn 2***Dliteanas***Airteagal 40***Dliteanas na gcomhghnóthas**

1. Rialófar dliteanas conarthach an chomhghnóthais trí na forálacha conarthachta ábhartha agus tríd an dlí is infheidhme maidir leis an gcomhaontú, maidir leis an gcinneadh nó maidir leis an gconradh i dtrácht.
2. I gcás ina bhfuil an dliteanas neamhchonarthach, déanfaidh an comhghnóthas, i gcomhréir leis na prionsabail ghinearálta is coiteann do dhlíthe na mBallstát, aon damáiste arb é a fhoireann is cúis leis i bhfeidhmiú a gcuid feidhmeanna a shlánú.
3. Measfar gur caiteachas de chuid comhghnóthais aon íocaíocht a dhéanfaidh comhghnóthas maidir leis an dliteanas dá dtagraítear i mír 1 agus mír 2, agus maidir leis na costais agus na speansais a tabhaíodh dá réir sin, agus cumhdófar iad ina chuid acmhainní féin.
4. Is iad na comhghnóthais amháin a bheidh freagrach as a gcuid oibleagáidí a chomhlíonadh.

*Airteagal 41***Dliteanas na gcomhaltaí agus árachas**

1. Beidh dliteanas airgeadais chomhaltaí an chomhghnóthais as fiacha an chomhghnóthais teoranta do ranníocaíochtaí airgeadais a rinne siad cheana leis an gcomhghnóthas.
2. Glacfaidh agus cothóidh an comhghnóthas árachas iomchuí.

*Airteagal 42***Coinbhleachtaí leasa**

1. Seachnóidh an comhghnóthas, a chomhlachtaí agus a fhoireann aon choinbhleacht leasa iad i mbun a gcuid gníomhaíochtaí.
2. Glacfaidh an bord rialaithe rialacha lena ndéanfar cosc, seachaint agus bainistiú ar choinbhleachtaí leasa i ndáil le foireann, comhaltaí agus daoine eile a fhreastalaíonn ar an mbord rialaithe agus comhlachtaí nó grúpaí eile an chomhghnóthais, i gcomhréir le rialacha airgeadais an chomhghnóthais agus leis na Rialacháin Foirne i leith foirne.

*Caibidil 6***Réiteach díospóide***Airteagal 43***Dlínse na Cúirte Breithiúnais agus an dlí is infheidhme**

1. Beidh dlínse ag Cúirt Bhreithiúnais an Aontais Eorpaigh:
 - (a) de bhun aon chlásal eadrána atá i gcomhaontuithe nó i gconarthaí arna gcur i gcrích ag an gcomhghnóthas, nó ina chinntí;

- (b) i ndíospóidí a bhaineann le cúiteamh de bharr damáiste a rinne foireann an Chomhghnóthais i gcomhlíonadh a gcuid dualgas;
 - (c) in aon díospóid idir an comhghnóthas agus a fhoireann laistigh de theorainneacha agus faoi na coinníollacha a leagtar síos sna Rialacháin Foirne agus sna Coinníollacha Fostaíochta Seirbhíseach Eile.
2. Maidir le haon ábhar nach bhfuil cumhdaithe leis an Rialachán seo ná le haon ghníomhartha dlíthiúla eile an Aontais, beidh feidhm ag dlí an bhallstáit ina bhfuil suíochán an chomhghnóthais lonnaithe.

Airteagal 44

Gearáin leis an Ombudsman

D'fhéadfadh cinní a ghlacann comhghnóthas maidir le cur chun feidhme an Rialacháin seo a bheith ina ábhar gearáin leis an Ombudsman i gcomhréir le hAirteagal 228 de CFAE.

Caibidil 7

Foirceannadh

Airteagal 45

Foirceannadh

1. Foirceannfar na comhghnóthais ag deireadh na tréimhse a leagtar amach in Airteagal 3.
2. Anuas ar mhír 1, tionscnófar an nós imeacht um fhoirceannadh an chomhghnóthais go huathoibríoch i gcás ina n-aistarraingíonn an tAontas nó gach comhalta seachas an tAontas ón gcomhghnóthas.
3. Chun críche na nósanna imeachta um fhoirceannadh a dhéanamh ar an gcomhghnóthas, ceapfaidh an bord rialaithe leachtaitheoir amháin nó níos mó, a chloífidh le cinní an bhoird rialaithe.
4. Le linn an nós imeachta um fhoirceannadh, féadfar sócmhainní an chomhghnóthais a úsáid chun a dhliteanais agus an caiteachas a bhaineann lena fhoirceannadh a chumhdach. Leithdháilfear aon bharrachas i measc chomhaltaí an chomhghnóthais tráth an fhoirceanntha i gcomhréir lena ranníocaíocht airgeadais leis an gcomhghnóthas. Aisíocfar le buiséad an Aontais aon bharrachas a dháilfear ar an Aontas.
5. Bunófar nós imeachta *ad hoc* chun bainistíocht iomchuí aon chomhaontaithe a chuirtear i gcrích nó aon chinneadh a ghlacann an comhghnóthas atá á fhoirceannadh a áirithiú, chomh maith le haon chonradh soláthair ag a bhfuil fad atá níos faide ná fad an chomhghnóthais.

CUID A DÓ

FORÁLACHA SONRACHA MAIDIR LE COMHGHNÓTHAIS AONAIR

TEIDEAL I

AN COMHGHNÓTHAS UM EORAIP BHITHBHUNAITHE CHIORCLACH

Airteagal 46

Cuspóirí breise an Chomhghnóthais um Eoraip Bhithbhunaithe Chiorclach

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag an gComhghnóthas um Eoraip Bhithbhunaithe Chiorclach:
 - (a) dlús a chur le próiseas nuálaíochta agus forbairt réiteach nuálach bithbhunaithe;

- (b) dlús a chur le himscaradh margaidh na réiteach aibí agus nuálach bithbhunaithe atá ann cheana;
 - (c) ardleibhéal feidhmíochta comhshaoil maidir le córais thionsclaíocha bithbhunaithe a áirithiú.
2. Beidh na cuspóirí sonracha seo a leanas ag an gComhghnóthas um Eoraip Bhithbhunaithe Chiorclach freisin:
- (a) déine gníomhaíochtaí taighde agus nuálaíochta trasearnálacha a mhéadú d'fhonn tairbhiú den dul chun cinn a rinneadh sna heolaíochtaí saoil agus i ndisciplíní eolaíochta eile chun réitigh inbhuanaithe bithbhunaithe a fhorbairt agus a léiriú;
 - (b) acmhainneacht taighde agus nuálaíochta na ngeallsealbhóirí ar fud an Aontais a mhéadú agus a chomhtháthú chun féidearthachtaí an bhithgheilleagair áitiúil a shaothrú, lena n-áirítear i réigiúin ina bhfuil tearcforbairt ar an acmhainneacht sin;
 - (c) an acmhainneacht taighde agus nuálaíochta a mhéadú chun aghaidh a thabhairt ar dhúshláin chomhshaoil agus ar nuálaíochtaí bithbhunaithe níos inbhuanaithe a fhorbairt trína áirithiú go ndéanfar saincheistean inbhuanaitheachta agus an fheidhmíocht chomhshaoil a chomhtháthú ar fud an tslabhra nuálaíochta iomláin agus i réitigh nuálacha amach anseo;
 - (d) comhtháthú taighde agus nuálaíochta bithbhunaithe i dtionscal bithbhunaithe an Aontais a threisiú agus rannpháirtíocht gníomhaithe T&N a mhéadú lena n-áirítear soláthraithe bunábhair sna slabhraí luacha bithbhunaithe;
 - (e) an riosca a ghabhann le hinfheistíocht taighde agus nuálaíochta i gcuideachtaí agus tionscadail bithbhunaithe a laghdú;
 - (f) a áirithiú go gcuirtear breithnithe ciorclaíochta agus comhshaoil, lena n-áirítear rannchuidithe le cuspóirí aeráidneodrachta agus truailliú nialasach, san áireamh i bhforbairt agus cur chun feidhme táirgí taighde agus nuálaíochta bithbhunaithe agus an glacadh sochaíoch a éascú.

Airteagal 47

Cúraimí breise an Chomhghnóthais um Eoraip Bhithbhunaithe Chiorclach

Anuas ar na cúraimí a leagtar amach in Airteagal 5, déanfaidh an Comhghnóthas um Eoraip Bhithbhunaithe Chiorclach na cúraimí seo a leanas:

- (a) a áirithiú go mbainfear a cuspóirí amach trí ghníomhaíochtaí taighde agus nuálaíochta na gcomhpháirtithe poiblí agus príobháideacha a chlárú;
- (b) cistiú poiblí agus príobháideach a shlógadh le haghaidh a ghníomhaíochtaí taighde agus nuálaíochta;
- (c) tacú le tionscadail taighde agus nuálaíochta ildisciplíneacha ardtionchair a chuireann leis an nuálaíocht thionsclaíoch bithbhunaithe chun a chuspóirí an Chomhghnóthais um Eoraip Bhithbhunaithe Chiorclach a bhaint amach;
- (d) a ghníomhaíochtaí taighde agus nuálaíochta chomh maith leis an slabhra nuálaíochta foriomlán ó Leibhéal ísle go Leibhéal arda Ullmhachta Teicneolaí a threisiú;
- (e) gníomhaithe taighde agus nuálaíochta lena n-áirítear soláthraithe amhábhair ó cheantair thuaithe, chósta agus uirbeacha agus ó réigiúin ina bhfuil poitéinseal le haghaidh forbairt slabhra breisluacla bithbhunaithe nár saothraíodh fós a shlógadh agus a chomhtháthú chun comhar a dhéanamh le gníomhaíochtaí tionscadail;
- (f) a áirithiú go ndíríonn gníomhaíochtaí taighde agus nuálaíochta faoi ar shaincheistean leas an phobail, go háirithe ar fheidhmíocht chomhshaoil agus aeráide an tionscail bithbhunaithe, i dtéarmaí tuisceana ar na fadhbanna ábhartha agus réitigh a fhorbairt ar na fadhbanna sin;
- (g) cumarsáid agus comhar a chur chun cinn idir gníomhaithe taighde agus nuálaíochta agus geallsealbhóirí tionsclaíocha faoi chun feacht a mhúscailt maidir le heolas agus teicneolaíocht atá ag athrú go tapa, comhar trasdisciplíneach agus trasearnála agus glacadh margaidh na réiteach nuálacha bithbhunaithe a éascú;
- (h) údarais náisiúnta agus réigiúnacha atá in ann coinníollacha níos fabhraí a chruthú le haghaidh ghlacadh margaidh na nuálaíochtaí bithbhunaithe a shlógadh;

- (i) tacú leis an machnamh i leith caighdeáin a fhorbairt chun glacadh nuálaíochtaí bithbhunaithe sa mhargadh a éascú;
- (j) critéir eolaíochta inbhuanaithe láidre agus tagarmharcanna feidhmíochta a shocrú, a chur chun feidhme agus faireachán a dhéanamh orthu ina ghníomhaíochtaí taighde agus nuálaíochta uile, agus iad a chur chun cinn taobh amuigh den tionscnamh agus sa tionscal bithbhunaithe;
- (k) réitigh nuálacha bithbhunaithe a chur chun cinn i measc déantóirí beartais, na hearnála tionsclaíochta, eagraíochtaí neamhrialtasacha, na sochaí sibhialta agus tomhaltóirí trí chéile agus na páirtithe sin a chur ar an eolas fúthu.

Airteagal 48

Comhaltaí

Beidh na comhaltaí seo a leanas ag an gComhghnóthas um Eoraip Bhithbhunaithe Chiorclach:

- (a) an tAontas, a mbeidh an Coimisiún mar ionadaí dó;
- (b) Cuibhreannas na dTionscal Bithbhunaithe, eagraíocht neamhbhrabúis atá cláraithe faoi dhlí na Beilge, tar éis fógra a fháil faoina cinneadh aontú don Chomhghnóthas um an Eoraip Bhithbhunaithe Chiorclach trí bhíthin litir ghealltanais, nach mbeidh coinníollacha inti maidir lena haontachas seachas na coinníollacha sin a leagtar amach sa Rialachán seo;
- (c) beidh na comhaltaí comhlachaithe a roghnófar i gcomhréir le hAirteagal 7 faoi réir cinneadh ón mbord rialaithe.

Airteagal 49

Ranníocaíocht airgeadais ón Aontas

Suas le EUR 1 000 000 000, lena n-áirítear suas le EUR 23 500 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas um Eoraip Bhithbhunaithe Chiorclach, leithreasuithe LEE san áireamh, chun costais riaracháin agus costais oibriúcháin a chumhdach.

Airteagal 50

Ranníocaíochtaí ó chomhaltaí seachas an tAontas

Déanfaidh comhaltaí an Chomhghnóthais um Eoraip Bhithbhunaithe Chiorclach seachas an tAontas ranníocaíocht iomlán a gcomheintíteas nó a n-eintíteas cleamhnaithe nó déanfaidh siad comhshocrú do dhéanamh a ranníocaíochta iomláine le haghaidh EUR 1 000 000 000 ar a laghad, lena n-áirítear suas le EUR 23 500 000 le haghaidh costais riaracháin, sa tréimhse a leagtar amach in Airteagal 3.

Airteagal 51

Raon feidhme gníomhaíochtaí breise

1. D'ainneoin chumhacht an Bhoird Rialaithe cinneadh a dhéanamh maidir leis an bplean gníomhaíochtaí breise de bhun Airteagal 17(2), pointe (n), agus laistigh de raon feidhme Airteagal 2, pointe (9) agus pointe (10), déanfaidh Cuibhreannas na dTionscal Bithbhunaithe nó a chomheintitis nó a eintitis chleamhnaithe togra le haghaidh na ngníomhaíochtaí breise gach bliain. Is éard atá i gceist leis na gníomhaíochtaí breise gníomhaíochtaí atá nasctha go díreach le tionscadail agus gníomhaíochtaí an Chomhghnóthais um Eoraip Bhithbhunaithe Chiorclach, lena n-áirítear an méid seo a leanas go háirithe:

- (a) infheistíochtaí i saoráidí nua a léiríonn slabhra luacha nua, lena n-áirítear infheistíochtaí i dtrealamh marthanach, uirlisí agus bonneagar tionlacain, go háirithe iad siúd a bhaineann le himscaradh réigiúnach agus a fhíorúchán inbhuanaitheachta;
- (b) infheistíochtaí i ngléasra nua táirgeachta nó suaitheanta nuálach agus inbhuanaithe;
- (c) infheistíochtaí i dtaighde agus nuálaíocht nua agus bonneagar a bhfuil údar cuí leis, lena n-áirítear saoráidí, uirlisí agus trealamh marthanach nó gléasra píolótach (lárionaid taighde);

- (d) gníomhaíochtaí caighdeánaithe;
 - (e) gníomhaíochtaí cumarsáide, scaipthe agus chun feasacht a ardú.
2. Is iad seo a leanas na hinfheistíochtaí atá nasctha go díreach le tionscadail go háirithe:
- (a) infheistíochtaí neamh-incháilithe a theastaíonn chun tionscadal de chuid an Chomhghnóthais um Eoraip Bhithbhunaithe Chiorclach a chur chun feidhme le linn an tionscadail sin;
 - (b) infheistíocht a rinneadh i gcomhthráth le tionscadal de chuid an Chomhghnóthais um Eoraip Bhithbhunaithe Chiorclach, lena gcomhlánaítear torthaí an tionscadail agus á thabhairt chuig LUT níos airde;
 - (c) infheistíochtaí a theastaíonn le haghaidh imscaradh torthaí tionscadail de chuid an Chomhghnóthais um Eoraip Bhithbhunaithe Chiorclach tar éis dhúnadh an tionscadail go dtí foirceannadh an Chomhghnóthais um Eoraip Bhithbhunaithe Chiorclach. I gcásanna ina bhfuil údar cuí leo, féadfar an infheistíocht a bhaineann le himscaradh torthaí tionscadail ón tionscnamh roimhe sin (Comhghnóthas BBI) a chur san áireamh.

Airteagal 52

Comhlachtaí an Chomhghnóthais um Eoraip Bhithbhunaithe Chiorclach

Is iad Comhlachtaí an Chomhghnóthais um Eoraip Bhithbhunaithe Chiorclach:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát;
- (d) an Coiste Eolaíoch;
- (e) na Grúpaí Imscartha.

Airteagal 53

Comhdhéanamh an Bhoird Rialaithe

Beidh an Bord Rialaithe comhdhéanta mar a leanas:

- (a) cúigear ionadaithe de chuid an Choimisiúin, thar ceann an Aontais; agus
- (b) cúigear ionadaithe ó gach ceann de na comhaltaí seachas an tAontas; ba cheart go ndéanadh duine amháin díobh ar a laghad ionadaíocht ar FBManna.

Airteagal 54

Feidhmiú an Bhoird Rialaithe

1. Beidh 50 % de na cearta vótála ag na comhaltaí eile seachas an tAontas i dteannta a chéile.
2. De mhaolú ar Airteagal 16(4), toghfaidh an Bord Rialaithe a chathaoirleach ar feadh tréimhse 2 bhliain.
3. Tionólfaidh an Bord Rialaithe a ghnáthchruinnithe ceithre huair sa bhliain ar a laghad.
4. Anuas ar na cruinnithe dá dtagraítear i mír 2, tionólfaidh an Bord Rialaithe cruinniú straitéiseach uair amháin na bliana ar a laghad, agus is é a bheidh mar phríomhchuspóirí leis an gcruinniú sin dúshlán agus deiseanna le haghaidh tionscal inbhuanaithe bithbhunaithe a aithint agus treoshuíomh straitéiseach breise a sholáthar don Chomhghnóthas um Eoraip Bhithbhunaithe Chiorclach.
5. Tabharfar cuireadh do phríomhfheidhmeannaigh bhreise nó d'oifigigh bhreise ag a bhfuil cumhacht chinnteoireachta de chuid na gcuideachtaí bithbhunaithe Eorpacha agus don Choimisiún freastal ar an gcruinniú straitéiseach.

*Airteagal 55***An Coiste Eolaíoch**

1. Is comhlacht comhairleach eolaíoch an Chomhghnóthais um Eoraip Chiorclach Bithbhunaithe dá dtagraítear in Airteagal 21(1) a bheidh sa Choiste Eolaíoch.
2. Ní bheidh níos mó ná 15 chomhalta bhuana a bheith ar an gCoiste Eolaíoch.
3. Toghfar cathaoirleach an Choiste Eolaíoch ar feadh tréimhse 2 bhliain.
4. Bunóidh an Coiste Eolaíoch tascfhórsa ar a mbeidh saineolaithe leis na próifílí iomchuí chun cuidiú le béim leordhóthanach a chur ar gach gné inbhuanaithe den chlár oibre. Aon uair is féidir, áireofar le comhairle an Choiste Eolaíoch maidir leis an gclár oibre gnéithe a bhaineann le ciorclaíocht, inbhuanaitheacht chomhshaoil, caomhnú agus feabhsú bithéagsúlachta, chomh maith le gnéithe níos leithne a bhaineann le hinbhuanaitheacht na gcóras bithbhunaithe agus na slabhraí luacha gaolmhara.

*Airteagal 56***Na Grúpaí Imscartha**

1. Bunófar Grúpa Imscartha amháin nó níos mó ná Grúpa Imscartha amháin de bhun Airteagal 22. Is é ról na nGrúpaí Imscartha comhairle a chur ar an mBord Rialaithe maidir le saincheistanna atá criticiúil do ghlacadh margaidh nuálaíochta bithbhunaithe agus chun imscaradh réiteach ciorclach bithbhunaithe inbhuanaithe a chur chun cinn.
2. Áireofar béim théamach iomchuí agus ionadaíochas forleathan geallsealbhóirí nuálaíochta bithbhunaithe le comhdhéanamh na nGrúpaí Imscartha. Féadfaidh aon gheallsealbhóir, seachas comhaltaí Chuibhreannas na dTionscal Bithbhunaithe, a gcomheintitis nó a n-eintitis chleamhnaithe, suim a léiriú chun bheith ina chomhalta de Ghrúpa Imscartha. Leagfaidh an Bord Rialaithe amach fad agus comhdhéanamh beartaithe na nGrúpaí Imscartha, fad na sainorduithe agus féidearthacht athnuachana na gcomhaltaí, agus roghnóidh sé comhaltaí na ngrúpaí sin.
3. Tiocfaidh na Grúpaí Imscartha le chéile uair amháin sa bhliain ar a laghad. Ag an gcéad chruinniú, glacfaidh na Grúpaí Imscartha a rialacha nós imeachta. Faomhfaidh an Bord Rialaithe na rialacha nós imeachta sin. Gairfear cruinnithe urghnácha de chuid na nGrúpaí Imscartha ar iarraidh ón mBord Rialaithe, ón gcathaoirleach nó ó thromlach an Ghrúpa Imscartha ábhartha.
4. Toghfaidh na Grúpaí Imscartha cathaoirleach, agus leasathaoirleach le haghaidh gach béime téamaí, i gcomhair tréimhse 2 bhliain. Comhordaíonn an cathaoirleach gníomhaíochtaí agus déanann sé ionadaíocht ar an nGrúpa Imscartha. Féadfar cuireadh a thabhairt don chathaoirleach, mar bhreathnóir, chuig cruinnithe an Choiste Eolaíoch agus ghrúpa ionadaithe na stát.
5. Soláthróidh na Grúpaí Imscartha moltaí maidir le saincheistanna a bhaineann le himscaradh na nuálaíochta bithbhunaithe ar iarraidh ón mBord Rialaithe. Féadfaidh na Grúpaí Imscartha moltaí a eisiúint don Bhord Rialaithe tráth ar bith ar a dtionscnamh féin freisin.

TEIDEAL II

AN COMHGHNÓTHAS UM EITLÍOCHT GHLAN*Airteagal 57***Cuspóirí breise an Chomhghnóthais um Eitlíocht Ghlan**

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag an gComhghnóthas um Eitlíocht Ghlan:
 - (a) rannchuidiú le lorg éiceolaíochta na heitlíochta a laghdú trí dhlús a chur le forbairt teicneolaíochtaí aeráidneodracha eitlíochta lena n-imscaradh a luaithe is féidir, agus dá bhrí sin déanfar rannchuidiú nach beag le baint amach spriocanna ginearálta an Chomhaontaithe Ghlais don Eoraip, go háirithe maidir le glanastaíochtaí gás ceaptha teasa ar fud an Aontais de réir sprioc laghdaithe 55 % ar a laghad faoi 2030, i gcomparáid le leibhéal 1990, agus le conair i dtreo aeráidneodracht a bhaint amach faoi 2050, ar a dhéanaí;

- (b) a áirithiú go gcuireann na gníomhaíochtaí taighde agus nuálaíochta a bhaineann le haerloingseoireacht, agus béim ar leith ar thionscnaimh teicneolaíochta cheannródaíocha, le hiomaíochas inbhuanaithe thionscal eitlíochta an Aontais, agus a áirithiú go gcomhlíontar leis na teicneolaíochtaí eitlíochta aeráidneodracha na ceanglais sábháilteachta agus slándála eitlíochta ábhartha, agus go mbeidh an eitlíocht ina modh iompair paisinéirí agus lasta atá slán, iontaofa, costéifeachtach agus éifeachtúil i gcónaí;
 - (c) acmhainneacht taighde agus nuálaíochta eitlíochta na hEorpa a chur chun cinn.
2. Beidh na cuspóirí sonracha seo a leanas ag an gComhghnóthas um Eitlíocht Ghlan freisin:
- (a) nuálaíochtaí teicneolaíochta aerárthaigh suaiteacha a chomhtháthú agus a léiriú go mbeidh siad in ann glanastaíochtaí gás ceaptha teasa a laghdú 30 % ar a laghad faoi 2030, i gcomparáid le teicneolaíocht úrscothach 2020, agus an chonair a réiteach chun go mbeidh an eitlíocht aeráidneodrach faoi 2050;
 - (b) a áirithiú gur féidir le hullmhacht theicneolaíoch agus ullmhacht fhéideartha thionsclaíoch nuálaíochtaí tacú le seoladh táirgí agus seirbhísí nua suaiteacha faoi 2035, agus mar aidhm leis sin flít nua a chur in ionad 75 % den fhlít ar seirbhís faoi 2050, agus córas eitlíochta Eorpach atá nuálach, iontaofa, sábháilte agus costéifeachtach a fhorbairt atá in ann cuspóir na haeráidneodrachta faoi 2050, ar a dhéanaí, a chomhlíonadh;
 - (c) comhtháthú slabhraí luacha taighde agus nuálaíochtaí maidir le heitlíocht aeráidneodrach a leathnú agus a chothú, lena n-áirítear an saol acadúil, eagraíochtaí taighde, tionscal agus FBManna, a bhaineann tairbhe as sineirgí a shaothrú le cláir ábhartha náisiúnta agus Eorpacha eile freisin agus trí thacú le glacadh scileanna tionsclaíocha ar fud an tslabhra luacha.

Airteagal 58

Cúraimí breise an Chomhghnóthais um Eitlíocht Ghlan

Anuas ar na cúraimí a leagtar amach in Airteagal 5, déanfaidh an Comhghnóthas um Eitlíocht Ghlan na cúraimí seo a leanas:

- (a) an fhaisnéis uile is gá le haghaidh ullmhú agus tíolacadh tograí chuig glaonna oscailte an Chomhghnóthais um Eitlíocht Ghlan a fhoilsiú ar a shuíomh gréasáin agus ar shuíomhanna gréasáin ábhartha an Choimisiúin;
- (b) faireachán agus measúnú a dhéanamh ar an dul chun cinn teicneolaíoch i dtreo ghnóthú na gcuspóirí ginearálta agus sonracha a leagtar amach in Airteagal 57;
- (c) rochtain iomlán ar shonraí agus ar fhaisnéis a éascú le haghaidh faireachán tionchair neamhspleách a dhéanamh ar thaighde agus nuálaíocht eitlíochta, arna dhéanamh faoi mhaoirseacht an Choimisiúin;
- (d) cúnamh a thabhairt don Choimisiún, ar iarraidh uaidh, maidir le bunú agus forbairt chomhordú na rialachán agus na gcaighdeán a thacaíonn le glacadh margaidh na réiteach eitlíochta glaine, go háirithe trí thabhairt faoi staidéir, ionsamhlúcháin agus comhairle theicniúil a chur ar fáil, fad a áirítear an gá le deireadh a chur le bacainní ó thaobh iontráil isteach sa mhargadh.

Airteagal 59

Comhaltaí

1. Beidh na comhaltaí seo a leanas ag an gComhghnóthas um Eitlíocht Ghlan:

- (a) an tAontas, a mbeidh an Coimisiún mar ionadaí dó;
- (b) na comhaltaí bunaidh a liostaítear in Iarscríbhinn I, tar éis fógra a fháil faoina gcinneadh aontú don Chomhghnóthas um Eitlíocht Ghlan trí bhíthin litir ghealltanais, nach mbeidh coinníollacha inti maidir lena n-aontachas seachas na coinníollacha a leagtar amach sa Rialachán seo;
- (c) na comhaltaí comhlachaithe a roghnófar i gcomhréir le hAirteagal 7 faoi réir cinneadh ón mBord Rialaithe.

2. De bhreis ar Airteagal 7(1), féadfaidh an Bord Rialaithe, le linn na chéad 6 mhí i ndiaidh bhunú an Chomhghnóthais um Eitlíocht Ghlan, comhaltaí comhlachaithe a roghnú ó liosta arna tharraingt suas i ndiaidh glao oscailte ar léiriú spéise a sheol an Coimisiún sular bunaíodh é. Beidh feidhm ag coinníollacha Airteagal 7(2) *mutatis mutandis*.

Airteagal 60

Ranníocaíocht airgeadais ón Aontas

Suas le EUR 1 700 000 000, lena n-áirítear suas le EUR 39 223 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas um Eitlíocht Ghlan, leithreasuithe LEE san áireamh, chun costais riaracháin agus costais oibriúcháin a chumhdach.

Airteagal 61

Ranníocaíochtaí ó chomhaltaí seachas an tAontas

Déanfaidh comhaltaí an Chomhghnóthais um Eitlíocht Ghlan seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 2 400 000 000 ar a laghad, lena n-áirítear suas le EUR 39 223 000 le haghaidh costais riaracháin, sa tréimhse a leagtar amach in Airteagal 3.

Airteagal 62

Raon feidhme gníomhaíochtaí breise

1. Chun críoch Airteagal 11(1), pointe (b), féadfaidh sé go n-áireofar na rudaí seo a leanas le gníomhaíochtaí breise:
 - (a) gníomhaíochtaí a chumhdaítear faoi ghníomhaíochtaí indíreacha an Chomhghnóthais um Eitlíocht Ghlan ach nach gcistítear faoi ghníomhaíochtaí indíreacha den sórt sin;
 - (b) gníomhaíochtaí a bhaineann go díreach le clár oibre an Chomhghnóthais um Eitlíocht Ghlan;
 - (c) gníomhaíochtaí taighde agus nuálaíochta lena dtógtar ar ghníomhaíochtaí arna gcistiú ag an gComhghnóthas um Eitlíocht Ghlan nó an tionscnamh a bhí ann roimhe;
 - (d) gníomhaíochtaí taighde agus nuálaíochta tionscadail a bhfuil nasc sonrach acu leis an gClár Oibre Straitéiseach um Thaighde agus um Nuálaíocht, agus a chomhchistítear faoi chlár náisiúnta nó réigiúnacha laistigh den Aontas;
 - (e) tionscadail phríobháideacha taighde agus nuálaíochta lena gcomhlánaítear tionscadail ar an Clár Oibre Straitéiseach um Thaighde agus um Nuálaíocht chomh maith le gníomhaíochtaí a rannchuidíonn le glacadh scileanna a bhaineann go sonrach leis an tionscal ar fud an tslabhra luacha;
 - (f) gníomhaíochtaí as a n-eascaíonn imscaradh nó glacadh thorthaí tionscadail ón gComhghnóthas um Eitlíocht Ghlan nó ó na tionscnamh roimhe sin dá chuid, nach bhfuair aon chistiú ón Aontas;
 - (g) gníomhaíochtaí caighdeánaithe agus deimhnithe Eorpacha a bhaineann le réitigh eitlíochta glaine ó thionscadail de chuid an Chomhghnóthais um Eitlíocht Ghlan nó ó thionscnaimh roimhe sin.
2. Beidh táirgí insoláthartha atá sainmhínithe go soiléir ag gníomhaíochtaí breise.

Airteagal 63

Comhlachtaí an Chomhghnóthais um Eitlíocht Ghlan

Is iad Comhlachtaí an Chomhghnóthais um Eitlíocht Ghlan:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát;

- (d) an Coiste Teicniúil;
- (e) an Comhlacht Comhairliúcháin Eolaíoch um Eitlíocht Ghlan na hEorpa.

Airteagal 64

Comhdhéanamh an Bhoird Rialaithe

Beidh an Bord Rialaithe comhdhéanta mar a leanas:

- (a) beirt ionadaithe de chuid an Choimisiúin, thar ceann an Aontais;
- (b) cúig ionadaí dhéag ó chomhaltaí seachas an tAontas a roghnaigh na comhaltaí bunaidh as a measc féin agus as measc comhaltaí comhlachaithe ag áirithiú ionadaíocht chothrom ar an slabhra breisluacha aerloingseoireachta amhail comhtháthairí aerárthaí, monaróirí inneall agus monaróirí trealamh. Bunóidh an bord rialaithe sásra uainíochta ina rialacha nós imeachta le haghaidh leithdháileadh shuíocháin na gcomhaltaí seachas an tAontas, agus cothromaíocht inscne á cur san áireamh. Aireofar ar na hionadaithe roghnaithe ionadaí amháin ar a laghad ar FBManna Eorpacha, dhá ionadaí ar a laghad ar na heagraíochtaí taighde agus ionadaí amháin ar a laghad ar na hinstiitíidí ardoideachais.

Airteagal 65

Feidhmiú an Bhoird Rialaithe

1. Beidh 50 % de na cearta vótála ag na comhaltaí eile seachas an tAontas i dteannta a chéile.
2. De mhaolú ar Airteagal 16(4), déanfaidh an Coimisiún cathaoirleacht ar an mBord Rialaithe thar ceann an Aontais agus déanfaidh ionadaí ó chomhaltaí seachas an tAontas comhchathaoirleacht air.
3. Freastalóidh cathaoirigh Chomhlacht Comhairliúcháin Eolaíoch um Eitlíocht Ghlan na hEorpa, an Choiste Theicniúil agus ghrúpa ionadaithe na stát agus ionadaí amháin ó EASA ar chruinnithe an Bhoird Rialaithe mar bhreathnóirí.
4. Áiritheoidh an Bord Rialaithe go bhfuil nasc díreach agus comhordú idir gníomhaíochtaí ghrúpa ionadaithe na stát nó gníomhaíochtaí comhlachtaí comhairleacha eile. Chun na críche sin, féadfaidh an Bord Rialaithe comhalta a tharmligean chun gníomhaíochtaí na gcomhlachtaí sin a leanúint.

Airteagal 66

Cúraimí breise an Bhoird Rialaithe

1. Anuas ar na cúraimí a liostaítear in Airteagal 17, déanfaidh Bord Rialaithe an Chomhghnóthais um Eitlíocht Ghlan na cúraimí seo a leanas:
 - (a) maoirseacht a dhéanamh ar oiriúnacht eitlíochta glaine na straitéisí le haghaidh ghníomhaíochtaí breise na gcomhaltaí seachas an tAontas;
 - (b) glacadh margaidh na dteicneolaíochtaí agus na réiteach a chuidíonn le cuspóirí an Chomhaontaithe Ghlais don Eoraip a bhaint amach a chur chun cinn agus a áirithiú go mbaintear cuspóirí sonracha an Chomhghnóthais a leagtar amach in Airteagal 57 amach;
 - (c) sineirgí a shaothrú idir gníomhaíochtaí taighde agus léirithe ar an leibhéal réigiúnach, náisiúnta nó ar leibhéal an Aontais a bhaineann leis an gClár Oibre Straitéiseach um Thaighde agus um Nuálaíocht agus le clár oibre an Chomhghnóthais um Eitlíocht Ghlan;
 - (d) faireachán agus measúnú ar dhul chun cinn an chláir i gcomparáid le táscairí tionchair agus cuspóirí sonracha an Chomhghnóthais um Eitlíocht Ghlan a leagtar amach in Airteagal 57(2) a mhaoirsiú;
 - (e) stiúradh agus bainistíocht leanúnach aistriú tosaíochtaí teicniúla agus gníomhaíochtaí taighde agus nuálaíochta an chláir Spéir Ghlan 2 go dtí go gcuirfear i gcrích iad a áirithiú, i gcomhréir le cuspóirí an Chomhghnóthais um Eitlíocht Ghlan agus, i gcás inarb ábhartha, aistriú torthaí chuig an gclár Eitlíochta Glaine a áirithiú.

2. Déanfaidh an Bord Rialaithe measúnú agus cinneadh i ndáil le cur chun feidhme an chláir agus maidir le cuspóirí an Chomhghnóthais um Eitlíochta Ghlan a chur ar fáil, lena n-áirítear na míreanna a leanas:

- (a) pleanáil straitéiseach ilbhliantúil na nglaonna um Eitlíocht Ghlan agus a n-ailíniú le cuspóirí Fís Eorpach agus na cláir oibre ghaolmhara agus na tosaíochtaí teicniúla agus gníomhaíochtaí taighde;
- (b) athbhreithnithe nó optamú raon feidhme an chláir chun ailíniú le clár oibre agus cuspóirí an Chomhghnóthais um Eitlíocht Ghlan agus le Fís Eorpach ar an iomlán agus le cláir oibre ghaolmhara eile de chuid comhpháirtíochtaí Eorpacha;
- (c) na moltaí ó chomhlachtaí comhairleacha agus gníomhaíochtaí sonracha a leagtar amach in Airteagal 58 chun dul i bhfód ar an margadh agus tionchar réiteach eitlíochta glaine a mhéadú i gcomhréir leis an gComhaontú Glas don Eoraip agus na gníomhaíochtaí beartais ghaolmhara lena fheabhsú.

Airteagal 67

Cúraimí breise an Stiúirthóra Feidhmiúcháin

Anuas ar na cúraimí a leagtar amach in Airteagal 19, déanfaidh Stiúirthóir Feidhmiúcháin an Chomhghnóthais um Eitlíocht Ghlan na cúraimí seo a leanas:

- (a) gníomhaíocht iomchuí a ghlacadh chun idirghníomhaíochtaí idir tionscadail a dtacaíonn an comhghnóthas leo a bhainistiú, ag seachaint aon fhorluí míchuí eatarthu agus dlús a chur le sineirgí ar fud an chláir iomlán;
- (b) a áirithiú go gcomhlíontar sprioc-amanna le haghaidh thraiseoladh na faisnéise is gá chuig comhlachtaí éagsúla an Chomhghnóthais um Eitlíocht Ghlan;
- (c) comhordú an Choimisiúin a éascú i gcomhréir le comhairle na gcomhlachtaí comhairleacha idir gníomhaíochtaí an Chomhghnóthais um Eitlíocht Ghlan agus na gníomhaíochtaí taighde agus nuálaíochta ábhartha laistigh de Fís Eorpach d'fhonn forluí a sheachaint agus sineirgí a chur chun cinn;
- (d) a áirithiú go n-éascaíonn an Comhghnóthas rochtain fhoriomlán ar shonraí agus faisnéis le haghaidh faireachán neamhspleách ar thaighde agus nuálaíocht eitlíochta a dhéantar faoi mhaoirsiú díreach an Choimisiúin agus aon ghníomhaíocht ábhartha is gá a ghlacadh chun neamhspleáchas an phróisis sin ón gComhghnóthas um Eitlíocht Ghlan féin a áirithiú, amhail trí bhíthin soláthar poiblí, meastóireachtaí neamhspleácha, athbhreithnithe nó anailís *ad hoc*. Cuirfear tuarascáil faireacháin agus measúnaithe an chláir faoi bhráid an Bhoird Rialaithe uair amháin in aghaidh na bliana;
- (e) cúnaimh a thabhairt don Bhord Rialaithe le hoiriúnuithe d'ábhar teicniúil agus leithdháiltí buiséid an chláir oibre nuair atáthar ag cur an Clár Oibre Straitéiseach um Thaighde agus um Nuálaíocht chun feidhme d'fhonn gnóthachain an Chomhghnóthais um Eitlíocht Ghlan a uasmhéadú.

Airteagal 68

Grúpa ionadaithe na stát

1. Reáchtálfaidh grúpa ionadaithe na stát cruinnithe comhordaithe le grúpa ionadaithe na stát de chuid comhghnóthas ábhartha eile, amhail Comhghnóthas Taighde BAT 3 an Aerspáis Eorpach Aonair, dhá uair in aghaidh na bliana ar a laghad, agus is é a bheidh mar aidhm leis na cruinnithe sin comhéadan a chruthú idir na húdaráis náisiúnta agus réigiúnacha agus an Comhghnóthas um Eitlíocht Ghlan agus comhairle a sholáthar don Chomhghnóthas um Eitlíocht Ghlan ar an mbonn sin.

2. I dteannta Airteagal 20, beidh na cúraimí breise seo a leanas freisin ar ghrúpa ionadaithe na stát:

- (a) bearta a mholadh chun comhlántachtaí idir na gníomhaíochtaí Taighde agus Nuálaíochta Eitlíochta Glaine agus cláir thaighde náisiúnta a chuireann le cuspóirí an Chláir Oibre Straitéisigh um Thaighde agus um Nuálaíocht, chomh maith le tionscnaimh agus tionscadail idirnáisiúnta agus náisiúnta eile, a fheabhsú;

- (b) bearta sonracha a chur chun cinn ar leibhéal náisiúnta nó réigiúnach a bhfuil sé mar aidhm leo rannpháirtíocht FBManna i dTaighde agus Nuálaíocht maidir le hEitlíocht Ghlan a mhéadú, lena n-áirítear trí imeachtaí scaipthe, ceardlanna teicniúla tiomnaithe agus cumarsáid, agus aon ghníomhaíocht eile a bhfuil sé mar aidhm léi comhar agus imscaradh teicneolaíochtaí aerloingseoireachta a chur chun cinn;
- (c) infheistiúcht i dtaighde agus nuálaíocht ó chistí Beartais Comhtháthaithe amhail Cistí Forbraíochta Réigiúnaí na hEorpa, Cistí Sóisialta na hEorpa, Cistí um Aistriú Cóir, agus Cistí Théarnaimh an Aontais Eorpaigh a chur chun cinn i gcomhthéacs an Chomhghnóthais um Eitlíocht Ghlan.

Airteagal 69

An Coiste Teicniúil

1. Beidh an Coiste Teicniúil comhdhéanta mar a leanas:
 - (a) suas le ceathrar ionadaithe ón gCoimisiún agus ó chomhlachtaí de chuid an Aontais, mar a chinneann ionadaithe an Aontais ar an mBord Rialaithe;
 - (b) ionadaí amháin ó gach comhalta de na comhaltaí seachas an tAontas;
 - (c) ionadaí amháin ó EASA.
2. Déanfaidh ionadaí ar na comhaltaí bunaidh, a ndéanfar uainíocht orthu gach 2 bhliain, agus an Coimisiún, comhchathaoirleacht ar an gCoiste Teicniúil. Tuairisceoidh sé don Bhord Rialaithe agus soláthróidh an Chomhghnóthas um Eitlíocht Ghlan a rúnaíocht.
3. Beidh an Stiúrthóir Feidhmiúcháin ina bhreathnóir buan ar an gCoiste Teicniúil. Féadfaidh ionadaithe ó ghrúpa ionadaithe na stát agus ón gComhlacht Comhairliúcháin Eolaíoch um Eitlíocht Ghlan na hEorpa freastal ar chruinnithe mar bhreathnóirí ar cuireadh ón gcathaoirleach, nó ar a n-iarraidh féin, agus sa chás sin beidh a bhfreastal faoi réir comhaontú a fháil ón gcathaoirleach agus ó ionadaithe an Chomhghnóthais.
4. Molfaidh an Coiste Teicniúil a rialacha nós imeachta agus cuirfidh sé iad faoi bhráid an Bhoird Rialaithe lena nglacadh.
5. Forbróidh an Coiste Teicniúil treochlár agus straitéis theicneolaíoch an chláir agus coinneoidh sé ar bun iad. Molfaidh sé agus ullmhóidh sé, de réir mar is iomchuí, raon feidhme agus clárú na ngníomhaíochtaí taighde, an straitéis theicneolaíoch agus treochlár taighde foriomlán an Chomhghnóthais um Eitlíocht Ghlan lena nglacadh ag an mBord Rialaithe. Féadfar comhalta de chuid an Bhoird Rialaithe a tharmligean chun na gníomhaíochtaí sin a leanúint.
6. Déanfaidh an Coiste Teicniúil na cúraimí seo a leanas:
 - (a) tograí a ullmhú i gcomhair leasuithe ar an gClár Oibre Straitéiseach um Thaighde agus um Nuálaíocht mar is gá leo le haghaidh breithniú agus cinneadh críochnaitheach an Bhoird Rialaithe;
 - (b) tograí a ullmhú le haghaidh na dtosaíochtaí teicniúla agus na ngníomhaíochtaí taighde atá le cur san áireamh sa chlár oibre, agus na hábhair thaighde i gcomhair glaonna oscailte ar thograí;
 - (c) faisnéis a sholáthar faoi ghníomhaíochtaí taighde atá beartaithe nó atá i mbun ar an leibhéal náisiúnta, réigiúnach nó ar leibhéal eile nach de chuid an Aontais iad agus moltaí a dhéanamh maidir leis na gníomhaíochtaí is gá chun sineirgí féideartha chlár an Chomhghnóthais um Eitlíochta Ghlan a uasmhéadú;
 - (d) togra d'athbhreithniú nó optamú raon feidhme an chláir chun ailiníú le clár oibre agus cuspóirí an Chomhghnóthais um Eitlíocht Ghlan agus le Fis Eorpach ar an iomlán agus le clár oibre ghaolmhara eile de chuid comhpháirtíochtaí Eorpacha, arna sonrú sa Chlár Oibre Straitéiseach um Thaighde agus Nuálaíocht, le haghaidh bhreithniú agus chinneadh críochnaitheach an Bhoird Rialaithe;
 - (e) moltaí a dhéanamh maidir le tionchar a uasmhéadú i gcomhréir le cuspóirí an Chomhaontaithe Ghlais don Eoraip agus maidir le glacadh margaidh féideartha thorthaí an chláir ó ghníomhaíochtaí indéacha arna gcistiú ag an gComhghnóthas.

*Airteagal 70***An Comhlacht Comhairliúcháin Eolaíoch um Eitlíocht Ghlan na hEorpa**

1. Is é an Comhlacht Comhairliúcháin Eolaíoch um Eitlíocht Ghlan na hEorpa comhlacht comhairleach eolaíoch an Chomhghnóthais um Eitlíocht Ghlan arna bhunú i gcomhréir le hAirteagal 21(1), pointe (a) agus le Airteagal 21(4).
2. Ní bheidh níos mó ná 15 buanchomhalta ag an gComhlacht Comhairliúcháin Eolaíoch um Eitlíocht Ghlan na hEorpa agus ní bheidh na comhaltaí sin ina gcomhaltaí d'aon chomhlacht eile faoin gComhghnóthas seo.
3. Toghfarr cathaoirleach an Chomhlachta Comhairliúcháin Eolaíoch um Eitlíocht Ghlan na hEorpa ar feadh 2 bhliain.
4. Beidh ionadaí ó EASA ina chomhalta buan den Chomhlacht Comhairliúcháin Eolaíoch um Eitlíocht Ghlan na hEorpa.
5. Le linn a cuid cúraimí a chomhall, comhoibríodh an Comhlacht Comhairliúcháin Eolaíoch um Eitlíocht Ghlan na hEorpa le fóraim geallsealbhóirí eitlíochta ábhartha Eorpacha, amhail an Chomhairle Chomhairleach le haghaidh Taighde Aerloingseoireachta san Eoraip (ACARE).
6. Reáchtálfaidh an Comhlacht Comhairliúcháin Eolaíoch um Eitlíocht Ghlan na hEorpa, de bhun Airteagal 21(7) pointe (f), cruinnithe comhordúcháin le comhlachtaí comhairleacha comhghnóthas ábhartha eile amhail Comhghnóthas Taighde BAT 3 an Aerspáis Eorpaigh Aonair, agus is é a bheidh mar aidhm leis na cruinnithe sin sineirgí agus comhar a chur chun cinn i measc thionscnaimh taighde agus nuálaíochta ábhartha an Aontais san eitlíocht agus comhairle a sholáthar chun na críche sin don Chomhghnóthas um Eitlíocht Ghlan ar an mbonn sin.
7. Cuirfidh an Comhlacht Comhairliúcháin Eolaíoch um Eitlíocht Ghlan na hEorpa comhairle agus tacaíocht ar fáil freisin don Choimisiún agus don Chomhghnóthas um Eitlíocht Ghlan maidir le tionscnaimh lena gcuirtear taighde eitlíochta chun cinn i gcórais oideachais na hEorpa, agus soláthróidh sé moltaí maidir le forbairt scileanna agus cumas aerloingseoireachta agus curaclaim innealtóireachta aerloingseoireachta nuashonraithe.

*Airteagal 71***Teicneolaíochtaí nua a dheimhniú**

1. Féadfaidh iarratasóirí, tairbhíthe nó an Stiúrthóir Feidhmiúcháin a iarraidh ar EASA comhairle a thabhairt ar thionscadail aonair agus gníomhaíochtaí taisealbhaidh ar shaincheistanna a bhaineann le comhlíontacht sábháilteachta eitlíochta, idir-inoibritheacht agus caighdeáin chomhshaoil, le háirithiú go ndéanfaí caighdeáin ábhartha, acmhainneacht tástála agus ceanglais rialála a fhorbairt go tráthúil le haghaidh forbairt táirgí agus imscaradh teicneolaíochtaí nua.
2. Beidh gníomhaíochtaí agus seirbhísí deimhniúcháin arna soláthar faoi réir forálacha a bhaineann le táillí agus muirir a leagtar amach i Rialachán (AE) 2018/1139.

*Airteagal 72***Maolú ó na rialacha maidir le rannpháirtíocht**

I gcás ina bhfuil údar cuí léirithe ina leith i dtuairisc na n-ábhar ábhartha sa chlár oibre, beidh eintiteas dlítheanach amháin atá bunaithe i mBallstát nó i dtír comhlachaithe nó i gcuibhreannas nach gcomhlíonann an coinníoll a leagtar síos in Airteagal 22(2) den Rialachán maidir le Fís Eorpach incháilithe chun bheith rannpháirteach i ngníomhaíochtaí indéreacha atá cistithe ag an gComhghnóthas um Eitlíocht Ghlan.

TEIDEAL III

AN COMHGHNÓTHAS UM HIDRIGIN GHLAN

Airteagal 73

Cuspóirí breise an Chomhghnóthais um Hidrigin Ghlan

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag an gComhghnóthas um Hidrigin Ghlan:
 - (a) rannchuidiú leis na cuspóirí a leagtar amach sa, teachtaireacht ón gCoimisiún an 17 Meán Fómhair 2020 maidir le Dlús a chur le huaillmhian aeráide na hEorpa do 2030, Infheistíocht i dtodhchaí aeráidneodrach ar son leas ár muintire, an Comhaontú Glas don Eoraip, agus sa Dlí Aeráide Eorpach ag méadú uaillmhian an Aontais maidir le hastaíochtaí gás ceaptha teasa a laghdú go 55 % faoi bhun leibhéil 1990 ar a laghad faoi 2030, agus aeráidneodracht a bhaint amach faoi 2050, ar a dhéanaí;
 - (b) rannchuidiú le Straitéis Hidrigine 2020 ón gCoimisiún le haghaidh Eoraip aeráidneodrach a chur chun feidhme;
 - (c) iomaíochas slabhra breisluacha hidrigine glaine an Aontais a neartú, d'fhonn tacú, go háirithe le FBManna, le dlús a chur le hiontráil réiteach glan nuálach ar an margadh;
 - (d) taighde agus nuálaíocht a spreagadh maidir le táirgeadh, dáileadh, stóráil agus feidhmeanna úsáide deiridh hidrigine glaine.
2. Beidh na cuspóirí sonracha seo a leanas ag an gComhghnóthas um Hidrigin Ghlan freisin:
 - (a) feabhas a chur, trí thaighde agus nuálaíocht, lena n-áirítear gníomhaíochtaí a bhaineann le LUTanna níos ísle, ar chostéifeachtúlacht, éifeachtúlacht, iontaofacht, cainníocht agus cáilíocht na réiteach hidrigine glaine, lena n-áirítear táirgeadh, dáileadh, stóráil agus úsáidí deiridh a fhorbraítear san Aontas;
 - (b) eolas agus acmhainneacht na ngníomhaithe eolaíochta agus tionsclaíocha ar feadh shlabhra luacha hidrigine an Aontais a neartú agus tacaíocht a thabhairt don ghlacadh scileanna tionsclaíocha;
 - (c) léirithe a dhéanamh ar réitigh hidrigine glaine d'fhonn iad a imscaradh go háitiúil, go réigiúnach agus ar fud an Aontais, agus é mar aidhm leo geallsealbhoirí sna Ballstáit uile a dhéanamh rannpháirteach agus aghaidh a thabhairt ar tháirgeadh, leithdháileadh, stóráil agus úsáid le haghaidh tionscal iompair agus na tionscail sin atá dian ó thaobh fuinnimh de, chomh maith le feidhmeanna eile;
 - (d) feachtas agus glacadh poiblí agus príobháideach le réitigh hidrigine glaine a mhéadú, go háirithe trí chomhar le comhpháirtíochtaí Eorpacha eile faoi Fís Eorpach.

Airteagal 74

Cúraimí breise an Chomhghnóthais um Hidrigin Ghlan

Anuas ar na cúraimí a leagtar amach in Airteagal 5, déanfaidh an gComhghnóthas um Hidrigin Ghlan na cúraimí seo a leanas:

- (a) measúnú agus faireachán a dhéanamh ar dhul chun cinn teicneolaíoch agus ar bhacainní teicneolaíocha, eacnamaíocha agus sochaíocha ar iontráil sa mhargadh, lena n-áirítear i margaí hidrigine atá ag teacht chun cinn;
- (b) d'ainneoin shainchumas beartais an Choimisiúin, faoi threoir agus maoirseacht bheartais an Choimisiúin, cur le forbairt na rialachán agus na gcaighdeán d'fhonn deireadh a chur le bacainní ar iontráil sa mhargadh agus chun tacú le himmhaltacht, idir-inoibritheacht agus trádáil ar fud an mhargaidh inmheánaigh agus dhomhanda;
- (c) tacú leis an gCoimisiún, lena n-áirítear trí shaineolas teicniúil, ina thionscnaimh idirnáisiúnta maidir leis an straitéis hidrigine, amhail an Chomhpháirtíocht Idirnáisiúnta maidir leis an nGeilleagar Hidrigine (IPHE), Nuálaíocht Misin agus an Tionscnamh Hidrigine de chuid na hAireachta Fuinnimh Ghlain.

*Airteagal 75***Comhaltaí**

Beidh na comhaltaí seo a leanas ag an gComhghnóthas um Hidrigin Ghlan:

- (a) an tAontas, a mbeidh an Coimisiún mar ionadaí dó;
- (b) Hydrogen Europe AISBL, eagraíocht neamhbhrabúsach atá cláraithe faoi Dhlí na Beilge (an “Grúpáil Tionscail”), ach a mbeidh fógra tugtha faoina cinneadh aontú don Chomhghnóthas um Hidrigin Ghlan trí bhíthin litir ghealltanais nach mbeidh coinníollacha inti maidir lena aontachas seachas na coinníollacha sin a leagtar amach sa Rialachán seo;
- (c) Hydrogen Europe Research AISBL, eagraíocht neamhbhrabúsach atá cláraithe faoi Dhlí na Beilge (an “Grúpáil Taighde”), ach a mbeidh fógra tugtha faoina chinneadh aontú don Chomhghnóthas um Hidrigin Ghlan trí bhíthin litir ghealltanais nach mbeidh coinníollacha inti maidir lena aontachas seachas na coinníollacha sin a leagtar amach sa Rialachán seo.

*Airteagal 76***Ranníocaíocht airgeadais ón Aontas**

Suas le EUR 1 000 000 000, lena n-áirítear suas le EUR 30 193 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas um Hidrigin Ghlan, leithreasuithe LEE san áireamh, chun costais riaracháin agus costais oibriúcháin a chumhdach.

*Airteagal 77***Ranníocaíochtaí ó chomhaltaí seachas an tAontas**

Déanfaidh comhaltaí an Chomhghnóthais um Hidrigin Ghlan seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 1 000 000 000 ar a laghad, lena n-áirítear suas le EUR 30 193 000 le haghaidh costais riaracháin, sa tréimhse a leagtar amach in Airteagal 3.

*Airteagal 78***Raon feidhme gníomhaíochtaí breise**

1. Chun críoch Airteagal 11(1), pointe (b), féadfaidh sé go n-áireofar le gníomhaíochtaí breise gníomhaíochtaí a bhfuil nasc díreach acu le gníomhaíochtaí an Chomhghnóthais um Hidrigin Ghlan agus a chuireann lena chuspóirí, lena n-áirítear iad seo a leanas:

- (a) trialacha agus tástálacha allamuigh réamhthráchtála;
- (b) cruthúnas ar choincheap;
- (c) línte táirgthe reatha a fheabhsú le haghaidh méadú scála;
- (d) cás-staidéir mhórsála;
- (e) gníomhaíochtaí a ardaíonn feasacht ar theicneolaíochtaí hidrigine agus ar bhearta sábháilteachta;
- (f) glacadh torthaí ó thionscadail i dtáirgí, saothrú breise agus gníomhaíochtaí laistigh den slabhra taighde ag LUTanna níos airde nó i snáitheanna gníomhaíochta comhthreomhara;
- (g) gníomhaíochtaí taighde agus nuálaíochta tionscadail bhfuil nasc sonrach acu leis an gClár Oibre Straitéiseach um Thaighde agus um Nuálaíocht, agus a chomhchistítear faoi chlár náisiúnta nó réigiúnacha laistigh den Aontas.

2. Beidh sé mar aidhm ag gníomhaíochtaí breise an Chomhghnóthais um Hidrigin Ghlan sineirgí a áirithiú leis an gComhghuaillíocht don Hidrigin Ghlan, le Dúshlán Nuálaíochta Misin “Hidrigin Inathnuaite agus Ghlan”, le Ciste Nuálaíochta an Aontais Eorpaigh, le hardán Straitéis um Speisialtóireacht Chliste H2 na Réigiún (S3) agus le clár píolótach ERA um hidrigin ghlas.

*Airteagal 79***Comhlachtaí an Chomhghnóthais um Hidrigin Ghlan**

Is iad seo a leanas Comhlachtaí an Chomhghnóthais um Hidrigin Ghlan:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát; agus
- (d) an grúpa geallsealbhóirí.

*Airteagal 80***Comhdhéanamh an Bhoird Rialaithe**

Beidh na comhaltaí seo a leanas ar an mBord Rialaithe:

- (a) ionadaithe de chuid an Choimisiúin, thar ceann an Aontais;
- (b) seisear ionadaithe ón nGrúpáil Tionscail, ag féachaint d'ionadaíocht gheografach, d'ionadaíocht ar na hinscní, d'ionadaíocht ar chuideachtaí de réir a méide agus d'ionadaíocht ar na hearnálacha;
- (c) ionadaí amháin ar an nGrúpáil Taighde.

*Airteagal 81***Feidhmiú an Bhoird Rialaithe**

1. Anuas ar na rialacha vótála a leagtar amach in Airteagal 16(3), beidh 43 % de na cearta vótála ag an nGrúpáil Tionscail agus beidh 7 % de na cearta vótála ag an nGrúpáil Taighde sa Bhord Rialaithe.
2. Beidh cathaoirleach an Bhoird Rialaithe ina ionadaí ar na comhaltaí príobháideach agus ceapfaidh an Bord Rialaithe é.

*Airteagal 82***Cúraimí breise an Bhoird Rialaithe**

Anuas ar na cúraimí a leagtar amach in Airteagal 17, déanfaidh Bord Rialaithe an Chomhghnóthais um Hidrigin Ghlan na cúraimí seo a leanas:

- (a) sineirgí a chothú le gníomhaíochtaí agus le cláir ábhartha ar leibhéal an Aontais, ar an leibhéal náisiúnta nó ar an leibhéal réigiúnach, go háirithe leo sin a thacaíonn le himscaradh réiteach taighde agus nuálaíochta, bonneagar, oideachas agus forbairt réigiúnach maidir le húsáid hidrigine glaine;
- (b) a sholáthar, de bhun Airteagal 5(2), pointe (b), agus Airteagal 17(n), treoshuíomh straitéiseach a mhéid a bhaineann le comhar le comhpháirtíochtaí Eorpacha eile, lena n-áirítear comhpháirtíochtaí i dtreo iompar ar bhóithre saor ó astaíochtaí, iompar ar an uisce saor ó astaíochtaí, iarnróid na hEorpa, eitlíocht ghlan, próiseas don phláinéad agus um chruach ghlan i gcomhréir lena Clár Oibre Straitéiseacha um Thaighde agus um Nuálaíocht faoi seach nó doiciméad comhionann eile;
- (c) glacadh margaidh na dteicneolaíochtaí agus na réiteach a chuidíonn le cuspóirí an Chomhaontaithe Ghlais a bhaint amach a spreagadh;
- (d) a áirithiú go mbaileofar tuairimí neamhspleácha agus comhairle neamhspleách an phobail eolaíochta i gcoitinne maidir leis an gClár Oibre Straitéiseach um Thaighde agus um Nuálaíocht, cláir oibre agus forbairtí sna hearnálacha cóngaracha trí cheardlann neamhspleách chomhairleach eolaíoch mar chuid den fhóram comhpháirtíochta Eorpach don Hidrigin Ghlan.

*Airteagal 83***Cúraimí breise an Stiúirthóra Feidhmiúcháin**

Anuas ar na cúraimí a leagtar amach in Airteagal 19, déanfaidh Stiúirthóir Feidhmiúcháin an Chomhghnóthais um Hidrigin Ghlan na cúraimí seo a leanas:

- (a) gníomhaíochtaí lena gcuirtear dlús le sineirgí le gníomhaíochtaí agus cláir ábhartha ar leibhéal an Aontais, ar an leibhéal náisiúnta nó ar an leibhéal réigiúnach a mholadh agus a chur chun feidhme;
- (b) tacú agus cur le tionscnaimh eile an Aontais a bhaineann le hidrigin, faoi réir a bhformheasta ag an mBord Rialaithe;
- (c) fóram comhpháirtíochta Eorpach don Hidrigin Ghlan a thionól ar bhonn bliantúil, faoi réir fhormheas an Bhoird Rialaithe, lena n-áirítear an cheardlann neamhspleách chomhairleach eolaíoch dá dtagraítear in Airteagal 82(d); reáchtálfar an fóram comhpháirtíochta, a mhéid is féidir, i gcomhar leis an bhFóram Eorpach do Hidrigin den Chomhghuaillíocht don Hidrigin Ghlan, agus i gcomhthráth leis.

*Airteagal 84***An grúpa geallsealbhóirí**

1. Cuimseofar sa ghrúpa geallsealbhóirí ionadaithe ó earnálacha a ghineann, a dháileann, a stóráilann, a éilíonn nó a úsáideann hidrigin ghlan ar fud an Aontais, lena n-áirítear ionadaithe ó chomhpháirtíochtaí Eorpacha ábhartha eile, chomh maith le hionadaithe ó Chomhpháirtíocht Idir-réigiúnach Eorpach um Ghleannta Hidrigine agus ón bpobal eolaíochta.
2. Anuas ar na cúraimí a leagtar amach in Airteagal 22, déanfaidh an grúpa geallsealbhóirí na cúraimí seo a leanas:
 - (a) ionchur a sholáthar ar na tosaíochtaí straitéiseacha agus teicneolaíocha a rachaidh an Comhghnóthas um Hidrigin Ghlan i ngleic leo mar a leagtar síos sa Chlár Oibre Straitéiseach um Thaighde agus um Nuálaíocht nó i ndoiciméad comhionann eile agus na treochláir theicneolaíocha mhionsonraithe, ag tabhairt aird chuí ar dhul chun cinn agus riachtanais in earnálacha cóngaracha;
 - (b) moltaí a sholáthar chun cothú sineirgí nithiúla idir an Comhghnóthas um Hidrigin Ghlan agus na hearnálacha cóngaracha nó aon earnáil lena meastar go mbainfidh breisluach a éascú;
 - (c) ionchur a chur ar fáil don Chomhpháirtíocht don Hidrigin Ghlan agus don Fhóram Eorpach don Hidrigin Ghlan den Chomhghuaillíocht Eorpach don Hidrigin Ghlan.

TEIDEAL IV

COMHGHNÓTHAS UM IARNRÓD NA hEORPA*Airteagal 85***Cuspóirí breise an Chomhghnóthais um Iarnród na hEorpa**

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag Comhghnóthas um Iarnród na hEorpa:
 - (a) rannchuidiú i dtreo Limistéar Eorpach Iarnróid Aonair a bhaint amach;
 - (b) aistriú tapa chuig córas iarnróid Eorpach atá níos tarraingtí, níos simplí le haghaidh úsáideoirí, níos iomaíche, níos inacmhainne, níos fusa le cothabháil, níos éifeachtúla agus níos inbhuanaithe, agus é comhtháite leis an mórchóras gluaiseachta, a áirithiú;
 - (c) tacú le forbairt tionscal iarnróid Eorpach atá láidir agus iomaíoch go domhanda.

2. Anuas ar na cuspóirí a leagtar amach i mír 1, beidh na cuspóirí sonracha seo a leanas ag an gComhghnóthas um Iarnród na hEorpa:
- (a) gníomhaíochtaí taighde agus nuálaíochta a éascú chun líonra iarnród comhtháite Eorpach a sholáthar trí dhearadh, ag cur deireadh le bacainní ar idir-inoibritheacht agus réitigh a sholáthar le haghaidh comhtháthú foriomlán, ag cumhdach bainistíocht tráchta, feithiclí, bonneagair, lena n-áirítear comhtháthú le rianta náisiúnta, amhail iarnróid 1 520, 1 000 nó 1 668 mm ar leithead, agus seirbhísí, agus an réiteach is fearr is féidir a sholáthar i gcás riachtanais paisinéirí agus gnólachtaí, ag cur dlús le glacadh na réiteach nuálach chun tacú le Limistéar Eorpach Aonair Iarnróid, agus cur le hacmhainneacht agus iontaofacht an iompair ar iarnróid agus costais a laghdú ag an am céanna;
 - (b) córas iarnróid inbhuanaithe athléimneach a sholáthar trí chóras iarnróid ciúin, astaíochtaí nialasacha agus bonneagar aeráid-díonach a fhorbairt, ag cur an gheilleagair chiorclaigh i bhfeidhm ar an earnáil iarnróid, ag baint leas píolótach próisis, teicneolaíochtaí, dearaí agus ábhair nuálacha i saolré fhoriomlán na gcóras iarnróid agus ag forbairt réitigh nuálacha eile ar an iompar dromchla treoraithe;
 - (c) coincheap oibríochtúil aontaithe agus ollstruchtúr feidhmiúil, sábháilte agus slán, agus gnéithe cibearshlándála á gcur san áireamh go cuí, agus é dírithe ar an líonra iarnróid Eorpach a bhfuil feidhm ag Treoir (AE) 2016/797 ó Pharlaimint na hEorpa agus ón gComhairle ⁽³⁹⁾ maidir leis, a fhorbairt trína Chólún Córasach le haghaidh bainistíocht tráchta, córais rialaithe, ceannais agus comharthaíochta iarnróid comhtháite Eorpach, lena n-áirítear uathrialú tráchta traenacha, rud a áiritheoidh go ndíríonn taighde agus nuálaíocht ar riachtanais custaiméirí agus riachtanais oibríochtúla ar a gcomhaontaítear agus a roinntear i gcoiteann agus go bhfuil siad oscailte don fhorbairt;
 - (d) gníomhaíochtaí taighde agus nuálaíochta a bhaineann le lasta iarnróid agus seirbhísí iompair idirmhódúil a chur i gcrích, chun lasta glas iomaíoch iarnróid atá comhtháite ina iomláine leis an slabhra breisluacha lóistíochta a sholáthar, agus uathoibriú agus digitiú an iarnróid lasta ina chroílár;
 - (e) tionscadail taispeántais a fhorbairt i mBallstáit a bhfuil spéis acu iontu;
 - (f) rannchuidiú le tionscal láidir iarnróid Eorpach a fhorbairt a bheidh iomaíoch ar bhonn domhanda;
 - (g) sineirgí le beartais, cláir, tionscnaimh, ionstraimí nó cistí eile de chuid an Aontais a chumasú, a chur chun cinn agus a shaothrú chun tionchar agus breisluach na n-iarnród a uasmhéadú.
3. Agus a ghníomhaíochtaí á gcur i gcrích aige, féachfaidh an Comhghnóthas um Iarnród na hEorpa le rannpháirtíocht chothrom comhaltaí agus comhpháirtithe a bhaint amach ina ghníomhaíochtaí. Bunóidh sé na naisc idirnáisiúnta is gá i ndáil le taighde agus nuálaíocht iarnróid freisin, i gcomhréir le tosaíochtaí an Choimisiúin.

Airteagal 86

Cúraimí breise an Chomhghnóthais um Iarnród na hEorpa

1. Anuas ar na cúraimí a leagtar amach in Airteagal 5, ullmhóidh an Comhghnóthas um Iarnród na hEorpa an Máistirphlean i gcomhar leis an gCoimisiún, agus tar éis dul i gcomhairle le grúpa ionadaithe na stát, déanfaidh sé an Máistirphlean arna fhorbairt i gcomhairle leis na geallsealbhóirí ábhartha uile sa chóras iarnróid agus sa tionscal soláthair iarnróid a chur faoi bhráid an Bhoird Rialaithe lena ghlacadh.
2. Féadfaidh an Coimisiún tús a chur le hullmhú an Mháistirphlean roimh bhunú an Chomhghnóthais um Iarnród na hEorpa, i gcomhairle le hionadaithe na mBallstát agus leis na geallsealbhóirí ábhartha uile.
3. Treochlár coiteann, réamhbhreathnaitheach atá bunaithe ar amharc córasach a bheidh sa Mháistirphlean. Aithneoidh sé na réimsí idirghabhála laistigh de raon feidhme an Chomhghnóthais um Iarnród na hEorpa. Beidh na cuspóirí a leagtar amach sa Mháistirphlean treoraithe ag feidhmíocht agus struchtúrtha thart ar na cuspóirí a leagtar amach in Airteagal 85.
4. Glacfaidh an Bord Rialaithe an Máistirphlean agus tacóidh an Coimisiún leis i gcomhréir le hAirteagal 16 cé is moite den roinn den Mháistirphlean a bhaineann leis an gColún Córasach a ghlacfar i gcomhréir le hAirteagal 93(4). Sula dtacaíonn an Coimisiún leis an Máistirphlean, cuirfidh sé faoi bhráid na Comhairle agus Pharlaimint na hEorpa é. Ina dhiaidh sin, déanfar aon leasú a chur in iúl don Chomhairle agus do Pharlaimint na hEorpa.

⁽³⁹⁾ Treoir (AE) 2016/797 ó Pharlaimint na hEorpa agus ón gComhairle an 11 Bealtaine 2016 maidir le hidir-inoibritheacht an chórais iarnróid laistigh den Aontas Eorpach (IO L 138, 26.5.2016, lch. 44).

5. Is éard a bheidh sa Mháistirphlean Clár Oibre Straitéiseach um Thaighde agus um Nuálaíocht an Chomhghnóthais um Iarnród na hEorpa laistigh de bhrí Airteagal 2, pointe (12). Cuirfidh sé treoir ar fáil maidir le cúraimí sonracha an Chomhghnóthais um Iarnród na hEorpa, eadhon:

- (a) amharc córasach a fhorbairt ina Cholún Córasach lena léirítear riachtanais an tionscail monaraíochta iarnróid, an phobail oibriúcháin iarnróid, na mBallstát agus geallsealbhóirí iarnróid príobháideacha agus poiblí eile, lena n-áirítear comhlachtaí a dhéanann ionadaíocht ar chustaiméirí, amhail paisinéirí agus lasta agus baill foirne, chomh maith le gníomhaithe ábhartha eile lasmuigh den earnáil iarnróid thraidisiúnta. Cuimseofar an méid seo a leanas san “amharc córasach” sin:
 - (i) forbairt coincheapa oibríochta aonair agus an ollstruchtúir, lena n-áirítear seirbhísí, bloic feidhme, agus comhéadain, atá mar bhunús oibríochtaí an chórais iarnróid, a shainiú;
 - (ii) forbairt na sonraíochtaí comhlachaithe lena n-áirítear comhéadain, sonraíochtaí ceanglais fheidhmiúil agus sonraíochtaí ceanglais chórasaigh chun iad a úsáid i Sonraíochtaí Teicniúla don Idir-inoibritheacht (STI) a bhunaítear de bhun Threoir (AE) 2016/797 nó i bpróisis chaighdeánaithe chun leibhéil níos airde digiteála agus uathoibrithe a bhaint amach;
 - (iii) a áirithiú go ndéanfar an córas a chothabháil, go gceartaítear earráidí agus go bhfuil sé in ann oiriúnú le himeacht ama agus a áirithiú go ndéanfar cúinsí a bhaineann le hascnamh ó ollstruchtúir reatha a chur san áireamh;
 - (iv) a áirithiú go ndéanfar na comhéadain is gá le móid eile, chomh maith le meitreo agus tramanna nó córais iarnróid éadroim, a mheasúnú agus a chur ar taispeáint, go háirithe i gcás trácht lasta agus paisinéirí;
- (b) na gníomhaíochtaí taighde agus nuálaíochta is gá a éascú chun cuspóirí an Chomhghnóthais um Iarnród na hEorpa a bhaint amach, lena n-áirítear gníomhaíochtaí taighde agus nuálaíochta a dhíríonn ar iarnróid ar leibhéal ísle ullmhachta teicneolaí (LUT). Chuige sin, déanfaidh an Chomhghnóthas um Iarnród na hEorpa:
 - (i) na gníomhaíochtaí taighde, nuálaíochta, léirithe, bailíochta agus staidéir a dhéanfar faoina údarás, a shainiú agus a eagrú, fad a sheachnaítear deighilt sna gníomhaíochtaí sin;
 - (ii) deiseanna caighdeánúcháin agus modúlachta a shaothrú, agus na comhéadain le modhanna agus córais eile a éascú;
 - (iii) tionscadail taispeántais a fhorbairt;
 - (iv) dlúthchomhar a fhorbairt agus comhar a áirithiú le gníomhaíochtaí taighde agus nuálaíochta Eorpacha, náisiúnta agus idirnáisiúnta ábhartha san earnáil iarnróid agus lasmuigh de mar is gá, go háirithe faoi Fís Eorpach, agus dá bhrí sin ag cur ar chumas an Chomhghnóthais um Iarnród na hEorpa ról mór a ghlacadh i dtaighde agus nuálaíocht a bhaineann le hiarnród fad a bhaintear tairbhe as an dul chun cinn eolaíoch agus teicneolaíoch a bhaintear amach in earnálacha eile freisin;
 - (v) a áirithiú, trí bhíthin an chomhair dá dtagraítear i bpointe (iv), go n-aistreofar taighde chuig iarracht forbartha éifeachtach agus chuig nuálaíochtaí ceannródaíocha a fhorbairt agus ar deireadh chuig nuálaíocht atá dírithe ar an margadh trí léiriú agus imscaradh;
- (c) aon chúram eile is gá chun na cuspóirí a leagtar amach in Airteagal 4 agus Airteagal 85 a bhaint amach a dhéanamh.

Airteagal 87

Comhaltaí

1. Is iad comhaltaí an Chomhghnóthais um Iarnród na hEorpa:

- (a) an tAontas, a mbeidh an Coimisiún mar ionadaí dó;
- (b) na comhaltaí bunaidh a liostaítear in Iarscríbhinn II, ar fhógra a fháil faoina gcinneadh aontú don Chomhghnóthas trí bhíthin litir ghealltanais, nach mbeidh coinníollacha inti maidir lena n-aontachas seachas na coinníollacha a leagtar amach sa Rialachán seo;
- (c) na comhaltaí comhlachaithe atá le roghnú i gcomhréir le hAirteagal 7. Tacóidh an Coimisiún leis an liosta de chomhaltaí comhlachaithe.

2. I dteannta Airteagal 7(1), féadfaidh an Bord Rialaithe, le linn na chéad 6 mhí i ndiaidh bhunú an Chomhghnóthais um Iarnród na hEorpa, comhaltaí comhlachaithe a roghnú ó liosta arna tharraingt suas i ndiaidh glao oscailte ar léiriú spéise a sheol an Coimisiún sular bunaíodh é. Beidh feidhm ag coinníollacha Airteagal 7(2) *mutatis mutandis*.

Airteagal 88

Ranníocaíocht airgeadais ón Aontas

Suas le EUR 600 000 000, lena n-áirítear suas le EUR 50 000 000 le haghaidh an Cholúin Chórasaigh agus suas le EUR 24 000 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas um Iarnród na hEorpa, leithreasuithe LEE san áireamh, chun costais riaracháin agus costais oibriúcháin a chumhdach.

Airteagal 89

Ranníocaíochtaí ó chomhaltaí seachas an tAontas

Déanfaidh comhaltaí an Chomhghnóthais um Iarnród na hEorpa seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 600 000 000 ar a laghad, lena n-áirítear suas le EUR 24 000 000 le haghaidh costais riaracháin, sa tréimhse a leagtar amach in Airteagal 3.

Airteagal 90

Raon feidhme gníomhaíochtaí breise

1. Chun críocha Airteagal 11(1), pointe (b), féadfaidh sé go n-áireofar na rudaí seo a leanas le gníomhaíochtaí breise:
 - (a) gníomhaíochtaí a chumhdaítear faoi gníomhaíochtaí indíreacha an Chomhghnóthais um Iarnród na hEorpa ach nach gcistítear faoi na gníomhaíochtaí indíreacha sin;
 - (b) gníomhaíochtaí a bhaineann go díreach le clár oibre an Chomhghnóthais um Iarnród na hEorpa;
 - (c) gníomhaíochtaí taighde agus nuálaíochta a thógann ar gníomhaíochtaí a chistigh an Comhghnóthas um Iarnród na hEorpa nó Comhghnóthas Shift2Rail;
 - (d) gníomhaíochtaí comhlántacha atá cistithe ag comhaltaí seachas an tAontas, lena ngabhann breisluach soiléir don Aontas agus lena rannchuidítear le cuspóirí an Chomhghnóthais um Iarnród na hEorpa a bhaint amach;
 - (e) gníomhaíochtaí atá cistithe ag comhaltaí seachas an tAontas i dtionscadail atá cistithe ag cláir náisiúnta nó cláir réigiúnacha lena gcomhlánaítear gníomhaíochtaí atá cistithe ag an gComhghnóthas um Iarnród na hEorpa;
 - (f) glacadh torthaí gníomhaíochtaí arna gcistiú faoin gComhghnóthas Shift2Rail agus faoin gComhghnóthas um Iarnród na hEorpa, saothrú breise, gníomhaíochtaí taispeántais, caighdeánú agus forbairt moltaí le haghaidh straitéisí faoina ndéanfar aistriú rianúil, cosáin ascnaimh agus nuashonruithe ar STI, agus le haghaidh gníomhaíochtaí údaraithe agus deimhnithe Eorpacha nach bhfuil nasctha le himscaradh níos forleithne.
2. I ndáil leis na gníomhaíochtaí atá cistithe ag comhaltaí seachas an tAontas i dtionscadail atá cistithe ag comhpháirtíochtaí Eorpacha eile nó ag cláir Aontais eile nó ag iarrachtaí agus infheistíochtaí taighde agus nuálaíochta eile ag a bhfuil breisluach Aontais suntasach agus a chuireann le cuspóirí an Chomhghnóthais um Iarnród na hEorpa agus a gníomhaíochtaí comhlántacha atá cistithe aige a bhaint amach, déanfar luach gníomhaíochtaí den sórt sin a thuairisciú, ag cur in iúl chineál, leibhéal agus fhoinse an chistithe ón Aontas, d'fhonn áireamh dúbailte a sheachaint.

Airteagal 91

Comhlachtaí an Chomhghnóthais um Iarnród na hEorpa

1. Is iad comhlachtaí an Chomhghnóthais um Iarnród na hEorpa:
 - (a) an Bord Rialaithe;

- (b) an Stiúrthóir Feidhmiúcháin;
- (c) grúpa ionadaithe na stát;
- (d) an grúpa stiúrtha don Cholún Córasach;
- (e) an Grúpa Imscartha.

2. Féadfaidh an Comhghnóthas um Iarnród na hEorpa grúpa stiúrtha eolaíochta a bhunú nó comhairle eolaíochta a lorg ó shaineolaithe léinn neamhspleácha nó ó chomhlachtaí comhairleacha eolaíochta comhroinnte.

Airteagal 92

Comhdhéanamh an Bhoird Rialaithe

Beidh an Bord Rialaithe comhdhéanta mar a leanas:

- (a) beirt ionadaithe de chuid an Choimisiúin, thar ceann an Aontais;
- (b) ionadaí amháin ó gach ceann de na comhaltaí seachas an tAontas.

Airteagal 93

Feidhmiú an Bhoird Rialaithe

1. De mhaolú ar Airteagal 16(4), déanfaidh an Coimisiún cathaoirleacht ar an mBord Rialaithe, thar ceann an Aontais.
2. Beidh 50 % de na cearta vótála ag na comhaltaí eile seachas an tAontas i dteannta a chéile.
3. Tabharfar cuireadh d'ionadaithe ó Ghníomhaireacht Iarnróid an Aontais Eorpaigh agus ó Chomhairle Chomhairleach um Thaighde Iarnróid na hEorpa (ERRAC) freastal ar chruinnithe an Bhoird Rialaithe mar bhreathnóirí agus páirt a ghlacadh ina phléití, ach ní bheidh aon chearta vótála acu.
4. De mhaolú ar Airteagal 16(1) maidir le gníomhaíochtaí atá le déanamh faoin gColún Córasach, measfar cinntí a bheith glactha le tromlach 55 % ar a laghad de na vótaí, lena n-áirítear vótaí na n-ionadaithe atá as láthair.
5. I dteannta Airteagal 16(5), tiocfaidh an Bord Rialaithe le chéile uair amháin in aghaidh na bliana ag comhthionól ginearálta agus tabharfar cuireadh do gach rannpháirtí de chuid ghníomhaíochtaí taighde agus nuálaíochta an Chomhghnóthais um Iarnród na hEorpa freastal ar an gcruinniú sin. Spreagfaidh an comhthionól machnamh ar threo foriomlán ghníomhaíochtaí an Chomhghnóthais um Iarnród na hEorpa a fhad a dhéantar idirphlé oscailte agus trédhearcach ar chur chun feidhme an Mháistirphlean.

Airteagal 94

Cúraimí breise an Bhoird Rialaithe

Anuas ar na cúraimí a leagtar amach in Airteagal 17, déanfaidh Bord Rialaithe an Chomhghnóthais um Iarnród na hEorpa na cúraimí seo a leanas:

- (a) an Máistirphlean agus aon togra dá leasú a ghlacadh;
- (b) cláir oibre a ghlacadh, lena n-áirítear buiséad agus plean cur chun feidhme, don Cholún Córasach agus a leasuithe bunaithe ar mholtaí arna ndéanamh ag an ngrúpa stiúrtha don Cholún Córasach agus ar thograí ón Stiúrthóir Feidhmiúcháin.

Airteagal 95

Grúpa ionadaithe na stát

I dteannta Airteagal 20, áiríteoidh na Ballstáit go gcuireann a n-ionadaithe seasamh comhordaithe i láthair lena léirítear tuairimí na mBallstát mar a nochtar iad sna coistí seo a leanas:

- (a) an coiste a bhunaítear faoi Airteagal 51 de Threoir (AE) 2016/797;

- (b) Coiste an Chláir faoi fhoirmíocht Fís Eorpach “Aeráid, Fuinneamh agus Soghluaisteacht”;
- (c) an Coiste um Limistéar Aonair Iarnróid Eorpach, a bhunaítear faoi Airteagal 62 de Threoir 2012/34/AE ó Pharlaimint na hEorpa agus ón gComhairle ⁽⁴⁰⁾.

Airteagal 96

An grúpa stiúrtha don Cholún Córasach

1. Beidh an grúpa stiúrtha don Cholún Córasach ina chomhlacht comhairleach de chuid Chomhghnóthais um Iarnród na hEorpa a mbeidh de chúram air comhairle a thabhairt faoi shaincheistanna a bhaineann leis an gColún Córasach.
2. Beidh an grúpa stiúrtha don Cholún Córasach comhdhéanta d'ionadaithe ón gCoimisiún, ionadaithe ar an earnáil iarnróid agus soghluaisteachta agus ar eagraíochtaí ábhartha, Stiúrthóir Feidhmiúcháin an Chomhghnóthais um Iarnród na hEorpa, cathaoirleach ghrúpa ionadaithe na stát agus ionadaithe ó Gníomhaireacht Iarnróid an Aontais Eorpaigh agus ó ERRAC. Déanfaidh an Coimisiún an cinneadh críochnaitheach maidir le comhdhéanamh an Ghrúpa. I gcás ina bhfuil údar cuí leis, féadfaidh an Coimisiún cuireadh a thabhairt do shaineolaithe agus páirtithe geallsealbhóirí breise chun freastal ar chruinnithe de chuid an ghrúpa stiúrtha don Cholún Córasach mar bhreathnóirí. Tabharfaidh grúpa stiúrtha don Cholún Córasach tuairisc go tráthrialta do ghrúpa ionadaithe na stát maidir lena chuid gníomhaíochtaí.
3. Déanfaidh an Coimisiún cathaoirleacht ar an ngrúpa stiúrtha don Cholún Córasach.
4. Déanfar moltaí an ghrúpa stiúrtha don Cholún Córasach a ghlacadh de chomhthoil. I gcás nach dtagtar ar comhthoil, ullmhóidh Stiúrthóir Feidhmiúcháin an Chomhghnóthais um Iarnród na hEorpa tuarascáil don Bhord Rialaithe, i gcomhairle le Gníomhaireacht Iarnróid an Aontais Eorpaigh agus leis an gCoimisiún, ina n-achomrítear na príomhphointí comhchoiteanna agus na tuairimí nach n-aontaítear orthu. Sa chás sin, ullmhóidh grúpa ionadaithe na stát tuairim don Bhord Rialaithe freisin.
5. Glacfaidh an grúpa stiúrtha don Cholún Córasach a rialacha nós imeachta féin.
6. Beidh an grúpa stiúrtha don Cholún Córasach freagrach as comhairle a sholáthar don Stiúrthóir Feidhmiúcháin agus don Bhord Rialaithe maidir le haon cheann de na hábhair seo a leanas:
 - (a) an cur chuige maidir le comhchuibhiú oibríochtúil agus forbairt ailtireachta córais, lena n-áirítear maidir leis an gcuid ábhartha den Mháistirphlean;
 - (b) an cuspóir sonracha a leagtar amach in Airteagal 85(2), pointe (c), a chur i gcrích;
 - (c) an cúram a leagtar amach in Airteagal 84(5), pointe (a) a dhéanamh;
 - (d) an plean cur chun feidhme mionsonraithe bliantúil don Cholún Córasach i gcomhréir leis na cláir oibre a ghlacann an Bord Rialaithe i gcomhréir le hAirteagal 94, pointe (b);
 - (e) faireachán a dhéanamh ar dhul chun cinn an Choluin Chórasaigh.

Airteagal 97

An Grúpa Imscartha

1. Bunófar an Grúpa Imscartha de bhun Airteagal 22. Is é an ról a bheidh ag an nGrúpa Imscartha comhairle a chur ar an mBord Rialaithe maidir le glacadh margaidh na nuálaíochta iarnróid a forbraíodh faoin gComhghnóthas um Iarnród na hEorpa agus chun tacú le himscaradh na réiteach nuálach.
2. Beidh deis isteach sa Ghrúpa Imscartha ag na geallsealbhóirí go léir. Áireofar béim théamach agus ionadaíochas iomchuí le comhdhéanamh an Ghrúpa Imscartha. Déanfaidh an Coimisiún an cinneadh críochnaitheach maidir le comhdhéanamh an Ghrúpa. Foilseofar an liosta comhaltaí ar shuíomh gréasáin an Chomhghnóthais um Iarnród na hEorpa.

⁽⁴⁰⁾ Treoir 2012/34/AE ó Pharlaimint na hEorpa agus ón gComhairle an 21 Samhain 2012 lena mbunaítear limistéar Eorpach aonair iarnróid (IO L 343, 14.12.2012, lch. 32).

3. Soláthróidh an Grúpa Imscartha moltaí maidir le saincheistean a bhaineann le himscaradh na réiteach nuálach iarnróid ar iarraidh ón mBord Rialaithe. Féadfaidh an Grúpa Imscartha moltaí a eisiúint ar a thionscnamh féin freisin.

Airteagal 98

Comhar le Gníomhaireacht Iarnróid an Aontais Eorpaigh

Áiríteoidh an Comhghnóthas um Iarnród na hEorpa dlúthchomhar le Gníomhaireacht Iarnróid an Aontais Eorpaigh, go háirithe maidir le cur chun feidhme an Mháistirphlean. De bhun Airteagal 40 de Rialachán (AE) 2016/796 ó Pharlaimint na hEorpa agus ón gComhairle ⁽⁴¹⁾, cuimseofar leis an gcomhar sin na cúraimí comhairleacha seo a leanas:

- (a) ionchur ar riachtanais taighde a bhaineann le Limistéar Eorpach Iarnróid Aonair a bhaint amach a bhreithneoidh an Comhghnóthas um Iarnród na hEorpa sa Mháistirphlean agus a leasuithe agus sna cláir oibre;
- (b) aiseolas agus comhairle ar idir-inoibritheacht agus sábháilteacht a bhreithneofar sna gníomhaíochtaí taighde nuálaíochta agus, níos sonraí, i gcomhthéacs gníomhaíochtaí agus torthaí tionscadail le haghaidh na gcuspóirí a shainaithnítear in Airteagal 86(5), pointe (a);
- (c) tacú leis an gComhghnóthas um Iarnród na hEorpa chun riachtanais le haghaidh aon bhailíochtú breise nó aon staidéar a dtugann sé faoi a shainaithint, lena n-áirítear trí rannpháirtíocht na n-údarás sábháilteachta náisiúnta;
- (d) comhairle a chur ar fáil a mhéid a bhaineann leis an gColún Córasach;
- (e) a áirithiú go gcuirtear taithí agus aiseolas ar STI nó caighdeáin san áireamh nuair atá sonraíochtaí, lena n-áirítear comhéadain, sonraíochtaí riachtanas feidhmiúil agus sonraíochtaí riachtanas córasach á bhforbairt.

TEIDEAL V

COMHGHNÓTHAS SHLÁINTE DHOMHANDA EDCTP3

Airteagal 99

Cuspóirí breise Chomhghnóthas Shláinte Dhomhanda EDCPT3

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag Comhghnóthas Shláinte Dhomhanda EDCTP3:

- (a) rannchuidiú leis an ualach socheacnamaíoch a ghabhann le galair thógálacha san Afraic Fho-Shahárach a laghdú trí fhorbairt agus glacadh teicneolaíochtaí sláinte nua nó feabhsaithe a chur chun cinn;
- (b) rannchuidiú le méadú na slándála sláinte san Afraic Fho-Shahárach agus ar fud an domhain trí neartú a dhéanamh ar na hacmhainneachtaí atá bunaithe ar thaighde agus nuálaíocht i ndáil le hullmhacht agus freagairt chun galair thógálacha a rialú.

2. Beidh na cuspóirí sonracha seo a leanas ag Comhghnóthas Shláinte Dhomhanda EDCTP3 freisin:

- (a) forbairt agus úsáid teicneolaíochtaí sláinte nua agus feabhsaithe chun dul i ngleic le galair thógálacha a chur chun cinn trí thacú le stiúradh trialacha cliniúla san Afraic Fho-Shahárach;
- (b) acmhainneacht taighde agus nuálaíochta agus na córais náisiúnta taighde sláinte san Afraic Fho-Shahárach chun dul i ngleic le galair thógálacha a neartú;

⁽⁴¹⁾ Rialachán (AE) 2016/796 ó Pharlaimint na hEorpa agus ón gComhairle an 11 Bealtaine 2016 maidir le Gníomhaireacht Iarnróid an Aontais Eorpaigh agus lena n-aisghairtear Rialachán (CE) Uimh. 881/2004, (IO L 138, 26.5.2016, lch. 1).

- (c) ailíniú níos fearr idir Ballstáit na tíortha comhlachaithe agus tíortha Fo-Shaháracha bunaithe ar Chlár Oibre Straitéiseach um Thaighde agus um Nuálaíocht coiteann i réimse na sláinte domhanda a éascú chun cost-éifeachtúlacht infheistíochtaí poiblí na hEorpa a mhéadú;
- (d) acmhainneacht i leith ullmhacht eipidéime a neartú san Afraic Fho-Shahárach trí fhreagairt éifeachtach tapa taighde chun feistí diagnóiseacha, vacsaíní agus teiripic fhíor-riachtanach a fhorbairt chun galair atá ag teacht chun cinn a mbaineann baol eipidéime leo a bhrath go luath agus a rialú;
- (e) líonrú agus comhpháirtíochtaí tairbhiúla agus inbhuanaithe i réimse an taighde sláinte domhanda a chur chun cinn, ag tógáil caidreamh Thuaidh–Theas agus Theas-Theas le neart eagraíochtaí príobháideacha agus earnála poiblí.

Airteagal 100

Cúraimí breise Chomhghnóthas Shláinte Dhomhanda EDCTP3

Anuas ar na cúraimí a leagtar amach in Airteagal 5, déanfaidh Comhghnóthas Shláinte Dhomhanda EDCTP3 na cúraimí seo a leanas:

- (a) caidrimh thairbhiúla a chothú idir daoine, grúpaí agus institiúidí Eorpacha agus Afracacha;
- (b) feasacht a ardú faoi leasanna coiteanna agus spriocanna comhroinnte idir institiúidí agus grúpaí taighde chun comhar tionscadal agus institiúidí a éascú agus a neartú;
- (c) rannchuidiú le hailíniú straitéisí sláinte domhanda cisteoirí, institiúidí agus údarás Eorpach agus Afracach a éascú;
- (d) infheistíocht bhreise a mhealladh lena n-áirítear chomhpháirtithe ón earnáil phríobháideach, ón earnáil phoiblí agus ón earnáil charthanachta;
- (e) sineirgí, comhoibriú agus gníomhaíochtaí comhpháirteacha leis an Ionstraim um Chomharsanacht, Forbairt agus Comhar Idirnáisiúnta arna bunú le Rialachán (AE) 2021/947 ó Pharlaimint na hEorpa agus ón gComhairle ⁽⁴²⁾, a chur chun cinn, go háirithe maidir le fothú acmhainní agus comhroinnt saoráidí agus bonneagar.

Airteagal 101

Comhaltaí

Is iad comhaltaí Chomhghnóthas Shláinte Dhomhanda EDCTP3:

- (a) an tAontas, a mbeidh an Coimisiún mar ionadaí dó;
- (b) Comhlachas EDCTP, eagraíocht neamhbhrabúsach atá cláraithe faoi dhlí na hÍsiltíre, ar fhógra a thabhairt maidir lena chinneadh aontú do chomhghnóthas Shláinte Dhomhanda EDCTP3 á fhógairt aige trí bhíthin litir ghealltanais, nach mbeidh coinníollacha inti maidir lena aontachas seachas na coinníollacha sin a leagtar amach sa Rialachán seo.

Airteagal 102

Rannchuidiú airgeadais ón Aontas

Suas le EUR 800 000 000, lena n-áirítear suas le EUR 59 756 000 le haghaidh costais riaracháin, a bheidh i ranníocaíocht airgeadais an Aontais le Comhghnóthas Shláinte Dhomhanda EDCTP3, leithreasuithe LEE san áireamh, chun costais riaracháin agus costais oibriúcháin a chumhdach, agus beidh an méid seo a leanas mar chuid de:

- (a) suas le EUR 400 000 000, ar choinníoll go bhfuil ranníocaíocht na gcomhaltaí seachas an tAontas, nó a gcomheintiteas nó a n-eintitis chleamhnaithe, cothrom leis an méid sin ar a laghad;
- (b) suas le EUR 400 000 000, ar choinníoll go bhfuil ranníocaíochtaí ó chomhpháirtithe rannchuidithe, nó óna gcomheintitis nó óna n-eintitis chleamhnaithe, cothrom leis an méid sin ar a laghad.

⁽⁴²⁾ Rialachán (AE) 2021/947 ó Pharlaimint na hEorpa agus ón gComhairle an 9 Meitheamh 2021 lena mbunaítear an Ionstraim um Chomharsanacht, Forbairt agus Comhar Idirnáisiúnta - An Eoraip Dhomhanda, lena leasaítear agus lena n-aisghairtear Cinneadh Uimh. 466/2014/AE agus lena n-aisghairtear Rialachán (AE) 2017/1601 agus Rialachán (CE, Euratom) Uimh. 480/2009 ón gComhairle (IO L 209, 14.6.2021, lch. 1).

I gcás nach gcomhlíonfar an coinníoll faoi phointe (b), méadófar an méid faoi phointe (a) suas le EUR 400 000 000, ar choinníoll go ndéanfar an méid iomlán lena méadaítear é a mheaitseáil ar a laghad leis an ranníocaíocht ó chomhaltaí eile seachas an tAontas, nó a gcomheintitis nó a n-eintitis chleamhnaithe, mar a leagtar amach in Airteagal 103(1).

Airteagal 103

Ranníocaíochtaí ó chomhaltaí seachas an tAontas

1. Déanfaidh comhaltaí Chomhghnóthas Shláinte Dhomhanda EDCTP3 seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 439 878 000 ar a laghad sa tréimhse a leagtar amach in Airteagal 3.
2. Cuimseofar sna ranníocaíochtaí dá dtagraítear i mír 1 den Airteagal seo na ranníocaíochtaí le Comhghnóthas Shláinte Dhomhanda EDCTP3 mar a leagtar síos in Airteagal 11(1). De mhaolú ar Airteagal 11(1), féadfaidh na ranníocaíochtaí sin a bheith ina ranníocaíochtaí airgeadais.

Airteagal 104

Raon feidhme gníomhaíochtaí breise

1. Forbróidh Comhlachas EDCTP agus a chomheintitis nó a eintitis chleamhnaithe gníomhaíochtaí breise Chomhghnóthas Shláinte Dhomhanda EDCTP3 agus cuirfidh sé chun feidhme iad ar bhealach ailínithe, comhtháite agus comhleánúnach agus leanfaidh siad Clár Oibre Straitéiseach um Thaighde agus um Nuálaíocht Shláinte Dhomhanda EDCTP3.
2. Chun críoch Airteagal 11(1), pointe (b), féadfar a áireamh ar ghníomhaíochtaí breise gníomhaíochtaí a bhfuil nasc díreach acu le gníomhaíochtaí Chomhghnóthas Shláinte Dhomhanda EDCTP3 agus a chuireann lena chuspóirí, lena n-áirítear iad seo a leanas:
 - (a) gníomhaíochtaí de chomheintitis nó eintitis chleamhnaithe Chomhlachas EDCTP ailínithe le gníomhaíochtaí comhchosúla ó chomheintitis eile Chomhlachas EDCTP nó ó eintitis chleamhnaithe Chomhlachas EDCTP agus bainistíocht neamhspleách á déanamh orthu i gcomhréir le rialacha cistithe náisiúnta;
 - (b) gníomhaíochtaí cur chun feidhme a dhéanann eagraíochtaí taighde rialtais thíortha na hAfraice Fo-Shaharáí;
 - (c) gníomhaíochtaí a chuireann líonrú agus comhpháirtíochtaí chun cinn ag tógáil caidreamh le neart eagraíochtaí san earnáil phríobháideach agus san earnáil phoiblí;
 - (d) tacaíocht d'fhorbairt bonneagar taighde amhail líonraí trialach cliniciúla nó cohóirt a bhaineann le raon feidhme Chomhghnóthas Shláinte Dhomhanda EDCTP3, agus tacaíocht d'ullmhacht na gcóras sláinte a neartú chun gníomhaíochtaí taighde a dhéanamh laistigh de raon feidhme Chomhghnóthas Shláinte Dhomhanda EDCTP3.

Airteagal 105

Comhlachtaí Chomhghnóthas Shláinte Dhomhanda EDCTP3

Is iad comhlachtaí Chomhghnóthas Shláinte Dhomhanda EDCTP3:

- (a) an Bord Rialaithe;
- (b) an Stiúrthóir Feidhmiúcháin;
- (c) an Coiste Eolaíoch;
- (d) an grúpa geallsealbhóirí.

Airteagal 106

Comhdhéanamh an Bhoird Rialaithe

Beidh na comhaltaí seo a leanas ar an mBord Rialaithe:

- (a) seisear ionadaithe de chuid an Choimisiúin, thar ceann an Aontais;
- (b) seisear ionadaithe ar Chomhlachas EDCTP.

*Airteagal 107***Feidhmiú an Bhoird Rialaithe**

Beidh 50 % de na cearta vótála ag Comhlachas EDCTP.

*Airteagal 108***An Coiste Eolaíoch**

1. De bhun Airteagal 21(1), pointe (a), is comhlacht comhairleach eolaíochta Chomhghnóthas Shláinte Dhomhanda EDCTP3 a bheidh sa Choiste Eolaíoch.
2. De bhreis ar Airteagal 21(2), áiríteoidh an Coiste Eolaíochta go gcuirfear saineolas eolaíoch ó thíortha na hAfraice san áireamh.
3. Anuas ar na cúraimí a liostaítear in Airteagal 21, déanfaidh an Coiste Eolaíoch na cúraimí seo a leanas:
 - (a) cuidiú le dearadh agus pleanáil straitéiseach agus eolaíochta ghníomhaíochtaí Chomhghnóthas Shláinte Dhomhanda EDCTP3;
 - (b) comhairle a thabhairt maidir le straitéisí chun sineirgí agus comhpháirtíochtaí a chothú leis na geallsealbhóirí uile;
 - (c) rannchuidiú le hullmhú doiciméad straitéiseach agus doiciméid eolaíochta atá ábhartha do Chomhghnóthas Shláinte Dhomhanda EDCTP3, mar is gá;
 - (d) comhairle straitéiseach agus eolaíochta a sholáthar do Chomhghnóthas Shláinte Dhomhanda EDCTP3 agus cur i gcrích rathúil na dtionscadal reatha a áirithiú;
 - (e) riachtanais agus tosaíochtaí a aithint chun dlús a chur le forbairt idirghabhálacha nua nó feabhsaithe, lena n-áirítear an oiliúint, líonrú agus tógáil acmhainneachtaí is gá a dhéanamh chun na cuspóirí sin a bhaint amach;
 - (f) athbhreithniú a dhéanamh ar thírdhreach na ngalar a bhaineann le bochtaineacht agus na ngalar a ndéantar siléig iontu chun ról Chomhghnóthas Shláinte Dhomhanda EDCTP3 a aithint i gcomhpháirtíocht le geallsealbhóirí eile chun dlús a chur le forbairt nó feabhsú idirghabhálacha in aghaidh na ngalar sin;
 - (g) measúnú a dhéanamh ar staid conairí forbartha táirgí domhanda agus ar na deiseanna conairí criticiúla le haghaidh forbairt táirgí amach anseo;
 - (h) comhairle a sholáthar maidir leis an athbhreithniú a dhéanfar ar aon ghlaio ar thograí agus cláir eile;
 - (i) tacaíocht agus ionchur a chur ar fáil do chreat faireacháin agus meastóireachta Chomhghnóthas Shláinte Dhomhanda EDCTP3, chomh maith le monatóireacht a dhéanamh ar thorthaí eolaíochta agus ar thionchair straitéiseacha na ndéontas atá cistithe ag Comhghnóthas Shláinte Dhomhanda EDCTP3;
 - (j) comhairle agus cúnamh a thabhairt agus a bheith rannpháirteach i meithleacha Chomhghnóthas Shláinte Dhomhanda EDCTP3, cruinnithe geallsealbhóirí, Fóram EDCTP agus in imeachtaí eile.
4. Ullmhóidh an cathaoirleach tuarascáil bhliantúil ar ghníomhaíochtaí agus gnóthachain an Choiste Eolaíochta sa bhliain roimhe agus cuirfidh sé faoi bhráid an Bhoird Rialaithe í lena formheasadh.

*Airteagal 109***An grúpa geallsealbhóirí**

1. Beidh ionadaíocht chothrom sa ghrúpa geallsealbhóirí ar gheallsealbhóirí ó thaobh na tíreolaíochta, téamaí agus na hinscne de, lena n-áirítear go háirithe saineolas Afracach.
2. Anuas ar na cúraimí a leagtar amach in Airteagal 22, déanfaidh an Grúpa Geallsealbhóirí na cúraimí seo a leanas freisin:
 - (a) ionchur a sholáthar ar na tosaíochtaí eolaíochta, straitéiseacha agus teicneolaíocha a rachaidh Chomhghnóthas Shláinte Dhomhanda EDCTP3 i ngleic leo mar a leagtar síos sa Chlár Oibre Straitéiseach um Thaighde agus um Nuálaíocht nó i ndoiciméad comhionann eile, ag tabhairt aird chuig ar dhul chun cinn agus riachtanais na Sláinte Domhanda in earnálacha cóngaracha;

- (b) moltaí a sholáthar chun cothú sineirgí nithiúla idir Comhghnóthas Shláinte Dhomhanda EDCTP3 agus na hearnálacha cóngaracha nó aon earnáil lena measfar go mbainfidh breisluach a éascú;
- (c) ionchur a sholáthar d'Fhóram EDCTP.

Airteagal 110

Incháilitheacht le haghaidh cistiúcháin

1. I gcomhréir le hAirteagal 17(2) den Rialachán maidir le Fís Eorpach agus de mhaolú ar Airteagal 23(1) de, beidh cistiú ó Chomhghnóthas Shláinte Dhomhanda EDCTP3 teoranta d'eintitis dhlítheanacha atá bunaithe i mBallstáit nó i dtíortha comhlachaithe nó i gcomhstáit Chomhlachas EDCTP. I gcásanna eisceachtúla agus má fhoráiltear dó sa chlár oibre, d'fhéadfadh eintitis atá bunaithe i stáit eile a bheith incháilithe chun cistiú a fháil ó Chomhghnóthas Shláinte Dhomhanda EDCTP3 le haghaidh ábhar glaonna sonracha freisin nó i gcás glao ina dtéitear i ngleic le héigeandáil sláinte poiblí.

2. Féachfaidh an tAontas le comhaontuithe a chur i gcrích le tríú tíortha a éascaíonn leasanna airgeadais an Aontais a chosaint. Sula gcuirtear i gcrích iad, agus d'fhonn leasanna airgeadais an Aontais a chosaint, i gcás ina bhfuil eintitis atá bunaithe i dtríú tír gan comhaontú den sórt sin rannpháirteach le cistiú i ngníomhaíocht indéreach, bunófar comhordaitheoir airgeadais na gníomhaíochta indéirí i mBallstát nó i dtír chomhlachaithe, déanfar an méid réamh-mhaoinithe a oiriúnú agus tabharfar aird chuí ar na rioscaí airgeadais i bhforálacha dliteanais an chomhaontaithe deontais.

Airteagal 111

Rannpháirtithe sainaitheanta

Féadfaidh rannpháirtíocht eintiteas a shainaitheann Comhghnóthas Shláinte Dhomhanda EDCTP3 a bheith mar chritéir incháilitheachta sa ghlaó ar thograí. Beidh údar cuí leis sa chlár oibre agus féadfaidh sé sin foráil a dhéanamh nach mbeidh rannpháirtithe sainaitheanta den sórt sin incháilithe chun cistiú a fháil ó Chomhghnóthas Shláinte Dhomhanda EDCTP3 faoi na gníomhaíochtaí indéreacha sainaitheanta.

Airteagal 112

Prionsabail eiticíúla

Cuirfear na trialacha cliniiciúla agus an taighde cur chun feidhme a dhéanfar faoi Chomhghnóthas Shláinte Dhomhanda EDCTP3 chun feidhme i gcomhréir le prionsabail bhunúsacha eitice, caighdeáin rialála idirnáisiúnta shainaitheanta agus dea-chleachtais rannpháirtíochta.

Airteagal 113

Comhar leis an nGníomhaireacht Leigheasra Eorpach agus leis an Lárionad Eorpach um Ghalair a Chosc agus a Rialú

Áiríteoidh Comhghnóthas Shláinte Dhomhanda EDCTP3 dlúthchomhar leis an nGníomhaireacht Leigheasra Eorpach agus leis an Lárionad Eorpach um Ghalair a Chosc agus a Rialú, agus le gníomhaireachtaí agus eagraíochtaí Afracacha ábhartha.

Airteagal 114

Rochtain inacmhainne

Áiríteoidh rannpháirtithe i ngníomhaíochtaí indéreacha atá cistithe ag Comhghnóthas Shláinte Dhomhanda EDCTP3, maidir leis na táirgí agus na seirbhísí a fhorbraíonn siad bunaithe nó bunaithe i bpáirt ar thorthaí staidéar cliniiciúil arna ndéanamh mar chuid de ghníomhaíocht indéreach, go bhfuil na táirgí agus na seirbhísí sin inacmhainne, ar fáil agus inrochtana don phobal de réir coinníollacha cothroima réasúnta. Chun na críche sin, i gcás inarb ábhartha, sonrófar sa chlár oibre na hoibleagáidí saothraithe breise is infheidhme maidir le gníomhaíochtaí indéreacha sonracha.

TEIDEAL VI

COMHGHNÓTHAS AN TIONSCNAIMH UM SHLÁINTE NUÁLACH

Airteagal 115

Cuspóirí breise an Chomhghnóthais um Shláinte Nuálach

1. Anuas ar na cuspóirí a leagtar amach in Airteagal 4 agus Airteagal 5, beidh ar Chomhghnóthas an Tionscnaimh um Shláinte Nuálach na cuspóirí ginearálta seo a leanas a bhaint amach faoi 2030:
 - (a) rannchuidiú le héiceachóras taighde agus nuálaíochta sláinte ar fud an Aontais a éascaíonn aistriú eolas eolaíochta ina nuálaíochtaí, go háirithe ag seoladh 30 tionscadal trasearnála ar scála mór a dhíríonn ar nuálaíochtaí sláinte;
 - (b) forbairt nuálaíochtaí sábháilte, éifeachtacha, duinelárnacha, costéifeachtúla a fhreagraíonn do riachtanais straitéiseacha sláinte poiblí nach gcomhlíontar go fóill a chothú, ag léiriú, i gcúig shampla ar a laghad, féidearthacht táirgí nó seirbhísí cúraim sláinte a chomhtháthú, le hoiriúnacht léirithe i gcomhar ghlacadh na gcóras sláinte. Ba cheart do na tionscadail ghaolmhara dul i ngleic le cosc, diagnóis, cóireáil nó bainistíocht galar a dhéanann difear do dhaonra an Aontais, lena n-áirítear rannchuidiú le Plean na hEorpa um Shárú na hAilse;
 - (c) nuálaíocht trasearnála a spreagadh le haghaidh tionscal sláinte Eorpach iomaíoch, agus cur le cuspóirí faoin Straitéis Nua Thionsclaíoch don Eoraip agus an Straitéis Cógaisíochta don Eoraip.
2. Beidh na cuspóirí sonracha seo a leanas ag Comhghnóthas an Tionscnaimh um Shláinte Nuálach freisin:
 - (a) rannchuidiú chun tuiscint níos fearr a fháil ar na nithe is cinntithe le sláinte agus réimsí tosaíochtaí galair;
 - (b) iarrachtaí scoilte taighde agus nuálaíochta sláinte a chomhtháthú ag tabhairt earnálacha tionscal sláinte agus geallsealbhóirí eile le chéile, ag díriú ar riachtanais sláinte poiblí nach gcomhlíontar go fóill, chun forbairt uirlisí, sonraí, ardán, teicneolaíochtaí agus próiseas a éascú i gcomhair réamhaisnéis, cosc, idircheapadh, diagnóis, cóireáil agus bainistíocht níos fearr galar, ag freastal ar riachtanais na n-úsáideoirí deiridh;
 - (c) féidearthacht na réiteach cúraim sláinte duinelárnach agus comhtháite a léiriú;
 - (d) an acmhainneacht iomlán a bhaineann le digiteáil agus malartú sonraí i gcúram sláinte a shaothrú;
 - (e) forbairt modheolaíochtaí agus samhlacha nua agus feabhsaithe a éascú le haghaidh measúnú cuimsitheach ar bhreisluach na réiteach cúraim sláinte nuálach agus comhtháite.

Airteagal 116

Cúraimí breise Chomhghnóthas an Tionscnaimh um Shláinte Nuálach

Anuas ar na cúraimí a leagtar amach in Airteagal 5, déanfaidh Comhghnóthas an Tionscnaimh um Shláinte Nuálach na cúraimí seo a leanas:

- (a) comhar dlúth agus fadtéarmach a chothú idir an tAontas, comhaltaí eile, comhpháirtithe rannchuidithe, agus geallsealbhóirí eile atá rannpháirteach i gcúram sláinte agus i dtionscail ábhartha eile, údarais chúraim shláinte (amhail comhlachtaí rialála, comhlachtaí measúnaithe teicneolaíochta sláinte agus íocóirí), eagraíochtaí othar, gairmithe agus soláthróirí cúraim shláinte, chomh maith leis an saol acadúil;
- (b) tacú le taighde agus nuálaíocht sláinte réamhiomaíoch, go háirithe gníomhaíochtaí a thugann le chéile eintitis ó roinnt earnálacha i dtionscal an chúraim sláinte chun comhoibriú ar réimsí riachtanas poiblí nach bhfreastalaítear orthu go fóill;
- (c) a áirithiú gur féidir le gach geallsealbhóir réimsí a mholadh le haghaidh glaonna ar thograí sa todhchaí;
- (d) athbhreithniú a dhéanamh go tráthrialta agus na leasuithe is gá a dhéanamh ar Chlár Oibre Straitéiseach um Thaighde agus um Nuálaíocht Chomhghnóthas an Tionscnaimh um Shláinte Nuálach i bhfianaise na bhforbairtí eolaíochta a thagann chun cinn le linn a chur chun feidhme nó i bhfianaise na riachtanas sláinte poiblí a thagann chun cinn;

- (e) faisnéis ar na tionscadail, lena n-áirítear eintitis rannpháirtithe agus méid ranníocaíochta airgeadais Chomhghnóthas an Tionscnaimh um Shláinte Nuálach agus ranníocaíochtaí comhchineáil geallta in aghaidh gach rannpháirtí a fhoilsiú;
- (f) cumarsáid thráthrialta a eagrú, lena n-áirítear cruinniú bliantúil amháin ar a laghad le leasghrúpaí agus lena gheallsealbhoirí chun oscailteacht agus trédhearcacht ghníomhaíochtaí taighde agus nuálaíochta Chomhghnóthas an Tionscnaimh um Shláinte Nuálach a áirithiú;
- (g) aon chúram eile is gá chun na cuspóirí dá dtagraítear in Airteagal 115 a bhaint amach.

Airteagal 117

Comhaltaí

Beidh na comhaltaí seo a leanas ag Comhghnóthas an Tionscnaimh um Shláinte Nuálach:

- (a) an tAontas, a mbeidh an Coimisiún mar ionadaí dó;
- (b) an Coiste Eorpach Comhordúcháin den Tionscal TF Raideolaíoch, Leictrimhíochaine agus Cúraim Sláinte (COCIR) atá cláraithe faoi dhlí na Beilge, Cónaidhm Eorpach na dTionscal agus na gCumann Cógaisíochta, lena n-áirítear a fhoghrúpa Vaccines Europe, atá cláraithe faoi dhlí Lucsamburg, EuropaBio atá cláraithe faoi dhlí na Beilge agus MedTech Europe atá cláraithe faoi dhlí na Beilge, ar fhógra a thabhairt maidir lena gcinntí faoi seach aontú don Chomhghnóthas um Shláinte Nuálach trí bhithin litir ghealltanais nach mbeidh coinníollacha inti maidir lena n-aontachas seachas na coinníollacha a leagtar amach sa Rialachán seo;
- (c) na comhaltaí comhlachaithe atá le roghnú i gcomhréir le hAirteagal 7.

Airteagal 118

Ranníocaíocht airgeadais ón Aontas

Suas le EUR 1 200 000 000, lena n-áirítear suas le EUR 30 212 000 le haghaidh costais riaracháin, a bheidh i ranníocaíocht airgeadais an Aontais le Comhghnóthas an Tionscnaimh um Shláinte Nuálach, leithreasuithe LEE san áireamh, chun costais riaracháin agus costais oibriúcháin a chumhdach, agus beidh an méid seo a leanas mar chuid de:

- (a) suas le EUR 1 000 000 000, ar choinníoll go meaitseálann ranníocaíocht na gcomhaltaí seachas an tAontas, nó a chomheintitis nó a eintitis chleamhnaithe, an méid sin;
- (b) suas le EUR 200 000 000, ar choinníoll go meaitseálann na ranníocaíochtaí breise ó chomhpháirtithe rannchuidithe, nó óna gcomheintitis, an méid sin.

Airteagal 119

Ranníocaíochtaí ó chomhaltaí seachas an tAontas

1. Déanfaidh comhaltaí Chomhghnóthas an Tionscnaimh um Shláinte Nuálach seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 1 000 000 000 ar a laghad, lena n-áirítear suas le EUR 30 212 000 le haghaidh costais riaracháin, sa tréimhse a leagtar amach in Airteagal 3.
2. Ní sháróidh ranníocaíochtaí comhchineáil le haghaidh gníomhaíochtaí breise níos mó ná 40 % de ranníocaíochtaí comhchineáil ó chomhaltaí seachas an tAontas, ar leibhéal chlár Chomhghnóthas an Tionscnaimh um Shláinte Nuálach.
3. Ranníocaíochtaí arna soláthar ag rannpháirtithe i gcomhair gníomhaíochtaí indíreacha atá cistithe ag Comhghnóthas an Tionscnaimh um Shláinte Nuálach, is é a bheidh iontu 45 % ar a laghad de chostais incháilithe de chuid gníomhaíochta indíri agus de chostais a gníomhaíochtaí gaolmhara breise. I gcás ina bhfuil údar cuí leis, féadfaidh an clár oibre cion ionadaithe níos ísle ranníocaíochtaí a cheadú ar leibhéal gníomhaíochta indíri aonair agus a ghníomhaíochtaí breise gaolmhara.

4. Tabharfar údar le costais a thabhaítear i ngníomhaíochtaí indíreacha i dtríú tíortha seachas tíortha atá comhlachaithe le Fís Eorpach agus beidh siad ábhartha do na cuspóirí a leagtar amach in Airteagal 115. Ní sháróidh siad 20 % de na ranníocaíochtaí comhchineáil le costais oibriúcháin a sholáthair comhaltaí seachas an tAontas agus comhpháirtithe rannchuidithe ar leibhéal cláir Chomhghnóthas an Tionscnaimh um Shláinte Nuálach. Ní mheasfar costais a sháraíonn 20 % de na ranníocaíochtaí comhchineáil chuig costais oibriúcháin ar leibhéal cláir Chomhghnóthas an Tionscnaimh um Shláinte Nuálach a bheith mar ranníocaíochtaí comhchineáil le costais oibriúcháin.

5. I gcásanna a bhfuil údar cuí leo, féadfaidh cláir oibre Chomhghnóthas an Tionscnaimh um Shláinte Nuálach teorannacha sonracha a leagan amach le haghaidh ranníocaíochtaí comhchineáil le costais oibriúcháin a thabhaítear i dtríú tíortha seachas tíortha atá comhlachaithe le Fís Eorpach ar leibhéal gníomhaíochta indí. Cuirfear na cuspóirí agus an tionchar a bheartaítear leis na gníomhaíochtaí lena mbaineann san áireamh sna cinntí a dhéanfar maidir le teorannacha sonracha den sórt sin agus ní bheidh sárú ar an uasteorainn a leagtar amach i mír 4 ar leibhéal cláir an Tionscnaimh um Shláinte Nuálach mar thoradh orthu.

Airteagal 120

Coinníollacha a bhaineann le gníomhaíochtaí breise

1. Chun críoch Airteagal 11(1), pointe (b), tabharfar faoi ghníomhaíochtaí breise san Aontas nó i dtíortha atá comhlachaithe le Fís Eorpach agus d'fhéadfadh na gníomhaíochtaí seo a leanas a bheith san áireamh leo:

- (a) gníomhaíochtaí a chuidíonn le cuspóirí gníomhaíochtaí indíreacha atá cistithe ag Comhghnóthas an Tionscnaimh um Shláinte Nuálach a bhaint amach;
- (b) gníomhaíochtaí a chuidíonn le scaipeadh, inbhuaine nó saothrú torthaí gníomhaíochtaí indíreacha atá cistithe ag Comhghnóthas an Tionscnaimh um Shláinte Nuálach.

2. I gcás inarb ábhartha, beidh plean le haghaidh a ngníomhaíochtaí breise gaolmhara mar chuid de na tograí tionscadal. Ní mór costais a bhaineann le gníomhaíochtaí breise den sórt sin a bhaineann go sonrach le tionscadal a thabhtú idir an dáta a cuireadh isteach an togra agus 2 bhliain tar éis dháta críochnaithe na gníomhaíochta indí.

3. Ionas go bhféadfar na costais a chur san áireamh mar ranníocaíochtaí comhchineáil dá dtagraítear in Airteagal 11(1), pointe (b), tabharfar faoi na gníomhaíochtaí breise foluiteacha san Aontas nó i dtíortha atá comhlachaithe le Fís Eorpach.

Airteagal 121

Comhlachtaí Chomhghnóthas an Tionscnaimh um Shláinte Nuálach

Is iad Comhlachtaí Chomhghnóthas an Tionscnaimh um Shláinte Nuálach:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát;
- (d) an Painéal Eolaíochta agus Nuálaíochta.

Airteagal 122

Comhdhéanamh an Bhoird Rialaithe

Beidh na comhaltaí seo a leanas ar an mBord Rialaithe:

- (a) ceathrar ionadaithe de chuid an Choimisiúin, thar ceann an Aontais;
- (b) ionadaí amháin in aghaidh gach comhalta seachas an tAontas.

*Airteagal 123***Feidhmiú an Bhoird Rialaithe**

Beidh 50 % de na cearta vótála ag na comhaltaí eile seachas an tAontas i dteannta a chéile.

*Airteagal 124***An Painéal Eolaíochta agus Nuálaíochta**

1. Cuirfidh an Painéal Eolaíochta agus Nuálaíochta comhairle ar an mBord Rialaithe maidir le cúrsaí a bhaineann le gníomhaíochtaí taighde agus nuálaíochta Chomhghnóthas an Tionscnaimh um Shláinte Nuálach agus i gcomhréir le hAirteagal 21.

2. Beidh na painéalaithe buana seo a leanas ar an bPainéal Eolaíochta agus Nuálaíochta:

- (a) beirt ionadaithe de chuid an Choimisiúin, thar ceann an Aontais;
- (b) ceathrar ionadaithe ó gach ceann de na comhaltaí seachas an tAontas;
- (c) beirt ionadaithe ó ghrúpa ionadaithe na stát;
- (d) ceathrar ionadaithe ón bpobal eolaíochta, agus iad ceaptha ag an mBord Rialaithe tar éis próiseas roghnúcháin oscailte i gcomhréir le hAirteagal 21(4);
- (e) suas le seisear painéalaithe buana eile, agus iad ceaptha ag an mBord Rialaithe tar éis próiseas roghnúcháin oscailte chun Airteagal 21(4) a chur chun feidhme, ag áirithiú ionadaíocht chuí ar gheallsealbhoirí atá páirteach sa chúram sláinte go háirithe, ag cumhdach go háirithe na hearnála poiblí, lena n-áirítear comhlachtaí rialála, othair agus úsáideoirí deiridh go ginearálta.

3. Féadfaidh na painéalaithe buana dá dtagraítear i mír 2, pointe (a), pointe (b) agus pointe (c), cuireadh a thabhairt do phainéalaithe *ad hoc*, i gcás inarb iomchuí, chun ábhair shonracha a phlé. Féadfaidh siad cuireadh ar bhonn comhpháirteach a thabhairt do sheisear painéalaithe *ad hoc* ar a mhéad le haghaidh gach cruinnithe.

Tabharfar cuireadh do phainéalaithe *ad hoc* den sórt sin bunaithe ar a saineolas eolaíoch nó teicniúil ar na hábhair atá le plé ag cruinnithe ar leith nó ag cur an ghá le sineirgí a chruthú le cláir thaighde eile san áireamh.

Is go chomhthoiliúil a thabharfaidh na painéalaithe buana dá dtagraítear i mír 2, pointe (a), pointe (b) agus pointe (c) cuireadh do phainéalaithe *ad hoc*. Cuirfidh siad a gcinntí in iúl don Bhord Rialaithe, grúpa ionadaithe na stát agus do na painéalaithe buana eile.

4. I dteannta Airteagal 21(7), cuirfidh an Painéal Eolaíochta agus Nuálaíochta comhairle ar fáil don Bhord Rialaithe, ar iarraidh uaidh nó ar a thionscnamh féin, maidir le cúrsaí eolaíochta agus teicneolaíochta a bhaineann le cuspóirí Chomhghnóthas an Tionscnaimh um Shláinte Nuálach, agus faoi na hábhair seo a leanas go háirithe:

- (a) tosaíochtaí eolaíocha, lena n-áirítear i gcomhthéacs an Clár Oibre Straitéiseach um Thaighde agus um Nuálaíocht a thabhairt cothrom le dáta;
- (b) an dréachtchlár oibre, lena n-áirítear ábhar na nglanna ar thograí;
- (c) pleanáil gníomhaíochtaí breise comhaltaí seachas an tAontas dá dtagraítear in Airteagal 120;
- (d) bunú grúpaí comhairleacha a bheidh dírithe ar thosaíochtaí eolaíocha sonracha i gcomhréir le hAirteagal 17(2), pointe (x), agus tar éis próiseas roghnúcháin oscailte dá gcomhaltaí i gcomhréir le hAirteagal 21(4);
- (e) cruthú sineirgí le gníomhaíochtaí eile de chuid Fís Eorpach, lena n-áirítear comhpháirtíochtaí Eorpacha eile, chomh maith le cláir cistiúcháin eile an Aontais agus cláir cistiúcháin náisiúnta.

5. De bhreis ar Airteagal 21(5), toghfaidh an Painéal Eolaíochta agus Nuálaíochta a chathaoirleach as measc na n-ionadaithe dá bhfáiltear i mír 2, pointe (d), den Airteagal seo.

Airteagal 125

Na coinníollacha is infheidhme maidir le gníomhaíochtaí indíreacha

1. Chun críoch an Rialacháin seo, déanfar riachtanas poiblí nach bhfreastalaítear air go fóill a shainmhíniú mar riachtanas nach dtéann córais cúraim sláinte i ngleic leis faoi láthair ar chúiseanna soláthair nó rochtana, mar shampla i gcás nach bhfuil modh sásúil diagnóise, coisc, nó cóireála ann i gcomhair fadhb shláinte nó i gcás ina bhfuil rochtain theoranta ag daoine ar chúram sláinte mar gheall ar an gcostas a bhaineann leis, an t-achar idir an duine agus na saoráidí sláinte nó amanna feithimh. Tagraíonn duinelárnach do chur chuige i leith cúraim a ghlacann go comhfhiúrach le dearcthaí daoine aonair, cúramóirí, teaghlach agus pobal agus meastar iad a bheith mar rannpháirtithe chomh maith le tairbhíthe na gcórais cúraim sláinte a eagraítear timpeall a riachtanas agus a roghanna féin seachas timpeall galair aonair.
2. D'fhéadfadh go mbeadh staidéir chliniciúla ina léirítear riachtanas poiblí nach bhfreastalaítear air go fóill sa réimse spriodhíthe nó san úsáid bheartaithe, a dhéanann difear suntasach do nó bagairt ar dhaonra an Aontais, san áireamh le gníomhaíochtaí indíreacha atá cistithe ag Comhghnóthas an Tionscnaimh um Shláinte Nuálach.
3. Ní mór do rannpháirtithe i ngníomhaíochtaí indíreacha atá cistithe ag Comhghnóthas an Tionscnaimh um Shláinte Nuálach a áirithiú, maidir leis na táirgí agus na seirbhísí a fhorbraíonn siad bunaithe nó bunaithe i bpáirt ar thorthaí staidéar cliniciúil arna ndéanamh mar chuid de ghníomhaíocht indíreach, go bhfuil na táirgí agus na seirbhísí sin inacmhainne, ar fáil agus inrochtana don phobal de réir coinníollacha cothroma agus réasúnta. Chun na críche sin, i gcás inarb ábhartha, sonrófar sa chlár oibre na hoibleagáidí saothraithe breise is infheidhme maidir le gníomhaíochtaí indíreacha sonracha.
4. I gcás ina bhforáiltear dó sa chlár oibre agus i dteannta Airteagal 5(2), pointe (a), féadfar a cheangal ar eintitis dhlítheanacha arna sainaitheint ag Comhghnóthas an Tionscnaimh um Shláinte Nuálach a bheith rannpháirteach i ngníomhaíochtaí indíreacha sonracha. Ní bheidh na heintitis sin incháilithe chun cistiú a fháil ó Chomhghnóthas an Tionscnaimh um Shláinte Nuálach.
5. Ní bheidh aon eintiteas dlítheanach atá rannpháirteach i ngníomhaíochtaí indíreacha sonracha leis na heintitis dhlítheanacha dá dtagraítear i mír 4 incháilithe chun cistiú a fháil sna cásanna seo a leanas:
 - (a) is eintitis dhlítheanacha bhrabúsacha iad a bhfuil láimhdeachas bliantúil atá cothrom le EUR 500 milliún nó níos mó ná sin acu;
 - (b) tá siad faoi rialú díreach nó indíreach eintitis dhlítheanaigh mar a thuairiscítear i bpointe (a), nó faoin rialú díreach nó indíreach céanna le heintiteas mar a thuairiscítear i bpointe (a);
 - (c) tá rialú díreach nó indíreach acu ar eintiteas dlítheanach dá dtagraítear i bpointe (a).

TEIDEAL VII

AN COMHGHNÓTHAS EOCHAIRTHEICNEOLAÍOCHTAÍ DIGITEACHA

Airteagal 126

Cuspóirí breise an Chomhghnóthais Eochairtheicneolaíochtaí Digiteacha

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag an gComhghnóthas Eochairtheicneolaíochtaí Digiteacha:
 - (a) neamhspleáchas straitéiseach an Aontais i gcomhpháirteanna agus córais leictreonacha a neartú chun tacú le riachtanais na dtionscal ingearach agus an gheilleagair trí chéile amach anseo. Is é an sprioc fhoriomlán rannchuidiú i dtreo luach dearaidh agus táirgthe comhpháirteanna agus córais leictreonach a dhúbláil san Eoraip faoi 2030, i gcomhréir le meáchan an Aontais i dtáirgí agus seirbhísí;
 - (b) sármhaitheas eolaíochta agus ceannaireacht nuálaíochta an Aontais a bhunú i dteicneolaíochtaí comhpháirteanna agus córais atá ag teacht chun cinn, lena n-áirítear i ngníomhaíochtaí a bhaineann le LUTanna níos ísle; agus páirtíocht ghníomhach FBManna a chur chun cinn, arb ionann iad agus aon trian amháin den líon iomlán rannpháirtithe sna gníomhaíochtaí indíreacha agus ar cheart 20 % ar a laghad den chistiú poiblí a bheith ag dul dóibh;
 - (c) a áirithiú go dtéann teicneolaíochtaí comhpháirteanna agus córais i ngleic le dúshlán shochaíocha agus chomhshaoil na hEorpa. Is é an sprioc atá ann ailíniú le beartas an Aontais maidir le héifeachtúlacht fuinnimh agus rannchuidiú le hídíú fuinnimh a laghdú 32,5 % in 2030.

2. Anuas ar na cuspóirí a leagtar amach i mír 1, beidh na cuspóirí sonracha seo a leanas ag an gComhghnóthas Eochairtheicneolaíochtaí Digiteacha:

- (a) tacú le taighde agus forbairt chun acmhainneachtaí deartha agus táirgthe a bhunú san Eoraip do réimsí feidhmeanna straitéiseacha;
- (b) punann chothrom de thionscadail mhóra agus bheaga a thacaíonn le haistriú tapa na dteicneolaíochtaí ón taighde chuig an timpeallacht thionsclaíoch a sheoladh;
- (c) éiceachóras dinimiciúil uile-Aontais a chothú bunaithe ar shlabhraí breisluacha digiteacha lena ngabhann rochtain shimplithe do rannpháirtithe nua;
- (d) tacú le taighde agus forbairt chun teicneolaíochtaí comhpháirteanna lena ráthaítear slándáil, iontaofacht agus éifeachtúlacht fuinnimh le haghaidh bonneagair chriticiúla agus earnálacha criticiúla san Eoraip;
- (e) slógadh acmhainní náisiúnta a chothú agus comhordú ar chláir thaighde agus nuálaíochta an Aontais agus ar chláir thaighde agus nuálaíochta náisiúnta a áirithiú i réimse na gcomhpháirteanna agus na gcóras leictreonach;
- (f) comhleanúnachas a bhunú idir Clár Oibre Straitéiseach um Thaighde agus um Nuálaíocht an Chomhghnóthais Eochairtheicneolaíochtaí Digiteacha agus beartaí an Aontais ionas go gcuirfidh teicneolaíochtaí comhpháirteanna agus córas leictreonach go héifeachtúil leo.

Airteagal 127

Comhaltaí

1. Beidh na comhaltaí seo a leanas ag an gComhghnóthas Eochairtheicneolaíochtaí Digiteacha:

- (a) na húdaráis phoiblí agus iad comhdhéanta de:
 - (i) an tAontas, a mbeidh an Coimisiún mar ionadaí dó;
 - (ii) na stáit rannpháirteacha seo a leanas: an Ostair, an Bheilg, an Bhulgáir, an Chróit, an Chipir, an tSeicia, an Danmhairg, an Eastóin, an Fhionlainn, an Fhrainc, an Ghearmáin, an Ghréig, an Ungáir, an Íoslainn, Éire, an Iodáil, an Laitvia, an Liotuáin, Lucsamburg, Málta, an Ísiltír, an Iorua, an Pholainn, an Phortaingéil, an Rómáin, an tSlóvaic, an tSlóivéin, an Spáinn, an tSualainn;
- (b) na comhaltaí príobháideacha agus iad comhdhéanta de na comhlachais tionscail seo a leanas: Cumann AENEAS arna chlárú faoi dhlí na Fraince; Comhlachas Tionscail Inside (INSIDE), arna chlárú faoi dhlí na hÍsiltíre; cumann EpoSS e.V. arna chlárú faoi dhlí na Gearmáine.

2. Ceapfaidh gach stát rannpháirteach a ionadaí ar chomhlachtaí an Chomhghnóthais Eochairtheicneolaíochtaí agus ainmneoidh sé an t-eintiteas nó na heintitis náisiúnta a bheidh freagrach as a oibleagáidí a chomhlíonadh maidir le gníomhaíochtaí an Chomhghnóthais Eochairtheicneolaíochtaí Digiteacha.

Airteagal 128

Ranníocaíocht airgeadais ón Aontas

Suas le EUR 1 800 000 000, lena n-áirítear suas le EUR 26 331 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas Eochairtheicneolaíochtaí Digiteacha, leithreasuithe LEE san áireamh, chun costais riaracháin agus costais oibriúcháin a chumhdach.

Airteagal 129

Ranníocaíochtaí ó chomhaltaí seachas an tAontas

1. Le linn na tréimhse a leagtar amach in Airteagal 3, déanfaidh stáit rannpháirteacha an Chomhghnóthais Eochairtheicneolaíochtaí Digiteacha ranníocaíocht iomlán a bheidh ar cóimhéid le méid ranníocaíocht an Aontais i leith costais oibriúcháin dá dtagraítear in Airteagal 128. Déanfaidh na stáit rannpháirteacha a ranníocaíochtaí comhchoiteanna agus an chaoi a soláthróidh siad iad a shocrú eatarthu. Ní dhéanfaidh sin difear do chumas gach stáit rannpháirtigh a ranníocaíocht airgeadais náisiúnta a shainiú i gcomhréir le hAirteagal 12. De mhaolú ar Airteagal 28(4), pointe (a), ní dhéanfaidh na stáit rannpháirteacha ranníocaíocht le costais riaracháin.

2. Le linn na tréimhse a leagtar amach in Airteagal 3, déanfaidh comhaltaí príobháideacha an Chomhghnóthais Eochairtheicneolaíochtaí Digiteacha ranníocaíocht nó socróidh siad go ndéanfaidh a gcomheintitis nó a n-eintitis chleamhnaithe ranníocaíochtaí EUR 2 511 164 000 ar a laghad leis an gComhghnóthas Eochairtheicneolaíochtaí Digiteacha.
3. I gcomhréir le hAirteagal 28(4), déanfaidh comhaltaí príobháideacha ranníocaíocht airgeadais nó socróidh siad go ndéanfaidh a gcomheintiteas nó a n-eintiteas cleamhnaithe ranníocaíocht airgeadais suas le EUR 26 331 000 le costais riaracháin leis an gComhghnóthas Eochairtheicneolaíochtaí Digiteacha.
4. Cuimseofar sna ranníocaíochtaí dá dtagraítear i mír 1 na ranníocaíochtaí a leagtar síos in Airteagal 11(3). Cuimseofar sna ranníocaíochtaí dá dtagraítear i mír 2 den Airteagal seo na ranníocaíochtaí a leagtar síos in Airteagal 11(1), lena n-áirítear 90 % ar a laghad de ranníocaíochtaí a leagtar síos in Airteagal 11(1), pointe (a).

Airteagal 130

Raon feidhme gníomhaíochtaí breise

1. Féadfaidh Bord Rialaithe an Chomhghnóthais Eochairtheicneolaíochtaí Digiteacha plean na ngníomhaíochtaí breise dá dtagraítear in Airteagal 11(1), pointe (b) a fhormheas i gcás inar gá tar éis togra ó Bhord na gComhaltaí Príobháideacha, ag cur tuairim Bhord na nÚdarás Poiblí san áireamh.
2. Chun críoch Airteagal 11(1), pointe (b), féadfaidh sé go n-áireofar na rudaí seo a leanas le gníomhaíochtaí breise:
 - (a) infheistíocht a bhfuil sé d'aidhm aici torthaí thionscadail an Chomhghnóthais Eochairtheicneolaíochtaí Digiteacha agus Chomhghnóthais ECSEL, ARTEMIS agus ENIAC a thionsclú;
 - (b) cláir phíolótacha, taispeántóirí, feidhmchláir, imscarthaí, tionsclú, lena n-áirítear caiteachas caipitil ábhartha, lena n-áirítear tionscadail faoi na IPCEInna ar mhicrileictreonaic;
 - (c) gníomhaíochtaí taighde agus forbartha gaolmhara nach gcistítear go poiblí;
 - (d) gníomhaíochtaí a mhaoinítear ag iasachtaí de chuid an Bhainc Eorpaigh Infheistíochta agus nach gcistítear faoi dheontas ón Aontas;
 - (e) gníomhaíochtaí chun an t-éiceachóras a thacaíonn le comhar úsáideoirí agus soláthróirí teicneolaíochta a fhorbairt.

Airteagal 131

Comhlachtaí an Chomhghnóthais Eochairtheicneolaíochtaí Digiteacha

Is iad comhlachtaí an Chomhghnóthais Eochairtheicneolaíochtaí Digiteacha:

- (a) an Bord Rialaithe;
- (b) an Stiúrthóir Feidhmiúcháin;
- (c) Bord na nÚdarás Poiblí;
- (d) Bord na gComhaltaí Príobháideacha.

Airteagal 132

Comhdhéanamh an Bhoird Rialaithe

Ceapfaidh gach comhalta den Chomhghnóthas Eochairtheicneolaíochtaí Digiteacha a n-ionadaithe agus a bpríomhthoscairí ag a mbeidh cearta vótála chomhalta an Bhoird Rialaithe.

Airteagal 133

Feidhmiú an Bhoird Rialaithe

1. Déanfar cearta vótála ar an mBord Rialaithe a leithdháileadh mar a leanas:
 - (a) aon trian don Choimisiún;

- (b) aon trian do na comhaltaí príobháideacha i dteannta a chéile; agus
 - (c) aon trian do na stáit rannpháirteacha i dteannta a chéile.
2. Sa chéad 2 bhliain airgeadais tar éis bhunú an Chomhghnóthais Eochairtheicneolaíochtaí Digiteacha, déanfar cearta vótála na stát rannpháirteach a leithdháileadh mar seo a leanas:
- (a) 1 % le haghaidh gach stáit rannpháirtigh;
 - (b) déanfar an céatadán atá fágtha a leithdháileadh go bliantúil i measc na stát rannpháirteach i gcomhréir lena ranníocaíochtaí airgeadais iarbhrís leis an gComhghnóthas Eochairtheicneolaíochtaí Digiteacha nó a thionscnamh roimhe sin sa 2 bhliain roimhe sin.
3. Maidir leis na blianta airgeadais ina dhiaidh sin, bunófar leithdháileadh cearta vótála na stát rannpháirteach go bliantúil agus i gcomhréir leis na cistí a gheall siad le gníomhaíochtaí indíreacha sa 2 bhliain airgeadais roimhe sin.
4. Déanfar cearta vótála na gcomhaltaí príobháideacha a leithdháileadh go cothrom i measc na gcumann tionsclaíoch mura gcinneann Bord na gComhaltaí Príobháideacha a mhálairt.
5. Cinnfidh an Bord Rialaithe na cearta vótála a bheidh ag comhalta nua den Chomhghnóthas Eochairtheicneolaíochtaí Digiteacha nach Ballstát ná tír chomhlachaithe é sula nglacann an comhalta sin ballraíocht sa Chomhghnóthas Eochairtheicneolaíochtaí Digiteacha.

Airteagal 134

Teorannú ar rannpháirtíocht i ngníomhaíochtaí sonracha

De mhaolú ar Airteagal 17(2), pointe (l), i gcás ina n-iarrfaidh an Coimisiún amhlaidh, tar éis formheas ó Bhord na nÚdarás Poiblí, beidh an rannpháirtíocht i ngníomhaíochtaí sonracha teoranta i gcomhréir le hAirteagal 22(5) den Rialachán maidir le Fís Eorpach.

Airteagal 135

Comhdhéanamh Bhord na nÚdarás Poiblí

Is iad a bheidh ar Bhord na nÚdarás Poiblí ionadaithe ó údaráis phoiblí an Chomhghnóthais Eochairtheicneolaíochtaí Digiteacha.

Ceapfaidh gach údarás poiblí a n-ionadaithe agus a bpríomhthoscáir ag a mbeidh na cearta vótála ar Bhord na nÚdarás Poiblí.

Airteagal 136

Feidhmiú Bhord na nÚdarás Poiblí

1. Sannfar na cearta vótála ar Bhord na nÚdarás Poiblí do na húdaráis phoiblí ar bhonn bliantúil i gcomhréir lena ranníocaíochtaí airgeadais le gníomhaíochtaí an Chomhghnóthais Eochairtheicneolaíochtaí Digiteacha don bhliain sin i gcomhréir le hAirteagal 12, agus le huasteorainn 50 % de na cearta vótála iomlána ar Bhord na nÚdarás Poiblí le haghaidh aon chomhalta ar leith.
2. Chun críoch Airteagal 134, ní áireofar ar Bhord na nÚdarás Poiblí ach údaráis phoiblí ar Ballstáit iad. Beidh feidhm *mutatis mutandis* ag mír 1.
3. Má chuireann níos lú ná trí stát rannpháirteacha a ranníocaíocht airgeadais de réir Airteagal 12(3) in iúl don Stiúrthóir Feidhmiúcháin, beidh 50 % de na cearta vótála ag an gCoimisiún agus déanfar an 50 % atá fágtha a leithdháileadh go cothrom i measc na stát rannpháirteach go dtí go gcuirfidh níos mó ná trí stát rannpháirteacha de chuid an Chomhghnóthais Eochairtheicneolaíochtaí Digiteacha a ranníocaíocht in iúl.

4. Déanfaidh na húdaráis phoiblí a ndícheall cinntí a ghlacadh de chomhthoil. Má chliseann orthu teacht ar chomhréiteach, déanfar vótáil. Glacfar cinneadh le tromlach 75 % ar a laghad de na vótaí, lena n-áirítear vótaí na stát rannpháirteach atá as láthair, ach gan staonadh a áireamh.
5. Toghfaidh Bord na nÚdarás Poiblí a chathaoirleach as a chomhaltaí ar feadh tréimhse 2 bhliain ar a laghad.
6. Féadfaidh an cathaoirleach a iarraidh ar dhaoine eile freastal ar a chruinnithe mar bhreathnóirí, go háirithe ionadaithe ó na húdaráis réigiúnacha laistigh den Aontas, ionadaithe ó chomhlachais FBManna agus ionadaithe ó chomhlachtaí eile den Chomhghnóthas Eochairtheicneolaíochtaí Digiteacha.
7. Reáchtálfaidh Bord na nÚdarás Poiblí a ghnáthchruinnithe dhá uair sa bhliain ar a laghad. Féadfaidh sé cruinnithe urghnácha a reáchtáil arna iarraidh sin ag an gCoimisiún, nó ó thromlach na n-ionadaithe ó na stáit rannpháirteacha, nó ar iarratas an chathaoirleach. Is é an cathaoirleach a ghaifidh cruinnithe Bhord an nÚdarás Poiblí agus reáchtálfar de ghnáth iad ag suíochán an Chomhghnóthais Eochairtheicneolaíochtaí Digiteacha.
8. Comhdhéanfaidh an Coimisiún agus príomhthoscairí trí stát rannpháirteacha ar a laghad córam Bhord na nÚdarás Poiblí.
9. Freastalóidh an Stiúrthóir Feidhmiúcháin ar chruinnithe Bhord na nÚdarás Poiblí, mura gcinneann Bord na nÚdarás Poiblí a mhalairt, ach ní bheidh aon chearta vótála aige.
10. Arna iarraidh sin ag Bord na nÚdarás Poiblí, féadfaidh aon Bhallstát nó tír chomhlachaithe nach comhalta den Chomhghnóthas Eochairtheicneolaíochtaí Digiteacha é nó í a bheith rannpháirteach i gcruinnithe Bhord na nÚdarás Poiblí mar bhreathnóir. Gheobhaidh breathnóirí gach doiciméad ábhartha agus féadfaidh siad comhairle a thabhairt ar aon chinneadh a ghlacann Bord na nÚdarás Poiblí. Beidh gach breathnóir den sórt sin faoi cheangal ag na rialacha rúndachta is infheidhme maidir le comhaltaí Bhord na nÚdarás Poiblí.
11. Féadfaidh Bord na nÚdarás Poiblí meithleacha a cheapadh i gcás inar gá de réir comhordú iomlán údaráis phoiblí amháin nó níos mó.
12. Glacfaidh Bord na nÚdarás Poiblí a rialacha nós imeachta féin.
13. Beidh freisin feidhm *mutatis mutandis* ag Airteagal 11(8) agus Airteagal 28(6) maidir le Bord na nÚdarás Poiblí.

Airteagal 137

Cúraimí Bhord na nÚdarás Poiblí

Déanfaidh Bord na nÚdarás Poiblí an méid seo a leanas:

- (a) rannchuidiú leis an gClár Oibre Straitéiseach um Thaighde agus um Nuálaíocht a dhreachtú;
- (b) ionchur a sholáthar leis an dreachtchlár oibre, go háirithe na glaonna ar thograí, lena n-áirítear na rialacha maidir le gníomhaíochtaí indíreacha a mheas agus a roghnú agus faireachán a dhéanamh orthu;
- (c) seoladh glaonna ar thograí a fhormheas, i gcomhréir leis an gclár oibre;
- (d) tograí a roghnú i gcomhréir le hAirteagal 12(1) agus Airteagal 17(2), pointe (s);
- (e) tuairim a sholáthar ar an dreachtphlean gníomhaíochta breise dá dtagraítear in Airteagal 11(1), pointe (b).

Airteagal 138

Comhdhéanamh Bhord na gComhaltaí Príobháideacha

1. Is iad a bheidh ar Bhord na gComhaltaí Príobháideacha ionadaithe ó chomhaltaí príobháideacha an Chomhghnóthais Eochairtheicneolaíochtaí Digiteacha.
2. Ceapfaidh gach comhalta príobháideach a ionadaithe agus príomhthoscaire ag a mbeidh na cearta vótála ar Bhord na gComhaltaí Príobháideacha.

*Airteagal 139***Feidhmiú Bhord na gComhaltaí Príobháideacha**

1. Tiocfaidh Bord na gComhaltaí Príobháideacha le chéile dhá uair sa bhliain ar a laghad.
2. Féadfaidh Bord na gComhaltaí Príobháideacha meithleacha a cheapadh i gcás inar gá faoi chomhordú foriomlán ceann amháin nó níos mó dá chomhaltaí.
3. Toghfaidh Bord na gComhaltaí Príobháideacha a chathaoirleach as a chomhaltaí.
4. Glacfaidh Bord na gComhaltaí Príobháideacha a rialacha nós imeachta.

*Airteagal 140***Cúraimí Bhord na gComhaltaí Príobháideacha**

Déanfaidh Bord na gComhaltaí Príobháideacha an méid seo a leanas:

- (a) an dréacht-Chlár Oibre Straitéiseach um Thaighde agus um Nuálaíocht a tharraingt suas agus a thabhairt cothrom le dáta go tráthrialta chun cuspóirí an Chomhghnóthais Eochairtheicneolaíochtaí Digiteacha a leagtar amach in Airteagal 4 agus Airteagal 126 a bhaint amach, agus ionchur Bhord na nÚdarás Poiblí á chur san áireamh;
- (b) an dréacht-Chlár Oibre Straitéiseach um Thaighde agus um Nuálaíocht a chur faoi bhráid an Stiúrthóra Feidhmiúcháin laistigh de na sprioc-amanna a leagfaidh an Bord Rialaithe amach;
- (c) Fóram comhairleach Geallsealbhóirí a eagrú atá oscailte do gach geallsealbhóir poiblí agus príobháideach a bhfuil leas acu i réimsí na bpríomhtheicneolaíochtaí digiteacha chun iad a chur ar an eolas maidir leis an dréacht-Chlár Oibre Straitéiseach um Thaighde agus um Nuálaíocht do bhliain ar leith, agus aiseolas a bhailiú air;
- (d) i gcás inarb iomchuí, agus Airteagal 130 á chur san áireamh, an dréachtphlean gníomhaíochtaí breise dá dtagraítear in Airteagal 11(1), pointe (b), a tharraingt suas agus a chur faoi bhráid an Bhoird Rialála, agus tuairim Bhord na nÚdarás Poiblí á cur san áireamh.

*Airteagal 141***Rátaí cistiúcháin**

I gcomhréir le hAirteagal 17(2) den Rialachán maidir le Fís Eorpach agus de mhaolú ar Airteagal 34 den Rialachán sin, féadfaidh an Comhghnóthas Eochairtheicneolaíochtaí Digiteacha rátaí difriúla cistiúcháin a chur i bhfeidhm don chistiú ón Aontas laistigh de ghníomhaíocht ag brath ar an gcineál rannpháirtí, go háirithe FBManna agus eintitis dhlítheanacha neamhbhrabúsacha agus an cineál gníomhaíochta. Sonrófar na rátaí cistiúcháin sa chlár oibre.

TEIDEAL VIII

COMHGHNÓTHAS TAIGHDE BAT 3 AN AERSPÁIS EORPAIGH AONAIR*Airteagal 142***Cuspóirí breise Chomhghnóthas Taighde BAT 3 an Aerspáis Eorpaigh Aonair**

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag Comhghnóthas Taighde BAT 3 an Aerspáis Eorpaigh Aonair:
 - (a) acmhainneacht taighde agus nuálaíochta an Aontais sa réimse BAT a neartú agus a chomhtháthú, chun go mbeidh sí níos athléimní agus intomhaiste i leith luaineachtaí sa trácht agus oibriú comhleanúnach gach aerárthaigh á chumasú;
 - (b) iomaíochas aeriompair le foireann agus iompair aeir gan foireann san Aontas, agus margaí seirbhísí BAT, a neartú, tríd an nuálaíocht, chun tacú le fás eacnamaíoch san Aontas;
 - (c) glacadh sa mhargadh le réitigh nuálacha a fhorbairt agus dlús a chur leis chun an t-aerspás san Aerspás Eorpach Aonair a bhunú mar an t-aerspás is éifeachtúla agus is neamhdhíobhálaí don chomhshaol don eitilt ar domhan.

2. Beidh na cuspóirí sonracha seo a leanas ag Comhghnóthas Taighde BAT 3 an Aerspáis Eorpaigh Aonair freisin:
 - (a) éiceachóras taighde agus nuálaíochta a fhorbairt a chumhdaíonn na slabhraí luacha iomlán aerspáis BAT agus U-spás lenar féidir an Spás Digiteach Eorpach a shainmhíniú sa Mháistirphlean Eorpach BAT a thógáil, lena gcumasaítear an comhar agus an comhordú a theastaíonn idir soláthraithe seirbhísí aerloingseoireachta agus úsáideoirí aerspáis chun córas aonair comhchuibhithe BAT san Aontas a áirithiú d'oibríochtaí le foireann agus gan foireann;
 - (b) réitigh BAT a thacaíonn le hardleibhéil uathoibrithe a fhorbairt agus a bhailíochtú;
 - (c) ailtireacht theicniúil an Spáis Dhigitigh Eorpaigh a fhorbairt agus a bhailíochtú;
 - (d) tacú le himscaradh brostaithe réitigh nuálacha sa mhargadh trí léiritheoirí;
 - (e) beartú tosaíochta agus pleanáil i leith iarrachtaí nuachóirithe BAT an Aontais a chomhordú, de réir próiseas faoi stiúir comhthola i measc geallsealbhóirí BAT;
 - (f) forbairt caighdeán le haghaidh tionsclú réiteach SESAR a éascú.
3. Chun críoch Chomhghnóthas Taighde BAT 3 an Aerspáis Eorpaigh Aonair, tá feidhm ag na sainmhínithe seo a leanas:
 - (a) ciallaíonn “aerspás U-spáis” crios geografach córas ar eite gan foireann (UAS) arna ainmniú ag na Ballstáit, áit nach gceadaítear oibríochtaí UAS ach amháin le tacaíocht seirbhísí U-spáis arna soláthar ag soláthraithe seirbhísí U-spáis;
 - (b) tagraíonn “Aerspás Digiteach Eorpach” don Mháistirphlean Eorpach BAT mar fhís, a fhéachann le bonneagar eitlíochta na hEorpa a chlaochlú chun a chur ar a chumas déileáil leis an bhfás agus an éagsúlacht aerthráchta amach anseo go sábháilte agus go héifeachtúil, agus an tionchar comhshaoil á laghdú ag an am céanna;
 - (c) tagraíonn “ailtireacht an Aerspáis Dhigitigh Eorpaigh” don fhís den Mháistirphlean Eorpach BAT, a fhéachann le haghaidh a thabhairt ar an ailtireacht neamhéifeachtúil aerspáis atá ann faoi láthair sa mheántearma agus san fhadtearma trí chumraíocht agus dearadh aerspáis a chur le chéile le teicneolaíochtaí chun an nasc idir soláthar seirbhísí agus bonneagar áitiúil a bhriseadh agus an leibhéal comhair agus tacaíocht uathoibrithe a mhéadú de réir a chéile;
 - (d) ciallaíonn “céim shainithe SESAR” an chéim lena mbunaítear agus lena nuashonraítear fis fhadtéarmach thionscadal SESAR, an coincheap gaolmhar oibríochtaí lena gcumasaítear feabhsuithe ag gach céim den eitilt, na hathruithe riachtanacha oibríochtúla is gá laistigh den ATM agus na tosaíochtaí forbartha agus imscartha is gá;
 - (e) ciallaíonn “céim imscartha SESAR” na céimeanna comhleanúnacha den tionsclaíocht agus den chur chun feidhme, a ndéantar na gníomhaíochtaí seo a leanas lena linn: caighdeánú, táirgeadh agus deimhniú an trealamh talún, an trealamh a bhíonn ar bord agus na bpróiseas is gá chun réitigh SESAR (tionsclú) a chur chun feidhme; agus trealamh agus córais atá bunaithe ar réitigh SESAR a sholáthar, a shuiteáil, agus a chur i seirbhís, lena n-áirítear nósanna imeachta oibríochtúla gaolmhara (cur chun feidhme).

Airteagal 143

Cúraimí breise Chomhghnóthas Taighde BAT 3 an Aerspáis Eorpaigh Aonair

Anuas ar na cúraimí a leagtar amach in Airteagal 5, déanfaidh Comhghnóthas Taighde BAT 3 an Aerspáis Eorpaigh Aonair na rudaí seo a leanas:

- (a) cúraimí chéim shainithe Thaighde BAT an Aerspáis Eorpaigh Aonair a chomhordú, faireachán a dhéanamh ar chur chun feidhme thionscadal SESAR agus, i gcás inar gá, an Máistirphlean Eorpach BAT a leasú;
- (b) na gnéithe taighde agus forbartha den Mháistirphlean Eorpach BAT a chur chun feidhme, go háirithe tríd an méid seo a leanas:
 - (i) obair chéim forbartha SESAR a eagrú agus a chomhordú, agus faireachán a dhéanamh uirthi, i gcomhréir leis an Máistirphlean Eorpach BAT, lena n-áirítear gníomhaíochtaí taighde agus nuálaíochta ar LUTanna ísle (0 go 2);
 - (ii) réitigh SESAR a sholáthar, ar aschur inchurtha i bhfeidhm iad de chéim forbartha SESAR lena dtugtar isteach nósanna imeachta oibríochtúla idir-inoibritheacha caighdeánaithe nó teicneolaíochtaí nua nó feabhsaithe;

- (iii) rannpháirtíocht gheallsealbhoirí sibhialta agus míleata earnáil na heitlíochta a áirithiú, go háirithe soláthraithe seirbhísí aerloingseoireachta, úsáideoirí aerspáis, comhlachais foirne gairmiúla, aerfoirt, an tionscal monaraíochta agus na hinstiúidí ábhartha eolaíochta agus an pobal eolaíochta;
- (c) úsáid bhrostithe a bhaint as réitigh SESAR sa mhargadh a éascú trí na rudaí seo a leanas a dhéanamh:
 - (i) gníomhaíochtaí mórsála taiséalbhaidh a eagrú agus a chomhordú;
 - (ii) dul i ndlúthchomhar le EASA chun go bhféadfaidh EASA bearta rialála a thagann faoi Rialachán (AE) 2018/1139 agus na rialacha ábhartha cur chun feidhme a fhorbairt go tráthúil;
 - (iii) tacú leis na gníomhaíochtaí gaolmhara caighdeánúcháin, i ndlúthchomhar le comhlachtaí um chaighdeánú agus le EASA, chomh maith leis an eintiteas a bhunaítear chun cúraimí na céime imscartha SESAR a chomhordú i gcomhréir le Rialachán Cur Chun Feidhme (AE) Uimh. 409/2013 ón gCoimisiún ⁽⁴³⁾.

Airteagal 144

Comhaltaí

1. Beidh na comhaltaí seo a leanas ag Comhghnóthas Taighde BAT 3 an Aerspáis Eorpaigh Aonair:
 - (a) an tAontas, a mbeidh an Coimisiún mar ionadaí dó;
 - (b) an Eagraíocht Eorpach um Shábháilteacht na hAerloingseoireachta (Eurocontrol), arna hionadú ag a Gníomhaireacht, ar fhógra a thabhairt maidir lena cinneadh aontú do Chomhghnóthas Taighde BAT 3 an Aerspáis Eorpaigh Aonair trí bhíthin litir ghealltanais, nach mbeidh coinníollacha inti maidir lena haontachas seachas na coinníollacha sin a leagtar amach sa Rialachán seo;
 - (c) na comhaltaí bunaidh a liostaítear in Iarscríbhinn III a ghabhann leis an Rialachán seo, ar fhógra a thabhairt maidir lena gcinneadh aontú do Chomhghnóthas Taighde ATM 3 an Aerspáis Eorpaigh Aonair trí bhíthin litir ghealltanais, nach mbeidh coinníollacha inti maidir lena n-aontachas seachas na coinníollacha sin a leagtar amach sa Rialachán seo;
 - (d) na comhaltaí comhlachaithe atá le roghnú i gcomhréir le hAirteagal 7.
2. I dteannta Airteagal 7(1), féadfaidh an Bord Rialaithe, le linn na chéad 6 mhí i ndiaidh bhunú Chomhghnóthas Taighde BAT 3 an Aerspáis Eorpaigh Aonair, comhaltaí comhlachaithe a roghnú ó liosta arna tharraingt suas i ndiaidh glao oscailte ar léiriú spéise a sheol an Coimisiún sular bunaíodh é. Beidh feidhm ag coinníollacha Airteagal 7(2) *mutatis mutandis*.
3. Agus comhaltaí comhlachaithe á roghnú, féachfaidh an Bord Rialaithe leis an ionadaíocht chuí ar an slabhra luacha iomlán BAT a áirithiú agus, i gcás inar gá, roghnófar gníomhaithe ábhartha ó lasmuigh den earnáil. Féadfar aon eintiteas nó comhlacht poiblí nó príobháideach, lena n-áirítear iad siúd ó thríú tíortha a bhfuil comhaontú amháin ar a laghad tugtha i gcrích acu leis an Aontas i réimse an aeriompair, a roghnú mar chomhaltaí comhlachaithe le Comhghnóthas Taighde BAT 3 an Aerspáis Eorpaigh Aonair.

Airteagal 145

Ranníocaíocht airgeadais ón Aontas

Suas le EUR 600 000 000, lena n-áirítear suas le EUR 30 000 000 le haghaidh costais riaracháin, a bheidh i ranníocaíocht airgeadais an Aontais le Comhghnóthas Taighde BAT 3 an Aerspáis Eorpaigh Aonair, leithreasuithe LEE san áireamh, chun costais riaracháin agus costais oibriúcháin a chumhdach.

⁽⁴³⁾ Rialachán Cur Chun Feidhme (AE) Uimh. 409/2013 ón gCoimisiún an 3 Bealtaine 2013 maidir le comhthionscadail a shainiú, rialachas a bhunú agus dreasachtaí chun tacú le cur chun feidhme an Mháistirphlean Eorpach um Bainistíocht Aerthráchta a shainiú (IO L 123, 4.5.2013, lch. 1).

*Airteagal 146***Ranníocaíochtaí ó chomhaltaí seachas an tAontas**

1. Déanfaidh comhaltaí príobháideacha Chomhghnóthas Taighde BAT 3 an Aerspáis Eorpaigh Aonair ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 500 000 000 ar a laghad, lena n-áirítear suas le EUR 25 000 000 le haghaidh costais riaracháin, sa tréimhse a leagtar amach in Airteagal 3.
2. Déanfaidh Eurocontrol ranníocaíocht iomlán suas le EUR 500 000 000, lena n-áirítear suas le EUR 25 000 000 i leith costais riaracháin, sa tréimhse a leagtar amach in Airteagal 3. De bhreis ar Airteagal 11(4), is é a bheidh sa ranníocaíocht freisin ranníocaíochtaí comhchineáil le haghaidh gníomhaíochtaí breise.

*Airteagal 147***Raon feidhme gníomhaíochtaí breise**

Chun críocha Airteagal 11(1), pointe (b), féadfaidh sé go n-áireofar na rudaí seo a leanas le gníomhaíochtaí breise:

- (a) gníomhaíochtaí lena gcumhdaítear iomlán na coda de thionscadail Thaighde an Aerspáis Eorpaigh Aonair nach gcistíonn an tAontas a rannchuidíonn le clár oibre comhaontaithe an Chomhghnóthais a bhaint amach;
- (b) gníomhaíochtaí tionsclaithe, lena n-áirítear caighdeánú, deimhniú agus táirgeadh, a bhaineann le Réitigh SESAR ó Chomhghnóthas Taighde BAT 3 an Aerspáis Eorpaigh Aonair nó an tionscnaimh roimhe sin, Comhghnóthas SESAR;
- (c) gníomhaíochtaí cumarsáide agus for-rochtana a bhaineann le Réitigh SESAR ó Chomhghnóthas Taighde BAT 3 an Aerspáis Eorpaigh Aonair nó ón tionscnamh roimhe sin, Comhghnóthas SESAR;
- (d) gníomhaíochtaí a áirithíonn comhchuibhiú domhanda BAT bunaithe ar Réitigh SESAR ó Chomhghnóthas Taighde BAT 3 an Aerspáis Eorpaigh Aonair nó ón tionscnamh roimhe sin, Comhghnóthas SESAR;
- (e) imscaradh nó glacadh torthaí ó thionscadail faoi Chomhghnóthas Taighde BAT 3 an Aerspáis Eorpaigh Aonair nó faoin tionscnamh roimhe sin, Comhghnóthas SESAR, nach bhfuair aon chistiú ón Aontas.

*Airteagal 148***Comhlachtaí Chomhghnóthas Taighde BAT 3 an Aerspáis Eorpaigh Aonair**

Is iad comhlachtaí Chomhghnóthas Taighde BAT 3 an Aerspáis Eorpaigh Aonair:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát;
- (d) an Comhlacht Comhairleach Eolaíochta.

*Airteagal 149***Comhdhéanamh an Bhoird Rialaithe**

Beidh an Bord Rialaithe comhdhéanta mar a leanas:

- (a) beirt ionadaithe de chuid an Choimisiúin, thar ceann an Aontais;
- (b) ionadaí amháin ó gach ceann de na comhaltaí seachas an tAontas.

*Airteagal 150***Feidhmiú an Bhoird Rialaithe**

1. De mhaolú ar Airteagal 16(4), déanfaidh an Coimisiún cathaoirleacht ar an mBord Rialaithe, thar ceann an Aontais.
2. Beidh na breathnóirí buana seo a leanas ag an mBord Rialaithe:
 - (a) ionadaí ón nGníomhaireacht Eorpach um Chosaint;
 - (b) ionadaí ar úsáideoirí sibhialta aerspáis, arna ainmniú ag a n-eagraíocht ionadaíochta ar leibhéal na hEorpa;
 - (c) ionadaí ar sholáthraithe seirbhísí aerloingseoireachta, arna ainmniú ag a n-eagraíocht ionadaíochta ar leibhéal na hEorpa;
 - (d) ionadaí ar mhonaróirí trealamh, arna ainmniú ag a n-eagraíocht ionadaíochta ar leibhéal na hEorpa;
 - (e) ionadaí ar aerfoirt, arna ainmniú ag a n-eagraíocht ionadaíochta ar leibhéal na hEorpa;
 - (f) ionadaí ó na comhlachtaí a dhéanann ionadaíocht ar fhoirne san BAT, arna ainmniú ag a n-eagraíocht ionadaíochta ar leibhéal na hEorpa;
 - (g) ionadaí ar na hinstiitúidí ábhartha eolaíochta nó ar an bpobal ábhartha eolaíochta, arna ainmniú ag a n-eagraíocht ionadaíochta ar leibhéal na hEorpa;
 - (h) ionadaí ó Gníomhaireacht Sábháilteachta Eitlíochta an Aontais Eorpaigh;
 - (i) ionadaí ón eagraíocht EASA;
 - (j) ionadaí ar thionscal na n-aerfheithiclí gan foireann, arna ainmniú ag a n-eagraíocht ionadaíochta ar leibhéal na hEorpa.
3. Beidh líon na vótaí ag comhaltaí de Chomhghnóthas Taighde BAT 3 an Aerspáis Eorpaigh Aonair i gcomhréir lena ranníocaíocht le buiséad an chomhghnóthais. Beidh 25 % ar a laghad de líon iomlán na vótaí ag an Aontas agus ag Eurocontrol araon, áfach, agus beidh 10 % ar a laghad de líon iomlán na vótaí ag an ionadaí ar na húsáideoirí sibhialta aerspáis dá dtagraítear i mír 2, pointe (b).
4. Déanfar cinntí an Bhoird Rialaithe a ghlacadh trí thromlach simplí na vótaí a chaitear. I gcás ina mbeidh na vótaí roinnte go cothrom, ag an Aontas a bheidh an vóta réitigh.
5. Éileoidh cinntí a bhaineann le hathbhreithniú a dhéanamh ar an Máistirphlean Eorpach BAT vótaí dearfacha ón Aontas agus Eurocontrol. Sna cinntí sin cuirfear san áireamh na tuairimí arna gcur in iúl ag gach breathnóir buan dá dtagraítear i mír 2 agus ag grúpa ionadaithe na stát.

*Airteagal 151***Cúraimí breise an Bhoird Rialaithe**

Anuas ar na cúraimí a liostaítear in Airteagal 17, déanfaidh Bord Rialaithe Chomhghnóthas Taighde BAT 3 an Aerspáis Eorpaigh Aonair maoirsiú ar sholáthar na ngnéithe taighde agus forbartha a shainaithnítear sa Mháistirphlean Eorpach BAT.

*Airteagal 152***Cúraimí breise an Stiúirthóra Feidhmiúcháin**

Anuas ar na cúraimí a liostaítear in Airteagal 19, déanfaidh Stiúirthóir Feidhmiúcháin Chomhghnóthas Taighde BAT 3 an Aerspáis Eorpaigh Aonair na cúraimí seo a leanas:

- (a) forghníomhú na gcéimeanna sainithe agus forbartha de thionscadal SESAR a stiúradh laistigh de na treoirlínte arna mbunú ag an mBord Rialaithe;
- (b) aon togra a chur faoi bhráid an Bhoird Rialaithe lena mbaineann athruithe ar dheardh chéim forbartha thionscadal SESAR.

*Airteagal 153***Grúpa ionadaithe na stát**

I dteannta Airteagal 20, áiritheoidh na Ballstáit go gcuireann a n-ionadaithe seasamh comhordaithe i láthair lena léirítear tuairimí na mBallstát mar a nochtar iad sna coistí seo a leanas:

- (a) an Coiste um Aerspás Aonair, a bunaíodh le hAirteagal 5 de Rialachán (CE) Uimh. 549/2004;
- (b) an Coiste Cláir faoi Airteagal 14 den Chlár Sonrach lena gcuirtear chun feidhme Fís Eorpach.

*Airteagal 154***An Coiste Eolaíoch**

- 1. Comhlacht comhairleach eolaíochta Chomhghnóthas Taighde BAT 3 an Aerspáis Eorpaigh Aonair dá dtagraítear in Airteagal 21(1), pointe (a), a bheidh sa Choiste Eolaíoch.
- 2. Ní bheidh níos mó ná 15 chomhalta bhuana ar an gCoiste Eolaíoch.
- 3. Toghfar cathaoirleach an Choiste Eolaíoch ar feadh tréimhse 2 bhliain.
- 4. Féadfaidh an Coiste Eolaíoch comhairle a thabhairt arna iarraidh sin ag an mBord Rialaithe agus comhlachtaí eile de chuid Chomhghnóthas Taighde BAT 3 an Aerspáis Eorpaigh Aonair, nó ar a thionscnamh féin, go háirithe ar ghníomhaíochtaí a bhaineann LUTanna ísle (0 go 2).
- 5. Rachaidh an Coiste Eolaíoch i gcomhar leis na comhlachtaí ábhartha comhairleacha arna mbunú le Fís Eorpach.

*Airteagal 155***Gníomhartha cur chun feidhme chun seasamh an Aontais maidir le leasú a dhéanamh ar an Máistirphlean Eorpach BAT a bhunú**

- 1. Glacfaidh an Coimisiún gníomhartha cur chun feidhme d'fhonn seasamh an Aontais a bhaineann le leasú a dhéanamh ar an Máistirphlean Eorpach BAT a bhunú. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 5 de Rialachán (AE) Uimh. 182/2011 ó Pharlaimint na hEorpa agus ón gComhairle ⁽⁴⁴⁾.
- 2. Déanfaidh an Coiste um Aerspás Aonair, arna bhunú le Rialachán (CE) Uimh. 549/2004, cúnamh a thabhairt don Choimisiún. Beidh an Coiste um Aerspás Aonair ina choiste de réir bhrí Rialachán (AE) Uimh. 182/2011

*Airteagal 156***Teicneolaíochtaí nua a dheimhniú**

- 1. Féadfaidh iarratasóirí, rannpháirtithe nó an Stiúrthóir Feidhmiúcháin a iarraidh ar EASA comhairle a thabhairt ar thionscadail aonair agus gníomhaíochtaí taisealbhaidh ar shaincheistean a bhaineann le comhlíontacht sábháilteachta eitlíochta, idir-inoibritheacht agus caighdeáin chomhshaoil, chun a áirithiú go ndéanfar caighdeáin ábhartha, acmhainneacht tástála agus ceanglais rialála a fhorbairt go tráthúil le haghaidh forbairt táirgí agus imscaradh teicneolaíochtaí nua.
- 2. Beidh gníomhaíochtaí agus seirbhísí deimhniúcháin arna soláthar faoi réir forálacha maidir le táillí agus muirir a leagtar amach i Rialachán (AE) 2018/1139.

⁽⁴⁴⁾ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na príonsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13).

*Airteagal 157***Comhaontú le Eurocontrol**

Mar chomhalta bunaidh de Chomhghnóthas Taighde BAT 3 an Aerspáis Eorpaigh Aonair, leagfar ról agus rannchuidiú Eurocontrol amach i gcomhaontú riaracháin idir an dá chomhpháirtí, Comhghnóthas Taighde BAT 3 an Aerspáis Eorpaigh Aonair agus Eurocontrol. Tabharfar tuairisc sa chomhaontú ar chúraimí, freagrachtaí agus rannchuidiú Eurocontrol le gníomhaíochtaí Chomhghnóthas Taighde BAT 3 an Aerspáis Eorpaigh Aonair a mhéid a bhaineann leis seo a leanas:

- (a) gníomhaíochtaí taighde, forbartha agus bailíochtaithe Eurocontrol a eagrú i gcomhréir le clár oibre Chomhghnóthas Taighde BAT 3 an Aerspáis Eorpaigh Aonair;
- (b) tacaíocht agus comhairle speisialaithe a sholáthar do Chomhghnóthas Taighde BAT 3 an Aerspáis Eorpaigh Aonair arna iarraidh sin dó;
- (c) tacaíocht agus comhairle a thabhairt maidir leis na forbairtí comónta do na córais BAT Eorpacha amach seo, go háirithe maidir le haitireacht aerspáis na todhchaí;
- (d) tacú le faireachán a dhéanamh ar chur chun feidhme Réitigh SESAR i gcomhréir leis an Máistirphlean Eorpach BAT;
- (e) caidreamh a chothú le Ballstáit Eurocontrol chun tacaíocht forleathan a áirithiú do chuspóirí beartais an Aontais agus torthaí gníomhaíochtaí taighde, bailíochtaithe agus taisealbhaidh i measc comhpháirtithe líonra uile-Eorpacha;
- (f) tacaíocht a sholáthar do bhainistíocht an chláir;
- (g) rannchuidiú le costais riaracháin Chomhghnóthas Taighde BAT 3 an Aerspáis Eorpaigh Aonair agus tacaíocht teicneolaíochta faisnéise, chumarsáide agus lóistíochta a sholáthar do Chomhghnóthas Taighde BAT 3 an Aerspáis Eorpaigh Aonair agus Eurocontrol).

*Airteagal 158***Socruithe cúloifige**

Ní bheidh feidhm ag Airteagal 13 maidir le Comhghnóthas Taighde BAT 3 an Aerspáis Eorpaigh Aonair. Is é Eurocontrol a sholáthróidh an socrú cúloifige.

TEIDEAL IX

AN COMHGHNÓTHAS UM LÍONRAÍ AGUS SEIRBHÍSÍ CLISTE*Airteagal 159***Cuspóirí breise an Chomhghnóthais um Líonraí agus Seirbhísí Cliste**

1. Anuas ar na cuspóirí a leagtar amach in Airteagal 4 agus Airteagal 5, beidh na cuspóirí ginearálta seo a leanas ag an gComhghnóthas um Líonraí agus Seirbhísí Cliste:
 - (a) ceannaireacht teicneolaíochta na hEorpa maidir le líonraí agus seirbhísí cliste amach anseo a chothú trí láidreachtaí tionscail atá ann faoi láthair a neartú agus trí shíneadh a chur leis an raon feidhme ó nascacht 5G go dtí an slabhra luacha straitéiseach níos leithne, lena n-áirítear soláthar seirbhíse néalbhunaithe agus comhpháirteanna agus gairis;
 - (b) treochláir straitéiseacha a ailíniú le réimse níos leithne gníomhaithe tionscail, lena n-áirítear ní hamháin an tionscal teileachumarsáide, ach gníomhaithe ó réimsí Idirlíon na Rudaí Nithiúla agus an néil, chomh maith le comhpháirteanna agus gairis freisin;
 - (c) sármhaitheas teicneolaíochta agus eolaíochta na hEorpa a chur chun cinn chun tacú le ceannaireacht na hEorpa chun córais 6G a mhúnlú agus máistreacht a fháil orthu faoi 2030;
 - (d) imscaradh bonneagar digiteach agus glacadh réiteach digiteach a neartú i margaí na hEorpa, go háirithe trí shásra comhordaithe straitéisigh a áirithiú don chlár SCE2 Digiteach, chomh maith le sineirgí laistigh de SCE2, agus le CED agus InvestEU mar chuid de raon feidhme agus rialachas an Chomhghnóthais um Líonraí agus Seirbhísí Cliste;

- (e) tionscadal soláthair líonraí agus seirbhísí cliste na hEorpa a ullmhú i gcomhair na ndeiseanna fadtéarmacha a thagann chun tosaigh mar thoradh ar fhorbairt margaí ingearacha do bhonneagair agus seirbhísí 5G, agus 6G ina dhiaidh sin, san Eoraip;
- (f) an nuálaíocht dhigiteach a éascú, faoi 2030, agus riachtanais mhargaí na hEorpa agus ceanglais beartais phoiblí á gcomhlíonadh, lena n-áirítear na ceanglais is déine ag margaí ingearacha, chomh maith le ceanglais shochoaíocha i réimsí lena n-áirítear an tslándáil, an éifeachtúlacht fuinnimh agus réimsí leictreamaighnéadacha;
- (g) tacú le líonraí agus seirbhísí cliste amach anseo a ailíniú le cuspóirí beartais an Aontais, lena n-áirítear an Comhaontú Glas don Eoraip, slándáil líonra agus faisnéise, eitic agus príobháideachas, chomh maith le hIdirlíon atá dírithe ar an duine agus inbhuanaithe.

2. Beidh na cuspóirí sonracha seo a leanas ag an gComhghnóthas um Líonraí agus Seirbhísí Cliste freisin:

- (a) forbairt teicneolaíochtaí atá in ann freastal ar ardriachtanais chumarsáide a éascú agus tacú le sármhaitheas na hEorpa maidir le teicneolaíochtaí agus ailtireachtaí líonraí agus seirbhísí cliste agus an éabhlóid a thiocfaidh orthu i dtreo 6G ag an am céanna, lena n-áirítear seasaimh láidre Eorpacha ar chaighdeán, ar phaitinní fíor-riachtanacha agus ar phríomhcheanglais, amhail ceanglais le haghaidh bandaí speictrim a bheidh de dhíth le haghaidh ardteicneolaíochtaí líonra chliste amach anseo;
- (b) dlús a chur le forbairt teicneolaíochtaí líonra atá tíosach ar fhuinneamh agus é mar aidhm ídiú fuinnimh agus acmhainní an bhonneagair fhoriomláin dhigitigh a laghdú go suntasach faoi 2030 agus ídiú fuinnimh príomhthionscal ingearach a laghdú le tacaíocht teicneolaíochta líonraí agus seirbhísí cliste;
- (c) dlús a chur le forbairt agus imscaradh forleathan 5G san Eoraip faoi 2025, agus bonneagar 6G ina dhiaidh sin, go háirithe, trí chomhordú ar imscaradh 5G agus tacaíocht straitéiseach don imscaradh sin a chur chun cinn le haghaidh Soghluaisteacht Nasctha agus Uathoibrithe feadh conairí trasteorann, trí chlár SCE2 Digiteach a úsáid agus imscaradh a chur chun cinn faoi SCE2, CED agus InvestEU;
- (d) slabhra inbhuanaithe éagsúil soláthair agus luacha a chothú i gcomhréir leis an mbosca uirlisí Cibearshlándála 5G;
- (e) seasamh thionscal an Aontais i slabhra luacha líonra agus seirbhísí cliste an domhain a neartú trí mhais chriticiúil gníomhaithe poiblí agus príobháideacha a chruthú, go háirithe trí rannchuidiú gníomhaithe bogearraí agus Idirlíon na Rudaí Nithiúla a mhéadú, tionscnaimh náisiúnta a ghíaráil agus tacú le teacht chun cinn gníomhaithe nua;
- (f) tacú le hailíniú le ceanglais eitiiciúla agus slándála, iad a chuimsiú sna Cláir Oibre Straitéiseacha um Thaighde agus um Nuálaíocht agus ionchur a sholáthar do phróiseas reachtach an Aontais de réir mar is iomchuí.

Airteagal 160

Cúraimí breise an Chomhghnóthais um Líonraí agus Seirbhísí Cliste

Anuas ar na cúraimí a leagtar amach in Airteagal 5, déanfaidh an Comhghnóthas um Líonraí agus Seirbhísí Cliste na cúraimí seo a leanas:

- (a) rannchuidiú leis na cláir oibre a ghabhann le cláir eile de chuid an Aontais, amhail clár SCE 2 Digiteach, CED agus InvestEU atá ag cur gníomhaíochtaí chun feidhme i réimse na líonraí cliste agus na seirbhísí cliste;
- (b) trialacha, tionscnaimh phiólótacha agus imscartha an Aontais i réimse na líonraí cliste agus na seirbhísí cliste a chomhordú, amhail conairí 5G uile-Eorpacha le haghaidh soghluaisteacht nasctha agus uathoibrithe faoi chlár SCE2 Digiteach, i gcomhar leis an gCoimisiún agus comhlachtaí ábhartha inniúla cistiúcháin;
- (c) sineirgí a chur chun cinn i measc trialacha, cláir phiólótacha agus gníomhaíochtaí imscartha ábhartha arna gcistiú ag an Aontas i réimse na líonraí cliste agus na seirbhísí cliste, amhail iad siúd a chistítear faoi chlár SCE2 Digiteach, CED agus InvestEU, agus scaipeadh agus gearáil an eolais agus an tsaineolais a bhailítear i gcomhthéacs na ngníomhaíochtaí sin a áirithiú;

- (d) na cláir straitéiseacha um imscaradh maidir le conairí 5G uile-Eorpacha le haghaidh soghluaisteacht nasctha agus uathobrithe a fhorbairt agus a chomhordú le rannpháirtíocht geallsealbhóirí. Leis na cláir oibre sin tabharfar treoir straitéiseach neamhcheangailteach lena gcumhdaítear ré chlár SCE2 Digiteach agus lena sainítear fíis choiteann maidir le forbairt éiceachóras 5G-chumasaithe agus na ceanglais líonra agus seirbhísí atá mar bhonn taca fúthu, agus lena saináithnítear cuspóirí agus treochláir um imscaradh chomh maith le samhlacha féideartha comhair.

Airteagal 161

Comhaltaí

Beidh na comhaltaí seo a leanas ag an gComhghnóthas um Líonraí agus Seirbhísí Cliste:

- (a) an tAontas, a mbeidh an Coimisiún mar ionadaí dó;
- (b) 6G-IA atá cláraithe faoi dhlí na Beilge ar fhógra a fháil faoina chinneadh aontú don Chomhghnóthas um Líonraí agus Seirbhísí Cliste trí bhithin litir ghealltanais, nach mbeidh coinníollacha inti maidir lena aontachas seachas na coinníollacha sin a leagtar amach sa Rialachán seo.

Airteagal 162

Ranníocaíocht airgeadais ón Aontas

Suas le EUR 900 000 000, lena n-áirítear suas le EUR 18 519 000 le haghaidh costais riaracháin, a bheidh i ranníocaíocht airgeadais an Aontais leis an gComhghnóthas um Líonraí agus Seirbhísí Cliste, leithreasuithe LEE san áireamh, chun costais riaracháin agus costais oibriúcháin a chumhdach.

Airteagal 163

Ranníocaíochtaí ó chomhaltaí seachas an tAontas

1. Déanfaidh comhaltaí an Chomhghnóthais um Líonraí agus Seirbhísí Cliste seachas an tAontas ranníocaíocht iomlán nó socróidh siad go ndéanfaidh a gcomheintitis nó a n-eintitis chleamhnaithe ranníocaíocht iomlán EUR 900 000 000 ar a laghad sa tréimhse a leagtar amach in Airteagal 3.
2. Déanfaidh comhaltaí an Chomhghnóthais um Líonraí agus Seirbhísí Cliste seachas an tAontas ranníocaíocht bhliantúil nó socróidh siad go ndéanfaidh a gcomheintitis nó a n-eintitis chleamhnaithe ranníocaíochta bliantúla le haghaidh 20 % ar a laghad de na costais fhoriomlána riaracháin le costas riaracháin an Chomhghnóthais um Líonraí agus Seirbhísí Cliste. Féachfaidh siad le líon a gcomheintiteas nó a n-eintiteas cleamhnaithe a mhéadú chun a ranníocaíocht a mhéadú go 50 % de chostais riaracháin an Chomhghnóthais um Líonraí agus Seirbhísí Cliste le linn a shaolré, agus aird chuif á tabhairt ar chomheintitis agus eintitis chleamhnaithe ar FBManna iad.

Airteagal 164

Raon feidhme gníomhaíochtaí breise

Chun críoch Airteagal 11(1), pointe (b) féadfaidh sé go n-áireofar na rudaí seo a leanas le gníomhaíochtaí breise:

- (a) seachghníomhaíochtaí taighde agus forbartha;
- (b) rannchuidithe le caighdeánú;
- (c) rannchuidithe le comhairliúcháin i gcomhthéacs phróisis rialála an Aontais;
- (d) gníomhaíochtaí a mhaoineítear ag iasachtaí de chuid an Bhainc Eorpaigh Infheistíochta agus nach gcistítear faoi dheontas ón Aontas;
- (e) rannchuidithe le gníomhaíochtaí na gcomhaltaí seachas an tAontas agus aon ghrúpa nó comhlachas eile geallsealbhóirí i réimse an Chomhghnóthais um Líonraí agus Seirbhísí Cliste, nach gcistítear faoi dheontas ón Aontas;
- (f) gníomhaíochtaí chun an t-éiceachóras a fhorbairt, lena n-áirítear comhar a fhorbairt le tionscail ingearacha;

- (g) gníomhaíochtaí scaipthe torthaí ar fud an domhain chun teacht ar chomhréiteach maidir le teicneolaíochtaí a dtacaítear leo mar ullmhúchán le haghaidh caighdeán amach anseo;
- (h) trialacha, taispeántais, cláir phíolótacha, cur ar an margadh agus luath-imscaradh teicneolaíochtaí;
- (i) comhar idirnáisiúnta nach gcistítear faoi dheontas ón Aontas;
- (j) gníomhaíochtaí a bhaineann le hullmhú tionscadail taighde agus nuálaíochta a chistíonn comhlachtaí príobháideacha nó comhlachtaí poiblí seachas an tAontas, nó le bheith rannpháirteach iontu.

Airteagal 165

Comhlachtaí an Chomhghnóthais um Líonraí agus Seirbhísí Cliste

Is iad comhlachtaí an Chomhghnóthais um Líonraí agus Seirbhísí Cliste:

- (a) an Bord Rialaithe;
- (b) an Stiúrthóir Feidhmiúcháin;
- (c) grúpa ionadaithe na stát;
- (d) an grúpa geallsealbhoirí.

Airteagal 166

Comhdhéanamh an Bhoird Rialaithe

1. Beidh na comhaltaí seo a leanas ar an mBord Rialaithe:
 - (a) beirt ionadaithe de chuid an Choimisiúin, thar ceann an Aontais;
 - (b) cúigear ionadaithe 6G-IA.
2. D'ainneoin Airteagal 42, nochtfaidh ionadaithe na gcomhaltaí príobháideacha láithreach don Bhoird Rialaithe a rannpháirtíocht i ngníomhaíochtaí gairmiúla le heintitis nach bhfuil bunaithe san Aontas, nó le heintitis nach bhfuil faoi rialú daoine dlítheanacha nó eintiteas atá bunaithe san Aontas. I gcás den sórt sin, féadfaidh ionadaithe ón Aontas a chinneadh a iarraidh ar an gcomhalta lena mbaineann ionadaí eile a cheapadh.

Airteagal 167

Feidhmiú an Bhoird Rialaithe

Beidh 50 % de na cearta vótála ag 6G-IA.

Airteagal 168

Cúraimí breise an Bhoird Rialaithe

Anuas ar na cúraimí a liostaítear in Airteagal 17, déanfaidh Bord Rialaithe an Chomhghnóthais um Líonraí agus Seirbhísí Cliste na cúraimí seo a leanas:

- (a) cláir oibre straitéiseacha um imscaradh a ghlacadh mar rannchuidithe neamhcheangailteacha faoin gclár CEF2 Digiteach maidir le conairí 5G agus, más iomchuí, iad a leasú ar feadh ré chlár digiteach SCE2;
- (b) a áirithiú go gcuirfear reachtaíocht chibearshlándála an Aontais agus treoir chomhordaithe na mBallstát atá ann cheana agus a bheidh ann amach anseo san áireamh i ngach gníomhaíocht den Chomhghnóthas um Líonraí agus Seirbhísí Cliste;
- (c) sineirgí agus comhlántachtaí a chur chun cinn idir earnálacha digiteacha, iompair agus fuinnimh chlár SCE2 Digiteach trí réimsí idirghabhála a shainithint agus rannchuidiú leis na cláir oibre, chomh maith le sineirgí agus comhlántachtaí le cláir ábhartha eile an Aontais.

*Airteagal 169***Grúpa ionadaithe na stát**

I dteannta Airteagal 20, áiríteoidh na hionadaithe go gcuirfidh siad seasamh comhordaithe i láthair lena léirítear tuairimí a stáit arna gcur in iúl in aon cheann díobh seo a leanas:

- (a) ábhair thaighde agus nuálaíochta a bhaineann le Fís Eorpach;
- (b) an clár oibre straitéiseach um imscaradh agus na gníomhaíochtaí imscartha a bhaineann le clár eile de chuid an Aontais, go háirithe clár SCE2 Digiteach, agus gníomhaíochtaí faoi CEP agus InvestEU freisin atá i raon feidhme an Chomhghnóthais um Líonraí agus Seirbhísí Cliste.

*Airteagal 170***Slándáil**

1. I gcás ina measfaí ábhartha é, féadfaidh an Bord Rialaithe a shainordú go n-áiríteoidh gníomhaíocht arna cistiú ag an gComhghnóthas um Líonraí agus Seirbhísí Cliste go mbeidh eilimintí líonra a úsáidtear le haghaidh tástáil nó píolótú ar mórsála faoi réir measúnuithe grinnsrúdaithe slándála. Léireoidh na measúnuithe reachtaíocht agus beartais chibearshlándála an Aontais, chomh maith le treoir chomhordaithe na mBallstáit atá ann cheana agus a bheidh ann amach anseo.

2. Maidir lena chúram dá dtagraítear i dAirteagal 160, pointe (a), tabharfaidh an Bord Rialaithe an chomhairle gur cheart do chomhlachtaí cistiúcháin eile mír 1 den Airteagal seo agus Airteagal 17(2), pointe (l), a chur i bhfeidhm maidir lena ngníomhaíochtaí *mutatis mutandis*, i gcás ina measann sé gurb iomchuí sin agus i gcás ina bhfuil sé sin údaraithe le bunghníomh an chláir cistiúcháin ábhartha de chuid an Aontais.

CUID A TRÍ

FORÁLACHA CRÍOCHNAITHEACHA*Airteagal 171***Faireachán agus meastóireacht**

1. Beidh gníomhaíochtaí na gcomhghnóthas faoi réir faireachán leanúnach agus athbhreithnithe tréimhsiúla i gcomhréir lena gcuid rialacha airgeadais, chun an tionchar is mó, sármhaitheas san eolaíocht agus an úsáid is éifeachtaí agus is éifeachtúla as acmhainní a áirithiú. Cuirfear torthaí an fhaireacháin agus na n-athbhreithnithe tréimhsiúla leis an bhfaireachán a dhéanfar ar chomhpháirtíochtaí Eorpacha agus ar mheastóireachtaí na gcomhghnóthas mar chuid de mheastóireachtaí ar Fís Eorpach mar a shonraítear in Airteagal 50 agus Airteagal 52 den Rialachán maidir le Fís Eorpach.

2. Eagróidh na comhghnóthais faireachán leanúnach agus tuairisciú ar bhainistiú agus cur chun feidhme a gcuid gníomhaíochtaí agus athbhreithnithe tréimhsiúla a eagrú ar aschuir, torthaí agus tionchair na ngníomhaíochtaí indíreacha cistithe arna gcur chun feidhme i gcomhréir le hAirteagal 50 den Rialachán maidir le Fís Eorpach agus le hIarscríbhinn III a ghabhann leis an Rialachán maidir le Fís Eorpach. Áireofar an méid seo a leanas san fhaireachán agus sa tuairisciú sin:

- (a) táscairí faoi cheangal ama chun tuairisciú ar bhonn bliantúil ar an dul chun cinn ar a gcuid gníomhaíochtaí i dtreo bhaint amach na gcuspóirí ginearálta, sonracha agus oibríochtúla, lena n-áirítear cuspóirí breise comhghnóthas a leagtar síos i gCuid a Dó, chomh maith le conairí tionchair a leagtar amach in Iarscríbhinn V a ghabhann leis an Rialachán maidir le Fís Eorpach;
- (b) faisnéis faoi shineirgí idir gníomhaíochtaí an chomhghnóthais agus tionscnaimh agus beartais náisiúnta nó réigiúnacha bunaithe ar fhaisnéis arna fáil ag na stáit rannpháirteacha nó ag grúpa ionadaithe na stát agus ar shineirgí le clár eile de chuid an Aontais agus le comhpháirtíochtaí Eorpacha eile;
- (c) faisnéis ar an leibhéal príomhshruthaithe eolaíochtaí sóisialta agus daonnachtaí, an cóimheas idir LUTanna ísle agus arda i dtaighde comhoibritheach, an dul chun cinn ar rannpháirtíocht tíortha a leathnú, comhdhéanamh geografach cuibhreachas i dtionscadail comhoibritheacha, úsáid nós imeachta aighneachta agus meastóireachta dhá chéim, na bearta atá dírithe ar naisc comhoibritheacha a éascú i dtaighde agus nuálaíocht na hEorpa, úsáid an athbhreithnithe

ar mheastóireacht agus líon agus cineálacha na ngearán, an leibhéal príomhshruthaithe aeráide agus caiteachas gaolmhar, rannpháirtíocht FBM, rannpháirtíocht na hearnála príobháidí, rannpháirtíocht inscne i ngníomhaíochtaí cistithe, painéil mheastóireachta, boird agus grúpaí comhairleacha, an ráta comhchistiúcháin, an cistiú comhlántach agus carnach ó chistí eile de chuid an Aontais, an méid ama a thógann sé deontas a thabhairt, an leibhéal comhair idirnáisiúnta, rannpháirtíocht saoránach agus rannpháirtíocht na sochaí sibhialta;

- (d) na leibhéil caiteachais dí-chomhiomlánaithe ar leibhéal tionscadail chun go bhféadfar anailís shonrach a dhéanamh, lena n-áirítear in aghaidh an réimse idirghabhála;
- (e) an leibhéal ró-shuibscríofa, go háirithe líon na dtograí agus maidir le gach glao ar thograí, an méanscór, sciar na dtograí os cionn na dtairseach cáilíochta agus faoina mbun;
- (f) faisnéis ar éifeachtaí gearála cáilíochtúla agus cainníochtúla, lena n-áirítear maidir le ranníocaíochtaí airgeadais agus comhchineáil a ghealltar agus a chuirtear ar fáil go hiarbhrí, infheictheacht agus suí sa chomhthéacs idirnáisiúnta, an tionchar ar thaighde agus na rioscaí ó thaobh nuálaíochta de a bhaineann le hinfeistíochtaí na hearnála príobháidí;
- (g) faisnéis maidir le bearta chun rannpháirtithe nua a mhealladh, go háirithe FBManna, institiúidí ardoideachais agus eagraíochtaí taighde, agus chun líonraí comhoibríocha a leathnú.

3. Cuirfear meastóireachtaí ar oibríochtaí na gcomhghnóthas i gcrích go tráthúil chun fónamh do na meastóireachtaí eatramhacha agus deiridh foriomlána in Fís Eorpach agus don phróiseas cinnteoireachta gaolmhar maidir le Fís Eorpach, a chomharba agus tionscnaimh eile atá ábhartha do thaighde agus nuálaíocht, dá dtagraítear in Airteagal 52 den Rialachán maidir le Fís Eorpach.

4. Déanfaidh an Coimisiún meastóireacht eatramhach agus deiridh ar gach Comhghnóthas chun fónamh do mheastóireachtaí Fís Eorpach, mar a shonraítear in Airteagal 52 den Rialachán maidir le Fís Eorpach. Déanfar scrúdú sna meastóireachtaí ar conas a chomhlíonann gach comhghnóthas a mhisean agus a chuspóirí, cumhdófar gach gníomhaíocht den chomhghnóthas agus déanfar meastóireacht ar bhreisluach Eorpach, éifeachtacht, éifeachtúlacht an chomhghnóthais lena mbaineann, lena n-áirítear a oscailteacht agus a thrédhearcacht, ar ábharthacht na ngníomhaíochtaí a shaothraítear agus a gcomhleanúnachas agus a gcomhlántachtaí le beartais ábhartha réigiúnacha, náisiúnta agus de chuid an Aontais, lena n-áirítear sineirgí le codanna eile de Fís Eorpach, amhail misin, braislí nó cláir théamacha nó shonracha. Cuirfear san áireamh sna meastóireachtaí tuairimí na ngeallsealbhoirí, ar leibhéal na hEorpa agus ar an leibhéal náisiúnta araon, agus i gcás inarb ábhartha, cuirfear san áireamh iontu freisin measúnú ar thionchair fhadtéarmacha eolaíocha, shochoaíocha, eacnamaíocha agus teicneolaíochtaí na gcomhghnóthas dá dtagraítear in Airteagal 174(3) go (9). Áireofar leis na meastóireachtaí freisin, i gcás inarb ábhartha, measúnú ar an modh idirghabhála beartais is éifeachtaí le haghaidh aon ghníomh sa todhchaí, chomh maith le hábharthacht agus comhleanúnachas aon athnuachana a fhéadfar a dhéanamh ar gach comhghnóthas faoi seach i bhfianaise na dtosaíochtaí beartais foriomlána agus an tírdhreach tacaíochta taighde agus nuálaíochta, lena n-áirítear a shuíomh i gcomparáid le tionscnaimh eile a dtacaítear leo tríd an gCreachtlár, go háirithe comhpháirtíochtaí nó misin Eorpacha. Tabharfar aird chuí sna meastóireachtaí ar an bplean céimnithe amach arna ghlacadh ag an mBord Rialaithe i gcomhréir le hAirteagal 17(2), pointe (a1), freisin.

5. Ar bhonn chonclúidí na meastóireachta eatramhaí dá dtagraítear i mír 2 den Airteagal seo, féadfaidh an Coimisiún gníomhú i gcomhréir le hAirteagal 11(6) nó féadfaidh sé aon ghníomh eile iomchuí a ghlacadh.

6. Féadfaidh an Coimisiún meastóireachtaí breise a dhéanamh ar théamaí nó ar thopaicí atá ábhartha go straitéiseach, le cúnamh ó shaineolaithe neamhspleacha seachtracha arna roghnú ar bhonn próiseas thrédhearcach, chun scrúdú a dhéanamh ar an dul chun cinn a rinne comhghnóthas i dtreo na gcuspóirí a leagadh síos, agus na tosca a rannchuidíonn le cur chun feidhme na ngníomhaíochtaí a shainaithint agus dea-chleachtais a shainaithint freisin. Ach na meastóireachtaí breise sin a dhéanamh, déanfaidh an Coimisiún a mhachnamh maidir leis an tionchar iomlán ar an gcomhghnóthas.

7. Déanfaidh comhghnóthais athbhreithnithe tréimhsiúla ar a gcuid gníomhaíochtaí mar bhonn dá meastóireachtaí eatramhacha agus deiridh mar chuid de na meastóireachtaí in Fís Eorpach dá dtagraítear in Airteagal 52 den Rialachán maidir le Fís Eorpach.

8. Cuirfear na hathbhreithnithe tréimhsiúla agus na meastóireachtaí san áireamh i bhfoirceannadh nó céimniú amach an chomhghnóthais dá dtagraítear in Airteagal 45 den Rialachán seo, i gcomhréir le hIarscríbhinn III a ghabhann leis an Rialachán maidir le Fís Eorpach. Laistigh de 6 mhí ó fhoirceannadh comhghnóthais, ach tráth nach déanaí ná 4 bliana tar éis an nós imeachta foirceanta dá dtagraítear in Airteagal 45 den Rialachán seo a thruicearú, cuirfidh an Coimisiún meastóireacht deiridh i gcrích maidir leis an gcomhghnóthas sin i gcomhréir leis an meastóireacht deiridh in Fís Eorpach.

9. Déanfaidh an Coimisiún torthaí na meastóireachtaí ar na comhghnóthais, ina n-áireofar conclúidí na meastóireachta agus barúlacha ón gCoimisiún, a fhoilsiú agus a chur in iúl do Pharlaimint na hEorpa, don Chomhairle, do Choiste Eacnamaíoch agus Sóisialta na hEorpa agus do Choiste na Réigiún mar chuid de na meastóireachtaí in Fís Eorpach dá dtagraítear in Airteagal 52 den Rialachán maidir le Fís Eorpach.

Airteagal 172

Tacaíocht ón mBallstát óstach

Féadfar comhaontú riaracháin a thabhairt i gcrích idir comhghnóthas agus an Ballstát ina bhfuil a shuíochán lonnaithe maidir le pribhléidí agus díolúintí agus tacaíocht eile a chuirfidh an Ballstát sin ar fáil don chomhghnóthas lena mbaineann.

Airteagal 173

Gníomhaíochtaí tosaigh

1. Beidh an Coimisiún freagrach as bunú agus oibriú tosaigh Chomhghnóthas Shláinte Dhomhanda EDCTP3 agus an Chomhghnóthais um Líonraí agus Seirbhísí Cliste go dtí go mbeidh an acmhainneacht oibríochtúil acu a mbuiséad féin a chur i bhfeidhm. Déanfaidh an Coimisiún gach gníomhaíocht is gá i gcomhar leis na comhaltaí eile agus le rannpháirtíocht comhlachtaí inniúla na gcomhghnóthas sin.

2. Chun críoch mhír 1:

- (a) go dtí go rachaidh an Stiúrthóir Feidhmiúcháin i mbun dualgas tar éis don Bhord Rialaithe é nó í a cheapadh i gcomhréir le hAirteagal 18(2), féadfaidh an Coimisiún oifigeach ón gCoimisiún a ainmniú le gníomhú mar Stiúrthóir Feidhmiúcháin eatramhach agus na dualgais a shanntar don Stiúrthóir Feidhmiúcháin a fheidhmiú;
- (b) de mhaolú ar Airteagal 17(2), pointe (h), feidhmeoidh an Stiúrthóir Feidhmiúcháin eatramhach cumhachtaí ábhartha an údaráis ceapacháin i leith aon phost foirne is gá a líonadh sula rachaidh an Stiúrthóir Feidhmiúcháin i mbun dualgas i gcomhréir le hAirteagal 18(2);
- (c) féadfaidh an Coimisiún líon teoranta dá chuid oifigeach a shannadh ar bhonn eatramhach.

3. Féadfaidh an Stiúrthóir Feidhmiúcháin eatramhach na híocaíochtaí uile arna gcumhdach ag na leithreasuithe dá bhforáiltear i mbuiséad bliantúil na gComhghnóthas dá dtagraítear i mír 1 a údarú i ndiaidh don Bhord Rialaithe iad a fhormheas agus féadfaidh sé nó siad comhaontuithe, cinntí agus conarthaí, lena n-áirítear conarthaí fostaíochta foirne, a thabhairt i gcrích, i ndiaidh go nglacfar plean bunaithe foirne na gcomhghnóthas sin.

4. Féadfaidh an Stiúrthóir Feidhmiúcháin eatramhach, le comhaontú an Stiúrthóra Feidhmiúcháin isteach agus faoi réir cheadú an Bhoird Rialaithe, an dáta a mheasfar a mbeidh sé d'acmhainneacht ag an gcomhghnóthas lena mbaineann a bhuiséad féin a chur chun feidhme a chinneadh. Ón dáta sin, staonfaidh an Coimisiún ó ghealltanais agus íocaíochtaí a dhéanamh i leith gníomhaíochtaí an chomhghnóthas sin.

Airteagal 174

Aisghairm agus forálacha idirthréimhseacha

1. Déantar Rialacháin (CE) Uimh. 219/2007, (AE) Uimh. 557/2014, (AE) Uimh. 558/2014, (AE) Uimh. 559/2014 (AE) Uimh. 560/2014, (AE) Uimh. 561/2014, agus (AE) Uimh. 642/2014 a aisghairm.

2. Leanfaidh gníomhaíochtaí arna dtionscnamh nó arna leanúint faoi na Rialacháin dá dtagraítear i mír 1 agus na hoibleagáidí airgeadais a bhaineann le gníomhaíochtaí den sórt sin de bheith faoi rialú na Rialachán sin go dtí go mbeidh siad tugtha chun críche.

3. Is é an Comhghnóthas um Eoraip Bhithbhunaithe Chiorclach a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte an Chomhghnóthais Tionscal Bhithbhunaithe a bhunaítear le Rialachán (AE) Uimh. 560/2014, agus gabhfaidh sé a ionad agus tiocfaidh sé i gcomharbas air.

4. Is é an Comhghnóthas um Eitlíocht Ghlan a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte Chomhghnóthas Spéire Glaine 2 a bhunaítear le Rialachán (AE) Uimh. 558/2014, agus gabhfaidh sé a ionad agus tiocfaidh sé i gcomharbas air.

5. Is é an Comhghnóthas um Hidrigin Ghlan a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte an Chomhghnóthais um Chealla Breosla agus um Hidrigin 2 a bhunaítear le Rialachán (AE) Uimh. 559/2014, agus gabhfaidh sé a ionad agus tiocfaidh sé i gcomharbas air.

6. Is é an Comhghnóthas um Iarnród na hEorpa a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte Chomhghnóthas Shift2Rail a bhunaítear le Rialachán (AE) Uimh. 642/2014 ón, agus gabhfaidh sé a ionad agus tiocfaidh sé i gcomharbas air.

7. Is é Comhghnóthas an Tionscnaimh um Shláinte Nuálach a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte an Chomhghnóthais maidir leis an Tionscnamh um Míochaine Nuálach 2 a bhunaítear le Rialachán (AE) Uimh. 557/2014, agus gabhfaidh sé a ionad agus tiocfaidh sé i gcomharbas air.

8. Is é an Comhghnóthas Eochairtheicneolaíochtaí Digiteacha (KDT) a bheidh mar chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte Chomhghnóthas ECSEL a bhunaítear le Rialachán (AE) Uimh. 561/2014, agus gabhfaidh sé a ionad agus tiocfaidh sé i gcomharbas air.

9. Is é Comhghnóthas Taighde BAT 3 an Aerspáis Eorpaigh Aonair a bheidh ina chomharba dlíthiúil agus uilíoch i leith gach conartha, lena n-áirítear conarthaí fostaíochta agus comhaontuithe deontais, dliteanais agus maoin fhaighte Chomhghnóthas SESAR a bhunaítear le Rialachán (CE) Uimh. 219/2007, agus gabhfaidh sé a ionad agus tiocfaidh sé i gcomharbas air.

10. Ní dhéanann an Rialachán seo difear do chearta agus d'oibleagáidí na foirne atá fostaithe faoi na Rialacháin dá dtagraítear i mír 1.

11. Ar feadh a dtéarma oifige atá fágtha, sannfar na Stiúrthóirí Feidhmiúcháin arna gceapadh faoi na Rialacháin dá dtagraítear i mír 1 den Airteagal seo d'fheidhmeanna an Stiúrthóra Feidhmiúcháin dá bhforáiltear sa Rialachán seo le héifeacht ó dháta theacht i bhfeidhm an Rialacháin seo. Ní thiocfaidh aon athrú ar choinníollacha eile an chonartha.

12. Ina chéad chruinniú, glacfaidh Bord Rialaithe gach comhghnóthais liosta cinntí a ghlac Bord Rialaithe na gcomhghnóthas roimhe seo dá dtagraítear i míreanna 3 go 9 a mbeidh feidhm leo fós maidir leis an gcomhghnóthas lena mbaineann a bhunaítear faoin Rialachán seo.

13. Cuimseofar sna meastóireachtaí eatramhacha dá dtagraítear in Airteagal 171(2) meastóireacht deiridh ar na comhghnóthais roimhe seo dá dtagraítear i míreanna 3 go 9 den Airteagal seo.

14. Déanfar aon leithreasuithe nár úsáideadh faoi na Rialachán dá dtagraítear i mír 1 a aistriú chuig an gcomhghnóthas comhfhreagrach arna bhunú faoin Rialachán seo. Úsáidfear aon leithreasuithe faoi chomhair oibríochtaí nár úsáideadh arna n-aistriú amhlaidh ar dtús chun tacaíocht airgeadais a sholáthar do ghníomhaíochtaí indíreacha arna dtionscnamh faoi Fís 2020. Féadfar aon leithreasuithe faoi chomhair oibríochtaí atá fágtha a úsáid le haghaidh gníomhaíochtaí indíreacha arna dtionscnamh faoin Rialachán seo. I gcás ina n-úsáidfí leithreasuithe faoi chomhair oibríochtaí den sórt sin le haghaidh gníomhaíochtaí indíreacha arna dtionscnamh faoin Rialachán seo, bainfear iad den ranníocaíocht airgeadais atá le soláthar ag an Aontas don chomhghnóthas faoi seach faoin Rialachán seo.

*Airteagal 175***Teacht i bhfeidhm**

Tiocfaidh an Rialachán seo i bhfeidhm dáta a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 19 Samhain 2021.

Thar ceann na Comhairle

An tUachtarán

J. BORRELL FONTELLES

IARSCRÍBHINN I

Comhaltaí bunaidh an Chomhghnóthais um Eitlíocht Ghlan

- (1) Aciturri Aeronáutica S.L.U., atá cláraithe faoi dhlí na Spáinne (cláruimhir: BU12351), agus a bhfuil a oifig chláráithe in P.I. Bayas, calle Ayuelas, 22, 09200, Miranda de Ebro (Burgos), an Spáinn;
- (2) Aernnova Aerospace SAU, atá cláraithe faoi dhlí na Spáinne (cláruimhir: VI6749), agus a bhfuil a oifig chláráithe in Parque Tecnológico de Álava, C/Leonardo da Vinci num. 13, Miñano (Álava), an Spáinn;
- (3) Airbus SAS, atá cláraithe faoi dhlí na Fraince (cláruimhir: 383474814), agus a bhfuil a oifig chláráithe in 2 Rond-Point Emile Dewoitine, 31707 Blagnac, an Fhrainc;
- (4) Centro Italiano Ricerche Aerospaziali SCPA (CIRA), atá cláraithe faoi dhlí na hIodáile (cláruimhir: 128446), agus a bhfuil a oifig chláráithe in Via Maiorise 1, Capua-Caserta 81043, an Iodáil;
- (5) Dassault Aviation SA, atá cláraithe faoi dhlí na Fraince (cláruimhir: 712042456), agus a bhfuil a oifig chláráithe in 9, Rond-Point des Champs-Élysées Marcel-Dassault, 78008 Páras, an Fhrainc;
- (6) Deutsches Zentrum für Luft- und Raumfahrt e.V. (DLR), atá cláraithe faoi dhlí na Gearmáine (cláruimhir: VR2780), agus a bhfuil a oifig chláráithe in Linder Höhe, 51147 Köln, an Ghearmáin;
- (7) Fraunhofer-Gesellschaft zur Förderung der Angewandten Forschung e.V., atá cláraithe faoi dhlí na Gearmáine (cláruimhir: VR4461), agus a bhfuil a oifig chláráithe in 27C, Hansastrasse, 80686 München, an Ghearmáin;
- (8) Fokker Technologies Holding BV, atá cláraithe faoi dhlí na hÍsiltíre (cláruimhir: 50010964), agus a bhfuil a oifig chláráithe in Industrieweg 4, 3351 LB Papendrecht, an Ísiltír;
- (9) GE Avio S.r.l., atá cláraithe faoi dhlí na hIodáile (cláruimhir: 1170622CF10898340012), agus a bhfuil a oifig chláráithe in Rivalta di Torino (TO), Via I Maggio uimh. 99, an Iodáil;
- (10) GKN Aerospace, Sweden AB, atá cláraithe faoi dhlí na Spáinne (cláruimhir: 5560290347), agus a bhfuil a oifig chláráithe in Flygmotorvägen 1, SE-461 81 Trollhättan, an tSualainn;
- (11) Honeywell International s.r.o., atá cláraithe faoi dhlí na Seice (cláruimhir: 27617793), agus a bhfuil a oifig chláráithe in V Parku 2325/18, 148 00 Praha 4 – Chodov, Prág, Poblacht na Seice;
- (12) Industria de Turbo Propulsores S.A.U., atá cláraithe faoi dhlí na Spáinne (cláruimhir: BI5062), agus a bhfuil a oifig chláráithe in Parque Tecnológico, Edificio 300, 48170 Zamudio, an Spáinn;
- (13) Leonardo SpA, atá cláraithe faoi dhlí na hIodáile (cláruimhir: 7031), agus a bhfuil a oifig chláráithe in Piazza Monte Grappa 4, 00195 an Róimh, an Iodáil;
- (14) Liebherr-Aerospace & Transportation SAS, atá cláraithe faoi dhlí na Fraince (cláruimhir: 552016834), agus a bhfuil a oifig chláráithe in 408 avenue des Etats-Unis, 31016 Toulouse Cedex 2, an Fhrainc;
- (15) Lufthansa Technik AG, atá cláraithe faoi dhlí na Gearmáine (cláruimhir: HRB 56865), agus a bhfuil a oifig chláráithe in Weg beim Jäger 193, 22335 Hamburg, an Ghearmáin;
- (16) Łukasiewicz Research Network – Institute of Aviation, atá cláraithe faoi dhlí na Polainne (cláruimhir: 387193275), agus a bhfuil a oifig chláráithe in Al. Krakowska 110/114, 02-256 Vársá, an Pholainn;
- (17) MTU Aero Engines AG, atá cláraithe faoi dhlí na Gearmáine (cláruimhir: HRB 157206), agus a bhfuil a oifig chláráithe in Dachauer Str. 665, 80995 München, an Ghearmáin;
- (18) National Institute for Aerospace Research (INCAS), atá cláraithe faoi dhlí na Rómáine (cláruimhir: J40649215071991), agus a bhfuil a hoifig chláráithe in B-dul Iuliu Maniu no. 220, sect 6, 061126 Búcairist, an Rómáin;
- (19) Office National d'Etudes et de Recherches Aérospatiales (ONERA), atá cláraithe faoi dhlí na Fraince (cláruimhir: 775722879), agus a bhfuil a oifig chláráithe in BP 80100 - 91123 Palaiseau, an Fhrainc;

- (20) Piaggio Aero Industries, atá cláraithe faoi dhlí na hIodáile (cláruimhir: 903062), agus a bhfuil a oifig chláráithe in Viale Generale Disegna, 1, 17038 Villanova d'Albenga, Savona, an Iodáil;
 - (21) Pipistrel Vertical Solutions d.o.o., atá cláraithe faoi dhlí na Slóivéine (cláruimhir: 7254466000), agus a bhfuil a oifig chláráithe in Vipavska cesta 2, SI-5270 Ajdovščina, an tSlóivéin;
 - (22) Rolls-Royce Deutschland Ltd & Co KG, atá cláraithe faoi dhlí na Gearmáine (cláruimhir: HRA 2731P), agus a bhfuil a oifig chláráithe in Eschenweg 11, Dahlewitz, 15827 Blankenfelde-Mahlow, an Ghearmáin;
 - (23) Safran, atá cláraithe faoi dhlí na Fraince (cláruimhir: 562082909), agus a bhfuil a oifig chláráithe in 2, Bvd. du General Martial-Valin, 75015 Páras, an Fhrainc;
 - (24) Stichting Nationaal Lucht- en Ruimtevaartlaboratorium, atá cláraithe faoi dhlí na hÍsiltíre (cláruimhir: 41150373), agus a bhfuil a oifig chláráithe in Anthony Fokkerweg 2, 1059 CM Amstardam, an Ísiltír;
 - (25) Thales AVS France SAS, atá cláraithe faoi dhlí na Fraince (cláruimhir: 612039495), agus a bhfuil a oifig chláráithe in 75-77 Avenue Marcel Dassault, 33700 Mérignac, an Fhrainc;
 - (26) United Technologies Research Centre Ireland, Ltd, atá cláraithe faoi dhlí na hÉireann (cláruimhir: 472601), agus a bhfuil a oifig chláráithe ar an gCeathrú hUrlár, Ionad Gnó Penrose, Cé Penrose, Corcaigh T23 XN53, Éire;
 - (27) Ollscoil Patras, atá cláraithe faoi dhlí na Gréige (cláruimhir: EL998219694 (CBL)), agus a bhfuil a hoifig chláráithe ar an gCampas Ollscoile, 26504 Rio Achaia, an Ghréig.
-

IARSCRÍBHINN II

Comhaltaí bunaidh an Chomhghnóthais um Iarnród na hEorpa

- (1) Administrador de Infraestructuras Ferroviarias (ADIF), Entidad Pública Empresarial, cuideachta chorparáideach phoiblí atá cláraithe faoi dhlí na Spáinne (cláruimhir: Q2801660H), agus a bhfuil a oifig chláráithe in Calle Sor Ángela de la Cruz, 3, 28020 Maidrid, an Spáinn;
- (2) Alstom Transport SA, atá cláraithe faoi dhlí na Fraince (cláruimhir 389191982), agus a bhfuil oifig chláráithe in 48, rue Albert Dhalenne, 93482 Saint-Ouen, an Fhrainc;
- (3) Cuibhreannas ANGELRAIL faoi stiúir MER MEC S.p.A., atá cláraithe faoi dhlí na hIodáile (cláruimhir: 05033050963), agus a bhfuil a oifig chláráithe in Monopoli (BA) 70043 Via Oberdan, 70 an Iodáil;
- (4) AŽD Praha s.r.o., atá cláraithe faoi dhlí na Seice (cláruimhir: 48029483), agus a bhfuil a oifig chláráithe in Žirovnická 3146/2, Záběhlice, 106 00, Prág 10, Poblacht na Seice;
- (5) Construcciones y Auxiliar de Ferrocarriles, S.A. (CAF), atá cláraithe faoi dhlí na Spáinne (cláruimhir: Imleabhar 983, Fóilió 144, Bileog uimhir SS-329, iontráil 239), agus a bhfuil a oifig chláráithe in calle José Miguel Iturriz n° 26, 20200, Beasain (Gipuzkoa), an Spáinn;
- (6) Asociación Centro Tecnológico CEIT, atá cláraithe faoi dhlí na Spáinne (cláruimhir: 28/1986 Clárlann Chomhlachais rialtas phobal féinrialaitheach Thír na mBascach), agus a bhfuil oifig chláráithe in Paseo Manuel Lardizabal, n° 15. Donostia-San Sebastián, an Spáinn;
- (7) České dráhy, a.s., atá cláraithe faoi dhlí na Seice (cláruimhir: 70994226, arna iontráil sa Chlár Tráchtála arna choimeád ag an gCúirt Dúiche i bPrág, roinn B, iontráil 8039), agus a bhfuil a oifig chláráithe in Prague 1, Nábřeží L. Svobody 1222, postchód 110 15, Poblacht na Seice;
- (8) Deutsche Bahn AG, an Ghearmáin;
- (9) Deutsches Zentrum für Luft- und Raumfahrt e.V. (DLR), atá cláraithe faoi dhlí na Gearmáine (cláruimhir: VR 2780 ag Amtsgericht Bonn), agus a bhfuil a oifig chláráithe in Linder Höhe, 51147 Köln, an Ghearmáin;
- (10) European Smart Green Rail Joint Venture (eSGR JV), (eSGR JV), arna ionadú ag Centro de Estudios de Materiales y Control de Obra S.A. (CEMOSA), atá cláraithe faoi dhlí na Spáinne (cláruimhir: A-29021334), agus a bhfuil a oifig chláráithe in Benaque 9, 29004 Málaga, an Spáinn;
- (11) Faiveley Transport SAS, atá cláraithe faoi dhlí na Fraince (cláruimhir 323288563 RCS Nanterre), agus a bhfuil a oifig chláráithe in 3, rue du 19 mars 1962, 92230 Gennevilliers, an Fhrainc;
- (12) Ferrovie dello Stato Italiane S.p.A. (FSI), atá cláraithe faoi dhlí na hIodáile (cláruimhir: R.E.A. 962805), agus a bhfuil a oifig chláráithe in piazza della Croce Rossa 1 - 00161 an Róimh, an Iodáil;
- (13) Hitachi Rail STS S.p.A., atá cláraithe faoi dhlí na hIodáile (cláruimhir: R.E.A. GE421689), agus a bhfuil a oifig chláráithe in Genova, an Iodáil;
- (14) INDRA SISTEMAS S.A & PATENTES TALGO S.L.U.

INDRA SISTEMAS S.A., atá cláraithe faoi dhlí na Spáinne (cláruimhir: A-28599033), agus a bhfuil a oifig chláráithe in Avenida de Bruselas n° 35, 28108 Alcobendas, Maidrid, an Spáinn;

PATENTES TALGO S.L.U., atá cláraithe faoi dhlí na Spáinne (cláruimhir: B-84528553), agus a bhfuil a oifig chláráithe in Paseo del tren Talgo, n° 2, 28290 Las Rozas de Madrid, Maidrid, an Spáinn;
- (15) Jernbanedirektoratet (Stiúrthóireacht Iarnróid na hIorua), Osló, an Iorua;
- (16) Knorr-Bremse Systems für Schienenfahrzeuge GmbH, atá cláraithe faoi dhlí na Gearmáine (cláruimhir: HRB91181), agus a bhfuil a oifig chláráithe in Moosacher Str. 80, 80809 München, an Ghearmáin;
- (17) Österreichische Bundesbahnen-Holding Aktiengesellschaft (ÖBB-Holding AG) atá cláraithe faoi dhlí na hOstaire (cláruimhir: FN 247642f), agus a bhfuil a oifig chláráithe in Am Hauptbahnhof 2, 1100 Vín, an Ostair;

- (18) Polskie Koleje Państwowe Spółka Akcyjna (PKP), atá cláraithe faoi dhlí na Polainne (cláruimhir: 0000019193), agus a bhfuil a oifig chláráithe in Al. Jerozolimskie 142A, 02-305 Vársá, an Pholainn;
- (19) Rail B.V. & NS Groep N.V.
ProRail B.V., atá cláraithe faoi dhlí na hÍsiltíre (cláruimhir: 30124359), agus a bhfuil a oifig chláráithe in Utrecht (PIC-nr.: 998208668), an Ísiltír;
NS Groep N.V., atá cláraithe faoi dhlí na hÍsiltíre (cláruimhir: 30124358), agus a bhfuil a oifig chláráithe in Utrecht (PIC-nr.: 892354217), an Ísiltír;
- (20) Siemens Mobility GmbH, atá cláraithe faoi dhlí na Gearmáine (cláruimhir HRB 237219), agus a bhfuil a oifig chláráithe in Otto-Hahn-Ring 6, München, an Ghearmáin;
- (21) Société nationale SNCF, société anonyme, atá cláraithe faoi dhlí na Fraince (cláruimhir: 552049447), agus a bhfuil a oifig chláráithe in 2 Place aux Étoiles, 93200 Saint-Denis, an Fhrainc;
- (22) Strukton Rail Nederland B.V., atá cláraithe faoi dhlí na hÍsiltíre (cláruimhir: 30139439 Cumann Tráchtála Utrecht), an Ísiltír;
- (23) THALES SIX GTS France SAS, atá cláraithe faoi dhlí na Fraince (cláruimhir: 383470937), a bhfuil a oifig chláráithe in 4 Avenue des Louvresses - 92230 Gennevilliers, an Fhrainc;
- (24) Trafikverket, Comhlacht Earnála Poiblí, atá cláraithe faoi dhlí na Sualainne (cláruimhir: 202100-6297), agus a bhfuil a oifig chláráithe in 781 89 Borlänge, an tSualainn;
- (25) voestalpine Railway Systems GmbH, atá cláraithe faoi dhlí na hOstaire (cláruimhir: FN 126714W), agus a bhfuil a oifig chláráithe in Kerpelystrasse 199, 8700 Leoben, an Ostair.
-

IARSCRÍBHINN III

Comhaltaí bunaidh Chomhghnóthas Taighde BAT 3 an Aerspáis Eorpaigh Aonair

- (1) Aeroporti di Roma SpA, cuideachta chorpraithe faoi dhlí na hIodáile, faoi réir bhainistiú agus chomhordú Atlantia SpA, a bhfuil a hoifig chláráithe ag Via Pier Paolo Racchetti 1, Fiumicino (An Róimh), an Iodáil, Cód Cánach agus uimhir Chlárlann Gnó agus Trádála na Róimhe 13032990155;
- (2) AENA Sociedad Mercantil Estatal, Sociedad Anónima (AENA S.M.E.S.A), atá cláráithe faoi dhlí na Spáinne (clárú oifigiúil C.I.F Deimhniú aitheantais cánach: A-86212420) agus a bhfuil a sheoladh dlíthiúil ag Calle Peonías 12, 28042, Maidrid, an Spáinn. Fón +34913211000;
- (3) AEROPORTS DE PARIS, Société Anonyme, atá cláráithe faoi dhlí na Fraince (clárú oifigiúil RCS Bobigny B 552016628), agus a bhfuil a oifig chláráithe in 1 rue de France, 93290 Tremblay Tremblay-en-France, an Fhrainc;
- (4) Société Air France SA, atá cláráithe faoi dhlí na Fraince, 420495178 RCS Bobigny, 45 rue de Paris, 95747 Roissy-CDG, an Fhrainc, FR 61420495178;
- (5) Seirbhísí Aerloingseoireachta Phoblacht na Seice (ANS CR), fiontar stáit, arna bhunú agus arna eagrú faoi dhlíthe Phoblacht na Seice, agus a bhfuil a oifig chláráithe in Navigační 787, 252 61 Jeneč, Poblacht na Seice, Uimhir Aitheantais na Cuideachta: 497 10 371, Uimhir Aitheantais CBL: CZ699004742, atá cláráithe sa Chlár Tráchtála arna riaradh ag an gCúirt Dúiche i bPrág, faoi Roinn A, Iontráil 10771;
- (6) Airbus SAS, atá cláráithe faoi dhlí na Fraince (clárúimhir: 383474814 R.C.S. Toulouse), agus a bhfuil a oifig chláráithe in 2 Rond Point Émile Dewoitine, 31700 Blagnac, an Fhrainc;
- (7) Airtel ATN Limited, atá cláráithe faoi dhlí na hÉireann (clárúimhir: 287698), agus a bhfuil a oifig chláráithe in 2 Cearnóg an Chuain, Bóthar Crofton, Dún Laoghaire, Contae Bhaile Átha Cliath, A96 D6RO, Éire;
- (8) Alliance for New Mobility Europe (AME), eagraíocht neamhbhrabúsach ("Association sans but lucratif/Vereniging zonder winst oogmerk"), atá cláráithe faoi dhlí na Beilge faoin gclárúimhir 0774.408.606, agus a bhfuil a oifig chláráithe in 227, rue de la Loi, 1000 an Bhruiséil, an Bheilg;
- (9) Aerfort Idirnáisiúnta na hAithne S.A., atá cláráithe faoi dhlí na Gréige (clárú oifigiúil: An Chlárlann Ghinearálta Leictreonach Tráchtála faoin uimhir 2229601000 G.E.MI, lena háitreabh cláráithe ag Spata Attica, an Ghréig, postchód 19019);
- (10) Austro Control Österreichische Gesellschaft für Zivilluftfahrt mit beschränkter Haftung, (ACG), cuideachta faoi dhlitheanas teoranta, atá cláráithe faoi dhlíthe na hOstaire (clárúimhir 71000m), lena oifig chláráithe ag Wagramer Strasse 19, A-1220 Vín, an Ostair;
- (11) Cuideachta NV/SA Aerfort na Bruiséile, cuideachta faoi dhlitheanas teoranta atá corpraithe agus arb ann di faoi dhlíthe na Beilge, atá cláráithe le Crossroads Bank of Enterprises faoin uimhir 0890.082.292 agus lena hoifigí cláráithe in Auguste Reyerslaan 80, 1030 an Bhruiséil, an Bheilg;
- (12) Boeing Aerospace Spain, SL, atá cláráithe faoi dhlí na Spáinne, uimhir CBL: B-83053835, agus a bhfuil a oifig chláráithe in Avenida Sur del Aeropuerto de Barajas 38, Maidrid, 28042, an Spáinn;
- (13) Fiontar stáit "Air traffic services authority" (BULATSA) (BULATSA), fiontar stáit atá cláráithe faoi dhlí na Bulgáire (clárúimhir 000697179), agus a bhfuil a oifig chláráithe sa Bhulgáir, 1 Brussels blvd, 1540 Sóifia;
- (14) Centro Italiano Ricerche Aerospaziali C.I.R.A. SCpA, atá cláráithe faoi dhlí na hIodáile (clárúimhir: CE-128446), lena oifig chláráithe in Via Maiorise snc – 81043 Capua (CE) – an Iodáil;
- (15) Croatia Control Ltd, (CCL), cláráithe faoi dhlíthe na Cróite (clárúimhir 080328617), lena oifig chláráithe ag Rudolfá Fizira 2, Velika Gorica, an Chróit;
- (16) Deutsche Lufthansa AG; cláráithe faoi dhlí na Gearmáine, Cúirt Dúiche Kölne HRB 2168, Venloer Str. 151-153, D-50672 Köln, an Ghearmáin, DE 122652565;
- (17) Deutsches Zentrum für Luft- und Raumfahrt e.V. (DLR), atá cláráithe faoi dhlí na Gearmáine (clárúimhir: VR 2780 ag Amtsgericht Bonn), lena oifig chláráithe in Linder Höhe, 51147 Köln, an Ghearmáin;

- (18) DFS Deutsche Flugsicherung GmbH, atá cláraithe faoin Dlí Príobháideach (Cláruimhir: HRB 34977), lena oifig chláráithe in Langen (Hessen), an Ghearmáin;
- (19) Stát na Fraince – Ministère de la Transition écologique (Direction générale de l'aviation civile (DGAC), Direction des services de la navigation aérienne DSNA, atá cláraithe faoi dhlí na Fraince (cláruimhir: SIREN 120 064 019 00074), a bhfuil a oifig chláráithe in 50 Rue Henry Farman 75720 Páras Cedex 15, an Fhrainc;
- (20) Drone Alliance Europe, eagraíocht neamhbhrabúsach ("Association sans but lucratif/Vereniging zonder winstoogmerk"), atá cláraithe faoi dhlí na Beilge lena chláruimhir 0693.860.794, agus a bhfuil a hoifig chláráithe in Rue Breydel 34 – 36, 1040 an Bhruiséil, an Bheilg;
- (21) Droniq GmbH, atá cláraithe faoi dhlí na Gearmáine, Ginnheimer Stadtweg 88, 60431 Frankfurt, an Ghearmáin, Amtsgericht Frankfurt am Main, HRB 115576, DE324815501;
- (22) easyJet Europe Airline GmbH, atá cláraithe faoi Dhlíthe na hOstaire (cláruimhir FN 452433 v), agus a oifig chláráithe in Wagramer Strasse 19, IZD Tower, 11. Stock, 1220 Vín, an Ostair;
- (23) Ecole Nationale de l'Aviation Civile (ENAC), atá cláraithe faoi dhlí na Fraince (cláruimhir: n°193 112 562 00015), agus a bhfuil a oifig chláráithe in 7 Avenue Edouard Belin, CS 54005 – 31055 TOULOUSE cedex 4, an Fhrainc;
- (24) ENTIDAD PUBLICA EMPRESARIAL ENAIRE, eintiteas gnó poiblí a cláraíodh faoi dhlí 4/1990 an 29 Meitheamh agus faoi Dhlí 18/2014 an 15 Deireadh Fómhair, uimhir CBL: Q2822001J, agus a bhfuil a oifig chláráithe in Parque Empresarial las Mercedes. Edificio n°2 Avda. de Aragón, 330. 28022 Maidrid, an Spáinn;
- (25) ENAV S.p.A., Cuideachta Comhstoic atá cláraithe faoi dhlí na hIodáile, cláruimhir: R.E.A. 965162, agus a bhfuil a hoifig chláráithe in Via Salaria, 716 – 00138, an Róimh, an Iodáil;
- (26) Flughafen München GmbH, atá cláraithe faoi dhlí na Gearmáine (cláruimhir: HRB 5448, cúirt áitiúil München), agus a bhfuil a oifig chláráithe in Nordallee 25, 85356 Aerfort München, an Ghearmáin;
- (27) Frequentis AG, atá cláraithe faoi dhlí na hOstaire (cláruimhir: FN 72115 b), agus a bhfuil a oifig chláráithe in Innovationsstraße 1, 1100 Vín, an Ostair;
- (28) Honeywell International s.r.o. atá cláraithe faoi dhlí na Seice, Uimhir Aitheantais: 276 17 793, agus a bhfuil a oifig chláráithe in V Parku 2325/16, 148 00 Prág 4, Poblacht na Seice;
- (29) HungaroControl Seirbhísí Aerloingseoireachta na hUngáire, Cuideachta Phríobháideach Theoranta, atá cláraithe faoi dhlí na hUngáire (cláruimhir: 01-10-045570), agus a bhfuil a hoifig chláráithe in Igló utca 3335, 1185 Búdapeist, an Ungáir;
- (30) Indra Sistemas, S.A., atá cláraithe faoi dhlí na Spáinne, lena ngabhann Cód Aitheantais Cánach A-28599033, atá cláraithe i gClárlann Mharsantach Mhaidrid in Imleabhar 5465 ginearálta, 4554 de roinn 3 den Mhórleabhar Corparáideach, Fóilió 80, Bileog uimhir 43677, an 1ú hiontráil, agus a bhfuil a oifig chláráithe in Avenida de Bruselas, NUM 35, 28108 Alcobendas – Maidrid;
- (31) Údarás Eitlíochta na hÉireann (IAA), atá cláraithe faoi Dhlíthe na hÉireann (cláruimhir 211082), lena oifig chláráithe ag Foirgneamh The Times, 11-12 Sráid D'Olier, Baile Átha Cliath 2, Éire;
- (32) Københavns Lufthavne A/S, atá cláraithe faoi dhlí na Danmhairge (Clárú oifigiúil CVR 14707204), lena hoifig chláráithe in Lufthavnsboulevarden 6, 2770 Kastrup;
- (33) L'OFFICE NATIONAL D'ÉTUDES ET DE RECHERCHES AÉROSPATIALES (ONERA), gníomhaireacht de chuid na Fraince (Établissement public à caractère industriel et commercial), atá cláraithe faoi dhlí na Fraince le clárlann tráchtála agus cuideachtaí Évry (uimhir 775722879), agus a bhfuil a ceannoifig in: BP 80100 – FR-91123 Palaiseau Cedex – an Fhrainc;
- (34) Leonardo Società per azioni; Ainm gearr: Leonardo S.p.A. – atá cláraithe faoi Dhlí na hIodáile (Cód Fioscach agus Cláruimhir: 00401990585), agus a bhfuil a oifig chláráithe in Piazza Monte Grappa n. 4, 00195 an Róimh, an Iodáil;
- (35) Letiště Praha, a. s. ("Aerfort Phrág"), Comhchuideachta atá cláraithe faoi dhlí Phoblacht na Seice, cláruimhir: 28244532, agus a bhfuil a oifig chláráithe in K Letišti 6/1019, Prág 6, Poblacht na Seice;

- (36) Luftfartsverket ("LFV"), cláraithe faoi Dhlíthe na Sualainne (cláruimhir: 202195-0795) lena oifig chláráithe ag Hospitalsgatan 30, S-601 79 Norrköping, an tSualainn;
- (37) Luchtverkeersleiding Nederland (LVNL), comhlacht poiblí arna bhunú le hAcht Eitlíochta na hÍsiltíre, atá cláraithe faoi dhlí na hÍsiltíre (cláruimhir: 34367959), agus a bhfuil a oifig chláráithe in Stationsplein ZuidWest 1001, 1117 CV Schiphol, an Ísiltír;
- (38) NAVEGAÇÃO AÉREA DE PORTUGAL – NAV Portugal E.P.E, cláraithe faoi Dhlíthe na Portaingéile (cláruimhir 504448064), lena oifig chláráithe ag Rua D, Edifício 121, Aeroporto de Lisboa, 1700-008 Lisboa, an Phortaingéil;
- (39) NAVIAIR, cláraithe faoi Dhlíthe na Danmhairge, lena n-áirítear dlí Naviar an 26 Bealtaine 2010, (cláruimhir 26059763) lena oifig chláráithe ag Naviar Allé 1 2770 Kastrup, an Danmhairg;
- (40) Stichting Nationaal Lucht- en Ruimtevaartlaboratorium (NLR), fondúireacht faoi dhlí na hÍsiltíre lena ngabhann cláruimhir de chuid an Chomhlachais Tráchtála: 41150373, agus a bhfuil a hoifig chláráithe in Amstardam, an Ísiltír, agus a seoladh in Anthony Fokkerweg 2, 1059 CM Amstardam, an Ísiltír;
- (41) Pipistrel Vertical Solutions d.o.o., atá cláraithe faoi dhlí na Slóivéine (cláruimhir: 7254466000), agus a bhfuil a oifig chláráithe in Ajdovščina, an tSlóivéin.;
- (42) Polish Air Navigation Services Agency PANSA, eintiteas dlítheanach stáit, a eagraíodh agus a oibríonn faoi Acht an 8 Nollaig 2006 maidir le Gníomhaireacht Seirbhísí Aerloingseoireachta na Polainne, Uimhir Clárlainne Náisiúnta Gnó: 140886771, uimhir aitheantais cánach: 5222838321, lonnaithe in sráid Wieżowa 8, 02-147 Vársá, an Pholainn;
- (43) Régie autonome "Riarachán Seirbhísí Aerthráchta Rómána" – ROMATSA, eintiteas dlíthiúil stáit atá cláraithe faoi Oifig Chlár Trádála na Rómáine Uimh. J40/1012/1991, Cód Cánach Uimh. RO1589932, atá lonnaithe in 10, Ion Ionescu de la Brad Blvd., 013813, Búcairist, an Rómáin;
- (44) Ryanair Holdings plc, atá cláraithe faoi dhlí na hÉireann, Ryanair Dublin Office, Páirc Ghnó Aerside, Sord, Contae Bhaile Átha Cliath, Éire, Cuideachta Uimh. 249885;
- (45) Saab AB (publ), atá cláraithe faoi dhlí na Sualainne (cláruimhir 556036-0793), lena oifig chláráithe 581 88 Linköping, an tSualainn;
- (46) SAFRAN, atá cláraithe faoi dhlí na Fraince (Cláruimhir: 562082909 R.C.S. Páras), agus a bhfuil a oifig chláráithe i bPáras, an Fhrainc;
- (47) SINTEF AS, Eagraíocht neamhbhrabúsach Taighde agus Teicneolaíochta, atá cláraithe faoi dhlí na hIorua (cláruimhir: 919303808), agus a bhfuil a hoifig chláráithe in Strindvegen 4 7034 TRONDHEIM, an Iorua;
- (48) Schiphol NEDERLAND BV, atá cláraithe faoi dhlí na hÍsiltíre (Uimhir de chuid na gComhlachas Tráchtála: 34166584), agus a bhfuil a oifig chláráithe in SHG, Evert van de Beekstraat 202, 1118 CP Schiphol, an Ísiltír;
- (49) Societa per Azioni Esercizi Aeroportuali (S.E.A), cláruimhir oifigiúil: 00826040156, a bhfuil a oifig chláráithe ag Aeroporto Milano Linate, Segrate, 20090, an Iodáil, uimhir CBL: 00826040156;
- (50) SWEDAVIA AB, cuideachta phoiblí theoranta, a cláraíodh faoi dhlí na Sualainne an 14 Nollaig 2009 leis an gcláruimhir oifigiúil 556797-0818, a bhfuil a hoifig chláráithe in Sigtuna leis an seoladh 190 45 Stócólm-Arlanda;
- (51) THALES AVS SAS FRANCE, Société simplifiée par actions, atá cláraithe faoi dhlí THALES AVS na Fraince, cláruimhir RCS Bordeaux 612039495, agus a bhfuil a oifig chláráithe in 73-75 Avenue Marcel Dassault 33700 Mérignac, an Fhrainc;
- (52) THALES LAS FRANCE SAS, atá cláraithe faoi dhlí na Fraince (cláruimhir: 319159877), agus a bhfuil a oifig chláráithe in 2, Avenue Gay Lussac, 78990 Elancourt, an Fhrainc;
- (53) United Technologies Research Centre Ireland, Ltd, atá cláraithe faoi dhlíthe na hÉireann (cláruimhir: 472601), agus a bhfuil a oifig chláráithe in Ionad Gnó Penrose, Cé Penrose, Corcaigh, Éire;

-
- (54) Volocopter GmbH atá cláraithe faoi dhlí na Gearmáine (cláruimhir HRB 702987), agus a bhfuil a oifig chláráithe in Zeiloch 20, 76646 Bruchsal, an Ghearmáin;
- (55) VTT Technical Research Centre of Finland Ltd, atá cláraithe faoi dhlí na Fionlainne (cláruimhir: 2647375-4), agus a bhfuil a oifig chláráithe in Espoo, an Fhionlainn agus a sheoladh cláráithe ag P.O. Box 1000, FI-02044 VTT, an Fhionlainn.
-